

ЎЗБЕКИСТОН РЕСПУБЛИКАСИ ФАНЛАР АКАДЕМИЯСИ

АЛИШЕР НАВОЙИ НОМИДАГИ ТИЛ ВА
АДАБИЁТ ИНСТИТУТИ

АЗИМ ҲОЖИЕВ

**ЎЗБЕК ТИЛИ МОРФОЛОГИЯСИ,
МОРФЕМИКАСИ ВА СЎЗ
ЯСАЛИШИННИНГ НАЗАРИЙ
МАСАЛАЛАРИ**



Ўзбекистон Республикаси Фанлар академияси
«Фан» нашриёти
Тошкент – 2010

УДК 811.512.133

ББК 81.2Ўзб

Х59

Ушбу монографияда ўзбек тили морфологияси, морфемикаси ва сўз ясалишининг долзарб назарий масалалари ёритилган. Ўзбек тилининг бевосита ўз табиатидан келиб чиккан ҳолда, тил ва нуткни изчил фарқлаш асосида морфема, лексема, сўз, сўз шакли ва сўз ясалиши каби ходисаларнинг мохияти ҳамда ўзига ҳос жиҳатлари очиб берилган. Бу ходисаларнинг тилшуносликдаги турлича талкинлари танкидий тахлил килиниб, ўзбек тили морфемикаси, морфологияси, сўз ясалиши ва семантикаси учун кимматли янгича назарий карашлар илгари сурйлган.

Китоб ўзбек тилшунослиги масалалари билан шуғулланиб келаётган олимлар, аспирантлар, докторантлар, тадқиқотчилар, олий ўқув юртларида филология йўналиши бўйича таълим олаётган талабалар, шунингдек, ўрта мактабларда она тили ва адабиёт фанидан дарс беравтган ўқитувчилар учун мўлжалланган.

УДК 811.512.133

ББК 81.2Ўзб

Масъул муҳаррир:

Н.М. Махмудов

филология фанлари доктори,
профессор

Тақризчилар:

Ё. Тожиев

филология фанлари доктори,
профессор

А.П. Мадвалиев

филология фанлари номзоди,
доцент

ISBN 978-9943-19-057-3

© Ўзбекистон Республикаси ФА
«Фан» нашриёти, 2010 йил.

СЎЗБОШИ

Адабий тилнинг шаклланиш, ривожланиш ва такомиллашиш йўлларини, бу жараёнда амал қиласиган қонуниятлар, сабаб ва имкониятларни белгилаш, ёритиш тилшуносликнинг, жумладан, ўзбек тилшунослигининг асосий вазифаларидан, марказий масалаларидан бири бўлиб келган ва ҳозир ҳам шундай. Бу масалаларни тўла ва тўғри ёритмай туриб, айниқса, ўзбек тили системаларини тадқик этишда жиддий эътиборни талаб этадиган назарий муаммоларни ҳал этмай туриб, адабий тил меъёрларини, иш кўриш имкониятларини, умуман, ўзбек тилининг амалиёти билан боғлиқ ишларни тўғри йўлга қўйиш, талаб даражасида ҳал этиш мумкин бўлмайди.

Ўтган йиллар давомида ўзбек адабий тили ҳар томонлама ривожланди, унинг барча соҳаларида, давр талабига мос равишда, жиддий ўзгаришлар юз берди. Бу жараёнда юз берган ўзгаришларни ёритиш талаби билан ўзбек тилшунослиги фани ҳам доимо ривожланишда бўлди. Ўзбек тилшунослигининг барча соҳалари бўйича яратилган илмий, назарий ишлар, айниқса, ўзбек тилининг шу давр мобайнидаги ривожланиши ҳамда бу ривожланишда амал қиласиган қонуниятларни ёритишга багишланган ишларнинг ўзиёқ фикримизга далил бўла олади. Бу ишлар ўзбек тилининг амалиёти билан боғлиқ вазифаларни, масалаларни кун тартибига қўйиш ва уларни ҳал этишда мухим аҳамият касб этди, ижобий самараларини берди. Айниқса, республикамиз мустақилликка эришгандан сўнг миллий тилимизни ривожлантириш билан боғлиқ вазифаларга алоҳида эътибор қаратилди ҳамда бунинг чора-тадбирлари белгиланди. Ўзбек тилига давлат тили мақоми берилиши билан «Давлат тили ҳақида»ги қонун моддаларида ўзбек тилини ҳар тарафлама ривожлантиришнинг асослари, чора-тадбирлари белгилаб берилди. Жумладан, Қонуннинг биринчи моддасида шундай дейилган: «Ўзбекистон Республикаси ўзбек тилини бутун чоралар билан ривожлантиради ва унинг сиёсий, ижтимоий, иқтисодий ва маданий ҳаётнинг бар-

ча соҳаларида тўла амал қилишини таъминлайди». Ҳакиқатан ҳам, давлат тили мақомига эга бўлган тил ҳаётнинг барча соҳаларида амал қила оладиган бўлиши шарт. Демак, ўзбек тилини шундай тил даражасига кўтариш, шундай тил бўлишини таъминлаш, шунга хизмат қилиш ўзбек тилшунослигининг, ўзбек тилшунослирининг асосий вазифаси бўлиб қолаверади.

Ўзбек тилига давлат тили мақоми берилгандан кейин ўтган давр мобайнида Қонун моддаларида белгиланган тадбирлар, асосан, ўз муддатларида бажарилди. Ўзбек тили ҳаётнинг барча соҳаларида амал қилишини таъминлаш эса, юкорида айтилганидек, доимий, муддат билмайдиган вазифа. Бинобарин, ўзбек тилшунослигининг ривожланиш (ривожланганлик) даражаси ҳам ана шу талабга қай даражада жавоб бериши, ана шу мақсадга эришиш учун қай даражада хизмат килаётганлиги билан белгиланади. Шу талаб нуктаи назаридан каралса, кейинги вактларда ўзбек тилшунослигида талабга жавоб бермайдиган, ҳатто ўзбек тилининг амалиёти билан боғлик вазифаларни тўғри йўлга қўйишга, амалга оширишга тўсқинлик қиласиган ишлар ҳам юзага келаётганидан, кўпайиб бораётганидан кўз юмиб бўлмайди. Очигини айтганда, бундай ҳолатларни бартараф этмай туриб, ўзбек тилининг амалиёти билан боғлик бўлган навбатдаги ишларни тўғри йўлга қўйиш, бу борада мавжуд бўлган муаммоларни талаб даражасида ҳал этиш мумкин бўлмайди.

Шу нарса аниқки, тил системаларининг шаклланиши ва бу шаклланиш жараёнида юз берадиган тил ҳодисаларининг моҳиятини белгилаш билан боғлик назарий масалаларни тўла ва тўғри ҳал этмай туриб, давр талабига жавоб берадиган ўқув қўлланмалари ва дарсликлар яратиш мумкин бўлмайди. Шу боис кейинги вактларда тил системаларини шакллантирувчи тил бирликларини, уларнинг моҳиятини ҳамда улар асосида тил системаларининг шаклланиши билан боғлик тил ҳодисаларини, демакки, назарий масалаларни ҳал этишга жиддий эътибор қаратила бошланди

Монография «Кириш» ва тўрт асосий қисмдан иборат.

КИРИШ

Лисон ва нутқ

Тил системалари шаклланиши билан боғлик ҳодисаларнинг моҳиятини тўғри ва аниқ ёритишида тил бирликлари, улар моҳияти масаласида тўғри хуносаларга келиш, аниқ тасаввурга эга бўлиш муҳим аҳамият касб этади. Ана шу мақсадга эришмай туриб, яъни маъно ва вазифасига кўра тил бирликларининг бир-биридан фарқли асосий турларини, ҳар бир турга мансуб бирликларнинг умумий моҳиятини аниқ белгиламай туриб, тил системаларининг шаклланиши билан боғлик ҳодисалар моҳиятини тўғри ёритиш мумкин бўлмайди. Ўзбек тилшунослигида бу масалаларнинг, бу тил ҳодисаларининг ўрганилиш ҳолати ҳам фикримизни тўла тасдиқлади.

Тил бирлигининг моҳиятини тўғри белгилашда, аввало, унинг лисон ва нутққа муносабатини – лисоний ёки нутқий бирлик бўлишини аниқ белгилаш талаб этилади. Бу эса, ўз навбатида, лисон ва нутқ хақида тўғри ва аниқ тасаввурга эга бўлишни тақозо этади. Шу айтилганлар сабабли ўзбек тили системаларининг шаклланиши билан боғлик назарий муаммоларга жиддий эътибор қаратилиши оркали лисон ва нутқни аниқ фарқлаш, ҳар бирининг моҳиятини аниқ белгилаш биринчи навбатдаги вазифа деб қаралди. Ўзбек тилшунослигида шу масала юзасидан фикр юритилган ишлар юзага кела бошлади. Бу ишлар лисон ва нутқ масаласига эътиборни тортиши, бу масала юзасидан ўзга тилшунослиқда мавжуд бўлган фикр-мулоҳазаларни ўзбек тилшунослигига олиб кириши билан эътиборга лойиқ. Лекин уларда икки муҳим камчиликка йўл қўйилганлиги кўринади: 1) лисон ва нутқ масаласида ўзга тилшунослиқда мавжуд бўлган фикрлардан тўла ва ўринли фойдаланмаганлик; 2) лисон ва нутқ масаласида бевосита ўзбек тили материаллари асосида иш қўрилмаганлик. Ана шу икки камчилик лисон ва нутқ масаласини тўла, тўғри ва аниқ ҳал этиш имконини бермади, масалани ижобий ҳал этишга тўсқинлик қилди. Энг ачинарлиси, бошқа тилшунослиқдан олинган чалакам-чатти, узук-юлук фикрларни ўзбек тили материаллари тасдиқламайди.

Фактларга мурожаат қиласылған: «Тил бевосита кузатишида берилмаган. У жамият аъзоларининг онгида мавжуд бўлиб, уларнинг барчаси учун тайёр, умумий, мажбурий бўлган, фикрни шакллантириш ва уни ифодалашга хизмат киладиган бирликлар ва уларнинг ўзаро муносабатлари ҳакидаги тасаввурлар сифатида қаралади.

Нутқ тилнинг намоён бўлиши, рўёбга чиқиши, вокеланиш шакли бўлиб, у бевосита кузатишида берилган моддий (табиий, физик) шаклга эгадир¹. Кўриниб турибдики, таърифлар жуда мавхум, тамтароқли гаплардан иборат бўлиб, тил билан нуткнинг моҳияти, ҳар бирининг ўзига хос хусусияти ҳакида аниқ тасаввур бермайди.

Проф. Ш. Раҳматуллаев тил, лисон ва нуткни қуидагича таърифлайди: «Тил мураккаб курилиши ижтимоий ҳодиса бўлиб, кишиларга фикрлаш, фикрлашув куроли сифатида хизмат қиласи. Дастроб тилнинг икки ҳолати фарқланади: лисон ва нутқ.

Лисон – тилнинг киши миясидаги тил хотираси марказида мавжуд бирликлардан ва улардан фойдаланиш қоидаларидан иборат бойлик. **Нутқ** эса ана шу бойлиқдан фойдаланиш жараёни ва шундай жараёнинг ҳосиласи. Лисон киши миясида мавжуд мавхум ҳодиса бўлиб, уни акл билан идрок киламиз; нутқ эса ана шу мавхум ҳодисадан фойдаланиш жараёнида юзага келадиган ҳодиса бўлиб, уни талафуз бирликлари сифатида эшитамиз.

Лисонга мансуб, яъни тил хотирасида мавжуд ҳодисаларга “лисоний бирликлар” дейилади: лисоний бирликларнинг нутқда моддий шакл олган ҳолатига “нуткий бирлик” дейилади. Демак, ҳар бир кишининг миясида лисоний бирликларнинг рамзларидан ва улардан фойдаланишнинг қоидаларидан иборат бойлик бор, ҳар бир киши эҳтиёжига қараб бу бойлиқдан фойдаланиб, нутқ ҳосил қиласи². Бу таърифлар юқоридаги таърифларга нисбатан анча ихчам, содда ва тушунарлироқ. Лекин, барибир, лисон билан нутқ ҳакида аниқ тасаввур бермайди.

Аввало шундайтиш керакки, тилни лисон ва нутқ каби икки турга ажратиб ўргачи маган даврларда ҳам тил ва нутқ масаласига жид-

¹ Неъматов Х.. Расулов Р. Ўзбек тили систем лексикологияси асослари. Тошкент: Ўқитувчи, 1995. 7-б. Бу ишда “тил” термини “лисон” термини ўрнида кўйланган.

² Раҳматуллаев Ш. Тил курилишининг асосий бирликлари. Тошкент: Университет. 2002. 12-13-б.

дий эътибор қаратилган, ҳар икки ҳодиса юзасидан эътиборга лойик, тўғри, асосли фикрлар мавжуд эди ва ҳозир ҳам бор. Бироқ кейинги вактларда юзага келган, тил, лисон ва нутқ ҳодисалари ҳакида фикр юритилган баъзи ишларда ўзбек тилшунослиги («анъанавий тилшунослиқ») лисон билан нутқни изчиллик билан фарқламаганлиқда айбланади, бу эса мазкур масалада қўпол ҳатоликларнинг юз беришига сабаб бўлганлиги алоҳида таъкидланади: «Систем тилшунослик тилга тизим сифатида ёндашади, тизим қонуниятлари асосида тил, унинг бирликлари ва ҳодисаларини талқин этади... Анъанавий тилшунослик тил ва нутқни изчиллик билан фарқламаганлиги сабабли «тил» ва «нутқ» атамаларини кўллашда ҳам жиддий бефарқликка йўл қўйган»¹. Тил ва нутқ ҳакида фикр юритилган ишларда тил ва нутқни фарқлашда маълум бир ҳато ва камчиликка йўл қўйилган бўлиши мумкин. Лекин буни ўзбек тилшунослиги айби, «тилшуносликнинг бефарқлиги», деб баҳолаш тухматдан бошқа нарса эмас. Аксинча, лисон ва нутқ ҳакида юкоридаги икки ишдан келтирилган таърифтавсифларда тилшунослиқда, жумладан, ўзбек тилшунослигига тил ва нутқ ҳакида мавжуд бўлган, тўғри ва тан олинган таъриф-тавсифлар ўз ифодасини бутунлай йўқотди, унинг ўрнини лисон ва нутқ ҳодисаси, айникса, нутқ ҳодисаси ҳакида тўғри, аник тасаввур бера олмайдиган, ҳато фикрлар эгаллади. Гапимиз куруқ бўлмаслиги учун юкорида айтилган гаплардан бир-иккитасини келтириб ўтайлик.

Юкоридаги икки ишда лисон (тил) ва нутқ ҳакидаги фикрлардан маълум бўляптики, лисон (тил) билан нутқни бир-биридан фарқловчи асосий хусусиятлар қуидагилар: **лисон (тил)нинг асосий хусусиятлари:** 1) бевосита кузатишда берилмаганлик; 2) киши миясининг тил хотираси марказида мавжуд бирликлардан, уларнинг ўзаро муносабати ҳакидаги тасаввурлардан ва улардан фойдаланиш қоидаларидан иборат **тайёр** бойлик эканлик.

Лисоний бирлик (тил бирлиги) – лисонга (тилга) мансуб бирликлар.

Нутқ бирлиги – лисоний бирликнинг нутқда моддий шакл олган ҳолати.

Лисон (тил)га берилган таърифда у қадар эътиrozга сабаб бўладиган ўрин йўқ, яъни лисоний бирликлар, масалан, фонема, мор-

¹ Н е ъ м а т о в Ҳ., Р а с у л о в Р. Юкорида кўрсатилган асар, 7-, 29-б.

фема, сўз каби тил бирликлари фойдаланиш учун тайёр (мавжуд) бирликлар хисобланади. Фақат шуни айтиш керакки, «тил бирликлари нинг ўзаро бирикиши ҳақидаги қоидалар», «ўзаро муносабат ҳақидаги тасаввурлар» лисоний бирлик хисобланмайди, улар нутқ ҳосил бўлиши жараённида ҳам нутқ бирлигига айланмайди. Масалан *теримчиларни* сўзида уч унли фонема (*a*, *э*, *и*), бир туб сўз (*тер*), икки ясама сўз (*терим, терими*) воқеланади, ҳар бир ясама сўзда сўз ясовчи бирлик (-*и*, -*чи*), шунингдек, шакл ясовчи икки тил бирлиги (-*лар, -ни*) воқеланади ҳамда сўз ясалиши ва шакл ясалиш қоидалари амал килади, яъни ясама сўз ва сўз шакллари маълум қоидалар асосида ҳосил килинади. Яхлит килиб айтганда, «намоён бўлиш» тўла ифодасини топади. Лекин бирон-бир нутқ ҳодисаси юз бергани йўқ, яъни айтилган лисоний бирликларнинг бирортаси нутқ бирлигига айлангани йўқ. Шундай экан, «лисоннинг намоён бўлиши нутқ», «лисоний бирлик намоён бўлиши (айтилиши, кўриниши) билан нутқ бирлигига айланади» деган гаплар бекорчи, маълум даражада кулгили гаплигича қолаверади. Бу ўринда лисон ва нутқ ҳақида айтилган исботсиз фикр-мулоҳазаларнинг барчасига тўхтаб ўтирамаймиз, қолаверса, маҳсус мақолаларимизда уларга ўз муносабатимизни билдирганмиз¹. Фақат лисон ва нутқ ҳамда лисоний бирлик ва нутқ бирлиги (нуткий бирлик) ҳақидаги ўз нуктаи назаримизни қисқача баён қилиш билан чекланамиз.

Лисон, проф. Ш. Раҳматуллаев таъкидлаганидек, тилнинг киши миясидаги тил хотираси марказида мавжуд бирликлардан ва улардан фойдаланиш қоидаларидан иборат бойлик. Нутқ, тилшуносликда эътироф этилганидек, «тилнинг (лисоннинг) фикр ифодалаш жараённида амал килиши, тилнинг алоҳида ижтимоий фаолият тури сифатидаги муайян яшаш шакли»². Демак, фикрдан холи бўлган, фикр ифодаламайдиган нутқ ҳақида гапириш мумкин эмас. Лисоний ва нуткий бирликларни белгилашда ва бир-биридан фарқлашда ҳам лисон билан нутқнинг шу асосий хусусиятига асосланиш керак бўлади, яъни лисоний бирлик лисонга мансуб бўлиб, унинг нутқка алоқаси йўқ. Нутқ бирлиги эса фақат нутқда мавжуд бўлади, нутқсиз нутқ

¹ Ҳ о ж и е в А. Ўзбек тилшунослигининг долзарб муаммолари (4-мақола) // Ўзбек тили ва адабиёти, 2007, 1-сон, 3-9-б.; Ҳ о ж и е в А. Назарий тилшуносликка оид бир масала / «Филология масалалари». Илмий-методик журнал. Тошкент: 2006. 51-56-б.

² Лингвистический энциклопедический словарь. М., 1990. -С. 414; Ўзбекистон миллий энциклопедияси. Т. б. Тошкент, 2003. 424-бет.

бирлиги бўлиши мумкин эмас. Яна ҳам аниқроқ килиб айтганда, лисоний бирликлар нутқдан ташқарида ҳам амал қиласи. Масалан, юқорида келтирилган *теримчиларни* сўзи таркибидаги *тер* сўзи, сўз ясовчи, сўз шаклини ясовчи *-иि*, *-чи*, *-лар*, *-ни* морфемалари лисоний бирлик, улар ўз вазифалари билан сўз ясаш, сўз шаклини ясаш учун хизмат киляпти, намоён бўляпти. Лекин улардан бирортасини нутқ бирлиги ҳисоблаш мумкин эмас. Лисоний бирликлар нутқда намоён бўлиши мумкин. Улар нутқда муайян вазифа бажарса, нутқ бирлиги ҳисобланади. Масалан, сўз, ясама сўз, сўз шакли гапда муайян вазифа бажариши, гап бўлаги ҳисобланishi мумкин: *Теримчиларга мукофотлар топширилди*. Бу гапда *теримчиларга* сўз шакли гап бўлаги (тўлдирувчи) вазифасини бажаради ва нутқ бирлиги ҳисобланади. Лекин унинг таркибида намоён бўлган фонемалар ва морфемалар, ҳатто унинг «*тер*» қисми ҳам нутқ бирлиги эмас, нутқ бирлиги бўла олмайди. «Намоён бўлиш», «моддий шакл олиш»ни нутқ бирлиги бўлишнинг биринчи белгиси ҳисобловчи, шуни ўйлаб топган баъзи тилшуносларимиз «лексема ясалмайди», «ясама сўз нутқ бирлиги» каби «янгиликлари»ни исботламоқчи бўладилар. Ачинарлиси шундаки, бундай қуруқ, кулгили даъволар ўкув қўлланмалари ва дарслик-лардан жой олиб улгурди¹.

Хуллас, нутқ бирликлари нутқни шакллантиради, нутқни ташкил этади. Масалан, содда гапни ташкил этувчи гап бўлаклари нутқ бирликлари ҳисобланади. Лисон ва нутқ, лисоний бирлик ва нуткий бирлик хақидаги умумий гапларни шу айтилганлар билан якунлаймиз. Буларнинг ҳар бири хақида, айниқса, лисоний бирликлар хақида иш давомида, ўз ўрнида жуда кўп гапирилади.

Тил бирлиги, тил қурилиши, тил сатҳи (босқичи), тузилини (структуре), тил системаси терминлари хақида

Бу терминларнинг ўзбек тилшунослигида кенг қўллананаётгани маълум. Шунинг ўзиёқ кўрсатадики, улар ўзбек тилидаги энг муҳим ҳедисаларни ифодалаш учун қўлланади. Бироқ бу терминлар ифода-

¹ Қаранг: Ҳ о ж и е в А. Ясама сўз лисоний бирликли ёки нутқ бирлигими? // Ўзбек тили ва адабиёти, 2004. 1-сон. 49-52-б.; Ҳ о ж и е в А. Ўзбек тилшунослигининг долзарб муаммолари (4-макола) / Ўзбек тили ва адабиёти, 2007. 1-сон. 3-9-б.

лайдиган тушунчаларнинг моҳияти, бирор тил ҳодисасини ифодалай олиш-олмаслиги масаласида аниқ бир фикрга келинмаган. Бу ҳолат тил системаси (системалари) билан боғлиқ энг мухим ҳодисаларнинг моҳиятини ёритишда ўзига хос салбий оқибатларга олиб келадики, куйида бунга ишонч ҳосил киласиз. Демак, бу терминлар ифодалайдиган тушунчанинг моҳияти, бирон-бир тил ҳодисасини аниқ ифодалай олиш ёки ифодалай олмаслигини аниқ белгилаш, бу ҳақда бир фикрга келиш асосий вазифалардан хисобланади.

Тилни система сифатида ўрганишга жиддий эътибор қаратилиши билан ўзбек тилшунослигида мазкур терминлар қўллана бошлади, яъни тил системасининг шаклланиши билан боғлиқ ҳодисаларни, лингвистик тушунчаларни ифодалаш талаби билан шу терминлар юзага келди. Лекин тан олиб айтиш керакки, ўзбек тилшунослигида тил системасининг (системаларининг) шаклланиши билан боғлиқ ҳодисаларнинг моҳияти етарли даражада ёритилмаган, шу нуктаи на-зардан талабга жавоб берадиган тадқиқот ишлари яратилишидан олдин бу терминлар истеъмолга киритилди. Очикроқ қилиб айтганда, тил системаларининг шаклланиши билан боғлиқ тил ҳодисаларининг моҳияти ўзбек тили материалларини тадқиқ этиш асосида аникланиб, шу моҳиятни қайд этувчи (қайд эта оладиган) термин белгилангани йўқ, балки бу терминлар ўзга тилшуносликка оид манбалардан кўчирилган, кўчирма терминлардир. Бу йўл кутилган, ижобий натижаларга олиб келавермаслиги аниқ ва амалда шундай бўлди ҳам.

Европа тилшунослигида «система», «структурा» ҳодисаларининг моҳияти масаласида деярли бир фикрга келинган дейиш мумкин. Ўзбек тилшунослигида бу масалага багишланган ишлардан маълум бўладики, муаллифлар умумтилшуносликка оид ишлардан хабардор, улардан фойдаланганликлари аниқ – бу ижобий ҳол, албатта. Лекин бу терминларнинг ўзбек тили материалларига мос келиш ёки мос келмаслигига етарли эътибор берилмаган. Оқибатда, бу терминларнинг баъзилари тил ҳодисасининг моҳиятини тўла ва тўғри қайд эта олмаса, баъзилари, умуман, бирон-бир тил ҳодисасини қайд этмайди. Бундай ҳолатнинг қандай натижаларга олиб келиши мумкинлигини тасаввур этиш қийин бўлмаса керак. Шу боис бу терминларнинг ҳар бирига алоҳида тўхташни, ҳар бири юзасидан ўз мулоҳазаларимизни билдиришни лозим топдик¹.

¹ Бу терминлар ҳақида маҳсус маколамиизда ҳам фикр билдирилган: Хожиев А.

Тил бирлиги термини умумий, мавхум тушунчани билдиради. Адабиётларда унга тўгри таъриф берилган. Лекин таърифлар ҳам умумий, мавхум характерга эгалиги сабабли у ифодалайдиган тушунчани аниқ тасаввур этиш ҳам осон бўлмайди. Тил бирликларининг турлари эса *бирлик* сўзи олдидан муайян сўзни (аниқловчи сўзни) кўллаш билан аниқ ифодаланади: *фонологик бирлик*, *лексик бирлик*, *морфологик бирлик* каби. *Тил қурилиши бирлиги*, *морфологик сатҳ бирлиги* каби бирикмалардаги *тил қурилиши*, *морфологик сатҳ биримлари* ҳам тил ҳодисасининг моҳиятини аниқлаштириш, қандай бирлик эканини аниқ қайд этиш талаби билан кўлланади. Лекин ана шу талаб, ана шу мақсад нуктаи назаридан ёндашилганда, бундай терминларнинг баъзилари, жумладан, *тил қурилиши бирлиги* термини талабга жавоб бермайди, тўғриси, унинг таркибидағи «тил қурилиши» бирикмаси, бу бирикма таркибидағи «қурилиш» сўзи ҳодисасининг (лингвистик тушунчанинг) моҳиятини аниқлаштириш учун хизмат қилмайди.

Тил қурилиши бирлиги бирикмалари ўзбек тилшунослигига лингвистик термин сифатида кейинги вактларда, аниқроги, тилни система сифатида ўрганишнинг назарий масалаларига жиддий эътибор қаратилгандан кейинги даврларда қўллана бошлади. Бу ишларда тилнинг қурилма экани алоҳида таъкидланади. Бироқ бу ишларда мазкур сўз бирикмаси ва сўзнинг лингвистик тушунчани ифодалай олиш ёки ифодалай олмаслигига эътибор берилмаган, аниқроги, *тил қурилиши бирикмаси* ва *қурилма* сўзининг лингвистик ҳодисани қайд эта олиши, лингвистик термин бўла олиши исботини топмаган. Сабаби, юқорида айтилганидек, улар тил ҳодисасининг моҳиятидан келиб чиқиб белгиланган (танланган) терминлар эмас.

Шуни таъкидламоқчи эдикки, *қурилиши* сўзи ва *тил қурилиши* бирикмасининг лингвистик тушунчани ифодалashi, яъни лингвистик термин сифатида қўлланиши билан бундай вазифага эга бўлмаган ҳолатини (қўлланишини) фарқлаш керак. Масалан, машхур турколог Н.К. Дмитриевнинг бир асари «Строй тюркских языков» деб аталади. Бу ном таркибида *строй* сўзи муайян лингвистик ҳодисани билдиради, яъни лингвистик термин эмас, лингвистик терминнинг таркибий қисми ҳам эмас. Бизнингча, ана шундай қўлланишлар ўзбек тилшунослигига *қурилиши*, *қурилма*, *тил қурилиши*, *тил қурилиши*

Ўзбек тилшунослигининг долзарб муаммолари (3-макола) // Ўзбек тили ва адабиёти, 2006. 6-сон, 26-28-б.

бирлиги каби сўз ва сўз бирикмаларининг лингвистик термин сифатида қўлланишига сабаб бўлган.

Умумтилшуносликда ҳам тилнинг система эканлигига, тилни система сифатида ўрганишнинг назарий масалаларига эътибор қаратилиши билан системага оид ҳодисалар, тушунчалар белгилана бошланди, уларнинг моҳияти аникланиб, шу моҳиятни қайд этувчи лингвистик терминлар ҳам юзага кела бошлади. Демак, аввал лингвистик ҳодисалар, тушунчалар аникланиб, сўнгра унинг ифодачиси – термини яратилди. Бу ҳолни, жумладан, рус тилшунослигига оид ишларда аниқ кузатиш мумкин. Бундай ишларда тил системаси билан боғлиқ бирор лингвистик ҳодиса учун *қурилиши*, *қурилма*, *тил қурилиши*, *тил қурилиши бирлиги* каби сўзлар, сўз бирикмалари термин сифатида қўлланмаган, шунингдек, лингвистик терминларнинг изохли лугатларидан бирортасида «тил қурилиши» терминини учратмадик. Масалага бевосита ўзбек тили материаллари асосида ёндашилса, бу тилда ҳам «қурилиш» ҳодисаси йўклиги маълум бўлади. Демак, «тил қурилиши» термини ўзга тилшуносликка (умумтилшуносликка) оид ишлардан қабул қилинган эмас – ўзи йўқ ҳодиса учун ўзбек тилшунослигига қўлланаётган «термин», холос.

Проф. А. Нурмонов ўзбек тили системасининг назарий масалаларига багишлиланган ишида «система», «қурилиш», «структуря» ҳодисаларининг моҳиятини тушунтиришга алоҳида эътибор қаратган: «Ўзаро боғлиқ ва шартланган икки ва ундан ортиқ элементларнинг муносабатидан ташкил топган ва янги сифатга эга бўлган барқарор бутунлик система саналади»...

«Системанинг мухим белгилари: 1) таркибий қисмларга бўлиниш;»... «Биринчи белгига кўра, ҳар қандай система муайян қурилиш бирликларидан ташкил топади.»... «Система қурилма экан, у албатта тузилишга эга бўлади. Системани ташкил этган элементларнинг ички алоқаси структурани ташкил этади... Системасиз структуранинг, структурасиз системанинг бўлиши мумкин эмас»¹.

Асосий максад *система*, *қурилиши* ва *структуря* сўзларининг муайян тил ҳодисасини ифодалаши ёки ифодалай олмаслигини, яъни лингвистик термин бўлиши ёки бўла олмаслигини белгилаш бўлгани боис уларнинг ҳар бири ҳакида билдирилган фикрларнинг тўғри-

¹ Н у р м о н о в А. ва бошқалар. Ўзбек тилининг назарий грамматикаси. Морфология. Тошкент: Янги аср авлоди, 2001. 6-7-б.

нотўгрилиги ҳақида батафсил тўхташни лозим топмаймиз. Маълум бўляптики, система, курилиш ва структура ўзаро алоқадор ҳодисалар сифатида қаралиб, курилишнинг моҳияти системанинг моҳияти асосида, структуранинг моҳияти курилишнинг моҳияти асосида тушунтириляпти. Бизнингча, ўзбек тили материаларининг кўрсатишича, тил системалари билан боғлик, унга алоқадор ҳодисаларнинг моҳиятини, ўзаро муносабатини ёритишда бундай йўл тутиш қутилган, ижобий натижаларга олиб келмайди. «Курилиш», «тил қурилиши» ҳодисаси йўқлигининг, бундай термин кўллашга эҳтиёж йўқлигининг ўзиёк фикримизни тасдиқлади. Структура билан система ва уларнинг ўзаро муносабати масаласига келганда ҳам ҳақиқий ҳолат, бизнингча, А. Нурмонов айтганича эмас. Система, курилиш, структура (тузилиш) ҳақида айтилган гаплар тил системаси ва у билан алоқадор бирор тил ҳодисаси ҳақида тўғри тасаввур бермайди. Ҳатто «ҳар кандай система муайян қурилиш бирликларидан ташкил топади»... «Система курилма экан, у албатта тузилишга эга бўлади» деган гаплар қурилиш билан тузилиш (структуря) бир-биридан фарқли ҳодиса эмас, балки бир ҳодиса эканини билдиради, яъни бу жумлалардан қурилиш (курилма) билан структура бир ҳодиса экани англашилади. У ҳолда бу терминлардан бирига эҳтиёж қолмайди – уларнинг биридан воз кечишга тўғри келади. Шунингдек, «системани ташкил этган элементларнинг ички алоқаси структурани ташкил этади» деган жумла ҳам структуранинг моҳиятини аниқ ва тўлиқ акс эттира олмайди. Чunksи ички алоқа структура хисобланмайди, балки ўзаро алоқадаги бирликлар бутунлиги (яхлит ҳолда) структурани юзага келтиради.

Ўзбек тилшунослигига «тил (курилиши) сатҳлари», «тил (курилиши) босқичлари» терминлари кўлланаётганлиги маълум. Ҳар иккала термин айнан бир тил ҳодисасига нисбатан кўлланади. Эътибор беринг: «Тилнинг қиммат жиҳатдан бир хил бирликларининг йиғиндиси лингвистик сатҳ деб юритилади. Масалан, фонологик сатҳ, морфем сатҳ каби»¹. «Ҳар бир тил бирлигига монанд равишда тил қурилишининг босқичлари ажратилади... Тил қурилиши ўта мураккаб бўлиб, улар ўзаро боғлик бир қанча босқичлардан иборат. Тил қурилишининг бирор босқичини ажратиш учун унинг ўзига хос тил бирлиги мавжуд бўлиши лозим»². Ш. Раҳматуллаев *сатҳ* сўзи

¹ Н у р м о н о в А. ва бошқалар. Юкорида кўрсатилган асар, 8-б.

² Раҳматуллаев Ш. Юкорида кўрсатилган рисола, 25-б.

«ўзаро боғлиқ сатхлар» тушунчасини ифодалашга қодир эмас», деб унинг ўрнида босқич сўзини қўллашни маъқул кўради. Лекин бу сўз, бизнингча, назарда тутилган тил ҳодисасини умуман қайд эта олмайди¹. Бу ишда эътиборга лойик нарса шуки, унда қуриши, структура сўзларидан биттаси – қуриши сўзи қўлланган, демак, бошқа сўзни қўллашга эҳтиёж сезилмаган (Лекин бу сўз тил ҳодисасининг моҳиятини тўғри ва аниқ қайд эта олмаслиги, уни лингвистик термин сифатида қўллаш мумкин эмаслиги айтилди).

Умумтилшуносликда бир хил қийматга (моҳиятга) эга бўлган тил бирлиги асосида юз берадиган икки хил ҳодиса – система ва структура ҳодисаси мавжудлиги тан олинади ва улар тегишли терминлар (*система, структура терминлари*) билан юритилади, шунингдек, бу икки термин ифодалайдиган тушунчанинг моҳияти ҳам тўғри, аниқ ёритилган². Бирок ўзбек тилшунослигидаги бундай тўғри қарашлар ўз ифодасини топганича йўқ. Масалан, А. Нурмоновнинг системага берилган «Ўзаро боғлиқ ва шартланган икки ва ундан ортиқ элементларнинг муносабатидан ташкил топган ва янги сифатга эга бўлган барқарор бутунлик система саналади» таърифини олайлик. Аввало, таъриф ўта мавхум ва системанинг моҳиятини тўғри, тўла ва аниқ қайд эта олмайди. Чунки, биринчидан, система ўзаро боғлиқ ва шартланган ҳар қандай икки ва ундан ортиқ элементлардан ташкил топмайди, балки бир хил қийматга (моҳиятга) эга бўлган икки ва ундан ортиқ тил бирлигидан ташкил топади. Масалан, луғавий система да тил бирлиги бўлмиш *teisa, appa, болта, ранда* сўzlари асбоб-курол маъноси билан бирлашади, бир бутунликни (лексик-семантик гурухни) ташкил этади. Ҳодисанинг моҳияти шундан иборат. Демак, «ўзаро боғлиқ ва шартланган... элементларнинг муносабатидан ташкил топган ва янги сифатга эга бўлган барқарор бутунлик» жумлалари ҳодисанинг (тушунчанинг) моҳиятини тушунишга хизмат қилмайди. Иккинчидан, тил системаси фақат юкоридаги каби гурухлардан (бутунликлардан)гина ташкил топмайди, балки муайян ифода ва мазмун жиҳатига эга бўлган, лекин шу турдаги тил бирликлари билан муносабатда бўлмаган тил бирлиги ҳам муайян системага мансуб бўла олади. Масалан, отнинг -ники морфемаси ёрдамида ясалувчи қарашлилик

¹ Бу хақда юкорида келтирилган маколамизда фикр билдирилган.

² Қаранг: С ол н ц е в В. М. Язык как системно-структурное образование. М.: Наука, 1977. -С.145-284.

шакли (*мактабники* каби шакл) от туркуми морфологик системасида ўз ўрнига эга (Булар хакида ўз ўрнида гапирилади).

Хуллас, системанинг асосий, муҳим ҳусусияти бир хил қийматга эга бўлган тил бирликларининг муайян белги асосида бирлашувидан ташкил топган бутунлик бўлишидир, бу бирликлар системани ташкил этувчилар хисобланади. Шу билан бирга, ўзига хос моҳият билан бир тил бирлиги ҳам муайян системага мансуб бўлади.

«Структура» деганда, ўзаро алоқада бўлган кисмлардан таркиб топган ва ўзаро алоқа схемасига эга бўлган мураккаб бирлик, бутунлик тушунилади. Структура системага хос, уни характерловчи ҳусусиятлардан бири хисобланади¹. Демак, структура билан система бир-биридан фарқли ҳодисалардир. Буни **тил сатҳлари** ҳодисасида, яъни тил бирликларининг сатҳланишида аникроқ тасаввур этиши мумкин. Юқорида кўрдикки, тил сатҳларининг ҳар бири бир хил қийматга (моҳиятга) эга бўлган тил бирликлари йиғиндисидан, мажмуидан ташкил топади: фонологик сатҳ фонемалардан, лексик сатҳ сўз (лексема)лардан ташкил топади ва ҳоказо. Тилшуносликнинг бўлимларида ҳар бир сатҳга мансуб тил бирликларининг моҳияти, улар асосида юз берадиган тил ҳодисаларининг моҳияти ёритилади, ўрганилади.

Тил сатҳи бир хил қийматга эга бўлган тил бирликлари мажмуи эканлигини кўрдик – тил сатҳи деганда шу ҳодиса тушунилади. Бунда тил бирликлари билан боғлиқ ҳодисалар, яъни тил бирликларининг ўзаро муносабати асосида юз берадиган ҳодисалар, масалан, тузилмалар, парадигмалар назарда тутилмайди. Шунинг учун ҳам муайян тил системасига мансуб тил бирликлари билан боғлиқ ҳодисаларга нисбатан *тузилиши*, *тузилма* (*структурна*) сўзлари қўлланмайди. Масалан, отнинг эгалик шакллари ҳусусий ва умумий белгиси асосида эгалик шакллари гурухини, парадигмасини ташкил этади, демак, бунда тузилиш ҳодисаси бор. Лекин бу ҳодисага нисбатан *тузилиши* (*тузилма*, *структурна*) сўзи қўлланмайди. Морфологик категорияларнинг бошқа турларига нисбатан ҳам бу сўз қўлланмайди. Демак, сатҳланиш тил бирликларининг ўзаро муносабатлари, алоқасидан эмас, бир хил моҳиятга эга бўлган тил бирликларининг ўзидан, мажмуидан юзага

¹ Мельников Г. П. Системная лингвистика и её отношение к структурной // Проблемы языкоznания (Доклады и сообщения советских учёных на X международном конгрессе лингвистов). М.: 1967. -С. 98.

келади, ташкил топади. Тил системасини эса ана шу бирликларнинг ўзаро муносабати, алоқасидан юзага келадиган тузилмалар, шунингдек, муайян сатхга мансуб ва муайян моҳиятга эга бўлган тил бирликлари шакллантиради. Масалан, отнинг келишик парадигмаси шакллари, шунингдек, парадигма хосил қилмайдиган, -лар аффикси билан ясалувчи кўплек шакли (*гуллар, қушилар*) ҳам отнинг морфологик системасига мансуб шакллар хисобланади.

Юқорида тилга олинган терминлар юзасидан бўлган мулоҳазаларимизни шу айтилганлар билан тугатиш (тўхтатиш) мумкин. Ҳар бир тил сатҳига мансуб системалар ва уларнинг шаклланиши билан боғлиқ ҳодисаларнинг моҳияти ҳақида ўз ўрнида, яъни ҳар бир тил сатҳи системалари тадқиқ этилган ўринда атрофлича фикр юритилади. Лекин шу ўринда муҳим бир нарсага эътиборни қаратмоқчимиз.

Тил сатҳи, системаси ва тузилма (структуря) ҳақида айтилганларнинг барчасидан аён бўлдики, буларнинг ҳар бири муайян қийматга (моҳиятга) эга бўлган тил бирлиги (бирликлари) асосида юзага келади, ташкил топади, бундай тил бирликларисиз тил сатҳи, структураси, тил системаси ҳақида гап бўлиши мумкин эмас. Бу ҳодисани хисобга олган ҳолда иш кўриш ўзбек тилшунослигига мавжуд бўлган, лекин шу вақтгача ечимини топмаган баъзи муҳим муаммоларни ҳал этиш имконини беради. Масалан, ўзбек тилшунослигига сўзларни туркумларга ажратишида семантик, морфологик ва синтактик белгилар асоси га олиниши айтилади ва ҳаракатнинг белгисини билдирадиган сўзлар алоҳида туркумга ажратилиб, «равиш туркуми» деб юритилади ва бу сўз туркуми тилшуносликнинг морфология бўлимида ўрганилади. Бироқ тил сатҳи ва системаларининг бир хил қийматга эга бўлган тил бирликларидан ташкил топиши, шаклланишига асосланилса, равишиларни туркумга ажратиш мумкин бўлмайди¹, чунки равишилар бундай тил бирлигига (сўз шаклига) эга эмас. Шу боис уларни тилшуносликнинг «Морфология» бўлимида ўранилишини ҳам ўйлаб кўриш керак, чунки уларда морфологик бирлик бўлмаганидек, морфологик система ҳам йўқ ва бошқалар.

¹ Сўзларни туркумлаш ҳақида маҳсус маколамида ўз мулоҳазаларимизни билдираганимиз: Ҳ о ж и ё в А. Ўзбек тилшунослигининг долзарб муаммолари (6-макола) / Ўзбек тили ва адабиёти, 2007. 3-сон, 30-37-б.


Тил бирликларининг таснифи

Таснифлаш илм-фанда нихоятда муҳим аҳамиятга эга. Тўғри тасниф ҳодисалар ва уларнинг моҳиятини аник белгилаш, тўғри ёритиш имконини яратади, шунга йўл очади: «**ТАСНИФ** (араб. – саралаш, тартибга солиш), классификация – илм ёки инсон фаолиятининг бирор соҳасига оид ўзаро бир хил тушунчалар системаси. Тасниф ҳар бир фанга хос муҳим мантиқий амал бўлиб, унинг воситасида шу фан доирасида тўпланган билимлар қатъий тартибга солинади. Фанни ўрганишда бундай тасниф кулайлик туғдиради. Таснифда бўлинувчи ва бўлувчи тушунчалар ўзининг қатъий ўрнига эга бўлади. Тасниф натижасида фанда муҳим аҳамият касб этувчи жадваллар, чизмалар, графиклар, кодекслар вужудга келади... Таснифлаш натижасида ҳосил бўлган билим предметнинг асосий хусусиятлари ҳамда улар ўртасидаги муносабатларни аниқлашга имкон яратади ва бу билимлар тартибга солинган билим ҳисобланади»¹. Бу фикрлар тилшунослик фанига ҳам дахлдор.

Ҳар қандай тасниф муайян белги, нуктаи назар асосида амалга оширилади. Масалан, сўзларни мустақил ва мустақил бўлмаган сўзларга ажратиш лугавий маънога эга ёки эга эмаслиги асосидаги тасниф; сўзларни туркумларга ажратиш туркумлик семаси (шу белги) асосидаги тасниф ҳисобланади ва ҳоказо. Лекин тилга система сифатида ёндашилганда, тил системаларининг шаклланиши билан боғлик ҳодисалар ўрганилганда, бундай таснифлар ҳеч қандай аҳамият касб этмайди, касб этмайдигина эмас, ҳатто тил ҳодисаларининг, тил бирликларининг моҳиятини тўғри белгилашга, ёритишга тўсқинлик қиласи. Буни «ёрдамчи сўз» термини мисолида аник кўриш мумкин.

Ўзбек тили материаллари кўрсатяптики, ёрдамчи сўз бирикмасида «ёрдамчи» сўзи ҳам, «сўз» сўзи ҳам «кўмакчи», «богловчи». «юклама» деб аталаётган тил бирликларига хос умумий белгини ҳам, ҳар бирига хос хусусий белгини ҳам қайд эта олмайди, яъни уларда шу хусусият (белги)ларни қайд этиш, билдириш имкони, умуман, термин ҳосил қилиш имкони йўқ. Ҳатто «ёрдамчи сўз» бирикмаси «мустақил сўз» бирикмаси ифодалайдиган тушунчага зид бўлган тушунчани ҳам билдира олмайди. Чунки «мустақил»нинг зидди «номустақил» бўлади. Бу сўз эса «ёрдамчи сўзлар» деб аталаётган тил бирликларига

¹ Ўзбекистон миллий энциклопедияси. 8-ж. Тошкент: 2004. 292-293-б.



хос умумий моҳиятни қайд эта олмайди. Хуллас, «ёрдамчи сўзлар» термини таркибидаги «ёрдамчи» сўзи кўмакчи, боғловчи, юклама тил бирликлари учун умумий бўлган белгини (хусусиятни) ифодалаш, бу вазифани бажариш имконига эга эмас. Ўз-ўзидан, бу сўз кўмакчи, боғловчи, юклама тил бирликларининг умумий белгисини ифодалаш учун қўлланадиган бирикма терминнинг таркибий қисми бўла олмайди.

Бевосита ўзбек тили материалларидан келиб чиқилса, «ёрдамчи сўз» термини таркибидаги «сўз» бирон-бир тил ҳодисасини қайд этиш имконига эга эмас. Чунки кўмакчи, боғловчи, юклама деб аталувчи тил бирликларига хос вазифада фақат сўз эмас, балки ифода жиҳатидан аффикс (қўшимча) кўринишида бўлган бирликлар ҳам қўлланади. Ўзбек тилшунослигига бу факт тан олинган ва улар кўмакчи аффикс (қўшимча), боғловчи аффикс (қўшимча), юклама аффикс (қўшимча) терминлари билан юритилади. Масалан, -ча кўмакчи аффикси, -ки(-ким) боғловчи аффикси, -ку (биласан-ку) юклама аффикси ва бошқалар. Шундай экан, кўмакчи, боғловчи ва юклама ҳақида гап борганида, бу тил бирликларининг ҳар икки тури, яъни ифода жиҳатига кўра сўз ва аффикс шаклидаги тури хисобга олининши шарт. Шу билан бирга, бу икки ҳолат учун умумий бўладиган, яъни «сўз» сўзи қўлланмайдиган терминни топиш керак бўлади¹. Қолаверса, бу уч тил бирлигини ифодаловчи терминларнинг «сўз» сўзисиз (кўмакчи, боғловчи, юклама тарзида) қўлланиши маълум, яъни уларни «сўз» билан қўллаш (кўмакчи сўз каби қўллаш) талаб этилмайди. Бу факт ҳам учала тил бирлигининг умумий хусусиятини ифодалай оладиган («сўз» сўзисиз) термин топиш ва истеъмолга киритиш шартлигини кўрсатади.

Тил системадан иборат экан, уни системалар мажмуи ташкил этар экан, бу системалар муайян тил бирликлари асосида шаклланиши шубҳасиз. Ўзбек тили материаллари ҳам буни тасдиқлайди. Лекин бу жараёнда, яъни тил системаларининг шаклланиш жараёнда тил бирликларининг тутадиган ўрни, бажарадиган вазифаси бир хил эмас ва бу ҳам табиий ҳол. Уларнинг айримлари муайян системани бевосита шакллантирувчи бўлса, баъзилари бу жараёнда ўзига хос бошқа вазифа билан иштирок этади. Масалан, сўз шакли (морфологик бирлик)

¹ Аслида, «ёрдамчи сўз» термини таркибидаги «сўз» ҳам тил бирлигининг ифода жиҳати, сўзга кўшиб ёзилмаслигига кўра қўлланади.

морфологик сатхга хос системаларни шакллантиrsa, морфем бирликлар (морфемалар) сўз ясалиши системаси ва морфологик системани шакллантирувчи тил бирликларини, яъни ясама сўз ва сўз шаклини ясаш учун хизмат килади. Бинобарин, улар шу системаларнинг шаклланишида бевосита эмас, билвосита иштирок этади дейиш мумкин ва хоказо.

Хуллас, тил системалари, системаларнинг шаклланиши билан боғлик ходисалар *тил бирликлари* асосида юз беради. Демак, тил системалари билан боғлик ҳар қандай ходисанинг моҳияти унинг шаклланишида бевосита иштирок этувчи тил бирликларининг маъно, вазифаси асосида ёритилиши керак бўлади. Бу эса, биринчи навбатда, тил бирликларининг маъно ва вазифасига кўра турларини аник белгилашни талаб этади. Бунда жинс ва тур тушунчаларини тўгри қайд этувчи сўз ёки сўз бирикмасини топиш ва уларни термин сифатида истеъмолга киритиш муҳим аҳамият касб этади. Шу айтилганларнинг ўзиёқ тил бирликларини таснифлаш масаласи ўзбек тилшунослигининг долзарб масалаларидан бири эканлигини, уни ҳал этиш тилшуносларимизнинг биринчи галдаги вазифаси эканини кўрсатади.

Кейинги вактларда ўзбек тилшунослигига тил бирликларининг маъно ва вазифасига кўра турларини белгилашга, турларга ажратишига эътибор қаратила бошлади. Масалан, проф. Ш. Раҳматуллаевнинг бир илмий рисоласи «Тил курилишининг асосий бирликлари»¹ деб аталишининг ўзиёқ фикримизни тасдиқлайди. Лекин бу масала яхлитлигича кун тартибига қўйилгани йўқ. Қолаверса, тил системаларини шакллантирувчи тил бирликлари ҳамда системаларнинг шаклланишига у ёки бу даражада дахлдор бўлган тил бирликларининг маъно ва вазифаси етарли даражада ўрганилгани йўқ.

Тилнинг ҳар бир сатхи муайян моҳиятга эга бўлган (фаркли моҳиятга эга бўлган) тил бирликлари мажмуудан ташкил топиши умумтилшуносликда анча илгаридан маълум: *фонологик сатҳ, морфологик сатҳ* каби (Бу ҳақда юқорида ҳам гапирилди). Ўзбек тилини система сифатида ўрганиш, бу борадаги назарий масалаларга жиддий эътибор қаратилгунга қадар ҳам бу гаплар бор эди. Жумладан, «тил курилишининг асосий бирликлари» деб юритилаётган, яъни тил системаларини шакллантирувчи тил бирликлари юзасидан умумтилшуносликда жуда ишлар бажарилган ва бундай тил бирликларининг

¹ Раҳматуллаев Ш. Юқорида кўрсатилган рисола.

моҳияти ҳақида тўғри хуносаларга келинган, дея оламиз. Лекин эришилган ана шундай натижалар ўзбек тилшунослигига тўла ва тўғри ифодасини топганича йўқ, десак ҳам хато қилмаган бўламиз. Қолаверса, тилда бевосита системани шакллантиримайдиган, лекин тил системаларининг шаклланишида ўзига хос вазифа бажарувчи тил бирликлари ҳам бор. Демак, тил системаларининг шаклланиши билан боғлиқ масалаларни ҳал этишда бу жараёнда бевосита ёки билвосита иштирок этадиган тил бирликларини, уларнинг моҳиятини, умумий ва хусусий белгиларига кўра турларини белгилаш ўзбек тилшунослиги, ўзбек тилшунослари олдида турган асосий вазифалардан ҳисобланади. Бу эса, биринчи навбатда, тил бирликларини таснифлаш масаласини кун тартибига кўяди. Афсуски, бу масалага деярли эътибор қаратилгани йўқ. Ўзбек тили системаларини ўрганиш билан bogлиq ишларимизнинг чала-чулла ҳолатда эканлигининг сабаби ҳам ана шунда.

Тил системалари муайян тил бирликлари асосида шаклланар экан, яъни системани шакллантирувчи, ташкил этувчи тил бирликлари бор экан (борлиги тан олинар экан), бундай бирликлар тўла ва аниқ белгиланмаган бўлса-да, уларни алоҳида тур сифатида ажратиш ҳамда, ўз моҳиятига кўра, «системани шакллантирувчи тил бирликлари» деб аташ тўғри ва мақсадга мувофиқ бўлади, деб ўйлаймиз. Бу билан тил бирликларининг бир тури ва уни қайд этувчи термин аникланган, белгиланган бўлади.

Ўзбек тилшунослигига «морфема» деб аталувчи тил бирлиги борлиги тан олинган. Ш. Раҳматуллаевнинг юкорида келтирилган рисоласида морфема тил курилишининг асосий бирликлари қаторига киритилади¹. Лекин ўзбек тили материаллари бу фикрни қувватламайди. Гап шундаки, морфема (морфемалар) системани шакллантирувчи тил бирликларини, яъни ясама сўз ёки сўз шаклини ясайди (хосил қиласи), унинг моҳияти, вазифаси шундан иборат. Ясама сўз ва сўз шакли эса сўз ясалиши ва морфологик системани шакллантирувчи бирликлардир. Демак, морфемаларни тил бирлиги сифатида баҳолашда, номлашда уларнинг шу хусусиятига, моҳиятига асосланиш керак бўлади. Шундай килинганда, морфемаларни «ясовчи тил бирликлари» деб аташ тўғри ва мақсадга мувофиқ бўлади, деб ўйлаймиз (Булар ҳақида ишнинг «Морфеманинг моҳияти» қисмида фикр билдирилади).

¹ Раҳматуллаев Ш. Юкорида кўрсатилган рисола, 17-б.

Яна бир тур тил бирликлари борки, улар тил системасини шакллантирмайды, шунингдек, сўз ясаш ёки сўз шаклини ясаш учун хизмат килмайды. Улар тилда муайян вазифа бажаради. Вазифа бажарувчи сифатида улар бир гурухга, бир умумий турга бирлашади. Булар кўйиакчи, боғловчи, юклама деб аталувчи тил бирликлариидир. Худди шу умумий хусусиятлари асосида тил бирликларининг бу гуруҳини «функционал тил бирликлари» термини билан юритиш тўгри ва мақсадга мувофиқ бўлади, деб ўйлаймиз.

Тил бирликларининг аникроғи, лисоний бирликларнинг таснифи юзасидан бизнинг тавсияларимиз шулардан иборат. Лекин шу нарса аниқки, ўзбек тилшунослигига тил бирликларининг маъно ва вазифалари етарли даражада ўрганилган эмас. Уларнинг моҳияти кенг, тўғри ёритила борган сари тасниф ҳам такомиллашиши шубҳасиз.

Тилнинг системалари ҳақида умумий маълумот

Тилнинг системалардан иборатлиги, ҳар бир системанинг муайян тил бирлиги асосида шаклланиши тилшуносликка оид адабиётлардан маълум ва буни ўзбек тили материаллари ҳам тасдиклайди. Тилнинг ҳар бир сатҳига хос системаларнинг шаклланиши ва бу жараёнда юз берадиган ҳодисалар, уларнинг моҳияти ҳақида ўз ўрнида, яъни ҳар бир сатҳга хос системалар тадқиқ этилган ўринларда кенг маълумот берилади. Бу ўринда, қисқа тарзда, системаларга хос умумий моҳият ҳақида тўхташни лозим топамиз.

Фалсафий тушунча сифатида система ҳақида куйидаги фикрлар билдирилган: «Система – муайян тарзда ўзаро боғланган ва бир қадар яхлитликни ташкил этадиган элементлар мажмуй... Система тушунчаси яхлитлик, тузилиш, алоқа, муносабат тушунчалари билан узвий боғлиқдир»¹.

Тилда бу ҳодиса тил бирликлари, уларнинг ўзаро алоқаси асосида юзага келадиган гурухлар (бутунликлар)да ўз ифодасини топади. Тилга хос ҳар бир система муайян моҳиятга (қийматга) эга бўлган тил бирликларининг ўзаро боғланиши асосида шаклланади, уларнинг ҳар бири системани ташкил этувчилар, системанинг аъзолари ҳисобланади. Ташкил этувчи бирликларнинг ҳар бири ўзига

¹ Ўзбекистон миллий энциклопедияси. 7-ж., Тошкент: 2004. 654-б.

хос хусусиятга эга бўлиши билан бирга умумий белгига ҳам эга бўлади ва худди шу белги асосида ўзаро бирлашиб, муайян бир гурухни, системани юзага келтиради.

Маълумки, ўзбек тилшунослигидаги тил системалари, система-ланиш ҳакида гап борганида, фонема, морфема, лексема, сўз шакли асосида шаклланувчи системалар – фонологик, морфем, лексик ва морфологик системалар назарда тутилади, шу системалар ҳакида фикр юритилади. Бирок умумий белги асосида гурухланиш барча тил бирликлари учун хос. Масалан, лугавий маънога эга бўлмаган, яъни мустакил бўлмаган сўзлар – ундовлар, таклид ва модал сўзлар, шунингдек. функционал бирлик бўлмиш ва «кўмакчи», «богловчи», «юклама» деб юритилувчи тил бирликлари ҳам маълум умумий белгилари асосида гурухларга бўлинади. Бунинг сабаби объектив борлиқда якка ҳолда яшовчи нарса-ходисанинг ўзи йўклигига. Тил системасида ҳам якка ҳолда амал килувчи тил бирлигининг бўлиши мумкин эмас.

Хуллас, объектив оламнинг системадан иборат бўлиши тилнинг ҳам системадан иборат бўлишини тақозо этади. Худди шу нарса, яъни системалик тилни билиш, ўрганиш имконини беради. Шундай экан, тилни система сифатида ўрганишда, системаларнинг шаклланиши билан боғлиқ ҳодисаларнинг моҳиятини ёритишда тилда мавжуд бўлган барча тил бирликлари, улар асосида шаклланувчи системалар назарда тутилиши, диққат-эътиборда бўлиши талаб этилади. Шундагина тилда мавжуд бўлган барча тил бирликлари, улар ёрдамида системаларнинг шаклланиши билан боғлиқ тил ҳодисаларининг моҳиятини тўла ва тўғри ёритиш мумкин бўлади, яна ҳам аниқрок қилиб айтганда, тилнинг системадан иборатлиги уни ўрганиш имконидир, акс ҳолда, тилни ўрганиш фани ҳакида гапириш ҳам мумкин бўлмас эди.

БИРИНЧИ ҚИСМ

МОРФЕМ САТХ. ТИЛ БИРЛИГИ – МОРФЕМА

Ўзбек тилшунослигига морфеманинг ўрганилиш тарихидан

Ўзбек тилшунослигига деярли олтмиш йиллар аввал «морфема» тушунчаси ва термини пайдо бўлди, унинг моҳияти ҳақидаги қарашлар юзага келди. Бироқ, ҳеч иккilanмай айтиш мумкинки, шу вактга қадар «морфема» деб аталиши мумкин (лозим) бўлган тил бирлиги ва унинг моҳияти тўғри, аниқ белгиланганича йўқ. Бунинг асосий сабаби шундаки, “морфема” деб аталаётган тил бирлиги ва унинг моҳияти бевосита ўзбек тили материалларидан келиб чиқиб белгилангани, белгиланаётгани йўқ. Аксинча, бошқа тилшуносликка, жумладан, рус тилшунослигига оид адабиётларда морфема юзасидан билдирилган фикр-мулоҳазалар ўзбек тилшунослигига кўчириляпти ҳамда уларни тасдиқловчи мисоллар ўзбек тилидан «топиляпти», то-пишга ҳаракат қилингапти. Ваҳолонки, бу йўл билан ўзбек тилидаги бу тил бирлигининг моҳиятини, унинг амалиёти билан боғлик тил ходисаларининг моҳиятини тўғри ёритиш, тўғри белгилаш мумкин бўлмайди. Яна шуни ҳам алоҳида таъкидлаш керакки, морфема ўзбек тили лисоний бирликларидан, яъни «тил курилишининг асосий бирликлари» ҳисобланувчи бирликлардан фарқли ҳолда, тил системаларини шакллантирадиган тил бирликларини ясаш учун хизмат қиласди. Ўзбек тилшунослигига ана шу муҳим фактга жиддий эътибор берилгани йўқ, яъни морфемалар билан боғлик тил ходисаларининг моҳияти унинг ана шу асосий хусусиятидан келиб чиқиб, шу вазифаси асосида ҳал этилгани йўқ. Худди шу сабаб билан морфеманинг моҳияти ва унга боғлик тил ходисаларининг моҳиятини тўғри ва тўла ёритиш имкони бўлмади. Буни аниқ тасавур этиш учун морфема ва у билан боғлик ходисаларнинг ўрганилиш жараёнини эътибордан ўтказиши керак бўлади.

Ўзбек тилшунослигида морфема ва у билан боғлик ходисаларнинг ўрганилиш тарихига назар ташланса, бир-биридан тамоман фарқли бўлган икки хил факт (икки ходиса) тадқик этилганлиги, текшириш объекти бўлганлиги кўзга ташланади: 1) сўзнинг маъноли кисмларини морфема деб қараш ва шундай кисмларнинг моҳиятини ўрганиш; 2) морфемани тил бирлиги, тил қурилишининг асосий бирликларидан бири ҳисоблаш ва шундай бирлик сифатида унинг, у билан боғлик ходисаларнинг моҳиятини тадқик этиш. Ваҳолонки, морфемани бундай икки хил тушуниш, ўз-ўзидан, унинг таҳлилида ҳам турли хатоликларга, бир-бирига зид хуносаларга олиб келади, улардан бири тўғри бўлса, бошқаси нотўғри бўлади. Ўзбек тилшунослигида морфемалар ва улар билан боғлик бошқа ходисаларнинг моҳияти юзасидан шу вактга қадар тўғри ва аниқ бир фикрга келинмаганлигининг асосий сабаби ҳам ана шунда. Шу боис морфема ҳақидаги ҳар икки нуктаи назар ва улар асосида юзага келган фикр-мулоҳазаларга алоҳида-алоҳида тўхтаб ўтишга тўғри келади.

1. *Морфеманинг сўзининг таркибий қисми сифатида ўрганилиши*. Бу босқични, мазкур тил бирлиги моҳияти қандай тушунилишига кўра, икки даврга ажратиш мумкин: 1) «морфема» тушунчаси ва термини юзаги келгунгача бўлгат давр; 2) бу тушунча ва термин пайдо бўлгандан кейинги давр. Ҳар икки даврда ҳам бу тил бирлиги сўзнинг, яъни ясама сўз ва сўз шаклининг таркибий қисми деб қаралган ҳамда шу нуктаи назардан ўрганилган.

Ўтган асрнинг эллигинчи йилларига қадар, яъни ўзбек тилшунослигида «морфема» тушунчаси ва термини пайдо бўлгунга қадар ўзбек тили грамматикасига оид ишларда сўз таркиби морфологик ходиса сифатида қаралиб, унинг ўзак ва аффиксадан таркиб топиши эътироф этилган, «сўз таркиби» сарлавҳаси остида ўзак, негиз ва аффиксларнинг хусусиятлари ҳакида фикр юритилган. Масалан, О. Усмон ва Б. Авизовларнинг «Грамматика» сида ясама сўзнинг «асосий маъноли, бўлинмас қисми» ўзак экани қайд этилади. Сўздан шакл ясовчилар («турловчилар») олиб ташлангандан қолган қисми эса «негиз» деб таърифланган¹ (Аслида, булар ҳам рус тилшунослигига оид ишлардан кўчирилган фикрлар).

¹ У с м о н О.. А в и з о в Б. Ўзбек тили грамматикаси. I бўлим, Фонетика ва морфология (лотин ёзувида). Тошкент: 1939. 46-48-б.

Бу ўринда сўз таркиби, ўзак (негиз) ва аффикслар юзасидан билдирилган фикрларга батафсил тўхташни лозим топмаймиз (Улар ҳақида иш давомида жуда кўп тўхталамиз). Факат шуни алохида таъкидламоқчимизки, сўзнинг сўз ясовчи ва шакл ясовчи аффикслардан иборат таркибини морфологик ҳодиса сифатида қараб, унинг лугавий маъноли қисми билан аффиксларига хос хусусиятларни ўрганиш ўзбек тили системаларига оид, бу системани шакллантирувчи бирон-бир тил бирлигининг ва унинг амалиёти билан boglik (системани белгиловчи) ҳодисаларнинг моҳиятини тўғри ёритиш имконини бергани йўқ ва шундай бўлиши табиий эди. Чунки «ўзак», «негиз», «аффикс», «қўшимча» каби терминлар тил системаларини шакллантирувчи бирон-бир тил бирлигини билдира олмас эди. Қолаверса, у даврларда «тил системаси», «тил системасини шакллантирувчи тил бирлиги» каби тушунчаларнинг, улар ҳақидаги тасавурнинг ўзи йўқ эди.

Тилшуносликда, жумладан, рус тилшунослигига «морфема» тушунчаси пайдо бўлганидан кейинги даврларда (ўтган асрнинг эллигинчи йилларида) ўзбек тилшунослигига ҳам бу тил бирлиги, унинг моҳияти, турлари ва ш.к. масалалар юзасидан фикрлар юзага кела бошлади. Бу фикрлар ҳам, асосан, рус тилшунослигига морфема ҳақида айтилган гапларнинг кўчирмаси бўлди. Аникроқ қилиб айтиганда, рус тилшунослигига узок вактлар давомида (ўтган асрнинг тўқсонинчи йилларига қадар) морфема сўзнинг таркибий қисми сифатида (сўзнинг маъноли, бўлинмас қисми сифатида) таърифланди, ўрганилди (Булар ҳақида ўз ўрнида фикр билдирамиз). Бу ҳолат ҳам ўзбек тилшунослигига кўчирилди, ўзбек тилшунослигига ўз ифодасини топди. Масалан, проф. А. Ғуломовнинг «Морфологияга кириш» номли ишидан олинган куйидаги жумлаларга эътибор беринг: «Кўпгина сўзлар икки ёки ундан ортиқ морфемадан иборат бўлади (морфема – сўзнинг маъноли элементлари): *тер-иши-лар-имиз*, *сўзла-ши-ди-к*, *сўзла-ши-тир-ил-ди* каби. Сўзнинг ўзаги асосий морфема саналади, бошқалари эса аффикслар – эргаш морфема саналади. Демак, сўзда икки хил морфема бўлади: ўзак морфема (асосий морфема) ва аффиксал морфема (эргаш морфема)¹.

Морфемани сўзнинг таркибий қисми сифатида тушуниш, шундай бирлик сифатида морфеманинг турларини белгилаш ва ҳар бири-

¹ Хозирги замон ўзбек тили. Ф.Камол таҳрири остида. Тошкент: 1957. 15-б.

нинг хусусиятларини ёритиш тамойили ўзбек тилшунослигига деярли хозирги кунгача давом этти. Икки манбадан олинган қуйидаги фактларга эътибор беринг: «Сўзнинг маъноли қисмлари **морфемалар** дейилади. Масалан, *иичиларимиз* сўзи *ши-*, *-чи*, *-лар*, *-чииз* қисмларидан иборат. Булардан ҳар бири сўз доирасида ўзига хос маъно билан қатнашади. *Иичиларимиз* сўзининг маъноли қисмларга бўлинишидаги охирги чегара шу... Демак, *морфема* сўзнинг бўлинмас энг кичик маъноли қисмидир... асосий хусусиятига кўра, морфемалар икки турга бўлинади: 1) ўзак морфема, 2) аффиксал морфема»¹.

«Сўзнинг маъноли қисмлари морфемалар дейилади... асосий хусусиятига кўра морфемалар икки турга бўлинади: ўзак морфема ва аффиксал морфема»².

Маълум бўлдики, сўзнинг таркибий, маъноли қисмларини «морфема» деб аташ («морфема» деб тушуниш) билан уларнинг моҳиятини белгилашда бирор муҳим ўзгариш бўлгани йўқ. Фақатгина сўзнинг таркибий (маъноли) қисмлари «морфема» сўзи билан ишлатиладиган бўлди, яъни ўзак, аффикс терминлари «ўзак морфема», «аффикс(ал) морфема» тарзида кўлланадиган бўлди. Бироқ бу билан «морфема» деб аталувчи тил бирлигининг моҳиятини тўғри белгилаш (тўғри ёритиш) мумкин эмас эди ва шундай бўлди ҳам.

Гап шундаки, морфемани сўзнинг таркибий қисми деб тушуниш уларнинг сўз таркибидан ташқарида мавжудлигини инкор этиштир. Ҳатто ўзбек тилшунослигига оид, ўзбек тили морфемикасига багишлиланган баъзи ишларда ҳакиқатда ҳам шундай экани алоҳида таъкидланди. Эътибор беринг: «Морфемалар бири иккинчиси билан боғлик бўлади, бири иккинчисидан ажратилганда, морфемалик хусусиятини ана шу ўринда йўкотган бўлади»³. Морфема сўзнинг таркибий қисми (шундай бирлик) деб тушунилгач, унинг моҳияти ҳақидаги гап шундан бошқача бўлиши мумкин эмас ва у жуда тўғри фикрдек туюлади. Аслида эса бундай эмас, яъни морфемалар бир-бири билан бириккан холда мавжуд бўлмайди ва бир-биридан ажратилганда йўқ бўлмайди ҳам. Аксинча, муайян сўз таркибидаги маъноли қисмлар

¹ Хозирги ўзбек адабий тили, I қисм, Педагогика институтларининг филология факультети студентлари учун дарслик, Тошкент: Ўқитувчи. 1980. 159-б.

² Хозирги ўзбек адабий тили. Олий ўкув юртлари таалабалари учун ўкув кўлланма. Тошкент: Илм. зиё, 2004. 68-б.

³ Тожиев Ё. Ўзбек тили морфемикаси. Тошкент: 1992. 10-б.

ажратилганда (белгиланганда), шу сўздаги морфемалар (морфема деб қаралувчи бирликлар) намоён бўлади, ўз ифодасини топади. Масалан, *иичичаримизга* сўзини маъноли қисмларга ажратиш билан шу сўзда мавжуд бўлган тил бирликлари, жумладан, морфем бирликлар (морфемалар) намоён бўлади, алоҳида ифодасини топади: *иши* – сўз, лексема, *-чи*, *-лар*, *-имиз*, *-га* – морфемалар. Бу морфемалар эса фақат *иши* сўзининг морфем таркибини ҳосил қилувчи, фақат *иши* сўзи билан қўлланувчи бирликлар эмас, балки улар тилда мавжуд бўлган сўзлардан ясама сўз ва сўз шаклларини ҳосил қилувчи тайёр бирликлар – морфемалардир¹.

Эътибор билан қаралса, морфемага берилган таъриф-тавсифлар, тушунтиришларнинг ўзиёқ тил қурилишининг бирон-бир турини қайд эта олмаслиги маълум бўлади. Жумладан, деярли барча ишларда «Морфема сўзининг маъноли, бошқа маъноли қисмларга бўлинмайдиган бўлаги» деган таъриф ҳакида ҳам шуни айтиш мумкин. Масалан, *текисла* сўзи маъноли, бошқа маъноли қисмларга бўлинмайдиган «текис» ва «ла» дан таркиб топган. Лекин фақат шу хусусияти учун буларни, яъни ҳар иккаласини морфема деб аташ мумкин эмас. Чунки «текис» ва «ла» моҳиятган бир-биридан бутунлай фарқли бўлган тил бирликларидир. Шундай экан, муайян тушунчани номловчи «морфема» терминини бу икки тил бирлиги учун қўллаш мутлақо мумкин бўлмайди, уларнинг бирини «ўзак», иккincinnисини «аффикс» деб аташнинг ўзи бунга йўл қўймайди, яъни улар бир-биридан тамомила фарқли бўлган тил бирликлари эканидан гувохлик беради. Морфеманинг турлари, ҳар бир турининг моҳияти ва шу кабиллар ҳакидаги фикрлар, тушунтиришлар ҳам бирон-бир тил ҳодисаси, унинг морфема деб аталиши мумкин бўлган тил бирлигига оидлиги ҳакида тўғри ва аниқ бир тасаввур бермайди. Эътибор беринг: «Кўпгина сўзлар икки ёки ундан ортиқ морфемадан иборат бўлади (морфема – сўзининг маъноли элементлари): *тер-им-чи-лар-имиз*, *сўзла-иши-тир-ил-ди* каби. Сўзининг ўзаги асосий морфема саналади.

Ўзбек тилида ясама сўзлар ва сўзининг формалари ўзакка маълум тартибда, изчиллик билан аффикслар қўшиш орқали ҳосил қилинади,

¹ “Ўзак”, “негиз” сўзларини лингвистик термин сифатида қўллашга эҳтиёж йўклиги. Эҳтиёж бўлмаганлиги куйидаги маколамизда исботланган: Ҳ о ж и е в А. Сўзининг морфологик ва сўз ясалиш структураси / Ўзбек тили ва адабиёти, 1976. 3-сон, 29-33-б.

бунда ўзак кўпинча ўзгармайди. Бу ходиса агглютинация хисобланади. Бунда сўз бир-биридан қатъий фарқ киладиган, ажрала оладиган икки товуш комплексидан (ўзак комплекс ва аффикс комплексидан) иборат бўлади... аффикслар мустакил қўлланилмайдиган, ўзакка қўшилиб, хар хил маъноларни ифодалашга хизмат киладиган элементлардир»¹. Бу жумлалар ҳакида куйидагиларни айтиш мумкин. Биринчидан, *морфема* сўзи термин сифатида муайян тушунчани ифодалар экан, унинг асосий ва асосий бўлмаган тури (етакчи морфема, эргаш морфема) ҳакида гапириш мумкин бўлмайди. Иккинчидан, аффикс морфема ҳакида айтилган «хар хил маъноларни ифодалашга хизмат килади» жумласи, унга нисбатан қўлланган «элемент» сўзи бирор нарса, тушунча ҳакида тасаввур бермайди. Учинчидан, ўзак ва аффикс сўз таркибида ўз товуш комплексига эга бўлган алоҳида бўлаклар экан, уларнинг иккаласига нисбатан «морфема» терминини қўллаш мумкин эмаслигини исботлашга эҳтиёж колмайди. Демак, морфема ҳакида турлича таъриф-тавсиф ва тушунтиришлар кўп, лекин уларнинг бирортаси муайян тил бирлигини кайд эта олмайди, у ҳақда тасаввур бера олмайди.

Шу ўринда яна бир фактга эътиборни қаратамиз. Морфема сўзнинг таркибий қисми бўлар экан, яъни шу нарса тан олинар экан, маъноли, лекин таркибий қисмларга бўлинмайдиган сўзлар – туб сўзларга нисбатан морфема ҳакида гапириш мантиққа тўғри келмайди. Бироқ морфема ҳакида фикр юритилган ишларда туб сўзнинг (аффикс қабул қилмаган сўзнинг) ўзак морфема хисобланиши алоҳида таъкидланади. Масалан, О. Қосимхўжаева сўзнинг морфологик таркибига бағишлиланган маҳсус ишида ўзак сўз таркибида бошқа морфемаларга нисбатан ҳам, ёлғиз турган ҳолда ҳам мавжуд бўла олади, деган фикрни билдиради². «Бир морфемали сўзлар ўзакдан иборат бўлиб, одатда туб сўз хисобланади» деган гаплар ҳам³ морфема сўзнинг таркибий қисми бўлиши ҳақидаги фикрни, демакки, морфемага берилаётган таърифни йўққа чиқаради, инкор этади.

Юқорида айтилганлар ва келтирилган фактларнинг барчасидан маълум бўладики, морфемани сўзнинг таркибий қисми деб қараш уни

¹ Фуломов А. Морфологияга кириш. Аюб Гуломовнинг илмий мероси (2-китоб). Тошкент: 2006. 10-12-б.

² Қосимхўжаева О. Сўзнинг морфологик таркиби. Тошкент: 1963. 10-б.

³ Фуломов А., Тихонов А. Н., Кўнгурев Р. Ўзбек тилининг морфем лугати. Тошкент: Ўқитувчи, 1977. 4-б.

морфологик бирлик ҳисоблашга, сўз ясалиши, шакл ясалишини морфологик ҳодиса деб тушунишга, охир-оқибат, «сўз таркиби»ни морфологик ҳодиса сифатида тилшуносликнинг «Морфология» бўлимида ўрганишга сабаб бўлди. Лекин, ҳар қанча уринилмасин, ўзбек тилшунослигига оид бирон-бир ишда ўзбек тилида шундай бирлик, «морфема» деб аталиши мумкин бўлган тил бирлиги борлиги, унинг амалиёти билан боғлиқ тил ҳодисалари мавжудлиги ва улар морфологиянинг ўрганиш обьекти бўлиши ўз исботини топмади, бу масалада айтилган барча гаплар қуруқ гаплигича қолаверди ва шундай бўлиши табий эди. Чунки тил системаларини шакллантирувчи бирликларни белгилаш, улар асосида ҳар бир системанинг шаклланиши билан боғлиқ ҳодисаларнинг моҳиятини белгилаш соғ назарий масалалар жумласига киради. Бундай масалалар билан шуғулланишга жиддий эътибор қаратилмаган, деярли шуғулланилмаган даврларда «морфема» деб аталиши мумкин бўлган тил бирлигини белгилаш, унинг моҳиятини тўла ва тўғри ёритиш ҳақида гап бўлиши мумкин эмаслиги ўз-ўзидан маълум. Қолаверса, морфема билан боғлиқ юқорида кўрилган фикрмуроҳазалар бошқа тилшунослик, жумладан, рус тилшунослиги учун хос эди. Ўзбек тилшунослигига мавжуд бўлган фикрлар, асосан, рус тилшунослигидаги фикрларнинг кўчирмаси эди. Бинобарин, бу борадаги хато ва камчиликларни бирон-бир мутахассисга тақаш, бирон-бир тилшуносининг хатоси, камчилиги ҳисоблаш ҳам инсофдан бўлмайди.

Рус тилшунослигига ҳам морфема кейинги вақтларга қадар (саксонинчи йилларда ҳам) сўзнинг таркибий қисми сифатида қараб келинди. Лекин эътиборлиси шундаки, бу вақтларда морфема морфемикага оид тушунча эканлиги, бу бирликнинг амалиёти «сўз ясалиши» ва «Морфология» баҳсларида ўрганилиши ҳақидаги фикрлар юзага келди, морфемика ва сўз ясалиши тилшуносликнинг алоҳида бўлимлари сифатида морфологиядан ажратила бошланди. Бу жиҳатдан куйидаги фикрлар эътиборга лойик: «Китобнинг композицияси ва структураси маъносида принцип жиҳатдан энг муҳими унда «Морфемикага кириш», «Сўз ясалиши»... бўлимларининг ажратилиши ҳисобланади»¹. Бу китобда («Грамматика»да) «Морфемикага кириш» қисми бор-у, «Морфемика» деган алоҳида бўлим йўқ.

¹ Грамматика современного русского литературного языка. М.: Наука. 1970. -С. 5.

1982 йилда нашр этилган рус тили грамматикасида ҳам «Морфемиканың асосий тушунчалари», «Сўз ясалиши» деб аталган алоҳида бўйимлар бор¹. Лекин «Морфемика» деган алоҳида бўлим йўқ. Ўз-үзидан, «Тилшуносликнинг «морфемика» деб аташ мумкин бўлган бўлими борми?» деган саволнинг туғилиши табиий. Лекин иккала грамматикада ҳам бу саволга жавоб йўқ.

Рус тилшунослигидаги кўриб ўтилган ҳолат таъсирида ўзбек тилшунослигига ҳам морфема ва морфемика ҳақида айрим фикрмуроҳазалар юзага кела бошлади. Масалан, проф. А. Гуломовнинг «Морфологияга кириш» номли ишида, жумладан, куйидагиларни ўқиймиз: «Ўзак ва аффиксларнинг анализи морфологияда ҳам, сўз ясалишида ҳам учрайди, лекин бу икки соҳанинг анализи, ҳодисага қандай нуқтаи назардан ёндашиши – ҳар хил, шундай бўлса ҳам, ба-рибир, ҳар икки соҳа учун умумий бўлган ҳодисалар ҳам бор. Шунга кўра, кейинги вактларда буларни ёритишнинг янги схемалари пайдо бўлди: дастлаб морфемаларнинг ҳар икки соҳага алокадор бўлган томонлари айрим берилади, бу айрим қием **морфемика** деб аталади, кейин сўз ясалиши, ундан кейин морфология баён қилинади. Бу янги тартиб илмий жиҳатдан пухта асосланган бўлиб, практик томондан ҳам афзалликларга эга.

Морфемика сўзнинг энг кичик маъноли қисмлари ҳақидаги таълимотдир².

Шуниси ажабланарлики, муаллиф морфемалар ҳақидаги таълимот «морфемика» эканини, унинг тилшуносликнинг алоҳида соҳаси (қисми) сифатида ажратилиши илмий жиҳатдан асосли, амалий жиҳатдан афзалликларга эга эканини тан олгани, шуни алоҳида таъкидлагани ҳолда, ишда унга амал қилгани кўринмайди. Чунки, биринчидан, «Морфемикада морфемаларнинг ҳар икки соҳага (сўз ясалиши ва морфологияга – А.Х.) алокадор томонлари айрим берилади» деган билан ишда бундай қилинмаган. Иккинчидан, ишда сўз ясалиши (морфологиядан ажратилиб) тилшуносликнинг бўлими сифатида берилса-да (морфемика ҳақида ҳам шу бўлимда гапирилишига эътибор беринг), аммо сўз ясалиши таркиби, уни ташкил этувчи бирликлар (морфемалар), уларнинг моҳияти ҳақида ҳеч қандай гап

¹ Русская грамматика. Т.1. М.: Наука, 1982. -С. 123-132,133-152.

² Ўзбек тили грамматикаси. I т. Морфология. Т.: Фан. 1975. 11-б.

йўқ. Учинчидан, морфема морфемика, сўз ясалиши ва морфологияга дахлдор бирлик экани эътироф этилса-да, лекин сўзниг лугавий маъноли қисми ва аффикс(лар)дан иборат таркиби морфологик таркиб деб қаралади ва у «Грамматика» нинг «Морфологияга кириш» қисмida берилади ҳамда бу таркиб ўзак ва аффиксал морфемадан иборат бўлиши айтилиб, шу бирликлар (ўзак ва аффикслар) ҳақида фикр юритилади (66-120-б.). Ана шу фактнинг ўзиёқ кўрсатадики, бу давр ўзбек тилшунослигида *морфема*, *морфемика* терминлари тилга олинса-да, бу терминлар билдирган тушунчаларнинг моҳияти аниқ ва тўғри ифодасини топмаган.

Юқорида айтилдиди, рус тилшунослигида «Введение в морфемику» ёки «Основные понятия морфемики» деган қисмлар берила бошланди. Буларда морфемика тилшуносликнинг алоҳида соҳаси экани ҳақида, морфемика сўз ясалиши ёки морфологиянинг қисми (бўлими) экани ҳақида ёки, аксинча, сўз ясалиши ва морфология морфемиканинг қисмлари экани ҳақида гап йўқ. Бу ишларда, юқоридаги сарлавҳалар остида, морфемалар ҳақида умумий маълумот берилади ва морфемаларнинг амалиёти сўз ясалиши ва морфологияда ўрганилиши қайд этилади. Шу асосда сўз ясовчи аффикслар (морфемалар) ва улар билан боғлиқ ҳодисалар тилшуносликнинг «Сўз ясалиши» бўлимида, форма (шакл) ясовчи морфемалар ва улар билан боғлиқ ҳодисалар эса «Морфология» бўлимида ўрганила бошланди. Ана шу нарса тил системаларига хос (уни шакллантирувчи) тил бирликларини аниқ белгилашда, жумладан, морфем бирликнинг моҳиятини тўғри белгилашда алоҳида аҳамият касб этди. Масалан, «Сўз ясалиши» бўлимида ясама сўзниг таркиби, бу таркибни ташкил этувчи бирликнинг моҳияти аниқ белгилангач, ясама сўз таркибида «ўзак» ёки «негиз» деб аталиши мумкин (лозим) бўлган қисм йўклиги, шунингдек, «аффикс» термини тил курилиши системасига оид муайян тушунчанинг моҳиятини қайд эта олмаслиги маълум бўлди. Сўзниг морфологик таркибига нисбатан ҳам шу гагларни айтиш мумкин. Натижада тилшуносликнинг бу бўлимларидан ҳар бирида ўзига хос тушунчалар билан иш кўрила бошланди: «сўз ясалиши асоси», «сўз ясовчи морфема» каби терминлар юзага келди (Булар ҳақида ўз ўрнида тўлиқ маълумот берилади).

Умумтилшуносликда, жумладан, рус тилшунослигида морфема ҳақида юзага келган янгича қарашлар таъсирида ўзбек тилшуносли-

года ҳам морфемани сўзнинг таркибий қисми сифатида эмас, тил бирлиги деб ган олиш кузатила бошлади. Бу жиҳатдан Т. Мирзакуловнинг шу мавзуда ёзилган докторлик диссертациясида билдирилган фикр-мулоҳазалар эътиборга лойик. Эътибор беринг: «...морфема сўзнинг бўлинмас, энг кичик маъноли қисмидир», «морфемика сўзнинг энг кичик маъноли қисмлари ҳақидаги таълимотдир» тарзидаги «сўздан морфемага караб» принципи асосида тузилган изоҳларни кўплаб учратамиз. Тил сатҳларининг бошқа йўналишдаги иерархиясига мувофиқ, иккинчи бир принцип – «морфемадан сўзга қараб» принципига асосланган **«морфема тилнинг энг кичик, бўлакларга бўлинмайдиган маъноли қисмидир»** (Биз ажратиб кўрсатдик – А.Х.) тарзидаги эътироф эса сўнгги йилларда учрай бошлади... ҳар иккала принцип ҳам тилдаги маълум реалликларга асосланади, ўз навбатида, бир-бирини тўлдиради¹. Кўринадики, муаллиф ҳар икки «принцип»ни тан олади, ҳар бири методик ва бошқа афзаликларга эга эканлигини қайд этади. Бизнингча, морфеманинг моҳиятини ёритишда «сўздан морфемага қараб» ва «морфемадан сўзга қараб» принциплари йўқ, шунингдек, бундай «принцип»лар билан морфеманинг тил бирлиги сифатидаги моҳиятини белгилаб бўлмайди. Шунингдек, «морфема тилнинг энг кичик, бўлакларга бўлинмайдиган маъноли қисмидир» деган таъриф морфеманинг тил бирлиги эканини қайд эта олмайди. Аникроқ килиб айтганда, «тилнинг энг кичик қисми» жумласи бирон-бир тил бирлиги, тил ҳодисаси ҳақида тасаввур бермайди. Т. Мирзакулов сўзнинг морфема бўлишини тан олгани ҳолда, яна қуидагиларни ёзади: «Шунга биноан, дастлабки этапда унинг (морфемиканинг – А.Х.) обьекти доирасига шундай бирликларни киритиш мумкин: 1) ўзак ва аффиксал морфемалар...»². Кўриниб турибдики, морфема тил бирлиги деб эътироф этилса-да, бу фикр амалда ўз исботини топмаган. Шундай бўлиши табий эди, яъни ўзбек тили системаси (системалари) билан бўлглик назарий масалалар билан шуғулланиш деярли эътибордан четда бўлган шароитда тил системаларини шакллантирувчи тил бирликларини белгилаш ва уларнинг моҳиятини ёритиш ҳақида гап бўлиши мумкин эмаслиги ўз-ўзидан маълум (Бу ҳақда юкорида ҳам гапирилди).

¹ Мирзакулов Т. У. Ўзбек тили морфем парадигматикаси ва синтагматикаси масалалари. Филол.фен. док. дисс.: Тошкент: 1994. 59-б..

² Мирзакулов Т. У. Шу диссертация, 61-б.

Хуллас, морфема сўзнинг таркибий қисми сифатида ўрганилаётган босқичнинг охирларига келиб, ўзга тилшуносликка оид адабиётлар таъсирида, у (морфема) *тил бирлиги* деб юритилса-да, лекин унинг моҳияти аниқ белгиланмаган. Шу боис «ўзак морфема», «аффиксал морфема», улардан ҳар бирига хос хусусиятлар ҳакидаги қарашлар давом этаверган. Ҳатто «ўзак морфема» термини таркибидаги ўзек сўзини бошқа сўз билан алмаштириш ҳакида мулоҳазалар билдирилган¹. Булар ҳакида ҳам маҳсус мақоламиизда ўз муносабатимизни билдирганимиз².

2. Морфеманинг тил бирлиги сифатида ўрганилиши. Европа тилшунослигига, жумладан, рус тилшунослигига морфема тил бирлиги сифатида қаралиб, шунга мос равишда таърифлана бошлагач, ўзбек тилшунослигига ҳам шундай нуқтаи назар ўз аксини топа бошлади.

Морфемаларнинг тил бирлиги экани эътиборга олинган дастлабки даврларда ҳам у «маъноли, бошқа маъноли қисмларга бўлинмайдиган лисоний бирлик» деб таърифлана бошлади. Натижада лугавий маъноли, бўлинмас бирликни «ўзак морфема», «лексик морфема» деб, бундай хусусиятга эга бўлмаган бўлинмас бирликларни «грамматик морфема», «аффиксал морфема» деб аташ давом этди³. Шу билан бирга, лугавий маъноли бирликни «лексема», сўз ясовчи ва сўз шаклини ясовчи бирликларни «морфема» деб аташ ҳам кузатила бошлади. Демак, лугавий маъноли бирликнинг морфем бирлик эмас, балки лугавий бирлик (сўз) эканига эътибор қаратилди. Бу эса тил бирликларининг, жумладан, морфем бирликларнинг ўрганилиш тарихида эътиборга лойик, жиддий ва ижобий ўзгариш эди (Булар ҳакида кейинрок яна тўхталамиз). Гап шундаки, тил қурилиши бирликларини (лисоний бирликларни) маънога эгалиги ва бошқа маъноли қисмларга бўлинмаслигига кўра бирлаштириш ҳамда шу асосда уларнинг барчасини «морфема» деб аташ назарий жиҳатдан тўгри бўлмаганидек, амалий жиҳатдан ҳам факат салбий оқибатларга олиб келиши аниқ эдики, қисман бунинг гувоҳи бўлдиқ, иш давомида эса бунга тўла ишонч ҳосил қиласиз.

¹ Мирзакулов Г. У. Шу диссертация. 126-127-б.

² Xожиев А. «Сўзнинг морфем таркиби» масаласига доир / Ўзбек тили ва адабиёти, 1998. 2-сон, 3-б-б.

³ Лингвистический энциклопедический словарь. -С. 312-313.; Xожиев А. Тилшунослик терминларининг изохли лугати. Тошкент: ЎзМЭ, 2002. 65-б.

Тилни система сифатида ўрганишга жиддий эътибор қаратилиши муносабати билан ўзбек тилшунослигига (90-йиллардан бошлаб) морфема ва унинг турлари масаласида жуда бир янгича қараш юзага келди. Масалан, ўзбек тилини система сифатида, назарий планда ўрганишга маҳсус багишланган баъзи ишларда, лексема ва аффикслардан ташқари, ёрдамчи сўзлар (боғловчи, кўмакчи ва юкламалар), ундов ва таклид сўзлар, умуман, фонемадан бошқа лисоний бирликларни «морфема» деб аташ тамойили юзага келди¹. Лекин бундай фикр, яна бир бор алоҳида таъкид билан айтамизки, бевосита ўзбек тили материалларини тадқиқ этиш натижасида юзага келган эмас, балки ўзга тилларга оид адабиётлардаги қарашларнинг ўзбек тилшунослигига киритилган кўчирмасидир, холос. Шунинг учун ҳам морфемаларга бундай қараш асосида ёндашиб иш кўриш ўзбек тилшунослигига бирон-бир ижобий натижа бергани йўқ, аксинча, ўзига хос хатоликларни, чалкашликларни, бир-бирига зид фикр-мулоҳазаларни келтириб чиқарди, умуман олганда, салбий натижаларга олиб келди. Оқибатда бундай қараш жамоатчилик (мутахассислар) томонидан қўллаб-кувватланимади ва тез орада барҳам топди². Булар ҳақида ишнинг кейинги қисмида ҳам (ўз ўрнида) фикрлар билдирилади.

Хуллас, ўзбек тилшунослигига морфемаларнинг моҳияти, турлари каби масалаларда шу вақтга қадар бир фикрга келинганича йўқ.

Ўзбек тилшунослигига, кай даражада бўлса-да, морфема ҳақидаги қарашларда ижобий томон силжишлар, морфеманинг моҳиятига мос келадиган фикрлар ҳам юзага келганлигини, бундай ҳолатлар давом этажанини кўрдик. Бироқ, энг ачинарлиси шундаки, яқин кунларда яратилган баъзи ишларда, аниқроғи, ўзбек тили системаларининг шаклланиши билан боғлиқ назарий масалаларга жиддий эътибор қаратилган ва бу борада сезиларли ютукларга эришилаётган бир пайтда, морфеманинг моҳиятига мутлақо мос келмайдиган таъ-

¹ Н е ъ м а т о в Ҳ.. Р а с у л о в Р. Юкорида кўрсатилган асар; Н у р м о - н о в А. ва бошқалар. Юкорида кўрсатилган асар, 46-51-б.

² Булар ҳақида “Тил курилишининг асосий бирликлари юзасидан мулоҳазалар” номи билан чоп этилган учта маколамиизда маҳсус тўхталганимиз учун бу ўринда уларни тақрорлаб ўтирумаймиз. Қаранг: Ўзбек тили ва адабиёти, 2004. 3-сон, 29-31-б.; Ўзбек тили ва адабиёти, 2005. 5-сон, 33-43-б.; Бундан ташқари, «Ўзбек тилшунослигининг долзарб муаммолари» сарлавҳаси остида морфем бирликлар ҳақида маҳсус маколамиз чоп этилган (Ўзбек тили ва адабиёти, 2007, 4-сон, 30-37-б.).

риф-тавсифлар кўзга ташланяпти. Булар, шубҳасиз, морфеманинг тил бирлиги сифатидаги мохиятини белгилашда, ёритишда тадқиқотчи ишини қийинлаштиради, нотўғри хуносаларга келишига сабаб бўлади. Эътибор беринг: «Морфемика сўзнинг номустақил таркибий қисмлари ҳақидаги таълимот... Сўзнинг ўзакдан бошқа қисмлари эса ундан айрича кўлланмайди ва маъно англатмайди. Шунинг учун улар *морфемалар дейилади*¹». Биринчидан, «сўзнинг номустақил таркибий қисми» деган тушунчанинг ўзи йўқ, яъни «сўзнинг номустақил таркибий қисми» бирикмаси хеч нарсани, жумладан, бирон-бир лингвистик тушунчани билдирамайди. Шундай экан, тилшуносликнинг «сўзнинг номустақил таркибий қисми»ни ўрганадиган бўлими (таълимот) борлиги ҳақида гап бўлиши мумкин эмас (Ўзи йўқ нарса ҳақида қандай таълимот бўлиши мумкин?!). Иккинчидан, «ўзакдан айрича кўлланмаслик, маъно англатмаслик» морфеманинг мохияти эмас. Алоҳида (мустақил) кўлланмайдиган тил бирлиги морфема бўлавермайди. Масалан, аффикс юкламалар (Булар ҳақида ўз ўрнида тўхтalamиз). Кўриниб турибдики, «морфемика» ва «морфема»га берилган таъриф-тавсиф на морфеманинг мохиятини, на тилшуносликнинг бу тил бирлигини ўрганувчи бўлими борлигини қайд эта олади. Иш давомида билдирилган фикр-мулоҳазалар ҳам, морфеманинг мохиятини тушунишга мос ҳолда, «морфема» деб аталиши мумкин бўлган тил бирлигининг мохиятига мос келмайдиган гаплардан бошқа нарса эмас. Эътибор беринг: «Тилимизда ёрдамчи сўзлар деб аталувчи катта гурух ҳам бор бўлиб, улар лексема ва морфемалар сирасида «оралиқ учинчи» мақомида бўлади. Шунинг учун уларни лексема-морфема дейиш мумкин. Ёрдамчи сўзларнинг лексемалиги шундаки, улар мустақил сўзлар каби ажралганлик хусусиятига эга. Бироқ шаклланувчиликка эга эмас. Лугавий маънога эга эмаслиги уларни морфемик майдон сари тортиб туради»². Биринчидан, «ёрдамчи сўзлар» деб аталувчи сўзларнинг барчасини («кўмакчи», «боғловчи» ва «юклама» деб аталувчи сўзларни) бир гурухга киритиш мумкин эмас, яъни уларни маъно ва вазифасига кўра бир турдаги тил бирлиги хисоблаш мумкин эмас. Иккинчидан, «оралиқ учинчи» бирикма-

¹ С а й ф у л л а е в а Р. ва бошқалар. Ҳозирги ўзбек адабий тили. Морфология. II (ўкув кўлланмана). Тошкент: 2005. 4-б.

² С а й ф у л л а е в а Р. ва бошқалар. Юкорида кўрсагилган ўкув кўлланмаси, 4-б.

си бирон-бир тил бирлиги, жумладан, сўз (лексема) билан морфема оралигидаги тил бирлигини қайд эта олмайди ва «лексема-морфема» «термини»ни қўллаш ҳам кулги қўзғатишдан бошкага хизмат килмайди. Учинчидан, ёрдамчи сўзларнинг «шаклланувчиликка эга эмаслиги», бу нарса «уларни морфемик майдон сари тортиб туриши» ҳақидаги гаплар бирон-бир моҳиятга эга бўлган тил бирлигини, жумладан, сўз ва лексеманинг моҳиятини қайд эта олмайди, шунингдек, бу тил бирликлари ўртасида «оралиқ учинчи» тил бирлиги борлигини ҳам исботлай олмайди ва ҳоказо. Кўлланманинг бор-йўғи икки ярим бетини ташкил этувчи шу қисмида морфеманинг моҳиятига мос келадиган бирон-бир янги фикрни кўрмадик. Аксинча, морфема ҳақида айтилган бошқа гаплар ҳам афсус ёки кулги уйготади, холос. Бу ўринда уларнинг барчасига тўхташни лозим топмаймиз. Лекин ҳар бири ҳақида иш давомида, ўз ўрнида, фикр-мулоҳазаларимизни билдириб ўтамиз.

Морфеманинг моҳияти

«Морфема сўзнинг маъноли, бошқа маъноли қисмларга бўлинмайдиган таркибий қисми» ёки «морфема маъноли, бошқа маъноли қисмларга бўлинмайдиган энг кичик тил бирлиги» деган таърифлар морфеманинг моҳиятини тўла ва тўғри акс эттира олмаслигини кўрдик. Бу таъриф, умуман, ўз маъно жиҳатига эга бўлган тил бирликларини (лисоний бирликларни) фонемадан (фонем бирликлардан) фарқлади, холос. Бирок ўз маъносига эга, бўлинмас тил бирликларидан бирор турининг моҳиятини қайд этолмайди. Ўзбек тилшунослигига морфемаларнинг моҳияти ҳақида шу вактга қадар аниқ бир фикрга келинмаганлигининг сабаби ҳам ана шу нотўғри таъриф (таърифлар) асосида иш кўришда эди (Юкорида маълум даражада бунинг гувоҳи бўлдик).

Ўзбек тилини система сифатида ўрганишда унинг назарий масалаларига жиддий эътибор қаратилиши билан бир қаторда ҳар бир системани шакллантирувчи бирликни белгилаш ва моҳиятини ёритиши диккат-эътиборда бўлди. Бунинг натижасида ўз мазмун ва ифода жиҳатига эга бўлган сўз билан морфема бир-биридан фарқли тил бирликлари экани маълум бўлди, ўз исботини топди. Демак, энди-

ги вазифа улардан ҳар бирининг ўзига хос хусусиятини, моҳиятини белгилаш ҳамда уни тўғри ва аник қайд этувчи таърифни топиш эди ва шундай таърифлар юзага кела бошлади. Бу ўринда улардан факат морфемага берилган таърифларга кисқача тўхттаймиз.

Лисоний бирлик сифатида морфемага (ўзбек тилшунослигида) биринчи бўлиб X. Неъматов ва Р. Расуловларнинг ишида маҳсус таъриф шакллантирилди ва турлари хақида ҳам кенг маълумот берилди: «Морфема тилнинг энг кичик, маъноли бирлиги бўлиб, бошқа маъноли қисмларга бўлинмайди... (сувчи) сўзи таркибидағи [сув] ва [-чи] мана шундай бирликларга – морфемаларга мисол бўла олади.

Морфемалар лугавий ва қўшимча (ёки умумлашма), грамматик-аффиксал морфемаларга ажратилади. Бунда [сув] лугавий морфема, [-чи] эса қўшимча (умумлашма, аффиксал, грамматик) морфема сифатида қаралади¹.

Лексема морфемадан бутунлай фарқли бўлган тил бирлиги экани ўзбек тилшунослигида ўз исботини топгани юкорида айтилди. Бу ҳақда проф. Ш. Раҳматуллаев, жумладан, шундай дейди: «Тил бирлиги учун муҳим жиҳат – мазмун жиҳати нуқтаи назаридан лексема билан морфема кескин фарқ қиласди. Бу икки бирликтининг тил курилишининг бошқа-бошқа босқичларига мансублиги ҳам уларнинг айрим-айрим бирликлар эканини тасдиқлайди»². Бу фикрга қўшилмаслик мумкин эмас. Муҳими шундаки, морфема билан сўз (лексема) тил қурилишининг бошқа-бошқа босқичларига мансуб бирликлар эканлигининг тан олиниши билан ўзбек тилида «ўзак морфема» деб аташ мумкин бўлган тил бирлиги йўқлиги маълум бўлди ва «ўзак», «ўзак морфема» терминлари ҳам истеъмолдан чиқди. Бу эса морфема билан боғлиқ тил ҳодисаларининг моҳиятини ёритишда, тўғри белгилашда муҳим роль ўйнади. Лекин сўз (лексема) билан морфеманинг моҳияти, уларнинг ўзаро муносабати ҳамда морфеманинг тил системасига муносабати каби масалаларда католиклар, камчиликлар давом этяпти.

Юкорида кўрдикки, морфема сўзининг таркибий қисми деб қаралган вақтларда «ўзак «асосий (етакчи) морфема», аффикс эса «ёрдамчи (эрғаш) морфема» деб ҳисобланар эди. Ана шу ҳолат сўз ва

¹ Неъматов X., Расулов Р. Юкорида кўрсатилган асар, 12-б.

² Раҳматуллаев Ш. Юкорида кўрсатилган рисола, 17-б.

морфема бир-биридан бутунлай фарқли тил бирлиги деб тан олингандан кейин ҳам кузатиляпти. Эътибор беринг: «Бу икки тил бирлигидан лексема асосий, морфема эса ёрдамчи» (Ш. Раҳматуллаев, Шу рисола, 16-б.). Бизнингча, лексема билан морфемани вазифасига (моҳиятига) кўра киёслаш ва бирини асосий, иккинчисини ёрдамчи деб баҳолаш мумкин эмас. Лексеманинг моҳияти хақида тилшуносликнинг бошқа бўлимида баҳс юритилади. Бу ўринда морфема хақидаги карашларга ўз муносабатимизни билдиришда давом этамиз.

Морфеманинг лексемадан бошқа тури (турлари), жумладан, -чи аффикси ҳақидаги фикрга келганда шуни айтиш керакки, «кўшимча», «умумлашма», «аффиксал» («аффикс»), «грамматик» сўзларининг бирортаси умуман морфеманинг эмас, ҳатто морфеманинг бирор турининг, жумладан, -чи морфемасининг моҳиятини аник қайд эта олмайди (Буларнинг ҳар бири ҳақида иш давомида, ўз ўрнида фикр билдирамиз).

Ўзбек тилидаги морфемалар ҳақида фикр юритилган ишларга назар ташланса, уларнинг деярли барчасида гап морфемага таъриф беришдан бошланади ва бу таъриф деярли бир хил: «маъноли, бошқа маъноли қисмларга бўлинмайдиган, грамматик маъноли» ва ш.к. Шунинг ўзиёқ ўзбек тилшунослигига морфемага берилаётган таъриф шу тилнинг материалларини тадқиқ этиш асосида берилган таъриф эмас, балки рус тилшунослигига оид ишлардан кўчирилган, тайёр ҳолдаги таъриф эканлигини кўрсатади. Шунинг учун ҳам ўзбек тилидаги «аффиксал морфема» деб аталаётган ҳодиса морфеманинг моҳиятини қисман акс эттиради, холос.

Ўзбек тилини система сифатида ўрганишга багишлиланган ишларда морфеманинг аффиксал морфемадан бошқа турлари, ҳатто «оралиқ учинчи» деб аталиши лозим бўлган тури мавжудлиги ҳақида фикр билдирилди ҳамда уларнинг лексемаларга ва грамматик морфемаларга тўлиқ teng бўла олмаслиги таъкидланди¹ (Бу ҳақда ишнинг аввалги қисмида ҳам гапирилди). Шунга яқин фикр-мулоҳазалар яна айрим ишларда ҳам билдирилди. Эътибор беринг: «8-§. Морфемалар мазмун ва вазифасига кўра тўрт турга бўлинади: 1) лексик морфемалар; 2) сўз ясовчи (деривацион) морфемалар; 3) грамматик маъно ифодаловчи морфемалар; 4) оралиқ морфемалар (ундов лексема, мо-

¹ Нематов Х., Расулов Р. Юқорида кўрсатилган асар. 12-б.

дал морфемалар)»¹. Лекин бу ишларда ҳакиқатда ҳам ўзбек тилида морфеманинг шундай турлари борлиғи, умуман олганда, морфеманинг моҳияти тӯғри белгилангани йўқ. Бунинг сабаби (сабаблари) маҳсус мақолаларимизда айтилгани боис бу ўринда уларни такрорлаб ўтирумаймиз².

Морфемаларнинг ўз ифода ва мазмун жиҳатига эга бўлган тил бирлиги эканини, бу жиҳатдан лугавий бирлик, яъни сўз (лексема) билан ўхшаш ва фарқли белгиларга эга бўлишини кўрдик. Шунингдек, морфеманинг ҳар бир тури умумий ва хусусий белгиларга эга бўлади. Умумий хусусияти (белгиси) билан муайян турга бирлашса, ҳар бир турга мансуб морфемалар ўзига хос хусусиятлари билан бир-биридан фарқланади. Демак, биринчи навбатда, ана шундай белгилари асосида морфемаларнинг турларини белгилаб олиш керак бўлади. Бусиз морфемаларга умумий таъриф бериш ҳам мумкин эмас. Ўзбек тили морфемалари ҳакида фикр юритилган ишларда морфемаларга берилган таърифлардан бирортасининг талабга жавоб берга олмаслигининг сабаби ҳам ана шунда. Демак, асосий вазифа ишни морфемага таъриф беришдан эмас, балки морфеманинг ҳар бир турини, ҳар бир турга мансуб морфемаларнинг умумий ва хусусий белгиларини (ҳар бир турнинг моҳиятини) аниқлашдан бошлаш керак бўлади.

Ўзбек тилида сўз ясалиши ва сўз шаклининг ясалишига бағишлиланган, шунингдек, сўзнинг сўз ясалиши ва шакл ясалиши (морфологик) таркибига оид ишларимизда сўз (лексема)нинг тил системаларига мансуб, муайян тил системасини шакллантирувчи тил бирликларининг ясалишида асос (ясалиш асоси) вазифасини ўташи айтилган³. Масалан, *иичиларни* сўзида *иии* қисми *иичи* сўзининг ясалиши учун асос (сўз ясалиш асоси), -чи эса сўз ясовчи вазифасини баражаряпти; *иичиларни*, *иичиларни* сўз шаклларида эса *иии* ва *иичи* шакл

¹ Нурмонов А. ва бошқалар. Юкорида кўрсатилган асар. 42-б.

² Xожиев А. Тил қурилишининг асосий бирликлари юзасидан мuloҳазалар (Лугавий ва грамматик морфема ҳакида) / Ўзбек тили ва адабиёти. 2004. 3-сон, 29-35-б.; Xожиев А. Тил қурилишининг асосий бирликлари юзасидан мuloҳазалар / Ўзбек тили ва адабиёти. 2004. 5-сон, 33-43-б.; Xожиев А. Ўзбек тилшунослигининг долзарб муаммолари (7-макола) / Ўзбек тили ва адабиёти, 2007. 4-сон, 30-37-б.

³ Xожиев А. Сўзнинг морфологик ва сўз ясалиш структураси. 29-33-б.; Xожиев А. Ўзбек тилида сўзнинг морфологик гаркиби масаласи / Ўзбек тили ва адабиёти. 1998. 1-сон, 29-33-б.; Xожиев А. Ўзбек тили сўз ясалиши тизими. Тошкент: Ўқитувчи, 2007.

яасалиш асоси, *-лар*, *-ни* шакл ясовчи (кўплик ва тушум келишиги шаклини ясовчи) вазифасини бажаряпти. Демак, ўз ифода ва мазмун жиҳатига эга бўлган тил бирлигининг бир тури, сўздан фарқли ҳолда, тил системасини шакллантирувчи тил бирлигини ясаш, хосил қилиш учун хизмат қиласди. Ана шу умумий хусусияти – **ясовчилик белгиси** билан у «тил қурилишининг асосий бирликлари» деб юритилаётган бирликлардан фарқланади ва шундай тил бирлигига нисбатан *морфема* терминини кўллаш, уларни *морфема* деб аташ тўгри, асосли бўлади, деб ўйлаймиз. Аниқроқ қилиб айтганда, тил системаларини шакллантирувчи тил бирлигини – ясама сўз ёки сўз шаклини ясаш (хосил қилиш) морфеманинг моҳияти ҳисобланади. Демак, ўзбек тили морфемаларини белгилашда худди шу умумий хусусият, умумий вазифа асосида иш кўриш кутилган, ижобий натижаларга олиб келади. Жумладан, морфемага таъриф беришда ҳам унинг қайд этилган моҳиятига асосланиш керак бўлади. Шундай қилинганда, морфеманинг таърифи қуйидагича бўлиши мумкин: **Морфема** – ўз ифода ва маъно жиҳатига эга бўлган, сўз ясаш ёки сўз шаклини ясаш учун хизмат киласидиган лисоний бирлик.

Морфеманинг бу таърифига эътибор берилса, унда морфеманинг икки муҳим белгиси: 1) ўз ифода (шакл) ва мазмун жиҳатига эгалиги; 2) вазифаси – сўз ясаш ва сўз шаклини ясаш вазифаси қайд этилган. Демак, таърифда морфеманинг вазифасига кўра икки тури борлиги ўз ифодасини топган. Ўйлаймизки, функционал бирлик ҳисобланувчи морфеманинг таърифи учун шунинг ўзи етарли, яъни унда морфеманинг функционал бирлик сифатидаги асосий моҳияти ўз ифодасини топган. Морфемани ва у билан боғлиқ тил ҳодисаларини, уларга хос моҳиятни белгилашда морфемага хос ана шу хусусият асосида ёндашиб талаб этилади. Шу билан бирга, морфеманинг ифода ва маъно жиҳати билан боғлиқ ҳодисалар ҳам аниқ ёритилиши талаб этилади. Бунда икки нарсага эътибор қаратилиши керак бўлади: 1) морфеманинг ўз маъно жиҳатига эга бўлган тил бирлиги сифатида сўз (лексема)дан фарқи, яъни морфемага хос маънонинг моҳияти нимадан иборат эканлиги; 2) морфеманинг ифода жиҳатига кўра тури масаласи.

Морфеманинг маъноси масаласи. Морфемага хос ҳар қандай белги-хусусиятнинг, жумладан, морфемага хос маънонинг моҳияти хақида гап борганида, ҳамма вақт унинг (морфеманинг) функционал

тил бирлиги экани назарда тутилиши керак бўлади. Шу асосда иш кўрилганда, морфемага хос маъно ҳам мустакил маъно бўла олмаслиги аён бўлади. Масалан, лексик маъно «семема» деб юритилиши, семема эса семалардан таркиб топиши маълум. Морфемада эса бундай ҳол қузатилмайди. Шуни назарда тутиб бўлса керак, морфеманинг маъноси баъзи ишларда семага тенглаштирилади¹. Бироқ бу фикрга ҳам кўшилиш қийин. Чунки морфема семемага эга эмас экан, унинг семаси ҳақида гап бўлиши ҳам мумкин эмас. Морфема, ясовчи бирлик сифатида, мустакил қўлланиши мумкин бўлган тил бирлиги билан, жумладан, сўз билан қўлланади ва унинг маъноси ҳам ўзи бириккан бирлик доирасида, яъни ясама сўз ва сўз шаклида воқеланади. Масалан, *ҳосилдор*, *ҳосилни* сўзларидағи *-дор*, *-ни* морфемаларининг маъноси ясама сўз ва тушум келишиги шаклини ҳосил қилганда воқеланади, юзага чиқади. Бу – бир томондан. Иккинчи томондан, ҳар қандай морфеманинг қўлланиши, яъни сўз ясави ёки сўз шаклини ясави бир сўз билан чегараланмайди. Ҳатто сўз ясовчи морфемалар ҳам бирдан ортиқ сўзлардан янги сўз ҳосил қилади. Ҳар бир сўз ясовчи морфеманинг маъноси ўзи ҳосил қилган сўзлар учун умумий бўлади. Шу тарзда ҳар бир сўз ясовчи морфема муайян маънога эга бўлган сўзлар (ясама сўзлар) гурухини юзага келтиради. Масалан, сўз ясовчи *-чи* морфемаси «шахс» маъноли сўз (от)лар ясади. Бу сўзлар шу маъноси билан ясама отларнинг бир гурухини, турини юзага келтиради. Ана шундай маъно «сўз ясалиши маъносига» деб юритилади². Бундай «умумийлик» хусусияти шакл ясовчи морфемаларда янада кучли. Масалан, *-лар* морфемасининг от турқумига мансуб деярли барча сўзлардан кўплик маъноли сўз шаклини ясашининг ўзиёқ буни аник кўрсатади. Шу хусусиятлари таъсирида баъзи ишларда морфемага хос маъно «умумлашма маъно», морфеманинг ўзи эса «грамматик морфема» деб қаралади³. Лекин бу биримга терминлар морфемага хос маънени, морфеманинг моҳиятини ҳам тўгри қайд эта олмайди (Булар ҳакида морфеманинг моҳияти юзасидан фикр билдирилган ўринда тўхтадик).

¹ Миртоҷиев М. Семаларнинг сўз семеси таркибида тутган ўрнига кўра типлари //Тильшуносликнинг долзарб масалалари (илмий маколалар тўплами). IV. Тошкент: 2008. 30-36-б.

² Ҳожиев А. Ўзбек тили сўз ясалиши тизими. Тошкент: Ўқитувчи, 2007. 36-38-б.

³ Нематов Ҳ., Расулов Р. Юкорида кўрсатилган асар. 12-б.

Хуллас, сўз ясовчи морфемаларга хос умумий маънони сўз ясалиши маъноси, сўз шаклини ясовчи морфемаларга хос умумий маънони (сўз шакли маъносини) грамматик маъно (морфологик маъно) деб юритиш мумкин. Булар ҳақида тилшуносликнинг «Сўз ясалиши» ва «Морфология» бўлимларида кенг фикр юритилади. Бу ўринда шуни алоҳида таъкидлашни истардикки, ясама сўз ва сўз шаклида воқеланадиган маъно (сўз ясалиши ва сўз шаклига хос умумий, бирлаштирувчи сема) ясама сўз ва сўз шакли маъноси таркибига мансуб бўлади. Ясама сўзлар ҳам, сўз шакллари ҳам ана шу умумий сема асосида ўзаро муносабатда бўлади, бундай муносабатлар билан ясама сўз ва сўз шаклларининг гурухлари юзага келади. Морфемалар эса, кўп марта таъкидланганидек, ана шундай гурухларни (парадигмаларни) шакллантирувчи, тузувчи тил бирликларини, яъни ясама сўз ва сўз шаклларини ясаш учун хизмат қиласди, холос.

Морфемаларнинг ифода жиҳатига кўра турлари

Тил бирликларидан бўлмиш сўз (туб сўз) ҳам ўз ифода ва мазмун жиҳатига эгалиги адабиётлардан маълум. Масалан, *даракт*, *ѓўзл*, *югу* сўзларининг ифода жиҳатини уларни ташкил этувчи фонемалар белгилайди. *-чи* (*ёрдамчи*), *-лаш* (*ёрдамлаш*), *-чан* (*ҳаракатчан*) морфемаларининг ифода жиҳатини ҳам уларнинг таркибидаги фонемалар комплекси ташкил этади. Ўзбек тилидаги морфемалар, асосан, сўзга қўшиб ёзилади, яъни аффикс (кўшимча) кўринишида бўлади. Шу билан бирга ифода жиҳатига кўра сўз кўринишида бўлган, лекин маъно ва вазифасига кўра морфема ҳисоблаш мумкин бўлган бирликлар ҳам бор. Шунга кўра морфемаларни аффикс морфемалар ва сўз морфемалар каби икки турга бўлиш мумкин. Буларнинг ҳар бири ҳақида алоҳида тўхташга тўғри келади.

Аффикс морфемалар. *Аффикс* лотинча сўз (affixus) бўлиб, «бирлаштирилган», «бириктирилган» деган маънони билдиради. Демак, у сўзга қўшиб ёзилади, худди шу хусусиятига кўра «кўшимча» деб юритилади. Бу хусусияти билан «морфема» деган маънони англатмайди. Лекин амалда морфема маъносида ҳам қўлланади. Масалан, «сўз ясовчи *-ли* аффикси», «кўплик шаклини ясовчи *-лар* аффикси» деганда, *аффикс* сўзи «морфема» маъносида қўлланади.

Ўзбек тилидаги баъзи лугавий бирликлар, яъни сўзлар морфема вазифасида ҳам кўлланади (морфемалик хусусиятига эга) ва сўзга қўшиб ёзилади. Масалан, қабуљона, дорихона, дарсхона; таълифнома сўзларидағи хона, нома. Бундай бирликлар адабиётларда «аффиксоид» деб юритилиши ҳам маълум. Лекин, бизнингча, бундай терминни кўллашга эҳтиёж йўқ. Чунки сўзга қўшиб ёзилиши ҳамда морфемага хос вазифага эгалиги уларни ҳам аффикс (қўшимча) деб атайдеришга асос бўла олади.

Морфем бирликни белгилашда тил бирлигининг сўз ясаш, сўз шаклини ясаш ёки бундай вазифага эга эмаслигини асосга олиш кераклиги юкорида айтилди. Аффикс морфемаларни белгилашда ҳам худди шу белги асосида иш кўриш талаб этилади. Масалага шу талаб асосида ёндашилганда, ўзбек тилидаги барча аффиксларни морфема ҳисоблаш мумкин бўлавермаслиги маълум бўлади.

Сўз ясовчи морфемалар сўз ясалиши системасини, шакл ясовчи морфемалар морфологик системани шакллантирувчи тил бирлигини ҳосил қилишини кўрдик. Ўз-ўзидан, шундай вазифага эга бўлмаган аффикслар морфема бўла олмайди. Масалан, равиш ясовчи деб қаралаётган аффикслар, модал маъноли аффикслар, -ку, -гина каби юклама аффикслар шулар жумласидандир. Бундай аффиксларнинг баъзилари бирор сўз туркумига мансуб сўзлардангина сўз шаклини ясаса (масалан, кичрайтиш ифодаловчи -ча аффикси: қуичча, уйча каби), юклама ва боғловчи аффикслар сўз ясаш ёки сўз шаклини ясаш вазифасига эга эмас (Бундай аффиксларнинг моҳияти ҳақида сўз ясалиши ва морфологик системаларга багишланган ишларда фикр юритилади).

Сўз морфемалар. Ўзбек тилшунослигида шу вактга кадар ифода жиҳатига кўра аффиксларга зидланадиган (аффиксдан фарқланадиган), моҳиятан морфема ҳисобланиши мумкин бўлган «сўз морфемалар» ҳақида фикр юритилгани йўқ, «сўз морфема» термини кўллангани ҳам йўқ. Бирок ўзбек тили материаллари бу тилда, жуда оз бўлса-да, морфеманинг шундай тури борлигини кўрсатади.

Маълумки, ўзбек тилшунослигида сўзлар лугавий маънога эга ёки эга эмаслигига кўра икки асосий гурухга бўлинади: 1) мустақил сўзлар; 2) мустақил бўлмаган сўзлар. Демак, бундай гурухлаш сўзларга хос маъно (маънонинг моҳияти) нуқтаи назаридан бўлса, барчасини «сўз» дейиш ифода жиҳатига

кўрадир. Бирок, нима бўлишидан қатъи назар, сўзларни бундай икки гурухга ажратиш тилни система сифатида ўрганишда аҳамият касб этмайди. Чунки «*мустақил сўз*», «*ёрдамчи сўз*», «*кўймакчи*», «*юклама*» каби терминлар тил системасини шакллантирувчи бирон-бир тил бирлигини аниқ қайд эта олмайди. Шундай экан, тилни система сифатида ўрганишда, биринчи навбатда, системани шакллантирувчи, системанинг шаклланишида қатнашувчи тил бирликларини, шу билан бирга, уларнинг моҳиятига мос (моҳиятини аниқ ва тўғри акс эттирадиган) терминларни белгилаш керак бўлади.

Ўзбек тили лугавий системасининг тил бирлиги (лугавий система шакллантирувчи тил бирлиги) сўз экани маълум. Лугавий маънога эга бўлмаган, «сўз» деб юритиладиган тил бирликларининг моҳиятини, қандай бирлик эканини белгилаш ўзбек тилшунослигининг муаммоларидан бири бўлиб турибди.

Кейинги вактларда нашр этилган баъзи ишларда сўзлар лугавий маънога эга ёки эга эмаслигига кўра икки турга – **лугавий маъноли** ва **лугавий маъносиз** сўз (лексема)ларга бўлиняпти ҳамда лугавий маънога эга эмаслари ёрдамчи сўз (лексема) деб аталяпти¹. Лекин сўз (лексема)ларни бундай гурухларга ажратиш ва шундай номлар билан аташ илмий-назарий жиҳатдан асосга эга бўлмаганидек, амалий жиҳатдан ҳам бирор аҳамият касб этмайди.

Системани ташкил қилувчи тил бирликлари ҳақида гап борганида айтилдики, муайян системага мансуб тил бирлиги шу системани шакллантириш учун хизмат қиласи, система шу тил бирлиги асосида шаклланади. Жумладан, сўзнинг лугавий системани шакллантирувчи бирлик экани маълум. Шунингдек, сўзнинг лугавий системани шакллантиришида унинг маъно жиҳати (маъноси, семемаси) асосий роль ўйнаши ҳам маълум. Демак, «ёрдамчи сўз» («ёрдамчи лексема») деб аталаётган бирликлар лугавий маънога эга бўлмас экан, уларни сўз (лексема) деб аташ ҳам тўғри бўлмайди. Чунки булар лугавий бирликка (сўзга) хос бўлган моҳиятини йўқотган. Шунинг учун ҳам лугавий системага мансуб (лугавий системани шакллантирувчи) бирлик бўла олмайди.

Хуллас, сўз (лексема) лугавий маъносини йўқотиши билан, умуман, «ёрдамчи сўз»га эмас, балки муайян маъно, вазифага эга бўлган

¹ Н е ъ м а т о в Ҳ.. Р а е у л о в Р. Юқорида кўрсатилган асар, 57-б.: Ж а м о л х о н о в Ҳ. Ҳозирги ўзбек адабий тили, 2-кисм. Тошкент: 2004. 6-б.

бошқа бир бирликка – тил бирлигига айланади. Аникрок килиб айтганда, «ёрдамчи сўз» бирикмаси тил системасига мансуб бўлган бирон тил бирлигини қайд эта олмайди. Демак, унинг қандай тил бирлиги эканини, мохиятини белгилаш, шу асосда бу тушунчанинг атамасини белгилаш асосий вазифа ҳисобланади. Бунда икки ҳолатни фарқлаш керак: 1) лугавий маъносини бутунлай йўқотган бирлик. Масалан, учун, билан, ҳамда, қадар бирликлари; 2) лугавий маъносини сақлаган, шу билан бирга, функционал бирликларга хос вазифаларда кўлланадиган сўзлар. Масалан, олдин, сабабли, қарши, бошида ва бошқалар. Буларга нисбатан «сўз» атамасини кўллашга эътиroz бўлиши мумкин эмас. Лекин лугавий маънога эга бўлмаган ҳолларда қандай бирлик ҳисобланишини ва аталишини ҳам айтиш талаб этилади.

Биринчи турдаги, яъни лугавий маъносини йўқотган билан, учун, қадар каби бирликларга нисбатан сўз атамасини кўллаш-кўлламаслик масаласига келганда шуни айтиш керакки, уларни «сўз» дейиш факат ифода жихатига кўрадир. Бунда «сўз» атамаси уларни (билан, учун, қадар кабиларни) аффиксдан фарқлаш учун кўлланади. Бизнингча, бунга эътиroz бўлиши мумкин эмас. Чунки, масалан, қаламни сўз шаклидаги «-ни» аффикс деб номланар экан, қалам билан шаклидаги « билан» ни сўз дейиш, сўз деб ифодалашдан бошқа илож ҳам йўқ. Қолаверса, аффикс сўзи ҳам тилнинг бирор системасига мансуб, системани шакллантирувчи бирлики номловчи термин эмас. Бошқача айтганда, «-ни» тил бирлиги сифатида **морфема**, ифода жихатига кўра (кўшиб ёзишилига кўра) унинг атамаси **аффикс**. Аффикснинг олдидан чизикча қўйилиши (-ни) эса, унинг кўшиб ёзишилини кўрсатади, холос. «Ёрдамчи сўз» «модал сўз» кабилардаги «сўз» ҳам худди шундай хусусиятга эга.

Аффикс морфемаларнинг тадкиқида кўрдикки, уларнинг бир тури сўз ясади, иккинчи тури сўз шаклини ясаш учун хизмат қиласди. Сўз морфемаларда бундай ҳолат кузатилмайди. Аникроқ қилиб айтсак, ўзбек тили материалыни бу тилда сўз шаклини ясовчи сўз морфема борлигини тасдиқламайди. Шу боис бу масалани сўз ясалиши ва сўз шаклининг ясалиши мисолида, ясама сўз ва сўз шаклининг мохиятидан келиб чиқиб ҳал этишга тўғри келади.

Масалага шу асосда ёндашилса, ўзбек тилидаги қил (эт, айла) ва бўй феълларини факат бир вазифасидагина, яъни феъл ясовчи ва-

зифасидагина морфема (сўз морфема) хисоблаш мумкин. Масалан, *қил* (эт, айла) ва бўл феъллари сўз ясаш учун хизмат қиласди: *роҳат қилимоқ*, *тасдиқ қилимоқ*, жабор этмоқ, *фарёд айламоқ*, *сарф бўлмоқ* ва бошқалар. Бу феъллар таркибидаги қил, эт, айла, бўл феъллари -лан, -ла феъл ясовчи морфемалари билан бир хил маъно ва вазифага эга: *роҳат қилимоқ* – *роҳатланмоқ*, *тасдиқ қилимоқ* – *тасдиқламоқ*, *сарф бўлди* – *сарфланди*. Бинобарин, уларни ҳам, худди -ла, -лат аффикслари каби, морфема хисоблаш тўғри бўлади – шундай қилинади ҳам. Демак, улар умуман ёрдамчи сўз сифатида эмас, сўз ясовчи морфема – сўз морфема сифатида эътироф этилиши керак, улар ясама сўзни шакллантирувчи бирликлардир ва сўзга қўшиб ёзилмаслигидан қатъи назар, ясама сўзнинг таркибий қисми хисобланади.

Ўзбек тилида шундай ҳолатлар ҳам кузатилади, бир сўз бирдан ортиқ сўз билан бирикиб, муайян бир маънода кўлланади. Бу билан у сўз ясовчи бирликдек кўринади. Шунинг таъсирида ҳатто сўзга қўшиб ёзилади. Бу жиҳатдан қуйидаги бир факт эътиборга лойик. Ўзбек тилида *талааб* сўзи билан кўлланувчи эркталаб, *сувталааб*, *ҳақиқатталааб*, *тинчликталааб*, *қуёшталааб*, *фарзандталааб* каби бирликлар кузатилади. Буларда *талааб* сўзи боғланган сўздан англашилган нарсага талаб, эҳтиёж борлик маъноси сезилиб туради, шунингдек, бу маънонинг *талааб* сўзига мансублигини сезиш ҳам қийин эмас. Демак, бу сўзлар таркибида *талааб* сўзи ва у боғланган сўз ўз маъноси билан қатнашяпти. Шундай экан, эркталаб, *сувталааб* кабиларни тўла маънода сўз ясалиш асоси ва сўз ясовидан таркиб топган тил бирлиги – ясама сўз хисоблаш қийин. Лекин, шу билан бирга, улар таркибидаги «*талааб*»ни мустақил тил бирлиги ёки ёрдамчи сўз дейиш ҳам мумкин эмас, аксинча, у кўпроқ ясовчилик хусусиятига, яъни морфемага хос хусусиятга эга. Ана шунинг таъсирида, бундай бирликларнинг имлоси (қўшиб ёки ажратиб ёзиш) ҳақида ҳеч қандай қоида бўлмагани холда, уларнинг барчаси қўшиб ёзиляпти ва бунга эътиroz билдириб ҳам бўлмайди. Демак, булар ясама сўзга хос моҳият, *талааб* эса сўз ясовичига хос моҳият касб этиб боряпти. Бу эса ўзбек тилида сўзнинг морфемага ўтиш жараёни бўлганини ва ҳозир ҳам шундай жараён мавжудлигини тасдиқлади.

Хуллас, ўзбек тилида сўз ясалиши, асосан, аффикс морфемалар ёрдамида амалга оширилади. Шунинг учун ҳам аффикслар ёрдами-

да сўз ясалиши ўзбек тилида сўз ясалишининг асосий усули, айтиш мумкини, ягона усули ҳисобланади¹. Ўзбек тили сўз ясовчи морфемаларининг ифода жиҳати масаласида муаммо сифатида қаралиши мумкин бўлган ҳолат кузатилмайди. Сўз шакли (морфологик бирлиқ) нинг ифода жиҳати масаласи, аникроғи, сўз шаклининг сўз морфема ёрдамида ясалиши (шақл ясовчи сўз морфема бор-йўклиги) масаласи анча мураккаб бўлиб, бу борада нафақат ўзбек тилшунослигига, умуман, туркийшуносликда ўз ечимини кутаётган муаммолар етарли.

Ўзбек тилида сўз шакли, яъни морфологик система тил бирлиги ҳам, асосан, шакл ясовчи аффикс морфема ёрдамида ҳосил қилинади. Аникроғ қилиб айтганда, сўз туркumlарига мансуб морфологик категорияларнинг шакллари, асосан, аффикс морфемалар билан ясалади. Шу билан бирга, ўзбек тилида грамматик ва модал маъноларнинг; сабаб, пайт, қиёс каби муносабатларнинг «кўмакчи» деб юритиладиган «ёрдамчи сўзлар» билан ифодаланиши ҳам маълум. Ана шундай сўзларнинг асосий моҳияти масаласи ўзбек тилшунослигига шу вактга қадар ҳал этилгани йўқ.

Сўз шакли ҳақида фикр юритилган ўзбек тилшунослигига оид ишларда сўз шаклининг синтетик ва аналитик тури мавжудлиги қайд этилган. Уларда аффикс морфемалар билан ясалувчи сўз шакллари «синтетик шакл», ёрдамчи (кўмакчи) сўз билан ясаладиган шакллар «аналитик шакл» деб қаралиши ҳам мумкин. Лекин бу терминлар бир нарсани, яъни сўз шаклининг аффикс ёки сўз билан ҳосил бўлишини қайд этади, холос. Кўмакчи сўзларнинг сўз шаклини ҳосил қилиш-қилмаслиги эса аниқ белгиланмаган, ҳал этилмаган.

Аввало айтиш керакки, «ёрдамчи сўз»лар юзасидан туркийшуносликда, жумладан, ўзбек тилшунослигига жуда кўп ишлар қилинган. Илмий мақолалар, рисолалар, иирик монографиялардан ташқари шу мавзууда, айникса, «кўмакчилар» мавзусида номзодлик ва докторлик диссертациялари ҳам ҳимоя этилган (Уларни санаб ўтишга эҳтиёж бўлмаса керак). Бу ишларда, асосан, кўмакчиларнинг, жумладан, кўмакчи феълларнинг ифодалайдиган маъноларини ёритишга эътибор қаратилган. Тил бирлиги сифатида уларнинг моҳияти масаласига, яъни тил системасини шакллантириши нуқтаи назаридан қандай бирлиқ бўлиши масаласига деярли эътибор қаратилгани йўқ. Вахолонки,

¹ Карапг: Ҳожиев А. Сўз ясалиш усуллари / Ўзбек тили ва адабиёти, 1975. 4-сон; Ҳожиев А. Ўзбек тили сўз ясалиши тизими, 6-17-6.

бу масала соф назарий ва ниҳоятда мураккаб бўлиб, уни ҳал этмай туриб, кўмакчи сўзлар билан boglik тил ҳодисаларининг моҳиятини тўла ва тўғри ҳал этиб бўлмайди. Шу билан бирга, кўмакчилар билан boglik назарий муаммоларни ҳал этиш катта куч, назарий билим, етарли муддат, катта ҳажмдаги маҳсус иш (ишлар) бажарилишини такозо этади. Шу мақсадга қаратилган иш(лар)да кўмакчиларнинг шакл ясовчи бирлик бўлиш-бўлмаслиги, шунингдек, уларни морфема хисоблаш мумкин ёки мумкин эмаслиги масаласи ҳам ҳал этилади. Ана шу айтилганлар ва мавжуд фактларни эътиборга олиб, кўмакчиларни шакл ясовчи дейишдан, масалан, қалам билан, айтиб кўр кабиларни сўз шакли хисоблашдан, айниқса, кўмакчиларни морфема хисоблашдан тийилдик ҳамда сўз ясовчи ва сўз шаклини ясовчи тил бирлиги морфема бўлишини алоҳида таъкидлашни лозим топдик.

Морфема ва унинг ёрдамида ясалувчи ясама сўз ва сўз шаклининг моҳияти хақида гап борганида, яна қуйидаги уч масалага ҳам тўхтаб ўтишга тўғри келади: 1) морфема қўшиладиган қисмнинг қандай тил бирлиги бўлишини аниқ белгилаш; 2) ноль морфема масаласи; 3) «морфем система» масаласи.

Морфема қўшиладиган қисмнинг моҳияти

Биринчи масала юзасидан, яъни сўз ясовчи, шакл ясовчи морфема бирикадиган қисмнинг қандай тил бирлиги экани юзасидан адабиётларда билдирилаётган фикрлар ҳақиқатга тўғри келмайди. Морфема сўзниг таркибий қисми сифатида ўрганилган ишларда сўзниг маъноли қисмлари, жумладан, сўзниг морфема қўшиладиган қисми ҳам морфема деб қаралганлиги, у “асосий морфема”, “бош морфема”, “етакчи морфема” каби терминлар билан юритилганлиги ва бунинг тўғри эмаслиги айтилди. Шундай экан, ясама сўз ва сўз шаклидаги морфема қўшиладиган қисм қандай тил бирлиги бўлади, деган савонинг туғилиши табиий.

Аввало шунга эътибор қаратиш керакки, сўз таркибида ясовчи бирликдан (морфемадан) бошка, ундан фарқли моҳиятга эга бўлган қисм бўлар экан, унинг умуман сўз таркибига эмас, балки сўз ясалиши, ясама сўз ҳамда шакл ясалиши, сўз шаклига хос бирлик эканини тан олиш ва шу асосда иш кўриш талаб этилади. Масалага шу тарзда ёндашилганда, ясама сўз ва сўз шаклида ясовчи бирлик (морфема)

кўшиладиган қисмни «ясалиш асоси» («сўз ясалиш асоси», «шакл ясалиш асоси») деб юритиш маъкул бўлиши маълум бўлди (Аслида бу фикр ҳам Европа тилшунослигига оид ишлардан олинган). Натижада ана шу термин ўзбек тилшунослигига ҳам истеъмолга киритилди ва шу морфемадан бутунлай бошка моҳиятга эга бўлган бирликнинг ифодачисига айланди. Оқибатда, ясама сўз ва сўз шакли ҳақида фикр юритилган ишларда сўз ясалиш ва шакл ясалиш асосини морфема деб қараш барҳам топди. Бу билан морфеманинг ва у билан boglik бошка тил ҳодисаларининг моҳияти масаласида давом этиб келаётган турли хатоликлар ва чалкашликларга ҳам чек қўйила бошлади.

Бироқ, минг афсуски, ўзбек тилшунослигига морфема масаласида эришилган ижобий натижаларни хисобга олмаган ҳолда, бу борадаги янги-янги қарашларга ҳеч қандай муносабат билдирилмаган ҳолда морфемани «сўзнинг маъноли қисми» сифатида таърифлаш ҳамон давом этяпти. Бунинг қандай салбий оқибатларга олиб келганлигини юқорида кўрдик. Бундай таърифларнинг янги-янгилари кейинги ишларда ҳам кузатиляпти. Эътибор беринг: «Сўз маъноли қисмларга бўлинади. Унинг ҳар бир маъноли қисми, грамматик нуқтаи назардан, морфема дейилади. У ясалиш асоси, ясовчи ва сўз шакли морфемаларидан иборат. Бу морфемалар сўзнинг морфем таркибидир»¹. Кўриниб турибдики, морфема сўзнинг маъноли қисми экани тан олиниади. Морфемани бундай тушуниш бир неча йиллар илгари мавжуд эди. Бундай тушунишнинг хатолиги эса ўзбек тилшунослигига кўп марта исботланган. Таърифдаги янгилик сифатида тўрт нарсани айтиш мумкин: 1) «сўзнинг маъноли қисми, грамматик нуқтаи назардан, морфема бўлиши». Бироқ бу жумла бирон-бир моҳиятни қайд эта олмайди; 2) сўз ясалиш асосини ҳам морфема деб тушуниш – хато фикр; 3) ясовчи деганда фақат сўз ясовчи аффикс морфемани тушуниш – бу ҳам хато; 4) «сўз шакли морфемалари» жумласи нотўгри кўлланган, тўғриси – «сўз шаклини ясовчи морфемалар».

Морфеманинг моҳиятини шундай эскича тушуниш бошка тил бирликларининг моҳиятини нотўгри тушуниш, нотўгри талқин этишга сабаб бўлган. Эътибор беринг: «...сўз ясалиш асоси, анъанавий тилшуносликдаги тушунча бўйича, ўзак вазифасини ўтайди»,

¹ Миртоҗиев М. Семаларнинг сўз семесаси таркибида тутган ўрнига кўра типлари //Тилшуносликнинг долзарб муаммолари (Илмий маколалар тўплами). ЙУ. Тошкент: 2008. 30-б.

«личоқчилар сўзининг тичоқчи қисми номловчи семани ифода этган»¹ ва бошқалар (Буларнинг ҳар бирига тўхташни лозим топмаймиз).

Ясама сўзининг сўз ясалиш асоси туб ёки ясама сўз бўлиши мумкин: *терим* (*тер* – туб сўз), *теримичи* (*терим* – ясама сўз). Шундай экан, морфема сўзининг ўз маъносига эга бўлган таркибий қисми деб тан олинган тақдирда ҳам, асос вазифасидаги ясама сўзни, жумладан, *теримичи* сўзининг *терим* қисмини морфема хисоблаш мумкин бўлмайди. Сўз ясалиши асоси туб сўзга тенг бўлганида ҳам уни морфема хисоблаш мумкин бўлмайди. Чунки у сўз ясалишида луғавий маъноли бирлик – сўз сифатида қатнашади, шу моҳияти билан сўз ясовчи ва сўз шаклини ясовчи бирликлардан – морфемалардан тудан фарқланади. Шунинг учун ҳам ясалма бирликнинг асос қисмини “бош морфема”, “асосий морфема”, “етакчи морфема” каби терминлар билан аташ бирон-бир тил бирлигини ва унинг моҳиятини кайд эта олмайди. Шундай экан, ясовчи бирликларни, яъни морфемаларни “ёрдамчи морфема”, “эргаш морфема” деб юритишга ҳам ўрин, эҳтиёж қолмайди. Шундай экан, ўзи йўқ ҳодисага нисбатан қўлланаётган терминлардан воз кечиш, улар сабабли юз бераётган салбий оқибатлардан кутулиш ўрнига, шу терминларга ёпишиб олиб иш кўриш оқибатида хатолар кетидан хатоларга йўл қўйиш кишини ажаблантиради².

Хуллас, морфема ўз ифода ва мазмун жиҳатига эга бўлган тил бирлиги экан, асосий вазифа унинг шундай хусусиятга эга бўлмаган тил бирликларидан фарқли моҳиятини, масалан, сўз (лексема) ва морфологик бирлик бўлмиш сўз шаклидан фарқли хусусиятларини аниқ белгилашдан иборат бўлади. Акс ҳолда, морфемага тўғри ва аниқ таъриф бериш ҳам мумкин бўлмайди.

«Ноль морфема» масаласи

Морфеманинг моҳияти ҳакида гап борганида, ҳозирда турли баҳс-мунозараларга сабаб бўлаётган, бор-йўқлиги ҳакида бир фикрга келинмаган, ҳал этилиши муҳим аҳамиятга эга бўлган бир масалага,

¹ Миртоҗиев М. Кўрсатилган мақола, 31-б.

² Мақоладаги сема, семема ҳакидаги карашларда мавжуд бўлган хатоликлар ҳакида ўз ўрнида фикр билдирамиз.

яъни «ноль морфема» масаласига тўхтаб ўтмаслик мумкин эмас. Бу фикр, яъни тилда «ноль морфема», «ноль шакл» («ноль кўрсаткичли шакл») ҳодисаси борлиги ҳақидаги фикр, асли, ўзга тилшуносликка оид адабиётларда мавжуд бўлган фикрларнинг ўзбек тилшунослиги-даги кўчирмасидир. Улар ўзга тиллар учун қанчалик тўғри ёки тўғри бўлмаслиги ҳақида аниқ гап айта олмаймиз (Бу бизнинг вазифамизга кирмайди ҳам), лекин ўзбек тили материаллари бу тилда «ноль морфема» борлигини тасдиқламайди. Ана шуни исботлашга ҳаракат қиласиз.

Бизнингча, бу муаммони ҳал этишда қўйидаги икки ҳодисага асосланган ҳолда иш кўриш ижобий, тўғри хulosага келиш имконини беради: 1) тил бирликларида ифода ва маъно (мазмун) масаласи; 2) «ноль морфема»нинг фақат сўз шаклида, яъни морфологик бирликда мавжудлигини тан олиш, аникрофи, «ноль шакл» мавжудлигини тан олиш масаласи.

Ўзбек тилшунослигига, асосан, «ноль шакл», яъни «шакл кўрсаткичига эга бўлмаган сўз шакли» ҳақида гапирилади, баъзи ишларда «ноль морфема» борлиги тан олиниб, унинг таъриф-тавсифи ҳам берилади: «Туркий тилларда ноль морфема грамматик шакллар сирасида устувор мавқега эга экан, нутқда воқеланган бирор мустақил лексема кўшимчасиз бўлиши мумкин эмас. Моддий қиёфали морфемасиз лексема ноль кўшимчалидир. Масалан, нутқдаги *Китобни ўқи*, *Ўйга бор*, *У аълочи* гапларидаги ўқи, бор, аълочи сўzlари ноль нутқий бирликлардир»¹. Бир оз эзмаликдек туюлса-да, «ноль морфема» ҳақида айтилган бу гапларга жиддий муносабатда бўлмаслик, ундаги хато фикрларни, фақат кулги қўзгатиш мумкин бўлган гапларни аниқ кўрсатмасдан ўтиш мумкин эмас. «Туркий тилларда ноль морфема грамматик шакллар сирасида устувор мавқега эга экан, нутқда воқеланган бирор мустақил лексема кўшимчасиз бўлиши мумкин эмас» жумласини олиб кўрайлик. Биринчидан, туркий тилларда ноль морфеманинг устувор мавқега эгалиги у ёқда турсин, шундай морфеманинг борлиги исботланмаган. Жумладан, бу ишда ҳам ноль морфеманинг борлиги ва унинг устуворлигини кўрсатувчи бирорта ҳам факт келтирилмаган. Иккинчидан, нутқда воқеланган бирлик лексема бўлмайди. Учинчидан, «Нутқда воқеланган бирор лексема кўшимчасиз бўлмайди» деган жумла муаллифнинг «лексема» ва

¹ Сайфуллаева Р. ва бошқалар. Юкорида кўрсатилган ўкув кўлланмаси. 5-б.

«қўшимча»нинг мохияти ҳақида хеч қандай тасаввурга эга эмаслигини кўрсатади. Тўртинчидан, **қўшимча** сўзга қўшиб ёзиладиган морфема, яъни қўшиб ёзилиши учун сўз таркибидаги морфема *аффикс* ёки *қўшичча* дейилади. Шундай экан, сўз таркибида қўшиб ёзилган нарса йўқ бўлса, қўшимча ҳақида гапириш, яъни бу лексемани «ноль қўшимчали лексема» дейиш мумкинми? Мана сизга «ноль морфема»ни тан олиш-у, унинг мохияти ҳақидаги таъриф-тавсифларнинг ахволи.

Юкорида айтилдики, ўзбек тилшунослигига «ноль морфема» ҳақида эмас, асосан, «ноль шакл» (сўзнинг ноль кўрсаткичи шакли) ҳақида гапирилади. Демак, бу ҳодисанинг шакл ясалишига, шакл ясовчи морфемаларга хослиги тан олинади. Ҳакиқатда ҳам сўз ясовчи морфемаларда, умуман, сўз ясалишида, ясама сўзда бундай ҳодиса йўқ ва бўлиши ҳам мумкин эмас. Чунки сўз ясовчи морфемасиз сўз ясалиши, ясама сўз ҳосил бўлиши мумкин эмаслиги, бундай ясама сўзнинг йўклиги аниқ ва бу исботталаб ҳодиса эмас. Аслида, шакл ясалишида ҳам бундай ҳодиса, яъни «ноль шакл» йўқ ва бу ҳам конуний хол (Бу масала юзасидан ишнинг морфологик системага бағишиланган тўртингчи кисмida фикр юритилади).

Айтилганлар ва келтирилган фактлардан маълум бўлдики, морфема шакл ва мазмун жихатига эга бўлган тил бирлиги – лисоний бирлик. Бундай тил бирлигининг шаклсиз (фонетик қиёфасиз) бўлиши мумкин эмас – шаклсиз морфема йўқ. Шундай экан, шаклсиз морфеманинг маъноси ҳақида гапириш ҳам мумкин бўлмайди. Бундай морфеманинг борлиги, айникса, унинг мохияти ҳақида гапириш морфема билан боғлик бирон-бир ҳодиса ҳақида тасаввур бера олмайди – куруқ гаплигича қолаверади. Салбий томони шундаки, морфемаларнинг мохиятини ёритишда тадқиқотчини чалгитади, нотўғри хуносаларга келишига сабаб бўлади; ўқиш-ўқитиш жараёнда ҳам фақат салбий оқибатларни юзага келтиради. холос.

«Морфем система» масаласи

Морфема тил қурилишининг асосий бирлиги деб тан олинишини кўрдик. Бу эса морфема ҳам, бошқа тил бирликлари каби, тил системасини, масалан, морфем системани шакллантиради, деган та-

саввур беради. Лекин шу вактга қадар бирон ишда морфеманинг тил системасини шакллантирувчи бирлик экани исботлангани йўқ (Буни кисман юқорида ҳам кўрдик). Бу масалада бир-биридан фарқли фикр-мулоҳазалар билдириляпти. Ҳатто кўпгина ишларда *морфемика* термини тилга олиниб, унинг «морфемалар ҳақидаги таълимом» экани айтияпти. Лекин бу жумла (*морфемалар ҳақидаги таълимом*) тил системаси ҳисобланиши мумкин бўлган морфемика ҳақида тўғри, аниқ тасаввур бера олмайди. Демак, «морфем система», унинг шаклланиши билан боғлиқ ҳодисаларнинг моҳияти ҳал этилмаганича қоляпти. Бунинг энг асосий сабаби «морфема» деб аталувчи тил бирлигининг моҳияти ҳақида шу вактга қадар тўғри бир фикрга келинмагани, ҳатто морфемага берилган таърифлар талаабга жавоб бермаслигидадир (Булар ҳақида ҳам юқорида гапирилди).

Ўзбек тилшунослигида морфема ҳақида дастлабки даврларда юзага келган фикр-мулоҳазалар рус тилшунослигида оид адабиётлардаги мавжуд фикрларнинг кўчирмаси бўлганлигини кўрдик. «Морфемика» термини ифодалайдиган тушунча юзасидан билдирилган фикрлар ҳақида ҳам шу гапни айтиш мумкин. Ҳатто бу масалада рус тилшунослигида оид адабиётларда мавжуд бўлган эътиборга лойик фикрлар ўзлаштириб улгурилмаган, деб ҳам бемалол айтиш мумкин.

Ўтган асрнинг 70–80- йилларида яратилган рус тили грамматикасига оид ишларда «Морфемикага кириш», «Морфемиканинг асосий тушунчалари» деб аталган бўлимлар ажратилди – алоҳида берилди¹. Лекин уларда «Морфемика» деган маҳсус бўлим йўқ.

Рус тилшунослигида мавжуд бўлган морфемика ҳақидаги ана шундай қарашлар ўзбек тилшунослигида ҳам ўз аксини топа бошлиди – ўзбек тилшунослигида кўчирила бошлиди. Жумладан, проф. А. Гуломов бу ҳақда кўйидагиларни ёзди: «Ўзак ва аффиксларнинг анализи морфологияда ҳам, сўз ясалишида ҳам учрайди, лекин бу икки соҳанинг анализи, ҳодисага қандай нуқтаи назардан ёндашиб – ҳар хил, шундай бўлса ҳам, ҳар икки соҳа учун умумий бўлган ҳодисалар ҳам бор. Шунга кўра, кейинги вактларда буларни ёритишнинг янги схемалари пайдо бўлди: дастлаб морфемаларнинг ҳар икки соҳага алоқадор бўлган томонлари айрим берилади, бу айрим кисм **морфемика** деб аталади, кейин сўз ясалиши, ундан кейин морфоло-

¹ Грамматика современного русского литературного языка. -С.5; Русская грамматика. Т.1. -С. 123-132,133-152.

гия баён қилинади. Бу янги тартиб илмий жиҳатдан пухта асосланган бўлиб, практик томондан ҳам афзалликларга эга»¹.

Аввало айтиш керакки, морфемика ҳақида рус тилшунослигида мавжуд бўлган карашлар (фикр-мулоҳазалар) бу жумлаларда тўғри ифодасини топмаган. Қолаверса, бу фикр-мулоҳазалар ҳақида куйидагиларни айтиш мумкин: 1. «Морфемика»да сўз ясалиши ва морфология учун умумий бўлган ҳодисалар эмас, балки муайян тил бирлиги бўлган морфеманинг моҳияти ҳақида умумий маълумот берилади. 2. Кейинги вактларда сўз ясалиши, морфология соҳалари ва улар учун умумий бўлган тил ҳодисаларини ёритишнинг янги схемалари пайдо бўлганий йўқ, балки тилнинг морфем сатҳи, тилшуносликнинг «морфемика» деб аташ мумкин бўлган бўлими бор-йўклиги, унинг сўз ясалиши ва морфология соҳаларига муносабати каби ҳал этилиши долзарб бўлган муҳим масалалар юзага келди. 3. Бу ишда *морфемика* термини тилга олинса-да, лекин у муайян системани, тилшуносликнинг шу системани ўрганувчи бўлимини билдирувчи термин сифатида қўлланмаган – бу масалалар юзасидан ҳеч қандай фикр билдирилмаган. Бу ишда ҳатто «морфемика» деб аталган бўлим ёки бўлимчанинг ўзи йўқ. Бу термин «Грамматика»нинг «Сўз ясалиши» бўлимида тилга олинган. «Грамматика»нинг ўзи эса «Морфология» қисмидан иборат. Буларнинг барчаси морфемиканинг сўз ясалиши бўлимига, сўз ясалишининг морфология бўлимига мансублигини тан олишдан бошқа нарса эмас.

Шу айтилганларнинг ўзиданоқ маълум бўляптики, рус тилшунослигига оид адабиётларда морфема ва морфемика ҳақида билдирилган фикрлар таъсирида ўзбек тилшунослигига ҳам маълум фикр-мулоҳазалар юзага келган бўлса-да, лекин улар морфемика ҳақида ҳам аниқ ва тўғри тасаввур бера олмас эди. Бундай холат ҳозиргача давом этяпти, десак муболага бўлмайди.

Рус тилшунослигига ўтган асрнинг 70-йилларида ёк «морфемика» деб аталувчи тилшунослик соҳасининг «сўз ясалиши» ва «морфология» соҳаларига муносабати ҳақида аниқ фикрлар юзага келган. Масалан, шу масалалар билан маҳсус шуғулланган В.В. Лопатин сўз ясалиши механизм морфологик (сўз ўзгариши) механизми билан бирга грамматиканинг **морфемика** деб аталиши мумкин бўлган бўлимининг

¹ Ўзбек тили грамматикаси, I т.. Морфология. Тошкент: 1975. 11-б.

қисми, деган фикрни билдиради¹. Лекин бу фикрга күшилиш қийин. Чунки морфемикани грамматиканинг бўлими дейиш учун, сўз ясалиши ва морфологияни морфемиканинг қисмлари деб ҳисоблаш учун етарли асос йўқ деб ўйлаймиз. Умуман, рус тилшунослигида ҳам бу масалада аник бир фикрга келинганича йўқ ва бу ҳол эътиборли манбаларда қайд этилган². Шу боис морфемика ҳақидаги қарашларга муносабат билдиришни тўхтатиб, ўзбек тили материалларидан келиб чиқкан ҳолда, бу масала юзасидан ўз мулоҳазаларимизни билдириш билан чекланамиз.

Тилнинг системалардан иборатлиги, ҳар бир система муайян тил бирлиги асосида шаклланиши адабиётлардан маълум. Шундай экан, тил системаларининг шаклланиши билан боғлик ҳодисаларни ёритишга ўтишдан олдин ҳар бир системани шакллантирувчи тил бирлигининг асосий моҳияти билан боғлик ҳодисаларни белгилаб олиш шарт бўлади. Юкорида морфем бирликнинг моҳияти, унинг амалиёти билан юз берадиган асосий ҳодисалар ҳақида фикр юритдик. Шу билдирилган фикрлар асосида «морфем система» масаласини ҳал этишга уриниб кўрамиз.

Ўзбек тилшунослигида кейинги вақтларда юз берган энг муҳим воқеалардан бири ўзбек тили системаларини шакллантирувчи тил бирликларини белгилаш, улар асосида ўзбек тили системаларининг шаклланиши билан боғлик назарий муаммоларни ёритишга жиддий эътибор қаратиш бўлди, десак муболага бўлмайди. Шу билан бирга, бу борада ўз ечимини кутаётган муаммолар етарли, десак ҳам хато килмаган бўламиз. Шу вактгача ўзбек тилшунослигига оид бирор ишда тил системаси ва уни шакллантирувчи тил бирлигининг моҳияти ҳақида, жумладан, морфеманинг моҳияти ва морфем система масаласида аниқ ва тўгри бир фикрга келинмаганлигининг ўзиёқ фикримизни тасдиқлади.

Ўзбек тили системалари ва улардан ҳар бирини шакллантирувчи тил бирликлари ўзбек тилшунослигига оид ишларда қайд этилган. Масалан, фонема фонологик системанинг тил бирлиги, сўз шакли морфологик системанинг тил бирлиги экани ва б. Лекин бу ишларни бевосита ўзбек тилининг ўз материалларини тадқиқ этиш йўли

¹ Лопатин В. В. Русская словообразовательная морфемика. М.: Наука. 1977. -С. 4.

² Лингвистический энциклопедический словарь. -С.313.

билин, ўзбек тили системаларининг шаклланиши билан боғлиқ назарий масалаларни ёритиш, ҳал этиш йўли билан амалга оширилган ишлар дея олмаймиз. Чунки, юқорида айтиб ўтганимиздек, бундай ишларга кейинги вақтлардагина жиддий эътибор қаратила бошланди. Ўзбек тили системалари, уларни шакллантирувчи тил бирликлари ҳақидаги гаплар ўзга тилшуносликда, жумладан, рус тилшунослигига мавжуд бўлган фикр-мулоҳазалар асосида айтилган гаплардир. Ўз-ўзидан, бундай ҳолатда ўзбек тили системаларининг шаклланиши билан боғлиқ назарий масалаларни талаб даражасида ҳал этиш мумкин бўлмайди. Қолаверса, тил системаларига оид назарий масалалар ниҳоятда мураккаб бўлиб, уларни ҳал этиш катта куч, етарли назарий билим ҳамда керакли муддат талаб этади. Шуни ҳисобга олган ҳолда, бу ўринда морфема асосида шаклланадиган тил системаси бор-йўклиги ҳақида ўз мулоҳазаларимизни билдиришни лозим топамиз. Яна ҳам аниқроқ килиб айтганда, морфема тил системасини шакллантирувчи бирлик бўла оладими? деган саволга жавоб беришга ҳаракат қиласиз. Аслида, бу ҳақда ишнинг «Морфеманинг можияти» қисмида гапириш тўғри бўлар эди. Лекин «морфем система»нинг бор-йўклигини морфеманинг шундай системани шакллантирувчи тил бирлиги бўлиш ёки бўла олмаслиги белгилаши боис бу ҳақдаги гапларни шу ўринга қолдирган эдик.

Масалага бирор ишда шу асосда ёндашилмаганлиги, яъни морфеманинг тил системасини шакллантирувчи бирлик ёки бундай бирлик эмаслиги тўғри белгиланиб, сўнгра «морфем система» масаласига ўтилмаганлиги боис бу масала ҳал этилмаганлигича қолиб келмоқда.

Морфема ҳақида фикр юритилган ўзбек тилшунослигидаги ишларни, шу масалага бўлган муносабатига кўра, иккига ажратиш мумкин:

1. Морфеманинг тил системасини шакллантирувчи бирлик бўлиш ёки бўла олмаслиги масаласи эътибордан четда қолган ишлар. Булар шу мавзуга алокаси бор ишларнинг асосий қисмини (деярли 99 фоизини) ташкил этади. Бу ишларнинг баъзиларида морфема тил бирлиги, тил қурилиши бирлиги экани айтилса-да, лекин бунинг исботи йўқ. Шунингдек, уларда «морфем система»нинг, тилшуносликнинг бу «система»ни ўрганадиган бўлимининг бор-йўклиги ҳақида ҳам асосли бир гап йўқ. «Морфемика – морфемалар ҳақидаги таълимот», «морфемика – тилшуносликнинг бир қисми» каби таърифлар куруқ (исботсиз), кўчирма гаплардан бошқа нарса эмас.

2. Бу масалага жиддий эътибор берилган, морфеманинг қандай тил бирлиги экани, шунингдек, тилнинг морфем қурилиши, тилшуносликнинг бу қурилишни ўрганувчи бўлими бор-йўқлиги ҳакида фикр билдирилган иш проф. Ш. Раҳматуллаевнинг юкорида кўрилган рисоласидир¹. Бироқ бу ҳодисаларнинг мохияти ҳакида билдирилган фикрларни ўзбек тили материаллари қувватламайди, тасдиқламайди².

Тил қурилиши ёки тил қурилиши системаси ҳакида гап борар экан, биринчи навбатда, бу ҳодисанинг мохияти нимадан иборатлиги белгиланиши, таърифланиши керак бўлади. Афсуски, шу масалага маҳсус бағишланган мазкур ишда ҳам бунга жавоб йўқ – масала очиқ қолган. Бу эса, ўз навбатида, тил қурилиши асосий бирликларининг мохияти ва улар асосида юз берадиган тил ҳодисаларининг мохиятини белгилашда ҳам хато ва камчиликларга йўл қўйилишига сабаб бўлган. Масалан, бу ишда морфема тил қурилишининг асосий бирликларидан бири экани тан олинган, лекин, айтилган сабаб таъсирида, нима учун шундай бирлик экани исботланмаган. Тил қурилишининг бошқа асосий бирликлари ҳакида ҳам шу гапни айтиш мумкин. Демак, тил қурилишининг асосий бирликлари тан олингани билан, бу фикр исботланмаган. Буларнинг барчаси ҳакида фикр юритиш бу ўринда талаб килинмайди. Шу боис морфеманинг қандай тил бирлиги бўлиши ҳакида фикр-мулоҳазаларимизни билдириш билан чекланамиз.

Тилнинг ҳар бир системаси муайян тил бирлиги асосида шаклланиши юкорида айтилди ва бунга шубҳа йўқ. Шу билан бирга, морфема тил қурилишининг асосий бирлиги деб тан олинишини ҳам кўрдик. Ана шу нарса бу тил бирлиги ҳам тил қурилишининг муайян системасини – «морфем система» деб аталиши мумкин бўлган системасини шакллантиради, деган фикрга олиб келади, яъни тил қурилишининг асосий бирлиги тилнинг муайян системасини шакллантириш экан, морфеманинг ҳам муайян системани шакллантириши мантиқан тўғри бўлади. Лекин ҳозирда тил қурилишининг асосий бирлиги деб тан олинаётган бирликларнинг барчаси бир хил мохиятта, яъни тил системасини шакллантириш мохиятига эга эмас. Бу жихатдан «морфема» деб атальувчи тил бирлиги «тил қурилишининг асосий бирлиги» ҳисобланувчи бошқа тил бирликларидан тубдан фарқланади.

¹Рахматуллаев Ш. Юкорида кўрсатилган рисола.

²«Тил қурилиши», «тил сатҳи», «тил боскичи» терминлари ҳакида ишнинг «Кириш» кисмida фикр билдирилганлигий учун уларни такрорлашга эҳтиёж йўқ, деб ўлаймиз.

Иш давомида айтилганлар ва морфемага берилган таърифдан аник бўлдики, морфема – ифода ва маъно жиҳатига эга бўлган, тилнинг муайян системасини шакллантирувчи тил бирлигини (ясама сўз ёки сўз шаклини) ясаш учун хизмат килувчи тил бирлиги. Демак, у системани шакллантирувчи тил бирлиги эмас, балки ясовчи бирлик. Худди шу хусусияти билан ниҳоятда муҳим аҳамиятга эга бўлган тил бирлиги хисобланади. Худди шу хусусияти – ясовчи тил бирлиги эканлиги билан у тил системасини шакллантирувчи тил бирликларидан фарқланади, мустакил ҳолда системани шакллантира олмайди.

Ш. Раҳматуллаевнинг юкорида кўрилган рисоласида: «Тил курилиши босқичлари ва уларни ўрганувчи соҳалари» сарлавҳаси билан берилган бўлим ва жадвал ҳам бор. Бу қисмда, морфема тил курилишининг асосий бирлиги бўлиши тан олингани боис, унинг «морфем система»ни шакллантириши ҳам эътироф этилган. Охир-оқибат, ўзбек тилшуносликнинг шу системани ўрганувчи ва «морфемика» деб аталувчи соҳаси бирлиги ҳам тан олинган¹.

Ясовчи бирлик сифатида морфема ясалма бирликнинг, яъни ясама сўз ёки сўз шаклини таркибий қисми мақомида бўлади. Ҳатто ясама сўз ва сўз шаклидаги ясалиш асоси ҳам мустакил тил бирлиги бўлмайди. Масалан, *гулчи*, *гулла*, *гуллар*, *гулни* ясама сўз ва сўз шакллари таркибидаги *гул* – сўз ясалиш ва шакл ясалиш асоси (шундай тил бирлиги), лекин шу сўзлар таркибида лугавий системани шакллантирувчи тил бирлиги эмас. Сўз ясалиш асоси, шакл ясалиш асоси терминлари сўз ясалиши ва морфологияга оид тушунчаларни билдиради (Улар билан бөглиқ тил ҳодисалари тилшуносликнинг шу бўлимларида ёри-тилади, ўрганилади)².

Морфеманинг ифода ва маъно жиҳатига эгалигини кўрдик. Бу хусусият лугавий бирлик бўлмиш сўзга ҳам хос. Шакл ва маъно муносабатига кўра сўзларнинг *омоним*, *синоним*, *антоним* каби гурухларга бўлиниши, шунингдек, сўзнинг бирдан ортиқ маънога эга бўлиши – *кўп маънолитик* (полисемия) ҳодисаси мавжудлиги ҳам маълум. Ўзбек тили морфемалари (аффикслари) ҳакида фикр юритилган, «морфемика» тилшуносликнинг алоҳида бўлими (қисми) сифатида берилган ишларда морфемаларни ҳам шакл ва маъно муносабати асосида шун-

¹ Раҳматуллаев Ш. Юкорида кўрсатилган рисола, 25-б.

² Бу ҳақда маҳсус маколачизда ҳам фикр билдирилган: Ҳожиев А. Тил курилишининг асосий бирликлари юзасидан мулоҳазалар / Ўзбек тили ва адабиёти, 2004. 5-сон, 35-36-б.

дай гурухларга ажратиш кузатилади ва *аффиксал полисемия, аффиксал омонимия, аффиксал синонимия, аффиксал антонимия* ҳодисалари мавжудлиги қайд этилади¹. Бироқ, юқорида кўрдикки, морфема мустақил тил бирлиги эмас, балки ясовчи бирлик. Ясовчи бирлик сифатида унинг моҳияти ясалма бирлик таркибида – ясама сўз ёки сўз шакли таркибида, яъни шундай бирликлар ҳосил қилинганида намоён бўлади. Масалан, -чи, -кор, -соз, -хўр, -доғи, -шунос морфемаларининг маъноси улар ёрдамида ясалган *теримчи, июликор, уйсоз, норинхўр, синфдоши, тилишунос* каби сўзларда вокеланади, уларнинг умумий ва хусусий белгилари ҳам шундай ясама сўзларда намоён бўлади, яъни уларнинг барчаси шахс оти ясовчи экани, ҳар бир ясовчи морфеманинг ўзига ҳос хусусияти маълум бўлади. Демак, морфемалар тил системасини шакллантириши мумкин бўлмаганидек, уларни ясама сўз ва сўз шаклидан ҳоли ҳолда, «кўз шакл ва маъноси» асосида гурухларга бўлиш ҳам мумкин бўлмайди. Бинобарин, мустақил бўлмаган тил бирлигидаги – морфемалардаги омонимия, синонимия, антонимия, шунингдек, кўп маънолилик ҳодисасини мустақил тил бирлиги бўлмиш сўз (лексема)лардаги шу ҳодисалар билан тенглаштириш мутлақо мумкин эмас. Бу айтилганлар куруқ гап бўлмаслиги учун морфем кўп маънолилик (морфем полисемия), морфем синонимия, морфем антонимия «ҳодисалари»нинг ўзбек тилида мавжудлиги қай даражада исботланганингига, ҳақиқий ҳолат қандайлигига қиска тарзда тўхтаб ўтишини лозим топамиз.

Морфемаларда полисемия, синонимия, антонимия каби ҳодисалар масаласи

Аввало айтиш керакки, ўзбек тилшунослигига оид адабиётларда, асосан, аффиксал полисемия, аффиксал синонимия, аффиксал антонимия кабилар ҳақида гапирилади. Бироқ тил бирлиги ҳақида гап борар экан, ясовчи бирликларга нисбатан *аффикс ёки қўшишимча терминини* эмас, *морфема терминини* кўллаш тўғри бўлади. Чунки *аффикс, қўшишимча* сўзлари тил бирлигини қайд эта олмайди (Морфема ҳақидаги таълимот аффикс ёки қўшимчалар ҳақидаги таълимот эмас)².

¹ Ҳозирги ўзбек адабий тили, I кисм. Тошкент: Ўқитувчи, 1980. 164-б., Ўзбек тили грамматикаси. I. Морфология. Тошкент: Фан, 1975. 94-б.

² Бу ҳақда маҳсус маколамизда фикр билдирилган: Ҳожиев А. Ўзбек тилшунос-

Морфема тил системасини шакллантирадиган бирлик (тил курилиши бирлиги) эмас, балки у ясовчи бирлиқдир. Морфема ва унинг амалиёти билан боғлиқ барча ҳодисаларнинг моҳияти унинг ана шу хусусиятидан келиб чиқади.

Лексемаларнинг ўзаро маъно муносабати асосида турли типдаги лексик-семантик гурухлар, парадигмалар юзага келиши, шаклланиши маълум (Буни исботлашга, фактлар келтиришга эҳтиёж йўқ деб ўйлаймиз). Морфема ўз маъно жиҳатига эга тил бирлиги бўлгани учун уларнинг ўзаро маъно муносабати асосида ҳам турли семантик гурухлар юзага келади, яъни полисемия, синонимия, антонимия каби қодисалар морфемалар учун ҳам хос деб қаралади. Биз ҳам шундай фикрда эдик. Лекин кейинги вақтларда морфемалар юзасидан олиб бораётган кузатишлирамиз ҳақиқий ҳолат бундай эмаслигини кўрсатяпти.

Морфемалар мустақил тил бирлиги бўлмагани учун улар ўзаро семантик муносабатга кириша олмайди – бу қонуний ҳол.

Морфемаларнинг сўз ясалиши ва сўз шаклини ясами – ясовчи бирлик экани ҳақида кўп гапирдик. Уларнинг маъноси ҳам мустақил ҳолда эмас, балки ясама сўз ва сўз шакли таркибида воқеланади. Шу боис морфемаларнинг вазифаси ва маъносини ясама сўзлар ва сўз шакллари доирасида ўрганиш тўғри бўлади. Шундай қилинғанда, морфемалар ва уларнинг амалиёти билан боғлиқ тил ҳодисаларининг моҳиятини тўғри тасаввур этиш, тўғри белгилаш осонлашади. Шу боис, морфемага хос деб қаралаётган полисемия, синонимия, антонимия ҳодисаларининг моҳиятини ясама сўз ва сўз шакли мисолида олиб кўрайлилар.

Ўзбек тилидаги сўз ясовчилар ҳақида фикр юритилган ишларда, ўқув қўлланмалари ва дарсликларда баъзи сўз ясовчи аффиксларнинг кўп маънолилик (полисемантиклик) хусусиятига эгалиги айтилади¹. Баъзи ишларда эса, умуман, морфемаларнинг шундай хусусиятга эгалиги алоҳида таъкидланади ва бунинг сабаби ҳам айтилади: «Морфемада ҳам шакл ва маъно муносабати барқарор. Морфеманинг миқдоран чекланганлиги бу муносабатнинг кенг қамровлилигидан далолат беради.

лигининг долзарб муаммолари (7-мақола) / Ўзбек тили ва адабиёти, 2007. 4-сон, 35-б.

¹ Турсунов У., Мухторов Ж., Рахматуллаев Ш. Хозирги ўзбек адабий тили. Олий ўқув юртлари филология факультетлари талабалари учун дарслик. Тошкент: Ўзбекистон, 1992. 207-б.

Морфем полисемия. Морфемик полисемия кенг тарқалган. Бу морфеманинг полифункционаллигига боғлиқдир. Мисол сифатида -чилик аффиксини олайлик. Дарслик ва қўлланмаларда қуйидаги уч маъноси фарқланади:

1. Асосдан англашилган нарсани етиштирадиган соҳани ифодаловчи от: *нахтачилик*, *уругчилик*, *чорвачилик*, *узумчилик*.
2. Асосдан англашилган нарса-ходисанинг борлик ҳолатини билдирувчи от: *нишиқчилик*, *мўлчилик*, *арzonчилик*.
3. Асосдан англашилган тушунча билан боғлиқ бўлган ишни билдирувчи от: *улфатчилик*, *тирикчилик*, *дуиманчилик*.

Аксарият морфема полисемик табиатлидир¹.

Келтирилган парчада билдирилган фикрлар ҳақида куйидагиларни айтиш мумкин. Биринчидан, морфеманинг ўз шакл ва маъно жиҳатига эга бўлган тил бирлиги экани барча томонидан эътироф этилган. Лекин «Морфемада ҳам шакл ва маъно муносабати барқарор» деган жумла бирор тил ходисасини қайд эта олмайди. Иккинчидан, «Морфеманинг миқдоран чекланганлиги бу муносабатнинг кенг қамровлигидан далолат беради» деган фикрга ҳам кўшилиб бўлмайди. Чунки «морфемаларда қўп маънолилик ходисаси мавжудлиги»ни бу тил бирлигининг миқдоран чекланганлиги билан асослаш мумкин эмас. Шунингдек, «Морфемик полисемиянинг «кенг тарқалганилигини» морфеманинг «полифункционаллик хусусияти» билан ҳам асослаб бўлмайди. Чунки морфеманинг вазифаси сўз ясаш ва сўз шаклини ясаш экани маълум – шундан бошқа функцияси йўқ. Учинчидан, «Аксарият морфема полисемик табиатлидир» деган фикрни ҳам ўзбек тили материаллари тасдикламайди. Биргина шахс оти ясовчи морфемалар мисолида фикримизни аниқ исботлаш мумкин.

Хозирги ўзбек тилида -чи, -шунос, -кор, -соз, -фуруши, -хўр морфемалари шахс от ясайди, яъни буларнинг барчаси 'шахс' маъноли от ясайди: *доторчи*, *хуқуқшунос*, *тадбиркор*, *йўлсоз*, *дўйтифуруши*, *норинхўр* каби. Демак, бу морфемаларнинг асосий вазифаси сўз ясаш, сўз ясовчи бошқа морфемалардан фарқли хусусияти эса от туркумига мансуб шахс отлари ясашидир. Уларнинг шундан бошқа вазифаси

¹ С ай ф у л л а е в а Р. ва бошкалар. Хозирги ўзбек тили. Ўкув қўлланма. Тошкент: 2007. 146-б.

йўқ. Шу вазифаси билан уларнинг «кўп маъноли» бўлишини асослаб, исботлаб бўлмайди. Шу билан бирга, бу аффиксларнинг баъзилари ёрдамида ясалган шахс отлари (морфемаларнинг ўзи эмас!) ўзига хос маънолари билан бир-биридан фарқланади. Ана шу икки нарса, биринчидан, бу ясама сўзларга хос 'шахс' маъносининг сўз ясовчи морфемага хослигини кўрсатса, иккинчидан, улардан баъзилари ёрдамида ясалган сўз (от)ларнинг бир-биридан фарқли маънога эга бўлиши ҳам сўз ясовчи морфемага хос деб қаралади, яъни кўп маънолилик ҳам морфемага тегишли деб кўрсатади. Лекин ҳакиқий ҳолат бошқача.

Биринчидан, келтирилган морфемалар билан ясалган сўзларда 'шахс' маъносининг шу сўзлар таркибидаги сўз ясовчи морфемага мансуб бўлишига шубҳа йўқ. Лекин, иккинчидан, мустакил тил бирлиги эмаслиги боис морфемалар мустакил кўлланмайди, 'шахс' маъносини ҳам билдира олмайди. Морфемага хос маъно ясама сўз (шахс оти) таркибида воқеланади. Шу боис у ясама сўзга мансуб маъно хисобланади, яъни ясама сўз семеси таркибидаги бир сема – 'шахс' семаси мақомида бўлади. Шунинг учун ҳам ясама шахс отларининг барчасида 'шахс' семаси мавжуд бўлади ва у умумий сема хисобланади. Демак, морфеманиг маъноси ҳакида гап борганида унинг ана шу мохияти доимо эътиборда бўлиши керак. Масалага шу асосда ёндашилса, ясама сўзларда ҳам семантик муносабат, ўзаро семантик муносабатга киришиш морфемага эмас, ясама сўзга (лексемага) хос бўлади, яъни ясама сўзлар ўзаро муносабатга киришади ва турли типдаги лексик-семантик гурухларни хосил қиласи.

Шахс оти ясовчи морфемалар ёрдамида ясалган сўзларнинг бир-биридан фарқли маънога эга бўлиши ва бу ҳодиса ҳам морфемага тегишли, морфеманинг кўп маънолилиги ҳодисаси деб қаралиши айтилди. Аслида, бу ҳодиса ҳам морфемаларга тегишли эмас. Масалан, -чи морфемаси билан ясалган шахс отларининг барчаси 'шахс' маъносига эга бўлади. (Шундай маъноли от ясаш -чи морфемасининг вазифаси). Шу билан бирга, бу морфема ёрдамида ясалган шахс отлари ўзига хос маънолари билан бир-биридан фарқланиши ҳам айтилди. Масалан, *спортчи*, *кураиччи*, *музиқачи*, *пахтакорчи*, *экскурсиячи* шахс отларининг бир-биридан фарқли маънога эгалигини сезиш кийин эмас. Худди шу ҳодиса, яъни бир-биридан фарқли маънонинг мавжудлиги «кўп

маънолилик» деб қаралади ва у («кўп маънолилик») шу ясама отларни ҳосил килган -чи морфемасига тегишли деб тушунилади, охироқибат «-чи морфемаси кўп маъноли» деган хulosага келинади. Аслида, бундай ясама отларнинг ҳосил бўлишида -чи морфемаси сўз ясалиш асосидан англашилган нарса билан «шугулланувчи шахс» маъноси билан қатнашади. Сўз ясалиш асосининг нимани билдиришига кўра бундай ясама отлар маъно жиҳатдан бир-биридан фарқланади: *спортчи* – спорт билан шугулланувчи шахс; *кураачи* – кураш билан шугулланувчи шахс; *мусиқачи* – мусиқа билан шугулланувчи (мусиқа чалувчи) шахс; *экскурсиячи* – экскурсияда қатнашувчи шахс (экскурсия қатнашчиси) ва бошқалар¹. Шу ўринда яна бир фактга эътибор қаратамиз. -чи морфемаси ёрдамида бир сўз (сўз ясалиш асоси)дан ясалган сўз икки хил маънога эга бўлиши мумкин. Масалан, *гулчи* ясама сўзи: 1) 'гул етиширувчи', 2) 'гул сотувчи' маъносини билдиради. Лекин бу икки маъно ҳам -чи морфемасига хос эмас, балки умумий ҳолатдан англашилади. Бу айтилганлар факат сўз ясовчи -чи морфемасига эмас, шахс оти ясовчи морфемаларнинг барчасига, факат шахс оти ясовчи морфемаларга эмас, умуман, сўз ясовчи морфемаларнинг барчасига тааллуқли. Бу факт сўз ясовчи морфемаларнинг кўп маънолилик ҳусусиятига эга эмаслигини аниқ тасдиқлади.

Морфем синонимия масаласи. Морфемалар мустакил тил бирлиги эмаслиги боис улар ўзаро семантик муносабатга кириша олмас экан, морфемаларнинг синонимик муносабати, синонимияси ҳақида ҳам гапириш мумкин бўлмайди. Шу боис ҳам ўзбек тилшунослигига оид бирор ишда морфемаларнинг ўзаро маъно муносабатига киришиши – морфем синонимия ҳодисаси мавжудлиги исботланмаган ва шундай бўлиши табиийдир.

Проф. Ш. Раҳматуллаев морфем синонимия ҳодисаси, асосан, сўз ясовчи морфемаларга хослигини, унинг шакл ясовчи морфемаларда жуда оз учрашини алоҳида таъкидлайди: «**4-§. Синоним бўлиш асосан лексема ясовчи морфемаларга хос...**

Шакл ҳосил қилувчи морфемаларнинг синонимик муносабатда бўлиши жуда оз учрайди»². Шу боис шакл ясовчи морфемалар сино-

¹ Булар ҳакида маҳсус ишимизда фикр билдирилган: Ҳ о ж и е в А. Ўзбек тили сўз ясалиши тизими. Тошкент: Ўқитувчи, 2007. 64–68-б.

² Т у р с у н о в У., М у х т о р о в Ж., Р а х м а т у л л а е в Ш. Юкорида кўрсатилган дарслик, 126-б.

нимияси масаласига тўхтамай, фақат сўз ясовчи морфемалар синонимияси хақида ўз мулоҳазаларимизни билдириш билан чекланамиз.

Ўзбек тилида шахс оти ясовчиларнинг бирдан ортиклигини юкорида кўрдик ва бу барчага маълум. Ана шу морфемалар ўзбек тилшунослигига морфем синонимия хақида фикр юритилган ишларнинг деярли барчасида синоним морфемалар деб қаралади. Лекин, юкорида кўп бора таъкидланганидек, мустакил тил бирлиги эмаслиги боис сўз ясовчи морфемаларда ҳам семантик муносабат ҳодисаси бўлмайди, демакки, синонимик муносабат, синонимия ҳодисаси ҳам бўлмайди. Масалан, *-чи*, *-кор*, *-соз*, *-паз*, *-фуруши* морфемалари 'шахс' маъноли от ясади: *наичи*, *галлакор*, *уйсоз*, *оитаз*, *мевафуруши* каби. Демак, 'шахс' маъноли муносабат ҳам морфемаларга эмас, улар ёрдамида ясалган лексемаларга тааллукли бўлади – 'шахс' маъноли асосида ясовчи морфемалар эмас, ясама сўзлар ўзаро муносабатга киришади, демак, ўзаро синонимлик морфемага эмас, лексемага хос ҳодиса хисобланади. Ясама сўз ёки ясовчи морфеманинг ўзаро синоним бўлиши масаласида ана шу қонуният асосида иш кўриш керак бўлади. Бу эса тўғри хулосаларга келиш имконини беради.

Морфем антонимия масаласи. Бу масала юзасидан ҳам ўзбек тилшунослигига тўгри ва аник бир фикрга келинмаган. Бу масала юзасидан мавжуд қараашларни, асосий моҳиятига кўра, уч турга ажратиш мумкин: 1) морфем антонимия ҳодисаси умуман тилга олинмаган ишлар¹; 2) морфем антонимия ҳодисасининг фақат сўз ясовчи морфемаларга хослиги эътироф этилган ишлар²; 3) антонимия ҳодисаси сўз ясовчи ва сўз шаклини ясовчи морфемалар учун, умуман, морфемалар учун хослиги тан олинган ишлар³. Келтирилган ана шу фактнинг ўзиёқ ўзбек тилшунослигига морфем антонимия масаласининг қандай ҳал этилганлиги хақида аник тасаввур бера олади.

Морфемалар мустакил тил бирлиги эмаслиги боис ўзаро семантик муносабатга кириша олмаслигини юкорида айтдик ва кўп маъ-

¹ Турсунов У., Мухторов Ж., Рахматуллаев Ш. Юкорида кўрсатилган дарслик.

² Шоабдурахмонов Ш. ва бошқалар. Ҳозирги ўзбек адабий тили. Тошкент: Ўқитувчи, 1980. 166-б.; Сайфуллаева Р. ва бошқалар. Юкорида кўрсатилган ўкув кўлланма. Тошкент: 2007. 147-б.

³ Рахматуллаев Ш. Юкорида келтирилган дарслик, 126-127-б.

нолилик, синонимия каби ҳодисалар морфем бирликлар учун хос эмаслигини исботлашга ҳаракат қилдик. Бу айтилган гапларнинг барчasi «қарама-қарши маъноли» морфемалар ва «морфем антонимия ҳодисаси»га ҳам таалуқли, яъни морфем антонимия ҳақида ҳам гап бўлиши мумкин эмас. Бу эса «морфем антонимия» ҳақида ортиқча гапларга эҳтиёж қолдирмайди. Лекин ўзбек тилида шундай ҳодиса борлиги тан олинган ишларда бунинг исботи учун фактлар келтирилган. Шу боис фактларнинг қай даражада талабга жавоб бериши ҳақида қисқача тўхтаб ўтишга тўғри келади.

Морфем антонимия ҳодисаси сўз ясовчи морфемаларга хослиги таъкидланган ишларда сўз (сифат) ясовчи -ли ва -сиз (*кучли* – *кучсиз*) морфемалари мисол сифатида келтирилади. Демак, бу ишларда ҳам антонимия ҳодисасининг сўз ясовчи барча морфемаларга хос эмаслиги, демакки, бу умумий ҳол эмаслиги тан олинади.

Ўзбек тилида -ли ва -сиз морфемаси билан ясалган сифатлар ўзаро зид маъноли (антоним) бўлади. Ўзаро зидлик – бу сўзлар таркибидағи -ли ва -сиз морфемаларига хос маъно ясама сўзниң маъноси (семемаси) таркибиға киради – ясама сўз семемасининг бир семаси ҳисобланади. -ли ва -сиз морфемаси билан ясалган сўзлар ана шу семалар билан бир-бирига зидланади: *кучли*–*кучсиз*, *баҳтили*–*баҳтсиз*, *асосли*–*асоссиз*, *саводли*–*саводсиз*... Демак, зидланиш (зидлик муносабати) морфемага эмас, сўзга (лексемага) хос бўлади. Яна шуни ҳам эътиборга олиш керакки, бундай ясама сўзларда «бор–йўқ», «эга–эга эмас» деган маъно ифодаланмайди. Агар шундай маъно ифодаланганида, -ли ва -сиз аффиксли одобли–одобсиз каби сўзларни ясама сўз (ясама сифат) эмас, балки отнинг 'эгалик' ва 'эга эмаслик' маъносини билдирувчи шакли, яъни сўз шакли эканини тан олишга тўғри келар эдики, буни исботлаш мумкин эмас.

Проф. Ш. Раҳматуллаев юқоридаги дарслигида морфемалардаги синонимия, антонимия каби ҳодисаларни лексемалардаги, лексемашакллардаги шундай ҳодисалар ўрганилгандан кейин, яъни парадигмалар доирасида ўрганишни маъкул кўради. Бунинг сабаби бор, албатта: морфемалар ўзаро семантик муносабатга кириша олмаслигини кўрдик. Демак, ясама сўз ва сўз шаклидан алоҳида (ажратилган) ҳолда морфемаларда полисемия, антонимия каби ҳодисалар борлигини исботлагб бўлмайди. Парадигмалар масаласида ўзбек тилшунослигига

мавжуд бўлган бир хатолик морфем антонимиянинг мавжудлигини исботлаш имконини берадигандек туюлади. Аслида эса бу хатолик морфем антонимия масаласида ҳам хато хулоса чиқаришга хизмат қиласиди.

Ўзбек тилшунослигида отнинг сон категорияси борлиги, унинг бирлик ва кўплик шакли парадигмани ҳосил қилиши; феълнинг бўлишили-бўлишсиз категорияси борлиги, бўлишили ва бўлишсиз шакллар парадигмани ҳосил қилиши эътироф этилади. Бу ишларнинг барчасида ўзбек тилида отнинг бирлик шаклини, феълнинг бўлишили шаклини ясовчи морфема йўқлиги тан олинади. Шундай экан, қандай килиб ўзи йўқ морфема бирор морфемага, ўзи йўқ шакл бошқа шаклга зидланади, деган савол туғилиши табиий. Лекин бу саволга тўгри ва аниқ жавоб йўқ. Факатгина парадигманинг шакл ясовчига эга бўлмаган кўриниши (шакли эмас) унинг шакл кўрсаткичли шаклига нисбатан белгиланиши хақидаги қуруқ гаплар билан чекланилади. Парадигма хақидаги ана шундай нотўғри тушунча «морфем антонимия» масаласида ҳам ўзига ҳос хатога йўл қўйилишига сабаб бўляпти.

Маълум бўлдики, морфемани тил қурилишининг асосий бирлиги – мустакил тил бирлиги деб тушуниш ҳам, ўзбек тилида тилнинг фонологик, лексик системалари каби, морфем системаси борлигини тан олишга сабаб бўлган. Лекин морфеманинг **ясовчи бирлик** эканнинг ўзиёқ бундай хулоса чиқаришга йўл қўймайди. Шу билан бирга, ўзбек тилида ўз ифода ва маъно жихатига, ўзига ҳос вазифага эга бўлган тил бирлиги бор экан, тилшуносликнинг ўрганилиши, морфема тилшуносликнинг маълум соҳаси предмети, ўрганиш обьекти бўлиши ҳам шубҳасиз. Вазифа – ана шуни белгилашдир. Иш давомида айтилганлардан бу масала анча ойдинлашиб қолди, яъни морфема сўз ясаш ва сўз шаклини ясаш учун хизмат қиласар экан, у тилшуносликнинг шу тил бирликларини ўрганувчи «Сўз ясалиши» ва «Морфология» бўлимларининг предмети бўлиши табиий. Лекин тилшуносликнинг бу бўлимларида морфеманинг ўзи ўрганилмайди, балки унинг сўз ясалиши, сўз шаклини ясалиши билан боғлиқ ҳодисалар, ясама сўз ва сўз шакллари ўрганилади. Бу – бир томондан. Иккинчи томондан, морфемаларнинг барчаси учун умумий бўлган сўз ясаш ва сўз шаклини ясаш вазифаларига ўтишдан олдин, яъни «Сўз ясалиши» ва «Морфология» бўлимлари олдидан қайд этилиши, ёритилиши та-

лаб этиладиган белги-хусусиятлари ҳам бор. Масалан, морфеманинг мустакил тил бирлиги эмас, **ясовчи бирлик** бўлиши, ясовчи бирлик сифатида икки тури мавжудлиги ва бошқалар. Учинчидан, юкорида тил бирликларининг таснифи ҳақида фикр юритилганда айтилдики, фақат мустакил тил бирликлари эмас, шунингдек, функционал бирликлар ҳам, жумладан, ясовчи бирликлар ҳам умумий ва хусусий белгилари асосида муайян гурухларни ташкил этади ва бу гурухлар ҳам ўзига хос тил сатҳлари ҳисобланади. Демак, морфеманинг мустакил тил бирликлари каби муайян системани шакллантириши ҳақида эмас, балки ясовчи бирлик сифатида ясама сўз ва сўз шаклини ҳосил қилувчи бирлик экани ҳақида гапириш тўғри, асосли бўлади. Тилшуносликнинг ана шундай тил бирлиги (морфем бирлик – морфема) ҳақидаги таълимот қисмини «морфемика» деб аташга ҳам эътиroz бўлмаса керак.

Морфем сатҳнинг ривожланиши

Ўзбек тилининг ривожланиши жараёнида унинг барча сатҳларида (фонетик, лексик ва бошқа сатҳларида) ўзгариш бўлгани каби, морфем сатҳида ҳам муайян ўзгаришлар юз бериши табиий. Лекин ўзбек тилшунослигида бу масалага деярли эътибор қаратилгани йўқ. Тўғри, баъзи ишларда аффиксларнинг этимологияси, сўзнинг морфологик таркибида юз берадиган ўзгаришлар ҳақида фикрлар билдирилган¹. Бирок тилнинг морфем сатҳида бўладиган ўзгаришларни аффикслар мисолида ўрганиш, баён этиш тўғри бўлмайди ва у кутилган натижани бермайди. Чунки «аффикс» термини морфеманинг моҳиятини қайд эта олмайди (Бу ҳақда юкорида айтилди). Шунингдек, сўзнинг морфологик таркибида юз берадиган ўзгаришлар фақат морфемага тегишли ҳодиса эмас. Нихоят, тилнинг морфем таркибида бўладиган ўзгаришлар ҳақида гап борар экан, унинг бошқа сатҳларда бўладиган ўзгаришлардан фарқли томонлари, ўзига ҳосликлари ва унинг сабаблари ёритилиши керак бўлади. Ўзбек тилшунослигида шуни мақсад килиб қўйган, шу талабларга жавоб берадиган ишни учратмадик. Бунинг асосий сабаби ҳам ўзбек тилшунослигида **морфема** ва у билан боғлиқ тил ҳодисаларининг ўрганилиш ахволи

¹ Ўзбек тили грамматикаси. I т., Морфология, 66-116-б.

билан изоҳланади, яъни морфеманинг моҳияти, «морфем система», «морфем сатҳ» каби ҳодисалар ҳақида аниқ тасаввур бўлмаган шароитда «морфем сатҳнинг ривожланиши» масаласи кимнинг хаёлига келиши мумкин?

Тил қурилишининг ҳар бир сатхи ўзига хос ривожланиш йўли, конун-коидаларига эга. Масалан, ўзбек тили лугат таркибининг ривожланиши шу системага хос тил бирликларининг тез суръатларда кўпайиши билан характерланади. Бу ҳам маълум факт. Бу жараёнда ўзбек тилининг ўз имкониятлари асосида янги сўзлар ясаш, ўзга тиллардан сўз ўзлаштириш каби омиллар муҳим роль йўйайди. Қолаверса, шундай йўллар билан сўз ҳосил қилишга эҳтиёж ҳам бўлиб туради. Морфем таркибнинг ривожланишида эса бундай ҳолатлар, ҳодисалар деярли ёки бутунлай кузатилмайди. Масалан, морфема ясалмайди, ўзга тилларга оид морфемани ўзлаштириш ҳам жуда кам учрайдиган ҳодиса. Қолаверса, морфемаларнинг сўзлар каби даражада кўпайишига тилда эҳтиёж сезилмайди ва ҳоказо. Булар лугат таркиби тараққиёти билан морфем таркибнинг ривожланишидаги асосий фарқлардир.

Ўзбек тили материалларининг кўрсатишича, бу тилдаги морфемалар, асосан, қуидаги йўллар билан, қуидаги тил бирликларидан юзага келган:

1. Фонетик таркибиغا кўра муайян умумийликка эга бўлган туб сўзлардан юзага келган. Бундай морфемалар жуда кам миқдорда. Масалан, феълнинг нисбат шаклларини ясовчи *-л*, *-н*, *-и* морфемалари охирни шу ундошлар билан тугаган ва бир умумий семантикага эга бўлган туб феъллар асосида юзага келади¹.

2. Кўмакчи сўздан келиб чиқади. Масалан, *ишилаб ётибди*, *ишилаётубди* феъл шаклларидаги ётиб кўмакчи феъл эмас, балки ҳозирги замон феъл шаклини ясовчи морфема ҳисобланади. Чунки бу феъл шаклларидаги ёт кўмакчиси феъллик моҳиятини бутунлай йўқотган бўлиб, ётиб яхлит ҳолда бир тил бирлиги – ҳозирги замон феъл шаклини ясовчи бирлик – шакл ясовчи бирлик, демак, морфема ҳисобланади. Ўзбек тили тараққиёти жараённида феълнинг ётиб шакли яп ҳолига келган: *ишилаётубди* > *ишилаётти*. Ўзбек шеваларида

¹ Миртоҗиев М. Нисбат категориялари семантикаси ва улар формантлари генезиси / Ўзбек тили ва адабиёти, 1983. 2-сон, 33-37-б.

эса унинг кўплаб варианtlари мавжуд¹. Ҳозирги-келаси замон феъл шаклининг учинчи шахс кўрсаткичи -ди морфемаси *тур* кўмакчи феълиниг *туур* (*дуур*) шаклидан келиб чиқкан: *келатуур*/*келадуур* > *келадир*> *келади* ва бошқалар (Бу ҳақда ишнинг морфологик системага бағишланган ўрнида фикр билдирилган).

3. Аффикс морфеманинг фонетик ўзгаришга учраши билан янги морфема юзага келади: *саргармоқ* > *саргаймоқ*. Қиёс: *қўкармоқ*, *оқармоқ* (Бу факт сўз ясалишига оид ишларда қайд этилган).

4. Аффикс морфемалар бирикиб, бир морфемага айланади. *-гарчиллик* (*одамгарчиллик*), *-чилик* (*девёнчончилик*), *-лан* (*руҳланмоқ*), *-моқда* (*келмоқда*), *-моқчи* (*келмоқчи*) морфемалари шу йўл билан юзага келган. Булар «қўшма аффикслар» деб ҳам юритилади. Лекин буни морфемаларни қўшиш билан морфема ҳосил қилиш деб тушунмаслик керак, ўзбек тилида морфемани қўшиш ҳодисаси йўқ. Уларни «қўшма аффикс» деб аташ таркибида ҳозирги ўзбек тилида мавжуд бўлган бирдан ортиқ морфеманинг бўлишига кўрадир. Морфема эса, юқорида алоҳида таъкидланганидек, бирон-бир усул билан ясалмайди. Юқоридаги каби морфемалар эса тил тараққиёти жараёнида таркибидаги қисмларда мавжуд бўлган имконият асосида ҳамда шундай морфемага эҳтиёж борлиги сабабли юзага келади. Булар ҳақида ишнинг сўз ясалиши ва морфологик системаларга бағишланган қисмларида ҳам фикрлар билдирилган.

5. Ўзга тиллардан (бошқа системага мансуб тиллардан) ўзлашган морфемалар. Булар, асосан, сўз ясовчи морфемаларда кузатилади: *адабиётчинос*, *атласфуруни*, *илмий*, *оизлавий* ясама сўзларидаги *-иунос*, *-фуруни*, *-ий*, *-вий* морфемалари шулар жумласидандир.

Хуллас:

1. Ўзбек тили системаларининг шаклланиши билан боғлик назарий масалалар юзасидан олиб борилаётган ишлар кўпгина тил ҳодисаларининг моҳиятини тўғри белгилаш, тўғри ёритиш имконини берди ва шундай ишларни давом эттириш, кучайтириш асосий вазифалардан бўлишини кўрсатди. Шу билан бирга, бу борадаги ишларда юзага келаётган салбий оқибатларнинг, хато ва камчиликларнинг асосий

¹ Бу ҳодиса маҳсус мақоламиизда кенг ёритилган: Ҳожиев А. Аниқ ҳозирги замон феъл формасининг келиб чиқиши ҳақида //Ўзбек диалектологиясидан материаллар. II. Т., 1961. 442-450-б.

сабабларидан бири ўзға тилшуносликка оид ишларда мавжуд бўлган фикр-мулоҳазаларни ўзбек тилшунослигига кўчириш – кўчирмачилик билан шуғулланиш эканлигини, аксинча, бевосита ўзбек тилининг ўз материаллари асосида иш олиб бориш ижобий натижаларга олиб келишини очик-ойдин тасдиқлади.

2. Тил системаларининг шаклланиши билан боғлиқ ҳодисаларнинг моҳиятини тўгри ёритиш лисон билан нутқни, лисоний бирлик билан нутқий бирликни тўғри фарқлаш имконини берди, яъни **лисон** – киши миёсидаги тил хотираси марказида мавжуд бирликлар ва улардан фойдаланиш қоидаларидан иборат бойлик. Нутқ – лисоннинг фикр ифодалаш жараёнида амал қилиши. Лисоний бирлик лисонга, нутқ бирлиги нутққа мансуб бўлади. Лисоний бирликнинг намоён бўлиши нутқ бирлигини юзага келтиравермайди. Шунингдек, нутқсиз нутқ бирлиги ҳақида гапириш мумкин эмас.

3. Тил системаси ҳақида фикр юритилган ишларнинг деярли барчасида кўлланган, кўлланаётган «тил қурилиши» бирикмаси таркибидаги «қурилиш» сўзи тил системасига алоқадор бирор ҳодисани қайд эта олмайди, бинобарин, «тил қурилиши» бирикмасини термин сифатида кўллаш мумкин эмас ва кўллашга эҳтиёж ҳам йўқ.

4. Муайян қийматга эга бўлган тил бирликлари мажмуини *тил сатҳи* термини билан аташ мумкин ва тўғри бўлади. *Тил босқичи* бирикмасини кўллашга эҳтиёж йўқ.

5. Бир хил қийматга эга бўлган тил бирликларининг йигиндиси, мажмуу тил сатҳини ташкил этади.

6. Бундай тил бирликларининг ўзаро муносабатидан ташкил топган гурухлар *тузилма (структуря)* дейилади.

7. Бундай тузилмалар муайян сатҳга хос система (системалар) ҳисобланади.

8. Асосий вазифасига кўра тил бирликларининг уч тури фарқланади: 1) тил системаларини шакллантирувчи бирликлар; 2) ясовчи бирликлар; 3) функционал бирликлар.

9. Тил бирлиги сифатида морфема икки моҳиятга эга: 1) тил сатҳини ташкил этувчи бирлик – морфем сатҳ бирлиги; 2) ясовчи бирлик – ясама сўз ва сўз шаклини ясовчи бирлик.

10. Ясама сўз ва сўз шаклида сўз ясовчи ва шакл ясовчи морфема кўшиладиган қисм морфемадан бошқа моҳиятга эга бўлган тил бир-

лиги – уни морфема ҳисоблаш мумкин эмас. Шу боис унга нисбатан ўзбек тилшунослигига кўлланаштган “ўзак морфема”, “бош морфема”, “асосий морфема”, “етакчи морфема” «терминлари» бирон-бир моҳиятни қайд эта олмайдиган, кераксиз терминлардир. Ўз навбатида, “ёрдамчи морфема”, “эрғаш морфема”, “грамматик морфема” каби терминларга ҳам эҳтиёж йўқ.

11. Ясовчи бирлик сифатида унинг амалиёти билан боғлик ҳодисалар тилшуносликнинг «Сўз яалиши» ва «Морфология» бўлимларида ўрганилади.

12. Морфема тил системасини, жумладан, «морфем система» деб аталиши мумкин бўлган системани шакллантирилди – у системани ташкил этувчи бирлик эмас. Бу унинг мустақил бўлмаган тил бирлиги экани билан изохланади.

13. Тил тараққиёти жараёнида, унинг барча сатҳларида бўлгани каби, морфем сатҳда ҳам ривожланиш юз беради. Бу ривожланиш ҳам баъзи морфемаларнинг истеъмолдан чиқиши, янгиларининг пайдо бўлиши билан характерланади. Морфема ясалмайди.

ИККИНЧИ ҚИСМ

ЛЕКСИК СИСТЕМА. ТИЛ БИРЛИГИ – СҮЗ (ЛЕКСЕМА)

Сўз ва лексема

Умумтилшуносликда тилни система сифатида ўрганиш бўйича амалга оширилган ишларнинг натижалари ўзбек тилшунослигига ҳам ўз таъсирини ўтказди: ўзбек тилшунослигига ҳам кейинги вақтларда ўзбек тилини система сифатида ўрганишга, айниқса, ўзбек тили системаларининг шаклланиши билан боғлиқ назарий масалаларни ҳал этишга алоҳида эътибор қаратилди, бу эса ўз самарасини бера бошлади. Ўтган қиска вақт ичидаги тил бирликлари, улардан хар бирининг моҳияти юзасидан билдирилган янги-янги фикрларнинг ўзиёқ бунга далил бўла олади. Лекин бу борадаги энг муҳим, биринчи навбатда ҳал этилиши лозим бўлган кўлгина масалалар бўйича ҳам тўғри ва аниқ бир фикрга келинганича йўқ. Бу эса тил системаларини шакллантирувчи хар бир тил бирлигининг, улар асосида юз берадиган тил ҳодисаларининг моҳияти ниҳоятда мураккаблиги билан изоҳланади. Ана шундай мураккаб, ҳал этилиши муҳим, долзарб бўлган масалалардан бири «сўз» деб аталувчи тил бирлигининг моҳияти масаласидир. Лекин бу масалада эришилган натижаларнинг ижобийсидан кўра салбийлари салмоқли ўрин тутади, десак хато қилмаган бўламиз. Буни шу ҳолатданоқ аниқ кўриш мумкинки, бир ишда лексик система тил бирлиги учун *лексема* термини умуман тилга олинмаса¹, бошқа бир ишда бу тил бирлиги учун сўз термини сифатида умуман кўлланмайди². Баъзи ишларда эса лексема лисоний бирлик, сўз эса нутқ бирлиги деб қаралади. Лексикология масалаларига бағишлиланган яна бошқа ишларда *сўз ва лексема* терминларининг моҳияти, бир-бирига муносабати ҳакида ҳеч қандай гап йўқ, факат *сўз термини* кўлланади³.

¹ Зикриллаев Г. Истиклол ва адабий тил. Тошкент: Фан, 2004.

² Рахматуллаев Ш. Тил қурилишининг асосий бирликлари. Тошкент: Университет, 2002.

³ Миртожиев М. Ҳозирги ўзбек адабий тили. Тошкент: 2004. 145-183-б.

Шу келтирилган фактнинг ўзиданок ўзбек тилшунослигининг энг марказий, назарий масаласида – тил системасига оид асосий бирликлар масаласида қай даражада кўнгилсиз ҳолат юзага келганлиги ни сезиб олиш қийин эмас. Ўзбек тилшунослигининг амалиёти билан боғлик ишларимизда бу каби ҳолатнинг нақадар заарарли оқибатларга олиб келишини кўз олдимизга келтириб кўрайлик. Энг ажабланарлиси, ачинарлиси шундаки, бундай хатоликлар хақида, бир-бирига зид қарашларнинг на униси, на бунисига жиддий муносабат билдирилмаяпти. Ўзбек тили фактлари мутлақо тасдикламайдиган қарашлар асосида ўкув дастурлари, ўкув кўлланмалари, ҳатто дарсликларни чоп этиш ишлари давом этяпти.

Тилни система сифатида ўрганишга жиддий эътибор қаратиш билан бирга ҳозиргача бўлган ўзбек тилшунослигининг камчиликлари хақида ҳам фикрлар билдириляпти. Жумладан, тил ва нутқ, тил бирлиги билан нутқ бирлиги масаласига жиддий эътибор берилмаганлиги ва бошқалар. Қизиги шундаки, «система тилшунослик» талаби асосида бажарилган тадқиқотларда ҳудди шу масалада хатоликлар, чалкашликлар янада кўпайди, кўпайиша давом этяпти¹. Бунинг энг асосий сабаби шундаки, ўзбек тилини система сифатида ўрганишнинг аҳамияти хақида жуда кўп гапирилаётган бўлса-да, лекин ҳар бир системани, жумладан, лексик системани шакллантирувчи тил бирлиги ва унинг моҳияти аниқ белгиланганича йўқ. Бу ҳол ўзига хос салбий натижаларини беряптики, иш давомида бунга ишонч ҳосил қиласиз.

Лексема термини ҳақида

Тилшуносликда лугавий бирликнинг ифодаси учун *лексема* терминининг истеъмолга киритилгани маълум. Натижада айни бир ходиса учун, яъни лугавий бирликнинг ифодаси учун икки термин – *сўз* ва *лексема* терминининг қўлланиш ҳолати юзага келди. Аслини олганда, *лексема* термини *сўз* термини билан бир хил (тeng) маъноли термин сифатида истеъмолга киритилгани йўқ. Баъзи мутахассисларгина бу терминнинг истеъмолга киритилиш сабабини тўғри англаб етмаяптилар. Ҳудди шу мутахассисларнинг ўзбек тили лексикасини система сифатида ўрганишга бағишиланган ва шундай ўрганишни

¹ Булар ҳақида ишнинг биринчи кисмида ҳам етарли маълумот берилди.

таргиб этувчи ишларидаги турлича хатоликлар, ўзбек тили материаллари тасдиқламайдиган фикрлар кўплаб учрайди.

Умумтилшуносликда, жумладан, Европа тилшунослигига лугавий бирликни ифодалаш учун лексема терминининг истеъмолга киритилиши, бунинг сўз терминидан фарқли белгиси ва шу кабилар хақида аниқ ва тўғри фикрлар билдирилган. Шу боис бу масалада баҳс-мунозаралар йўқ хисоб; бу терминларнинг хар бири ўз ўрнида қўлланишда давом этяпти. Афсуски, ўзбек тилшунослигига лексема билан сўз масаласида бир-бирига зид фикрлар, қарашлар давом этяпти. Бу ҳолат эса бошқа масалаларда ҳам турли хатоликлар, ортиқча, кераксиз баҳс-мунозараларнинг келиб чикишига сабаб бўляпти. Буларнинг барчаси тилшуносликда сўз ва лексема хақида мавжуд бўлган, тайёр фикрларни тўғри ўзлаштира олмаслик ҳамда тил ходисаларининг моҳиятини белгилашда бевосита тил фактлари асосида иш кўрмаслик, ўзбек тилининг материалларига етарли эътибор бермасликнинг оқибатидир.

Бир вақтлар тилшуносликда сўз терминининг талабга жавоб бермай қолганлиги, ҳатто сўзга таъриф бериб бўлмайдиган ҳолат юзага келганлиги хақида гап кўпайди. Кейинги вақтларда бундай гаплар, хеч қандай асоссиз, ўзбек тилшунослигига ҳам кўчирилди. Бу билан сўз термини ўрнида лексема терминини қўллаш тўғри ва мақбул бўлишини исботлашга ҳаракат ҳам қилинди: «Лекин лексемалар ичida шундайлари ҳам борки, улар гапда мустақил ўринни эгаллай олмайдилар. Бундай лексемалар сирасига ёрдамчи сўзлар (богловчилар, соғ от, феъл, равиш кўмакчи, юклама, нисбий сўзлар ва б.; ҳам, ҳамда, бироқ, лекин; учун, билан, каби, янглиг, бурун кабилар) киради. Моҳиятан ушбу ёрдамчи лексемалар грамматик морфемалардир. Лексемалар билан (лугавий морфемалар билан) қўшимчалар (грамматик, аффиксал морфемалар) орасида ана шундай bogланишни, бирининг иккинчисига ўтиш хусусиятини хисобга олмаслик анъанавий тилшуносликда сўз таърифини беҳад чигаллаштириб юборди. Натижада сўзга таъриф бериб бўлмайдиган даражага келиб қолди. Систем лексикология эса бу қарама-қаршиликка чек қўйди»¹.

Киска килиб шуни айтиш керакки, биринчидан, моҳиятан бирбиридан фарқли тил бирликлари фарқланмай, улар учун сўз термини

¹ Невъматов Х., Расулов Р. Юкорида кўрсатилган асар, 37-38-б.

кўлланган экан, бу факт сўз терминининг айби эмас, тилшуносликнинг муайян даврдаги даражаси, шу давр тилшуносларининг савияси билан изоҳланади. Ҳар бир тил бирлигининг моҳияти аник (тўгри) белгилангач, ҳар бири учун мувофиқ термин яратилади. Бу билан сўз ортичча “юқ”дан қутулади, унга таъриф бериш ҳам қийин бўлмайди. Демак, бунинг учун лугавий маъноли бирликка нисбатан қўлланниб келган сўз терминини **лексема** термини билан алмаштиришга ҳеч қандай эҳтиёж бўлмаган. Қолаверса, бундай алмаштириш ўзига хос салбий оқибатларни юзага келтирдики, кўпгина масалаларда бунга ишонч ҳосил қиласиз. Яна шуни ҳам айтиш керакки, “анъанавий тилшунослик”ни лугавий морфемалар билан аффиксал морфемалар орасидаги боғликларни, бирининг иккинчисига ўтишини ҳисобга олмаслиқда айблаб, “систем лексикология бу қарама-қаршиликка чек кўйди” дейиш учун ҳеч қандай асос йўқ.

Ҳ. Неъматов, Р. Расулов ва Ш. Раҳматуллаевларнинг рисолалирида лексема билан сўзга маҳсус таърифлар берилган: «...луғавий морфемаларни умумлашган маъноли грамматик қўшимчалардан – аффиксал морфемалардан фарқлаш зарур. Шу сабабли систем тилшуносликка **лексема** тушунчаси ва атамаси киритилган»¹

Морфеманинг бир турини иккинчи бир туридан фарқлаш учунгина **лексема** тушунчаси ва атамаси киритилган бўлса, у ҳолда бу терминни қўллашга эҳтиёж бўлган ва ҳозир ҳам бор дея олмаймиз. Чунки, биринчидан, ўзек тилида морфеманинг «лексик морфема» деб аталиши мумкин бўлган турининг ўзи йўқ. Иккинчидан, «грамматик морфема» деб аталаётган бирликнинг (умуман морфеманинг) моҳиятини «лексема» сўзисиз ҳам аник тасаввур этиш ва ёритиш мумкин. Яна эътибор беринг: «Лексема – тил бирлиги, тайёр ва турлича имкониятлар мажмуаси бўлса, сўз унинг воқеланиши, рӯёбга чиқиши, аник шакл, мазмун ва вазифа кашф этган моддий қўринишидир. Ҳар бир лексема нутқда муайян сўз сифатида намоён бўлади» (Шу рисола, 47-б.).

Проф. Ш. Раҳматуллаев лексеманинг моҳияти ҳақида шундай дейди: “Тил хотирасида ҳар бир лексеманинг тил бирлиги сифатида ўз рамзи бўлади, ана шу рамз асосида лексема нутқда талаффуз бирлиги сифатида намоён бўлади. Шунга кўра бу тил бирлиги лисоний бирлик

¹ Несъматов Ҳ., Расулов Р. Шу рисола. 37-б.

холатида *лексема* деб, нутқий бирлик холатида *леке* деб юритилади¹.

Биринчи ишда лексеманинг намоён бўлиши билан нутқ бирлиги – сўз юзага келиши (лексеманинг сўзга айланиши) тан олинади. Ш. Раҳматуллаев эса бу фикрга қўшилмайди ва бирор ўринда сўз терминини қўлламайди. Бунинг сабаби ҳақида эса ишда бирор фикр-мулоҳаза учратмадик.

Лексема тушунчаси ва атамаси морфеманинг бир турини иккинчи бир туридан фарқлаш учун киритилган бўлса, у ҳолда лисоний бирликнинг *лексема* деб аталадиган тури бўлиши мумкин эмаслиги айтилди. Бироқ юқорида айтилганлар ва келтирилган фактлардан ҳам маълум бўлиб турибдики, асосий гап лексемани морфемадан фарқлашда эмас, балки лисоний бирлик билан нутқий бирликни фарқлаш, аниқроқ қилиб айтганда, *лексема* деб аталмиш лисоний бирликнинг нутқий бирлик бўлмиш сўзга айланиши устида боряпти. Бу фактлар яна шундан далолат бериб турибдики, «лексема» терминининг нима учун киритилганлиги ҳам, лексеманинг нутқда сўзга айланиши ҳақидаги гап ҳам асоссиз гапдан бошқа нарса эмас. Улар ўзбек тилининг ўз материалларини таҳлил этиш асосида чиқарилган хуросалар эмас².

Келтирилган фактларнинг ўзиданоқ қўриниб турибдики, баъзи тилшуносларимиз *лексема* терминининг истеъмолга киритилиш сабабини тўгри англаб етмаганлар ёки ўзларича бу масалада янгилек яратмоқчи бўлганлар.

Юқорида қайд этилган икки ишда тил (лисон) билан нутқни, лисоний бирлик билан нутқий бирликни фарқлаш тилни система сифатида ўрганишда муҳим аҳамиятга эгалиги алоҳида таъкидланган (Аслида, бу гаплар ҳам бошқа тилшуносликка оид илмий адабиётларда қайд этилган). Бироқ ҳудди шу ишларнинг ўзида бу ҳодисаларнинг, бу тил бирликларининг моҳияти тўгри ечимини топгани йўқ. *Лексема* ва сўз масаласида ҳам ҳудди шу гапни айтиш мумкин.

Юқоридаги таърифдан кўрдикки, лексема – лисоний бирлик, «хар бир лексема нутқда муайян сўз сифатида намоён бўлади». Аммо бу ва шунга ўхашаш гаплар жуда кўп айтилса-да, улар фактлар асосида ўз исботини топганича йўқ ва топиши мумкин ҳам эмас.

¹ Раҳматуллаев Ш. Ўша рисола, 16-бет.

² Лисон ва нутқ, лисоний бирлик ва нутқий бирлик ҳақида ишнинг морфемага багишланған биринчи кисмида ўз фикр-мулоҳазаларимизни билдирганмиз.

Умумий тилшуносликка оид адабиётларда мустакил сўзнинг лугавий ва грамматик маънога эгалиги, шунинг учун ҳам у *лексик-грамматик бирлик* хисобланиши қайд этилган ва бу фикрга шу вактгача бирон-бир эътиroz билдирилганича йўқ¹. Демак, лугавий маънога эгалик сўзнинг бир хусусияти, туркумликни – қайси сўз туркумига мансубликни қайд этувчи маъно эса унинг грамматик (категориал) маъноси (иккинчи хусусияти) деб қаралган. Лугавий маъно ҳар бир сўз учун хусусий маъно, грамматик маъно эса сўзлар, сўзлар гурухи (лексик-грамматик бирликлар) учун умумий маъно хисобланган². Шундай экан, сўзнинг бир томонини, яъни лугавий маъносини алоҳида олиб, уни қандайдир «тил бирлиги»га ёпиштириш ва бу бирликни «лексема» деб аташ мумкин эмас ва бундай қилишга эхтиёж ҳам йўқ. Шунингдек, сўзнинг туркумлик маъносини алоҳида олиб (ёки шу маъно асосида), уни грамматик бирлик, яъни «сўзшакл» ёки «сўзнинг шакли» хисоблаш ҳам мумкин эмас.

Сўзнинг лугавий маъноси (семемаси) таркибида умумий (бираштирувчи) ва хусусий (фарқловчي) сема бўлиши маълум. Лугавий маънодаги умумий сема бирдан ортиқ сўзда мавжуд бўлиши мумкин. Ана шу умумий семаси асосида сўзлар муайян гурухга бирлашади ва бу гурухлар сўзларнинг маънога (lugavий маънога) кўра гурухи хисобланади ва, одатда, «сўзларнинг семантик гурухи» ёки «лексик-семантик гурух» деб юритилади. Масалан, *олма, нок, голос, тол, олхўри, шафтоли* сўзларининг маъноси (семемаси) таркибидаги «дараҳт» семаси; *дараҳт, бута,райхон, гул* сўзларининг семасидаги «ўсимлик» семаси шу сўзларнинг маъносидаги умумий сема хисобланади. Шу семаси асосида улар бир семантик гурухни ташкил этади. Тилшуносликнинг лексикология бўлимида сўзнинг лугавий маъноси, маънога кўра гурухлари ва улар билан боғлиқ ҳодисалар ўрганилади. Бошқача айтганда, худди шу томонлари билан сўз лексикологиянинг ўрганиш объекти хисобланади.

Ана шу айтилганларнинг ва келтирилган фикрларнинг ўзиёқ «лексема» деб аталиши мумкин ёки шарт бўлган, сўздан бутунлай

¹ Березин Ф.М., Головин В.Н. Общее языкознание. М.: 1979. -С.154.

² Бу хақда маҳсус маколамиизда фикр билдирилган: Ҳожиев А. Ўзбек тилшунослигининг долзарб муаммолари (6-мақола) / Ўзбек тили ва адабиёти, 2007. З-сон, 30-37-б.

фарқли, алоҳида тил бирлиги йўклигини кўрсатади. Шунинг учун ҳам эътиборли манбаларда лексема сўздан фарқли бўлган алоҳида тил бирлиги сифатида қаралмайди, аксинча, лексик маъно сўзга мансуб эканлиги эътироф этилади, лексема тилнинг лугат таркибига мансуб сўз сифатида таърифланади¹. Лексика эса «тилдаги сўзлар мажмуи» деб таърифланади². Бундай эътирофни рад этиш ва шу маънода лексема терминининг кўлланишига қўшилмаслик мумкин эмас. Зоро, худди шу маънода сўз термини ўрнида лексема терминини кўллаш сўзининг лугавий маъноси билан боғлиқ тил ҳодисаларини аник қайд этиш, уларнинг моҳиятини тушуниш ва тушунтиришда катта имкониятлар, кулайликлар юзага келтиради, илмий-тадқиқот ишларида жуда қўл келади. Аслида ҳам, худди шундай имкониятлар бериши туфайли лексема термини истеъмолга киритилган. Унинг шу имкониятлари асосида иш кўрилса, ҳозирда ўзбек тилшунослигига сўз ва лексема масаласида мавжуд бўлган нохуш ҳолатларнинг барчасига – «лексема лисоний бирлик, сўз нутқий бирлик», «лексема намоён бўлиши билан сўзга айланади» каби тутуруксиз, асоссиз гапларнинг барчасига чек қўйилади, сўз терминидан воз кечиб, фақат лексема терминини кўллашга ўтишдек ниҳоятда салбий оқибатларга олиб келиши мумкин бўлган харакатнинг олди олинади ва ҳоказо (Иш давомида бунга тўла ишонч ҳосил килинади).

Лексема термини сўзга хос бўлмаган бирон-бир тушунчани, масалан, «лугавий маъно»дан бошқа нарсани билдира олмас экан, уни моҳиятан сўздан фарқли термин сифатида қўллаш мумкин бўлмайди. Худди шу нарса лексемадан бошқа бир тил бирлиги ясаллиши ёки ясалмаслиги масаласидаги баҳс-мунозараларга ҳам чек қўяди, яъни ясалиш ҳодисасининг лексемага эмас, сўзга хослигига шубха қолдирмайди – ясалиш (сўз ясаллиши ва шакл ясаллиши) сўз

¹ Лингвистический энциклопедический словарь. М.: Советская энциклопедия. 1990. -С.297. Шу ишда сўз, морфема, лексема ҳакида ниҳоятда кимматли фикрлар билдирилган. лекин лексеманинг вокеланиши билан лисоний бирлиқдан нутқий бирликка айланиши ёки «лексеманинг сўзга айланиши» ҳакида хеч кандай гап йўк. Чунки шундай ҳодисанинг ўзи йўк. Яна қаранг: Розенталь Д. Е., Теленкова М. А. Словарь-справочник лингвистических терминов. М.: Просвещение. 1976 -С.160.; Ҳожиев А. Тилшунослик терминларининг изохли лугати. Тошкент, 2002. 56-, 58-б.; Березин Ф. М., Головин В. Н. Юкорида кўрсатилган асар. -С.165-166.

² Березин Ф. М., Головин В. Н. Юкорида кўрсатилган асар. -С.162.

асосида, сўзнинг лугавий ёки туркумлик маъноси асосида юз беради, ҳар икки ҳолатда, яъни сўз ясалиши ва шакл ясалишида сўз «ясалиш асоси» вазифасини бажаради.

Хуллас, лексема терминининг истеъмолга киритилиши ва унинг моҳиятини тўғри англаш кўпгина тил ҳодисаларининг моҳиятини тўғри ёритиш имконини беради. Шу боис унинг ўзига хос вазифага эга бўлган термин сифатида қўлланаверишига эътиroz бўлиши мумкин эмас.

Биз ҳам лексема терминини худди шу маънода – «тилнинг лугат таркибига мансуб сўз» маъносида қўлладик. Сўз термини эса, ўрни билан шу маънода ҳам қўлланавериши мумкин. Эса фақат сўз термини қўлланиши керак. Шу боис ҳам туркumlаниш ҳакида фикр юритилганда, фақат сўз термини қўлланади – сўз *туркумлари*, сўзларнинг туркумланиши каби бирикмалардаги сўз ўрнида лексема сўзини қўллаш мумкин эмаслигининг сабаби ҳам шунда.

Хуллас, лексема термини «тилнинг лугат таркибига мансуб сўз», «лугавий маъноли сўз» деган маънода, сўзнинг бир вазифасидагина қўлланади. Колган холларда «сўз» ўрнида «лексема» қўлланмайди. Масалан, сўз *ясалиши*, сўз *шакли*, сўз *ургуси*, сўз *бирикниаси*, сўзларнинг пайдо бўлиши, лугатнинг сўзлиги бирикмалари таркибидаги сўз ўрнида лексема қўлланмайди.

Шу айтилганлар асосида фақат лугавий системанинг тил бирлигини лексема, системанинг ўзини лексик система деб атадик – уларга нисбатан шу терминларни қўлладик.

Лексик маъно ва тушунча

Лексик системаларнинг шаклланиши билан бодлиқ ҳодисаларнинг моҳиятини ёритишда лексик маъно билан тушунчанинг моҳиятини аниқ фарқлаш мухимдир. Анъанага кўра, сўзнинг маъноси билан тушунчанинг фарқи ҳакида гапирилар, шу боис бу ҳақда «сўз ва тушунча» каби сарлавҳалар остида фикр юритилар эди. Лекин, юқорида кўрдикки, лугавий маъно ҳакида гап борганида, лексема сўзидан фойдаланиш мақсаддага мувофиқ бўлади. Лугавий маъно билан тушунчанинг моҳиятини белгилашда ва ифодалашда ҳам лексема, лексик маъно терминларининг афзалликларга эгалиги янада аниқрок намо-

ён бўлади. Масалан, сўзнинг мазмун жиҳати ҳақида гап борганида, «сўзнинг лугавий маъноси» бирикмасини ҳамма вакт кўллаш мумкин, «лексеманинг лугавий маъноси» бирикмасини кўлла ш деярли кузатилмайди. Чунки лексеманинг шундан бошқача маъноси йўқ – “лексик маъно” дейишнинг ўзи кифоя. Лексеманинг маълум воқеликни номлаши ва маълум бир лугавий маъно англатиши шу мавзуга оид барча ишларда эътироф этилган. Тушунча эса бундай маънодан, яъни лексик маънодан фарқланади. Бошқача айтганда, лексеманинг тушунчани ифодалаши ҳақида гап бўлиши мумкин эмас. Лексема, юқорида айтилганидек, лугавий маъноли сўз, лексикологиянинг обьекти сифатидаги сўз – лексик сўз. Шунинг учун ҳам уни (*лексема* сўзини) тушунчани ифодаловчи бирлик сифатида кўллаш мумкин эмас. Лугавий маъно изоҳланади, тушунча эса таърифланади, тушунтирилади. Тушунчани қайд этувчи сўзлар “термин” деб юритилади.

Сўз, лексема, лексик маъно ва тушунча ҳақида айтилганлардан маълум бўлдики, сўз: 1) лугавий маъноси билан, шундай маъно ифодаловчи сифатида – лексема; 2) фан, техника ва бошқа соҳага оид тушунчани аниқ ифодалайдиган бирлик сифатида – термин. Демак, *лексема*, *термин* ўрнида ‘сўз’ни кўллаш мумкин, лекин *лексема*, *термин* сўзларини сўз термини ўрнида кўллаш ҳамма вакт мумкин бўлавермайди – сўзнинг мазмун жиҳати кенг. Шу билан бирга, *лексема* ва *термин* сўзларининг (термин сифатида) бири ўрнида иккинчиини кўллаш мумкин эмас. Чунки улар сўзга хос бошқа-бошқа хусусиятларни ифодаловчи, сўзни бир-биридан фарқли хусусияти билан билдирувчи бирликлардир¹; 3) *лексема* сўзининг термин сифатида истеъмолга киритилиши ва унинг моҳиятини тўғри англаш асосида иш кўриш тил ҳодисаларининг моҳиятини тўғри ёритиш имконини беради.

Лексеманинг семантик таркиби

Лексеманинг ўз ифода ва мазмун жиҳатига эга бўлган тил бирлиги эканлиги, ифода (шакл) жиҳати фонемалардан ташкил топиши адабиётларда қайд этилган, бу масалада фикрлар бир хил. Лекин лексеманинг мазмун жиҳати ва у билан боғлиқ жуда кўп ҳодисаларнинг

¹ Бу ўринда терминнинг ўзига хос барча хусусиятларига тўхташни лозим топмаймиз.

моҳияти масаласида бир хил фикрга келинганича йўқ. Бунинг асосий сабаби лексема маъноси таркибий қисмларининг ва улар билан боғлик ҳолда юз берадиган тил ҳодисаларининг моҳияти ниҳоятда мураккаблигидадир. Ана шу ҳодисаларни, улардан ҳар бирининг моҳиятини тўғри белгилаш эса лексик системанинг шаклланиши билан боғлик ҳодисаларнинг моҳиятини аниқ ва тўғри ёритиш имконини беради. Демак, лексеманинг таркибий қисмлари, улар билан боғлик муаммоларни ҳал этиш лексик системаларнинг шаклланиши билан боғлик масалаларни ёритишда биринчи навбатдаги вазифа ҳисбланади. Бу эса мазкур вазифанинг қай даражада муҳимлиги ҳақида аниқ тасаввур беради.

Сўзнинг маъноси *семема* термини билан, семеманинг таркибий қисмлари *сема* термини билан юритилаётгани маълум. Лекин семема таркибидаги семалар, уларнинг моҳияти, баъзиларининг ҳатто бор-йўклиги ҳақида бир фикрга келинган эмас. Ўзбек тилшунослигига лексеманинг семемаси таркибида куйидаги семалар бўлиши ҳақида фикрлар бор: 1) аташ семаси (номловчи сема); 2) ифода семаси (коннотатив сема); 3) туркумлик семаси; 4) вазифа семаси. Булардан аташ семаси (номловчи сема) ва ифода семаси (коннотатив сема) шу мавзуга бағишлиланган деярли барча ишларда келтирилади ва худди шу семалар лексик системаларнинг шаклланишида катнашади. Шу боис бу семалар ҳақида ишнинг «Лексик системаларнинг шаклланиши» деб номланган бобида фикр юритилиди. Бу бобда моҳияти, ҳатто семема таркибида бўлиш-бўлмаслиги, бор-йўклиги ҳақида бир фикрга келинмаган «вазифа семаси» ва «туркумлик семаси» юзасидан ўз мулоҳазаларимизни билдириш билан чекланамиз.

Вазифа семаси

Лексеманинг семантик таркиби, таркибий қисмларининг моҳияти ҳақида фикр юритилган ишларда лексеманинг семемаси таркибида 'вазифа семаси' бўлиши (борлиги) айтилади ва буни исботловчи далиллар ҳам келтирилади. Бироқ бирор ишда шу фикр исботини топмаган. Бу ҳол мазкур масалада ортиқча, кераксиз гап-сўзларга, баҳс-мунозараларга сабаб бўляпти. Буларга барҳам беришнинг ўзиёқ асоси

сий вазифалардан бири ҳисобланади. Фактларга мурожаат қилайлик: «Вазифа семалари семема таркибига киравчи ва лексеманинг нутқда қандай вазифаларда кела олишини (синтактик қурилиш қолилларида қандай ўринни эгаллай олишини) билдирувчи семалардир. Вазифа семалари лексеманинг бирикувчалигини (синтактик валентлилигини) ҳам белгилаб келади. Масалан, [китоб], [мактаб], [адолат], [ёз] каби лексемалар гапда турлича гап бўлаклари вазифасида кела олади. Шунинг учун уларда вазифа семалари оддий (нейтрал) ва ўта кенг бўлади. [энди], [бирдан], [шахдам] каби лексемаларда вазифа семаси белгининг белгисини ифодалаш; [катъий], [кеескин], [мовий] ва [кизгиш] каби лексемаларда эса нарса-буюм ва белгини ифодалаш вазифаси билан чекланади¹. Биринчидан, гап бўлаклари вазифасида келиш билан белгининг белгисини кўрсатиш тамомила бошқа-бошқа ҳодисалардир. Иккинчидан, булар лексемаларга хос ҳодисалар эмас. Учинчидан, 'вазифа семаси' ҳакидаги гапларнинг барчаси қуруқ гаплигича қолган, яъни келтирилган лексемалар семемасининг қайси семаси вазифа семаси эканлиги кўрсатилмаган (кўрсатилиши мумкин ҳам эмас). Умуман, нутқда қандай вазифада келиш, белгининг белгисини кўрсатиш кабилар лексемага эмас, сўзга хос хусусиятлардир. Қолаверса, вазифа семалари деб қаралаётган семалар, аслида, сўз (лексема) семемаси таркибидаги нарса, белги, ҳаракат кабиларни номловчи семалардир. Шундай семалардан қайси бирига эга бўлишига кўра (нимани номлашига кўра) сўзлар муайян вазифаларда қўлланади. Бу эса шундай семаларни вазифа семалари ҳисоблашга асос бўла олмайди. *Қизғии, сарғии, кўқимтирир* каби сўз шакли эса саноқли сўзлардагина мавжуд ва улар лексема эмас, сўз шакли ҳисобланади.

Ҳ.Жамолхоновнинг лексеманинг смантик таркиби ҳақида фикр юритилган маҳсус ишида шу масала юзасидан эътиборга лойик фикр-мулоҳазалар билдирилган. Жумладан, унда вазифа семаси ҳақида қуидагилар айтилган: «Вазифа семалари ҳам семема таркибига киради, аммо улар аташ, ифодалаш билан бирга лексемаларнинг нутқда ўзаро бирика олишини (валентлигини, дистрибуцияни), шу орқали гапда маълум вазифа бажаришини белгилайди. Масалан, чой лексемасининг лексик маъноси (семемаси) таркибида «қайта ишланган», «суюклик», «ичимлик», «куруқ», «куритилган», «чой ўсимлиги» сема-

¹ Нематов Х., Расулов Р. Юкорида кўрсатилган асар, 62-б.

лари бор. Бу семалар чой лексемасининг ўстирмоқ, ичмоқ ва дамламоқ феъллари билан бирика олишини таъминлади: чой ўстирмоқ, чой дамламоқ, чой ичмоқ, чой қайнатмоқ каби»¹. Кўриниб турибдики, бу ўринда ҳам «вазифа семаси» деганда унинг лексеманинг ўзаро бирика олишини таъминлаши (валентлиги), шу орқали гапда маълум вазифа бажаришини белгилаши назарда тутилади. Лекин эътиборлиси шундаки, муаллиф чой лексемаси таркибида мавжуд бўлган семаларнинг номловчи сема эканлигини, улар аташ, ифодалаш билан бирга лексемаларнинг нутқда ўзаро бирика олишини, шу орқали гапда маълум вазифа бажаришини таъминлашини эътироф этади. Бу эса чой лексемасининг таркибидаги семаларнинг аташ семаси – номловчи сема эканлигини тан олишдир. Шу семаларга эга бўлган тил бирлигининг нутқда маълум вазифа бажариши – бошқа масала. Аникроқ килиб айтганда, лексема (сўз) семемаси таркибидаги семалар номловчи сема экан, уларни вазифа семаси ҳисоблашга ўрин қолмайди. Колаверса, “лексеманинг гапда вазифа бажариши” ҳақида гап бўлиши мумкин эмас. Энди лексеманинг семантик таркиби ҳақидаги таърифга эътибор беринг: «Лексеманинг семантик таркиби лексик маъно, қўшимча оттенкалар (маъно қирралари, услубий семалар) ва туркумлик семаларини ўз ичига олади.

Лексик маъно лексеманинг ниманидир номлаш (аташ), англатиш, ифодалашидир»².

Таърифдан маълум бўляптики, лексеманинг семантик таркибида вазифа семаси бўлиши ҳақида ҳеч қандай гап йўқ. Мазкур таъриф лексема семемаси таркибий қисмларини ҳамда уларнинг моҳиятини тўғри ифодалайди. Муаллиф чой лексемасининг вазифа семалари деб ҳисоблаётган семалар ҳам, аслида, бундай сема эмас, балки номловчи семалардир. Чунки номловчи семеманинг таркибий қисми ҳам номловчи сема бўлиши табиий, яъни номловчи семема номловчи семалардан таркиб топади, номловчи семема таркибида шундан бошқа моҳиятга эга бўлган сема бўлиши мумкин эмас. Жумладан, чой лексемаси семемасидаги ‘ичимлик’, ‘ўсимлик’ каби семалар ҳам номловчи сема эканига шубҳа бўлиши мумкин эмас. Шу семаларга эга бўлган чой сўзининг чой ўстирмоқ, чой ичмоқ каби бирикмаларда ўстирмоқ, ичмоқ сўзлари

¹Жамолхонов Х. Юкорида кўрсатилган асар, 15-б.

²Шу иш, 10-б.

билингвистика олишини кўрсатмайди, аксинча, уларнинг номловчи сема бўлишини тасдиқлади.

Лексеманинг семантик таркибида вазифа семаси бўлиш-бўлмаслиги ҳакида шуларни айтиш билан чекланамиз. Лекин бу «сема»нинг бошқа тил бирликлари «семантикаси»да бўлиши ҳакида ҳам фикрлар борки, қисқа тарзда бўлса ҳам, уларга муносабат билдирилмаслик мумкин эмас.

Сема семемага эга бўлган тил бирлигига хос бирлик экан, ўз-ўзидан, семемасиз тил бирлигининг вазифа семаси ҳакида гапириш мумкин бўлмайди. Бироқ баъзи ишларда бу масалада бошқача карашлар, фикр-мулоҳазалар кузатилади: «Вазифа семалари ёрдамчи лексемаларда алоҳида ранг-баранглик кашф этади, хилма-хил кўриниш ва хусусиятларга эга бўлади. Масалан, [кўй] лексемаси ёрдамчи феъл вазифасида келганда, «ҳаракатнинг тўсатдан, беихтиёр содир бўлиши» вазифа семасини қабул қиласди ва [кўй] ёрдамчи феълини [юбор], [кол], [бер] ёрдамчи феъллари билан ўхшашлик муносабатига киритади (*Бу гапни айтиб қўйди / айтиб қолди / айтиб юборди / айтиб берди*). Богловчи, кўмакчи, юклама каби лексема семемаларида вазифа семалари етакчилик киласди. Чунончи, [ва] ёрдамчи лексема семемасида «нутқ ва гапларни боялаш» семаси асосий гаркибий қисм саналади. Лексема семемаларининг вазифа семалари ўзбек тилшунослигида энг кам ўрганилган соҳа бўлиб, кўлланмада бу ҳақда тор доирада фикр юритдиқ, холос. Аниқроги, ушбу ишда айни ҳодисани масала сифатида кўйиш билан чекландик¹. Матндан охирги жумла билан муаллифлар масалани ҳал этишни ўз зиммасидан холи қиласди. Лекин масала кўйилдими, унинг мавжудлиги тан олинган бўлади. Қолаверса, ишда «ёрдамчи лексемалар» вазифа семасининг моҳияти ҳақидаги асосий гаплар айтилди. Шундай экан, вазифа семаси ҳакида гап борганда, бу фикр-мулоҳазаларга муносабат билдирилмаслик мумкин эмас. Шу боис улар ҳакида қисқа тарзда кўйидагиларни айтишни лозим топамиз:

Биринчидан, лексеманинг ёрдамчи тури йўқ, яъни “ёрдамчи сўз” деб юритилаётган боғловчи, кўмакчи, юклама ва кўмакчи феълларни “ёрдамчи лексема” деб юритиши мутлако мумкин эмас. Иккинчидан, сема кўмакчи феъллар томонидан (умуман, тил бирлиги томонидан) қабул килинмайди, балки тил бирлигининг маъноси таркибида мажуд бўлади.

¹ Незматов Х., Расулов Р. Юкорида кўрсатилган иш, 62-63-б.

Учинчидан, сема семантик таркибга (семемага) эга бўлган тил бирликларида мавжуд бўлади. Бундай моҳият «ёрдамчи» деб юритилаётган тил бирликларида йўқ. Тўртингидан, ёрдамчи бирликлар ўзаро семантик муносабатга киришмайди. Бешинчидан, семантик таркибга эга бўлган тил бирликларининг маъноси унинг семалари орқали изоҳланади. Ёрдамчи бирликларнинг вазифаси эса тушунтирилади.

Ана шу айтилганларнинг ўзиёк ёрдамчи бирликларнинг вазифа семаси йўқлигини кўрсатади. Шундай экан, бу масаланинг ўзбек тил-шунослигида энг кам ўрганилганлигини таъкидлашга, ўрганилиши лозим бўлган масала сифатида кун тартибига қўйишга асос ҳам, эҳтиёж ҳам йўқ¹.

Проф. М. Миртоҷиевнинг семаларнинг типларини белгилашга бағишлиланган маҳсус мақоласида 'вазифа семаси' деб қаралаётган сема янада бошқача талқин этилади ва бошқача ном билан аталади: «*ничоқчилар сўзининг -лар маъноли қисмида релятив сема ифода топган...* Маълумки, сўз коммуникацияга киришганда факат номловчи семаси билан бошқа сўзларга боғланмайди. У албатта грамматик шаклланган, граммема орттирган бўлади. Сўзнинг ана шу орттирган граммемаси, шакл семантикаси релятив сема деб қаралади. Ҳ. Нематов ва Р. Расуловлар ўз асарларида релятив сема термини ўрнида *вазифа семаси* терминини қўллаганлар ва терминни функциональная сема терминидан таржима қилиб олганликларини қайд этганлар. Шуни ҳам айтиш керакки, *вазифа семаси* термини ҳар қанча тўғри таржима қилиб олинган бўлмасин, *релятив сема* термини ўрнини боса олмайди. Чунки *вазифа семаси* термини сўзлар коммуникациясида уларнинг грамматик муносабати учун восита вазифасини ўтайди. *Релятив сема* ундан кенгроқ ифодага эга. У сўзларга қўшилиб, улардан англашилган маънога қўшимча маъно илова қилувчи аффикс (шакл ҳосил қилувчи аффикс)нинг ҳам моҳиятини ўзида ифодалайди². Биринчидан, Ҳ. Нематов ва Р. Расуловнинг ишида, шунингдек, Ҳ. Жамолхоновнинг ишида сўз шаклига ҳос сема ҳакида эмас, балки лексема семемасига ҳос сема ҳакида фикр юритилган. Демак, мақола муаллифи Ҳ. Нематов ва Р. Расуловнинг

¹ «Ёрдамчи тил бирликлари» билан бўглик муаммолар етарли, лекин уларнинг семе ма ва сема масаласига дахли йўқ.

² Миртоҷиев М. Семаларнинг сўз семемаси таркибида тутган ўрнига кўра типлари. 31-32-б.

ишида вазифа семаси ҳакида айтилган фикрларга муносабат билдиришда, биринчи навбатда, шу нарсага эътибор бериши керак эди. Акс холда, ҳар қандай мақтov ёки танқид қуруқ гап бўлиб қолаверади ва шундай бўлган ҳам. Иккинчидан, мақолада вазифа семаси деганда -лар аффиксига хос сема назарда тутиляпти. *Пичноқчилар* сўзидағи -лар (умуман, -лар аффиксли сўз шакли) бундай маъно ва вазифага эга эмас. Шундай экан, *пичноқчи* сўзига -лар аффикси қўшилиши билан тичоқ сўзининг бошқа сўзга бириқиши-бириқмаслигига ҳеч қандай ўзгариш бўлмайди, *пичноқчилар* сўз шаклига нисбатан ифода семаси ёки релятив сема терминини қўллаган билан улар ҳеч қандай моҳиятни қайд эта олмайди. Қисқа қилиб айтганда, “вазифа семаси” терминини “релятив сема” терминига алмаштириш билан мақсадга эришиб бўлмайди. Аксинча, асоссиз равишда бундай қилиш ўзига хос салбий оқибатларга олиб келади.

Юкорида айтилдиди, семема ва унинг таркибий қисми бўлган сема муайян тил бирлигининг, масалан, лексеманинг семантикаси мисолида ўрганилиши керак. Шундай экан, лексеманинг семемаси унинг таркибий қисми ҳисобланувчи сема (семалар) ҳакида гап бораётганида, сўз шакли ва уни ҳосил қилувчи -лар морфемасининг семаси ҳакида фикр юритиш, аникроги, моҳиятнан бир-биридан фарқли бўлган тил бирликларини коришириш тўғри бўлмайди. Бундай қилиш ўрганилаётган ходисаларнинг (тил бирликларининг) моҳиятини белгилашда факат нотўғри хулосаларга олиб келадики, мазкур макола ҳам бунга мисол бўла олади.

Вазифа семаси ҳакидаги гапларни шулар билан тугатиб, мақоланинг хулоса қисмida семаларнинг типлари ҳакидаги фикрга муносабат билдиришни ҳам шарт деб ҳисоблаймиз: «Семалар сўз семемаси таркибида тутган ўрни ва унинг мантиқий узвлари нуқтаи назаридан туб маънони белгиловчи ядро сема, янги маъно ҳосил қилувчи дериват сема, қўшимча маъно илова қилувчи релятив сема, проклитика ва энклизаларга мансуб сиртқи семаларга ажратилади»¹. Ҳеч иккilanмай айтиш мумкинки, семанинг типларини бундай асосда белгилаш мутлако нотўғри. Шу боис семаларни кўрилган тарзда типларга ажратиш ва ажратилган типлар талабга жавоб бермайди, илмий ва амалий жиҳатдан ҳеч қандай аҳамиятга эга эмас. Улар

¹ Миртоҷиев М. Юкорида кўрсатилган макола. 36-б.

семема, сема ва улар билан бөглиқ тил ҳодисаларининг мохиятини ёритишида нотўғри хуласаларга келишга хизмат қиласди, холос. Буни биргина *синфдоилар* сўзи мисолида аниқ кўриш мумкин. М. Мирто-жиеевнинг қарашига кўра, бу сўзининг *синф* қисми ядро семани, *-доиши* қисми янги маъно ҳосил қилувчи дериват семани, *-лар* қисми релятив семани ифода этади. Бироқ семаларни бу тарзда типларга ажратиш тўғри эмас ва у семеманинг таркибий қисми бўлган семалар ҳамда уларнинг мохиятини тўғри қайд эта олмайди. Чунки, масалан, *синфдоилар* сўзининг *синф* қисми бир семага тенг эмас, бир семемага тенг, у семалардан ташкил топган (исботнинг ҳожати бўлмаса керак). Шу боис “ядро сема” термини семанинг бирор турини қайд эта олмайди. Янги маъно ҳосил қилувчи “дериват сема” бирикмаси ҳакида қуидагиларни айтиш мумкин. Биринчидан, “дериват сема” термини таркибидаги *дериват* сўзи ўзбекча *ясовчи* (сўз *ясовчи*) ўрнида кўлланяпти. Лекин бундай алмаштиришга ҳеч қандай эҳтиёж йўқ. “Ясовчи”, “сўз ясовчи” термини ҳодисанинг мохиятини *дериват* сўзига нисбатан жуда аниқ ифодалайди. Иккинчидан, сема янги маъно ҳосил қилмайди, балки сўз ясовчи морфема янги сўз ҳосил қиласди. Жумладан, *-доиши* морфемаси *синф* сўзининг янги маъносини ҳосил қилаётгани йўқ, *синф* сўзидан фарқли маънога эга бўлган янги сўз ҳосил қиляпти. Учинчидан, “релятив сема” деб қаралаётган *-лар* морфемасига ҳос маъно қўшимча маъно илова қилувчи сема эмас, бу аффикс қўплик маъноли сўз шаклини ҳосил қиласди. Тўртингчидан, “сиртқи сема” ва унинг мохияти ҳакидаги фикр ўзга тилшуносликка оид ишлардан қўчирилган бўлиб, ўзбек тилидаги сўз семемаси таркибидаги семанинг бирон-бир турини қайд эта олмайди. Чунки сема семеманинг таркибий қисми экан, семемадан ташқарида бўладиган сема – сиртқи сема ҳакида гап бўлиши мумкин эмас. Демак, бу термин ўзбек тили учун ортиқча, кераксиз термин ҳисобланади.

Ана шу қисқа тарзда айтилганларнинг ўзидаёқ семаларнинг турларини белгилашга маҳсус бағишлиланган мақолада ҳам бу масала қандай ҳал қилинганлиги ҳакида аниқ тасаввур беради деб ўйлаймиз. Бу айтилганлар ҳатто мақоланинг номи ҳам талабга жавоб бермаслигини кўрсатади, яъни семаларнинг типлари (бизнингча, турлари) семема таркибida тутган ўрнига кўра белгиланмайди, яъни *семемада тутган ўрни* бирикмаси бирор мохиятни билдира олмайди. Семанинг турлари улардан ҳар бирининг мохияти асосида белгиланади.

Айтилганларнинг барчаси лексеманинг семемаси таркибида «вазифа семаси» деб аталиши мумкин бўлган сема йўқ, дейишга асос бўла олади.

«Туркумлик семаси» масаласи

Ўзбек тилшунослигига семема ва сема ҳакида фикр юритилган ишларга эътибор берилса, бир-биридан фарқли ҳолатлар кузатиласди: 1) семеманинг семалари, унинг турлари каторида туркумлик семаси келтирилмайди, демак, бундай сема борлиги тан олинмайди¹; 2) бошқа семалар каторида туркумлик семаси келтирилади. Лекин, биринчидан, бу семанинг моҳияти ҳакидаги фикрлар бир-бирига мос келмайди. Иккинчидан, бирор ишда лексеманинг семемаси таркибида туркумлик семаси бўлиши исботланмаган. Ана шулар ҳакида бир - бир тўхталиб ўтамиз.

Бу ҳодисанинг моҳиятини тўғри белгилаш сўз (луғавий бирлик) билан боғлиқ кўпгина ҳодисаларнинг моҳиятини тўғри ёритишга имкон беради. Афсуски, шундай муҳим масала ўзбек тилшунослигига шу вақтга қадар ўз ечимини топганича йўқ.

Тилни система сифатида ўрганишга оид ишларда ҳам бу масалага эътибор қаратилди ва туркумлик семаси лексеманинг маъносига (семемасига) мансуб бирлик (семеманинг таркибий қисми – семаси) сифатида таърифланди ва таърифланяпти. Бирок ўзбек тилшунослигига *лексема* терминининг киритилиши ижобий натижадан кўра кўпроқ салбий натижалар келтирганидек (бунинг сабаблари юқорида айтилди), «туркумлик семаси» масаласининг кун тартибига қўйилиши ҳам ҳеч қандай ижобий натижা бергани йўқ². Шундай бўлиши табиий эди. Чунки «лексеманинг семемаси таркибида туркумлик семаси ҳам бор» деган гап ўзбек тили фактларидан келиб чиқиб айтилган гап эмас, балки бошқа тилларга оид ишларда билдирилган фикр – тайёр гаплардир.

¹ Миртоҗиев М. Семаларнинг сўз семемаси таркибида тутган ўрнига кўра типлари // Тилшуносликнинг долзарб масалалари (илмий маколалар тўплами) IV. Тошкент, 2008. 30-36-б.

² Бу ҳақда маҳсус маколамизда фикр билдирилган: Ҳожиев А. Ўзбек тилшунослигининг долзарб муаммолари (З-макола) / Ўзбек тили ва адабиёти, 2007. 2-сон, З-8-б.

Проф. Ҳ. Нематов ва Р. Расуловларнинг ўзбек тили систем лексикологияси асосларига бағишланган рисоласида семеманинг турлари ҳакида кўйидагича фикр билдирилган: «Маъно хусусиятига кўра семема таркибидаги семалар уч хил бўлади:

- 1) аташ семалари (денотатив семалар);
- 2) ифода тасвир, қўшимча маъно семалари (коннотатив семалар);
- 3) вазифа семалари (функционал семалар).

Ҳар бир семема таркибида шундай семалар мавжуддир»¹. Демак, бу ишда семема таркибида кўрилган уч турдаги сема бўлиши эътироф этилади. «Туркумлик семаси»нинг бор-йўклиги, унинг моҳияти ҳакида ҳеч қандай гап йўқ. Лекин *даражат* сўзининг семемалари каторида 'предмет' семаси, яъни туркумлик семаси ҳам келтирилади². Демак, бу ишда лексема семемаси таркибида туркумлик семасининг бўлиш-бўлмаслиги масаласи ҳал этилмаган. Яъни лексема семемаси таркибида туркумлик семаси борлиги тан олинган-олинмаганлиги аниқ эмас.

Ўзбек тилининг назарий грамматикаси (морфологияси)га багишланган ишда туркумлик маъноси лексик маъно (семема) таркибига кирмаслиги таъкидланади. Эътибор беринг: «Грамматик маъно лексик маънодан фарқли равишда борлиқдаги нарса ва ҳодисаларнинг умумлашган маъноларини ва улар ўртасидаги муносабатни билдиради. Масалан, *даражат* сўзи «бўйдор, танадан шохловчи кўп йиллик ўсимлик» лексик маъносидан ташқари предметлик маъносига ҳам эга. Бундай маънога фақат дараҳтларгина эмас, балки ким ёки нима сўрогига жавоб бўлувчи жамики жонли ва жонсиз нарса ва ҳодисалар ҳам эга бўлади. Ана шу умумий маъно ҳам грамматик маъно хисобланади...

Бу маъно лексеманинг ўзидан билиниб туради»³.

Бу айтилганлардан эътиборга лойиқ фикрлар шуки, биринчидан, туркумлик маъноси лексик маънодан ташқари маъно, умумий маъно, грамматик маъно деб қараляпти. Бу билан лексема семемасида туркумлик семаси бўлмаслиги очик-ойдин эътироф этиляпти. Ана

¹ Нематов Ҳ., Расулов Р. Юкорида кўрсатилган асар, 58-б.

² Шу асар, 57-б.

³ Нурмонов А. ва бошкалар. Юкорида кўрсатилган асар, 32-б.

шу нарса ўзбек тили материаллари билан исботланса, масала тўғри, ижобий ҳал этилган бўлар эди. Бирок сўз охиридаги «Бу маъно лексеманинг ўзидан билиниб туради» деган жумла масалани яна очик қолдиради. Чунки туркумлик маъноси лексема маъносидан ташқари маъно бўлар экан, унинг лексеманинг ўзидан билиниб туриши мумкин эмас (Бироз кейинроқ бу масалага яна қайтамиз).

Ҳ.А. Жамолхонов «Хозирги ўзбек адабий тили» номли ўқув қўлланмасида лугавий маъно – «семема», «туркумлик семаси» ҳакида бошқачароқ фикрлар билдирган. Бу ишда, аввало, туркумлик семаси лексеманинг семемаси таркибига киритилади: «Лексеманинг семемаси таркиби лексик маъно, кўшимча оттенкалар (маъно кирралари, услубий семалар) ва туркумлик семаларини ўз ичига олади»¹. Туркумлик маъноси эса куйидагича таърифланади: «Туркумлик семалари – лексеманинг мазмун планидаги учинчи компонент.

Бундай семалар лексик маънога таянган холда лексемаларнинг грамматик маъноларини белгилайди, шу асосда лексемаларнинг лексик-семантик гурухланиши, сўз туркумларига уюшиши таъминланади...

Демак, лексик маънода хусусийлик, индивидуаллик, грамматик маънода эса умумийлик устун туради»². Масалан, *даражат* лексемасининг лексик маъносида куйидаги семалар борлигини кўрамиз: 1) «предмет», 2) «ўсимлик», 3) «кўп йиллик ўсимлик», 4) «ерда ўсувчи», 5) «ёғочланган танали», 6) «илдизли», 7) «шоҳ-шаббали», 8) «баргли». Бу семалар бирлашиб, *даражат* лексемасининг лексик маъносини шакллантиради»³.

Бу фикрлар юзасидан қуйидагиларни айтиш мумкин. Биринчидан, лексик маъно лексеманинг семантик таркибига киритилиб, туркумлик семаси ҳам семантик таркиби кириши айтилса-да, иш давомида туркумлик семасининг лексик маъно таркиби кириши ҳакида гапирилади. Иккинчидан, «туркумлик маъноси лексеманинг грамматик маъносини белгилайди» деган фикр лексеманинг лугавий бирлик эканини инкор этади (Бу ҳақда юқорида ҳам гапирилди). Учинчидан, лексемалар туркумлик маъноси асосида гурухларга (туркумларга) ажратилар экан, бу ходисани сўзларнинг туркумланиши эмас, балки

¹ Жамолхонов Ҳ.А. Хозирги ўзбек адабий тили, 10-б.

² Шу кўлланма, 12-б.

³ Шу кўлланма, 13-14-б.

лексемаларнинг туркумланиши деб ҳисоблашга тўғри келадики, бундай қилиш мумкин эмаслиги ҳам маълум. Нихоят, тўртинчидан, шу айтилганлар асосида, *дараҳт* сўзининг маъноси (семемаси) таркибида «предмет» семаси бор деган фикрга қўшилиб бўлмайди. Куйидаги бир фактга эътибор беринг. Бундан роса 30 йил илгари нашр этилган «Ўзбек тилининг изоҳли лугати»да *дараҳт* сўзига куйидагича изоҳ берилган: «Тана кўйиб, шоҳ ва новдалар чикариб, томир отиб ўсадиган кўп йиллик ўсимлик»¹. Кўриниб турибдики, *дараҳт* сўзининг маъноси асосан тўғри изоҳланган. Бу изоҳ таркибига «предмет» семасини киритишга эхтиёж йўқ. Эҳтиёж йўққина эмас, балки уни бу сўзнинг маъноси (семемаси) таркибига киритиш мумкин эмас. Демак, лексеманинг семемаси таркибида туркумлик семаси бўлади (бор), деган гаплар умумий, қуруқ гаплигича колади.

Хуллас, ўзбек тилини система сифатида ўрганишга бағишлиланган ишларда сўзнинг маъноси (семемаси) ва у билан боғлиқ ходисаларга, жумладан, туркумлик семаси ва унинг моҳияти масаласига алоҳида эътибор қаратилади. Бироқ бирон ишда у ўз ечимини (аниқ ва тўғри ечимини) топганича йўқ – масала муаммолигича қолмоқда. Бу эса ходисанинг мураккаблигини кўрсатади.

Туркумлик маъноси масаласи кўп вактлардан бери мутахассисларнинг дикқат-эътиборида бўлиб келган. Лекин лугавий маънони (сўзнинг маъносини) таҳлил этиш усули бу ходисанинг моҳиятини тўғри белгилаш имконини бермади. Сўз маъносини компонентли таҳлил асосида ўрганишга ўтгунга қадар унда, яъни сўзда лугавий маънодан ташқари туркумлик маъноси ҳам борлиги тан олинган ва бу маъно грамматик маъно ҳисобланар эди. Шу асосда сўз лексик-грамматик бирлик ҳисобланар эди. Жумладан, биз ҳам шу фикрда эдик (Шундай қараш, яъни туркумлик маъносини грамматик маъно ҳисоблаш ҳозирда ҳам давом этаётганлигини юқорида кўрдик). Лекин кейинги кузатишлар бундай қараш ҳақиқатга тўғри келмаслигини кўрсатди.

Лугавий маънони компонентли таҳлил йўли билан ўрганиш ходисанинг моҳиятини ёритишида тўғри, аниқ ҳуласаларга олиб келиши исботини топган, тан олинган факт. Бизнингча, туркумлик семасининг моҳиятини белгилашда ҳам худди шу усул асосида иш кўриш билан ижобий натижага эришиш мумкин бўлади.

¹Ўзбек тилининг изоҳли лугати, I жилд. Тошкент: 1981, 209-б.

Лекин шуни айтиш керакки, сўз маъносини компонентли таҳлил асосида ўрганиш ва лексик маъно (семема)ни таркибий қисмларга (семаларга) ажратиш билан семема таркибида туркумлик маъноси борлигини исботлаб бўлмайди. Чунки семема таркибида бундай семанинг ўзи йўқ. Шуни сезган ҳолда бўлса керак, проф. Ш. Раҳматуллаев туркумлик семасини бошқачароқ талқин қилади¹.

Туркумлик маъноси грамматик маъно эмаслиги, шунингдек, сўзни лексик-грамматик бирлик ҳисоблаш мумкин эмаслигини юқорида кўрдик. Шунга эътибор қаратган ва буни сезган ҳолда бўлса керак, олим сўз туркумини лексик-грамматик гурух эмас, балки лексик-семантик гурух деб қаратди, шундай баҳолайди: «Лексемаларнинг (лексосемемаларнинг) лексик маъно асосида гурухланишига лексик-семантик гурух (ЛСГ) дейилади. Энг йирик ЛСГ деб лексемаларнинг туркумларга ажратилиши кўрсатилади: от лексемалар ЛСГи, феъл лексемалар ЛСГи каби. Бундай ЛСГларга лексемалар лексик маъноси таркибидаги бош идеографик сема асосида бирлаштирилади; масалан, «предмет» семаси асосида от лексемалар ЛСГи, «предметнинг ҳаракати-ҳолати семаси» асосида феъл лексемалар ЛСГи ажратилади»².

Бу ишда лексеманинг маъноси таҳлил этилган ўринларда бу маъно (сема) идеографик семалардан ташкил топиши кўрсатилади, лекин идеографик семалар қаторида туркумлик семаси кайд этилмайди. Идеографик семалар кайд этилган жадвалда эса, биринчи бўлиб туркумлик семаси (от лексеманинг «предмет» семаси) қайд этилади (Шу асар, 62-б.) ҳамда бу сема «бош идеографик сема» (энг кенг кўламли сема) деб таърифланади. Лекин лексеманинг семемаси таркибида (идеографик семалар қаторида) туркумлик семасининг бўлмаслигини *даражат* сўзи мисолида кўрдик. Туркумлик семасини идеографик семалар қаторига киритиш ва уни (аслида “умумий сема” деб аталувчи семани) «бош идеографик сема» деб аташ ҳам бирор ҳодисани, жумладан, лугавий маънонинг таркибида «туркумлик семаси» деб аталиши мумкин бўлган сема борлигини тасдиқлай олмайди.

Ишда туркумлик семаси ҳақида айтилган гаплар ва келтирилган фактлардан маълум бўляптики, «бош идеографик сема» деганда, тилшуносликда маълум бўлган ва тан олинган умумий сема тушунияп-

¹ Rahmatullayev Sh. Hozirgi adabiy o'zbek tili. Toshkent: Universitet, 2006. 83-b.

² Rahmatullayev Sh. Hozirgi adabiy o'zbek tili. 83-b.

ти, яъни умумий сема термини ўрнида бош идеографик сема термини кўлланяпти. Бироқ бундай қилишга асос ҳам, эҳтиёж ҳам йўқ. Аксинча, бундай қилиш ўзига хос хатоликларнинг, чалкашликларнинг келиб чиқишига сабаб бўлади. Масалан, семема таркибидаги бирор сема «бош сема» деб аталадиган бўлса, семема таркибидаги бошқа семаларни (фарқловчи семаларни) ҳам бошқа ном билан (масалан, «иккинчи даражали сема» деб) аташга тўғри келадики, бунинг номақбул эканини исботлашга эҳтиёж бўлмаса керак.

Ишда «лексик-семантик гурух» ҳақида, шунингдек, бу гурухларнинг сўз туркумларига муносабати ҳақида айтилган фикрларга ҳам қўшилиб бўлмайди. Масалан, лексеманинг семемаси таркибидаги умумий сема асосида луғавий бирликларнинг лексик-семантик гурухлари ҳосил бўлиши маълум (Мазкур ишда ҳам шу фикр ўз ифодасини топган). Лекин бу сема сўзларни туркумларга ажратиш учун асос бўла олмайди (Бу ҳақда юқорида ҳам гапирилди). Бу гурухлар қанчалик йирик бўлмасин, уларни сўз туркуми ҳисоблаш мумкин бўлмайди. Бошқача айтганда, лексик-семантик гурухлар қанчалик йириклишасин, қанчалик йирик бўлмасин, сўз туркуми юзага келтирмайди, улар сўз туркуми ҳисобланмайди. Демак, гап ҳодисанинг кичик ёки йириклигига эмас, балки унинг моҳиятида. Моҳиятан эса лексик-семантик гурухлар ва сўз туркумлари бутунлай бошқа-бошқа ҳодисалардир. Ишда ҳатто «энг йирик ЛСГ деб лексемаларнинг туркумларга ажратилиши кўрсатилади», деган фикр билдириладики, бу фикрга мутлақо қўшилиб бўлмайди ва бирон ишда бундай фикр билдирилмаган. Агар шу фикр тўғри бўлганида, у ҳолда «сўз туркумлари» термини ўрнида «лексема туркумлари» терминини кўллашни тавсия этишга тўғри келардики, буни маъкуллаш мутлақо мумкин эмаслигини исботлашга ҳожат бўлмаса керак.

Туркумлик семаси юзасидан ўзбек тишлинослигида билдирилган фикрлар ҳақида юқорида айтилганлар билан чекланиб, туркумлик семасининг моҳияти ҳақида ўз мулоҳазаларимизни билдиришга ўтамиш.

Юқорида кўп бора таъкидландикси, лексема термини факат ‘луғавий маъноли сўз’ни ифодалаш учун, шундай маъноли бирликни ифодалаш учун қабул қилинган. Шундай экан, аввало, туркумловчи белги лексема ёки умуман сўзга тааллукли бўлишини аниқ белгилаб олиш талаб этилади. Сўнгра бу белгига нисбатан *сема*, *маъно* сўзларини бефарқ кўллайвериш ҳам мумкин эмас. Демак, улардан

қайси бирини қўллаш тўғри бўлишини белгилаб олиш талаб этилади. Бу борадаги хатоликлар, бир-бирига зид қарашларнинг мавжудлиги, умуман, ҳодисанинг моҳияти тўла ва тўғри ёритилмасдан қолишига сабаб бўляпти.

Сема лексема семемасининг таркибий қисми бўлар экан, бу таркибда, яъни семема таркибида туркумлик семаси бўлмаслиги аниқ. Бу – бир томондан. Иккинчи томондан, туркумлик белгисига нисбатан маъно сўзи қўлланган тақдирда ҳам, бу белгини лексемага нисбатан қўллаш, яъни «лексеманинг туркумлик маъноси» биримасини қўллаш мумкин бўлмайди. Чунки лексема семемасининг семаларидан бири умумий сема бўлишини кўрдик. Худди шу сема нарса-ҳодисани атайди ва шу хусусиятига кўра *ноиловчи сема* (*аташ семаси, денотатив сема*) деб юритилади. Лугавий маъно таркибидаги семаларнинг бирортаси, ҳатто умумий сема (аташ семаси) ҳам туркумлик семаси бўлолмайди. Чунки семема таркибидаги семалар бевосита кузатиша бўлган нарса-ҳодисани билдиради (Бу ҳам эътироф этилган факт). Эътибор беринг: «Лексик маънонинг идеографик семаларини аниқлашда бевосита воқеликнинг ўзига мурожаат килинади, чунки лексема билан (лексик маъно билан) маълум бир воқелик тўғридан-тўғри номланади, маълум бир маъно ҳам шундай биркитилади¹. Шу гап, шу эътирофнинг ўзи лугавий маъноли сўзнинг семемаси таркибида шундай сема бор дейишга ўрин колдирмайди. Чунки “туркумлик семаси” воқеликни номламайди, у – илмий тушунча.

Барча лугавий бирликларнинг маъно таркибида умумий сема бўлиши маълум. Барча сўзларнинг лугавий маъноси (семемаси) таркибида шу семани номловчи сўз бўлади, яъни умумий сема муайян сўз билан қайд этилади. Масалан, *сада, тол, терак* сўзларининг маъноси (семемаси) таркибидаги умумий сема «ўсимлик» сўзи билан қайд этилади. Бу семаларни қайд этувчи сўзлар (*даражат, ўсилийк* сўзлари), умуман олганда, нарсани билдиради (номлайди), шунинг учун ҳам «нима?» деган сўроққа жавоб бўлади. Бошқа туркумга оид сўзлар семемасида ҳам худди шундай ҳолат кузатилади. Масалан, феъл-сўзларнинг семемаси таркибидаги умумий сема ҳам сўз(феъл) билан ифодаланади: *бормоқ, келмоқ* – «бирор томондаги жойда ҳозир бўлмоқ», бирор төмондаги жойга ташриф буюрмоқ».

¹ Rahmatullayev Sh. Hozirgi adabiy o‘zbek tili. 51-b.

Кўриниб турибиди, *даражат*, ўсиллик сўзларининг (отларнинг) семемаси таркибида «предмет» семаси бўлмаганидек, *бормоқ* ва *келмоқ* феълларининг семемаси таркибида «ҳаракат» семаси йўқ.

Юкорида айтилганлар, табиий ҳолда, куйидаги бир саволни келтириб чиқаради: «Сўзнинг лугавий маъноси таркибида «туркумлик семаси» йўқ экан, нима учун семема ва сема ҳакида фикр юритилган ишларнинг деярли барчасида шундай сема борлиги таъкидланади, шуни исботлашга ҳаракат қилинади, лекин бирон ишда шу фикр ўз исботини топмаган?» Бунинг асосий сабаблари сифатида куйидагиларни айтиш мумкин. Бизнингча, биринчидан, «сўзнинг (лексеманинг) семемаси таркибида туркумлик семаси борлиги» ҳақидаги фикр бевосита ўзбек тили материалынинг тадқиқидан юзага келган фикр эмас. Иккинчидан, ўзбек тилига лексема термини киритилгандан кейинги даврларда сўз ва лексема терминларининг моҳиятини тушунишда қандай хатоликлар, ўзаро зид фикр-мулоҳазалар юзага келганлиги, давом этаётганлигини, бу ҳол қандай салбий оқибатларга олиб келаётганлигини юкорида кўрдик. Ана шу ҳолатлар ҳам лексема семемаси таркибида «туркумлик семаси» бор дейишга ва уни исботлаш учун ҳаракат қилишга сабаб бўляпти. Нихоят, учинчидан, «сема» сўзини «маъно», «семема» ўрнида бефарқ, нотўғри қўллаш ҳоллари мавжуд ва давом этяпти. Бу ҳолат ҳам «туркумлик семаси» ҳакида нотўғри, асосиз тушунчалар юзага келишига сабаб бўляпти. Энди ана шу айтилганларни исботлашга ҳаракат қиласиз.

Юкорида кўрдикки, X. Нематов, Р. Расуловларнинг систем лексикологияга бағишлиланган маҳсус ишида лексема семемасининг таркибий қисмлари (семалари) қаторида «туркумлик семаси» келтирилмаган ва тўғри килинган. Лекин *даражат* лексемасининг семалари қаторида «предмет» семаси ҳам келтирилган. Бу эса лексема таркибида туркумлик семаси бўлишини тан олишdir. Чунки 'предметлик', яъни предметликни билдириш от туркумига хос хусусият. Демак, 'предметлик' – туркумловчи белги. 'Предмет' тушунчасини лексеманинг семемаси таркибий қисми деб тушуниш лексема семемасида туркумлик семаси бор, деган фикр юзага келишига сабаб бўлган. Лекин X. Нематов, Р. Расуловнинг ишида бу сема лексема семемалари қаторида берилмаганидек, унинг моҳияти ҳакида ҳам ҳеч қандай гап йўқ. Чунки лугавий маъно таркибида ўзи йўқ нарса ва унинг моҳияти ҳакида нима ҳам айтиш мумкин? X.Жамолхонов эса «туркумлик се-

маси лексеманинг мазмун жихатидаги учинчи компонент» эканлиги ни таъкидлайди (Буни ҳам кўрдик). Лекин бу гап ҳам исботланмаган. Ш. Раҳматуллаевнинг ишида эса лексема семемаси таркибида шундай семанинг борлигини исботлашга ҳаракат қилинган, лекин исботланмаган. Чунки, такрор айтамиз, ўзи йўқ нарса қандай исботланиши мумкин?!

Маълум бўляптики, баъзи лексемаларнинг семемаси таркиби, семалари кўрсатилганда, хеч қандай асос-исботсиз, улар каторида туркумлик семасининг, яъни 'предмет', 'белги', 'харакат' семалари-нинг келтирилиши сабабли («кўр-кўронга ҳолда» дейиш мумкин) шу фикр – туркумлик семаси борлиги ҳақидаги фикр бошқа ишларда ҳам такрорланаверган. Агар биргина фактга, яъни лексемаларнинг туркумланмаслигига жиддий эътибор қаратилганда ва шу нарса исботланганда эди, лексеманинг семемаси таркибида туркумлик семаси бўлиши ҳақидаги гапларга чек қўйилган бўларди (Ваҳолонки, лексеманинг туркумланиши ҳақидаги гапларни ҳам кўрдик).

Ўзбек тилига *лексема* термини киритилгандан кейинги даврларда сўз ва *лексема* терминларининг моҳиятини тушунишда қандай хато-ликлар, уларни бефарқ қўллаш ҳолатлари юзага келганлиги, давом этаётганлиги. бу ҳол қандай салбий оқибатларга олиб келаётганини юкорида кўрдик. Ана шу факт ҳам лексема семемаси таркибида туркумлик семаси бор дейишга ва уни исботлаш учун ҳаракат қилишга сабаб бўлмоқда.

'Сема' семеманинг таркибий қисми (узви) эканлиги деярли барча гомонидан тан олинган. Минг афсуски, сема ва семема ҳақида фикр юритилган ишларда шу оддий факт доим эътиборда бўлавермайди. очиги, унга амал қилинмайди, яъни *маъно*, *семема*, *сема* терминлари бефарқ қўлланаверади. Бу ҳолат ҳам 'туркумлик семаси' ҳақида нотўғри хulosалар чиқаришга асосий сабаблардан бири бўлиб хизмат килмоқда. Чунки 'туркумлик семаси' ва 'туркумлик маъноси' бирикмалари бир-биридан тамомила бошқа ходисаларни билдиради.

Сўзнинг луғавий маъноси (семемаси) таркибида умумий (бираштирувчи) сема бўлиши, шундай сема асосида сўз (лексема)ларнинг семантик гуруҳлари, парадигмалари шаклланиши маълум. Худди шу ходиса учун сўз ўрнида *лексема* термини қўлланяётганлиги ҳам маълум. Шу билан бирга сўзнинг семантик структурасида яна бир умумий белги ҳам мавжуд. Бу белги 'туркумлик белгиси'

хисобланади. Худди шу белги асосида сўзларнинг яна бир ўзига хос гурухланиши юз беради, яъни шу белги асосида сўзлар туркумларга бўлинади. Сўзнинг лугавий маъноси (семемаси) ва унинг таркибий қисмлари (семалари) бевосита кузатишдаги нарсаларни номласа, сўзнинг иккинчи умумий белгиси, яъни туркумлик белгиси бевосита кузатишда берилган нарсани номламайди. Чунки у тушунча хисобланади. Тушунча эса фалсафада куйидагича таърифланади: «**Тушунча** – нарса ва ходисаларнинг умумий, мухим белгиларини акс эттирувчи тафаккур шаклидир. Тушунчанинг хиссий билиш шаклларидан тубдан фарқ килишига алоҳида эътибор бериш зарур. Тушунча предметнинг яққол образи эмас, абстракт образидир. Тушунча хиссий билиш шаклларидан фарқли ўлароқ, инсон миясида тўғридан тўғри акс этмайди. У маълум бир мантикий усууллардан таққослаш, анализ, синтез, абстракциялаш, умумлаштиришлар фойдаланган ҳолда ҳосил қилинади. Тушунчанинг шаклланиши сўз билан узвий боғлиқ. Улар ўртасидаги алокадорлик тафаккур билан тил ўртасидаги боғланишнинг аниқ тарзда намоён бўлишидир»¹. Бу фикрлар 'туркумлик', 'сўз туркуми' тушунчаларига бевосита алоқадор.

Шу лугатда моҳият ва ҳодиса оламнинг мавжудлик холатлари сифатида бир нарсанинг ўзаро боғлиқ икки томони экани, бир-биридан мустасно ва алоқасиз ҳодисалар ҳам, моҳиятлар ҳам бўлмаслиги алоҳида таъкидланади². Бу ҳодиса сўзнинг лугавий ва туркумлик белгисига ҳам дахлдор, яъни у лугавий маънодан ажralган туркумлик маъносининг бўлмаслигини қайд этади. Лекин бу гап лугавий маъно таркибида туркумлик маъноси бор, дегани эмас.

Масалага имконият ва воқелик тушунчалари асосида ёндашилса, бу нарса янада ойдинлашади: «Борлиқни билиш имкониятларни билиш асосига курилади. Имконият тушунчаси воқелик тушунчаси билан бевосита алоқадорdir. Воқелик имкониятларнинг ифодаланиш шакли саналади... имконият бу янги нарса, ҳодиса ва тамойиллар ке-либ чикишини ифодаловчи муайян шарт-шароит ва вазият мажмуасидир. Нарса ва ҳодисаларнинг ички табиатига қўра зарурий равища реаллашиши лозим бўлган, бироқ ҳали юзага чиқмаган воқеликдир... Имкониятлар конкрет вазият, шарт-шароит, омиллар билан боғлик

¹Фалсафа. Қомусий лугат. Тошкент, 2004. 406-6.

²Шу лугат, 282-б.

бўлиб, турли шаклларда рўёбга чикиши мумкин, яъни воқеликка айланиси мумкин»¹.

Сўзнинг семантикасида имконият ҳолида мавжуд бўлган тушунча умумий, бирлаштирувчи хусусиятга эга бўлади. У воқелангач, бирлаштирувчи белги сифатида, сўзларнинг гурухланишига – туркумланишига асос бўлади. Ана шундай умумий тушунчалар асосида юзага келадиган гурухлар сўз *туркумлари* хисобланади ва бу сўз бирикмаси ҳам илмий тушунчани билдирувчи термин хисобланади. Туркумликни қайд этувчи тушунчалар воқелангач, ҳар бир туркумга мансуб сўзлар учун умумий бўлган белгини билдирувчи сўзлар ҳам юзага келади ва улар ҳам лингвистик тушунчани қайд этувчи терминлар хисобланади. Масалан, *предмет, белги, ҳаракат* терминлари шулар жумласидандир. Ўз навбатида, ҳар бир туркумни номловчи лингвистик терминлар яратилади. Масалан, *от, сифат, феъл* терминлари шулар жумласидандир.

Маълум бўлдики, туркумликни билдирувчи тушунча мустақил сўзларнинг семантикасида имконият ҳолатида мавжуд бўлади. У воқелангач (воқелантирилгач), сўзларни гурухловчи, сўз туркумларини ташкил этувчи белгига айланади. Шу белги (тушунча) асосида сўзларнинг ҳар бир туркуми аник белгиланади ҳамда ҳар бир туркумни номловчи термин ҳам яратилади. Масалан, *от, сифат, феъл, равии* терминлари шулар жумласидандир. Демак, *от, сифат, феъл, равии* терминлари сўз туркумини номлайди. Бу номларнинг семантик таркибида туркумни қайд этувчи белги (тушунча) бўлади.

Хуллас, сўзлар семема ёки сема асосида эмас, балки тушунча асосида – туркумловчи тушунча асосида – 'предмет', 'белги', 'харакат' каби тушунчалар асосида туркумланади.

Сўз охирида яна бир нарсага эътибор қаратишни истардик.

Лексеманинг семантик таркибида туркумлик семаси бўлиши ҳакида фикр юритилган ишларда бу сема семема таркибидаги семанинг ўзи эканлиги, бу сема лексеманинг ўзидан англашилиб туриши ҳакида гапирилганлиги, лекин бу гаплар исботланмаганлиги, исботланиши мумкин эмаслигининг гувоҳи бўлдик.

Туркумлик тушунчасининг моҳияти аниқлангач, шу нарса маълум бўляптики, бу тушунча, ҳар ҳолда, сўзнинг маъносидан бутунлай ажралган ҳолдаги тушунча эмас экан. Аниқроқ килиб айтсак, бу

¹ Шу луғат, 157-158-б.

тушунча лексема семемаси таркибидаги умумий семада имконият тарзидаги, мавжуд тушунча экан. Эътибор берилса, от туркумига хос сўзларнинг семемаси таркибидаги умумий семадан 'нарса' ('предмет') тушунчаси, сифат туркумига оид сўзларнинг умумий семасидан 'белги' тушунчаси, феъл туркумига оид сўзларнинг маъносидаги умумий семадан 'харакат' тушунчаси сезилиб туради. Лекин улар мустақил сема мақомида эмас. Масалан, *сада*, *тол*, *терак* сўзларининг семемаси таркибидаги 'дараҳт' умумий семаси, *дараҳт*, *гул*, *қаниши* сўзларининг семемаси таркибидаги 'ўсимлик' семаси, умуман олганда, *нарсани* билдиради. Илмий изланишлар натижасида маълум сўзлар семантикаси таркибида имконият ҳолидаги, мавхум ҳолдаги «нарса» тушунчаси мавжудлиги маълум бўлади ва бундай сўзларнинг барчаси бир туркумга бирлаштирилади. Бошқа туркумга оид сўзларда ҳам худди шундай ҳодиса кузатилади.

Туркумлик белгиси ҳакида айтилганларнинг барчасидан маълум бўлдики, лугавий маъно семеманинг таркибий қисми ҳам, яъни сема ҳам, шунингдек, семемага тенг бирлик ҳам эмас. Шу боис бу белгига нисбатан *семема ёки села* терминларини қўллаш ҳам тўғри бўлмайди.

Туркумлик белгиси сўзнинг лугавий маъноси таркибидаги умумий семада имконият ҳолатидаги тушунча бўлғанидек, у воқелангач, умумий семага хос умумийликдан ҳам кенг қамровли умумийликни ифодаловчи тил бирлигига айланади. Шу боис бу белги асосидаги гурухланиш ва гурухнинг ўзи ҳам умумий сема асосидаги гурухланишга (гурухга) нисбатан кенг қамровли бўлади ҳамда моҳиятан лексик-семантик гурухлардан бутунлай фаркланади. Лексик-семантик гурухлар бевосита кузатишдаги нарса-ҳодисаларни қайд этса, туркумлик белгиси асосида бевосита кузатишда берилмаган, мавхум нарса-ҳодисалар гурухланади. Бундай гурухланишда умумий тушунча асосида шаклланувчи категориялар юзага келади. Шунинг учун ҳам бундай категорияларни шакллантирувчи тушунчага нисбатан *категориал маъно* терминини қўллаш мумкин бўлади. Демак, бу маъно лугавий маънодан ҳам, грамматик маънодан ҳам (морфологик ва синтактик бирликларга хос маънолардан ҳам) фаркланади.

Сўзнинг лугавий ва категориал маъноси ҳакида айтилганлардан маълум бўладики, сўз бундай моҳияти, белги-хусусиятлари билан тил амалиёти ва тараққиётida ниҳоятда муҳим аҳамиятга молик тил

бирлиги ҳисобланади. Лугавий маъноси билан янги-янги сўзларнинг ясалишида асос бирлик (сўз ясалиш асоси) сифатида, туркумлик белгиси (маъноси) билан эса морфологик системани шакллантирувчи тил бирлигини, яъни сўз шаклини ҳосил килишда ҳам асос бирлик, яъни шакл ясалиш асоси вазифасини бажаришининг ўзиёқ сўзнинг қандай муҳим аҳамиятга эга бўлган тил бирлиги экани ҳакида аниқ тасаввур беради (Булар ҳакида ишнинг кейинги қисмларида ҳам фикр билдирилади).

Хуллас:

1. Семема – лексеманинг маъноси. Сема эса семеманинг таркибий қисми, қисмлари. Шундай экан, сўзнинг (лексеманинг) маъноси ва унинг таркибий қисмларидан бошқа тил бирликларига нисбатан бу терминларни кўллаш мумкин эмас.

2. Лексеманинг семемаси таркибида номловчи ва коннотатив семадан бутунлай фаркли бўлган ҳамда «вазифа семаси» деб ёки бошқа ном билан аташ мумкин бўлган сема йўқ.

3. Туркумлик белгиси (туркумловчи белги) семема ёки семага teng тил бирлиги эмас. У – сўз семантикасида имконият ҳолида мавжуд бўлган тушунча. Туркумлик белгиси воқелангач, сўзларни гурухловчи белги вазифасига эга бўлади ва сўзлар шу белги (маъно) асосида гурухларга, туркумларга бўлинади, гурухланади.

4. Туркумловчи маъно категориал маъно ҳисобланади. Лекин уни грамматик маъно ҳисоблаш мумкин эмас. Сўз бу маъноси билан грамматик бирликларнинг ҳосил бўлишида асос бирлик (ясалиш асоси) вазифасини бажаради.

5. Туркумланиш туркумлик маъносига эга бўлган тил бирликларига, яъни мустакил сўзларга хос экан, биринчидан, бу ҳодиса худди шу тил бирликлари мисолида тадқиқ этилиши, иккинчидан, бу ҳодисанинг берилиш ва ўрганилиш ўрнини ўйлаб кўриш керак бўлади.

Лексик системаларнинг шаклланиши

Лексеманинг ифода ва мазмун жиҳатига эгалиги айтилди. Лексемаларнинг мазмун ва ифода (шакл) жиҳатига кўра турлича муносабатларда бўлиши билан лексик сатҳга мансуб системалар шаклланади.

Бунда лексик системанинг маъно (семема) асосида шаклланиши асосий ходиса хисобланади.

Лексемаларнинг мазмун жиҳатида номловчи ва коннотатив семалар бўлишини ҳам кўрдик. Номловчи семаларнинг ўзаро муносабати асосида лексик системанинг бир тури, семема ва коннотатив семаларнинг муносабати асосида иккинчи тури ташкил топади. Лексемаларнинг шакл ва маъно муносабатлари асосида эса лексик системанинг учинчи тури шаклланади. Шу боис буларнинг ҳар бирини алоҳида алоҳида ўрганган маъқул.

Лексик-семантик гурӯҳ ва лексик парадигма

Объектив оламнинг системадан иборат эканлиги, унинг ифодаловчиси бўлган тил ҳам система эканлиги, тилшунослик фани системани, яъни тил системаларини ўрганиши – эътироф этилган факт. Бу, айниқса, тилнинг лугат таркибида, лексикасида аниқ ифодасини топади. Демак, асосий мақсад объектив олам (борлик)ни ташкил этувчи гурӯхлар ва уларни тилда акс эттирувчи ходисаларнинг – системаларнинг моҳиятини белгилашдир. «Тил системаси», «лексик система», «лексик парадигма», «лексик-семантик гурӯҳ», «семантик майдон» каби тушунчалар объектив олам системасига хос гурӯхланишларни акс эттирувчи тушунчалардир. Демак, ўзбек тили лексик системаларини тадқиқ этишда ана шу тушунчаларнинг моҳиятини тўғри белгилаш ва аниқ ёритиш асосий мақсад хисобланади. Ўзбек тилшунослигига ана шу ходисаларнинг моҳияти юзасидан бир фикрга келинганича йўқ. Бунинг асосий сабаби, биринчидан, ўзга тилшуносликка оид адабиётларда шу масалалар юзасидан билдирилган нотўғри фикрларни ўзбек тилшунослигига кўчиришда бўлса, иккинчидан, парадигманинг моҳиятини, «умумийлик» тушунчасининг моҳиятини фарқламаслиқ, умумийлик ходисасини «ўхшашлиқ», «уядошлиқ» деб тушуниш ва шу каби салбий оқибатлардадир. Бирок умумтилшуносликка оид ишларда бу борадаги хатоликлар, уларнинг сабаблари қайд этилган ва аслида кандай бўлиши кераклиги ҳакида ҳам аниқ фикр билдирилган.

Ф.М. Березин, В.Н. Головиннинг «Общее языкознание» асарида Ф. де Соссюр ассоциатив муносабат деб тушунган ҳар қандай муносабатни парадигма билан боғлаш, парадигматик муносабат

хисоблаш мумкин эмаслиги, *ассоциатив муносабат* бирикмаси *парадигматик муносабат* бирикмасига нисбатан кенг тушунчани билдириши алоҳида қайд этилган. Ишда «маълум инвариант ва вариантлар муносабати аниқ ифодасини топган гурух (бутунлик)га нисбатангина парадигма ва парадигматик муносабат ҳақида гапириш мумкинлиги, акс ҳолда, «парадигматик майдон», «парадигматик қатор» ҳақида гапириш мумкинлиги, ҳодисанинг моҳияти шундай йўл тутилгандагина аниқ ифодасини топиши аниқ тушунтирилган¹. Масалага шу тарзда ёндашилса, ўзбек тилида лексик-семантик гурух деб қаралаётган ҳодисаларнинг бир турини лексик парадигма хисоблаш мақсадга мувофиқ бўлади.

Ўзбек тилшунослигига «лексик-семантик гурух», «лексик парадигма» терминлари бир хил маънода қўлланиб келаётгани маълум. Бироқ ҳар бир ҳодисанинг ўз моҳиятидан келиб чиқилса, «лексик-семантик гурух» термини «лексик парадигма» терминига нисбатан кенг тушунчани билдиради, яъни бу термин хусусий маъноли лексемаларнинг умумий маъно асосида бирлашувчи гурухи (шундай бутунлик) ни ифодалаш учун, шунингдек, синонимик ва антонимик қаторларга нисбатан ҳам қўлланиб келяпти. Ваҳолонки, булар моҳияттан бир-биридан фарқли ҳодисалардир. Шундай экан, уларнинг ҳар бири ўзига мос, ҳодисанинг моҳиятини тўғри ва аниқ қайд этадиган термин билан аталиши ҳамда бир-биридан фарқли ҳодисалар сифатида, алоҳида-алоҳида ўрганилиши керак бўлади.

Бу билан «лексик-семантик гурух» бирикмасини бутунлай қўлламаслик керак, демокчи эмасмиз. Фақатгина «лексик-семантик гурух» деб юритилиши мумкин бўлган гурухларнинг моҳияттан бир-биридан фарқли бўлган турларини аниқ белгилаш ва алоҳида ҳодиса сифатида ўрганиш лозимлигига эътиборни қаратмоқчимиз. Ана шундай гурухлардан, яъни «лексик-семантик гурух» деб ҳам юритиш мумкин бўлган гурухлардан бир тури – бир умумий маъноси (семаси) асосида бирлашувчи лексемалардан тузилган лексик-семантик гурухлардир. Масалан, *бугдоӣ, арна, шоли, мош* лексемаларининг ҳар бири дон экини ва унинг ҳосилини (донни) билдиради – бу уларнинг умумий белгиси, худди шу белгиси асосида бир лексик-семантик гурухни ташкил этади. Худди шу хусусияти билан бундай гурухлар

¹Березин Ф.М., Головин В.Н. Юкорида кўрсатилган асар, -С. 208.

сионимлар қаторидан, антоним жуфтликлардан ва бошқа типдаги лексик-семантик гурухлардан тубдан фарқланади. Бизнингча, «лексик парадигма» терминини шу типдаги лексик-семантик гурухларга нисбатангина қўллаган маъкул. Бу билан ўзбек тили системалари шаклланишининг бир йўли (усули) аниқ белгиланади, ажратилади, бу эса, ўз навбатида, лексик системаларнинг шу йўл билан шаклланиши жараёнида юз берадиган тил ҳодисаларининг моҳиятини тўғри ва аниқ белгилаш, ёритиш имконини яратади.

Лексик парадигмалар

Номловчи семалар объектив борлиқдаги нарса-ҳодиса, белги, харакат кабиларни номлайди. Номловчи семалардан таркиб топган се-мема ҳам воқелик билан бевосита боғланади, предмет, белги, харакат кабиларни номлайди. Шу боис бундай маъно “номловчи маъно” деб ҳам юритилади. Номловчи маъно лексемаларнинг маълум гурухида уларнинг семесасидаги умумий (бирлаштирувчи) ва фарқловчи (дифференциал) семалардан таркиб топиши мумкин.

Объектив олам системадан иборатлиги, шу оламнинг ифодачиси бўлган тил ҳам системадан иборат эканлиги айтилди. Объектив олам жонсиз нарсалар, жониворлар ва инсоният оламидан иборатлиги ҳам маълум. Ҳар бир олам системасининг шаклланишида ўзига хосликлар бўлиши шубҳасиз. Ўзбек тили материалларидан маълум бўлишича, бу тил сатҳларининг жумладан, лексик системанинг, ички системаларнинг шаклланишида ҳам объектив асослар билан изохланувчи ўзига хосликлар бор. Шу боис лексик системаларнинг шаклланишини объектив оламнинг ҳар бир бўлимига (нарса, жонивор, инсоният олами) мансуб воқеликни ифодаловчи лексемаларни гурухлаб ўрганиш орқали белгилаш мумкин. Бу билан лексик системаларни, уларнинг ички турларини тўғри белгилаш имкони тугилади, ҳар бир ҳодисанинг моҳиятини тўғри тасаввур этиш осонлашади.

I. Нарсани номловчи лексемалардан тузилган парадигмалар. Моддий борлиқдаги жонсиз нарсаларни билдирадиган лексемалар муайян нарсани номлайди. Шу боис бундай лексемаларга хос маъно «номловчи сема», номловчи маънонинг (семеманинг) таркибий қисмлари – семалари «номловчи маъно» деб юритилади. Юқорида ай-

тилдики, тил тузилишига хос ҳар кандай система объектив борлықда мавжуд бўлган ҳодисани (системани) акс эттиради. Бу ҳодиса, жумладан, жонсиз нарсаларни билдирувчи лексемалардан тузилган парадигмаларда ҳам кузатилади. Масалан, биргина ўсимликлар дунёсининг ўзи ўзаро алоқада бўлган бир канча гурухлардан (системалардан) ташкил топган. Уларнинг ҳар бири муайян лексик парадигмаларда ўз ифодасини топади. Нарсани номловчи лексемалардан тузилган парадигмаларда парадигма аъзоларининг ҳар бири муайян нарсани номлайди. Мисол сифатида *чинор*, *сада*, *арча*, *терак*, *тол*, *бодом* лексемаларидан тузилган парадигмани келтириш мумкин. Бу лексемаларнинг ҳар бири дараҳтнинг муайян турини номлайди. Шу билан бирга, бу лексемаларнинг семемалари таркибида дараҳтга хос бўлган умумий белгини қайд этувчи сема ҳам бор. Масалан, келтирилган лексемалар билдирган ҳар бир нарсада (чинор, сада ... кабиларда) 'илдиз', 'тана', 'шоҳ', 'барг' ва ш.к. лар бор. Лекин буларнинг ҳар бири бир-биридан фарқли нарсалар бўлиши боис, уларни номловчи семалар ҳам бир-биридан фарқланади ва уларни умумий сема хисоблаш мумкин эмас.

Бу типдаги парадигмаларнинг тузилишида эътиборга лойиқ ҳодисалардан бири шуки, парадигмада таркибида бирлаштирувчи семани ифодаловчи лексема қатнашмайди. Масалан, *тарвуз*, *қовун*, *ҳандайлак* лексик парадигмасидаги ҳар бир лексема полиз экини ва унинг маҳсулини билдиради. Лекин парадигмада полиз экини бирикмаси қатнашмайди. *Босвонди*, *қизилтуруғ*, *чўғири*, *кўкча*, *амири* лексик парадигмасида бирлаштирувчи белги *қовун* лексемасига хос, лекин парадигмада бу сўз катнашмайди. Бундай парадигмаларда бирлаштирувчи сема парадигма аъзоси бўлмаган лексема орқали ифодаланади. Масалан, *чарос*, *ҳусайн*, *чиллаки*, *доройи*, *шивилгони* лексик парадигмасига хос бирлаштирувчи белги (сема) шу парадигмада катнашмаган узум лексемаси билан, *босвонди*, *қизилтуруғ*... парадигмасида *қовун* лексемаси билан қайд этилади. Бундай парадигмаларда (умуман, парадигмада) бирлаштирувчи семани қайд этувчи лексемаларнинг бўлмаслик сабаби шуки, умумийлик (инвариант) бевосита кузатища берилмайди. Лекин парадигма аъзоларининг ҳар бирида парадигмага хос умумий белги мавжуд бўлади. Масалан, *чарос*, *чиллаки*, *ҳусайн* лексемаларининг ҳар бирида 'узум' белгиси сезилиб туради. Шунинг учун ҳам бирлаштирувчи семани қайд этувчи сўз (лексема)

бу типдаги парадигма аъзоларига бериладиган изоҳнинг охирида қўлланади (Демак, изоҳли лугат тузишда ана шу умумий ходиса, албатта, эътиборда тутилиши керак).

Мълум бўляптики, бундай парадигмаларда парадигма аъзолари муайян гурухга мансуб бўлган нарсаларни номлайди. Аъзолар ўртасида зидланиш, зидлик белгиси бўлмайди. Худди шу хусусиятдан келиб чиқилса, бу типдаги парадигма аъзоларига хос ўзаро муносабатни – парадигматик муносабатни «тeng қийматли муносабат» деб юритиш мумкин.

Хуллас, бу типдаги парадигмага хос асосий хусусиятлар сифатида куйидагиларни айтиш мумкин: 1) парадигма иккidan ортиқ лексемалардан тузилади; 2) парадигма аъзолари парадигмага мансуб бўлган нарсаларни номлайди, шу боис уларга хос семалар номловчи семалар бўлади, яъни бир хил қийматга эга бўлган семалар хисобланади; 3) парадигма таркибида бирлаштирувчи семани ифодаловчи сўз катнашмайди, бу сема алоҳида лексема билан ифодаланади ва бу сема ҳам парадигмани шакллантирувчи сема макомида (бирлаштирувчи сема макомида) бўлади.

П. Жониворлар оламини лексемалардан тузилган парадигмалар. Жониворлар олами ҳам ниҳоятда мураккаб тузилишли бўлиб, уларга хос гурухлар турли-тумандир. Уларни ифодаловчи лексик парадигмалар ҳам ниҳоятда кўп ва турли-туман. Лекин ҳар қандай система умумийликлар асосида шаклланishi боис, жониворлар олами ҳам энг умумий белгилари асосида йирик-йирик гурухларга бўлинади. Умумий белгини билдирадиган лексемалар асосида эса шундай катта гурухларни кайд этувчи лексик парадигмалар ҳосил килинади. Натижада жониворлар оламидаги гурухланишни акс эттирувчи лексик система шаклланади.

Жониворлар олами куйидаги асосий белгилари билан жонсиз нарсалар оламидан фарқланади: 1) яшаш (хаёт) тарзи; 2) зоти (тури); 3) жинси; 4) ёши; 5) ранг-туси ва б. Ана шу айтилганлар нуктаи назаридан улар умумий ва хусусий белгиларга эга бўлади ва шу белгилар асосида гурухланади, бу гурухлар тилда парадигмаларда ўз ифодасини топади. Бу айтилганларнинг барчасини биргина ҳайвонот оламига мансуб жониворларни билдирувчи лексемалардан шаклланадиган парадигмалар мисолида аниқ кўриш мумкин.

Жониворлар оламига мансуб жонзотларни билдирувчи лексемалардан парадигмалар шаклланишида иккى асосий холат кузатилади: 1) парадигма номловчи семаларни билдирувчи лексемалардан тузилали; 2) парадигма умумий ва хусусий белгига эга бўлган лексемалардан таркиб топади.

1. Биринчи турдаги парадигмалар моҳиятнан жонсиз нарсани билдирувчи лексемалардан тузиладиган парадигмаларга ўхшайди, яъни бунда парадигма аъзоларининг барчаси бир хил семага (номловчи семага) эга бўлади, парадигмаларнинг ҳар бир аъзоси муайян гуруҳга мансуб нарсани номлайди. Парадигма таркибида бирлаштирувчи семани ифодаловчи лексема қатнашмайди. Лекин парадигма аъзоларининг ҳар бирида улар учун умумий бўлган белги – 'хайвон' белгиси (хайвон эканлиги) сезилиб туради, худди шу белги асосида лексемалар бир гуруҳга бирлашади. Шунинг учун парадигма аъзоларидан ҳар бирининг изоҳида ҳайвон лексемаси қатнашади Масалан, *иер*, *йўлбарс*, *қоплон* лексемалари билдирадиган жониворлар ёввойилиги, мушуксимонлар оиласига мансублиги, йиртқичлиги билан хайвонот дунёсининг кичик бир гурухини ташкил этади. Бу хайвонларни номловчи лексемалар ана шу белгиларни қайд этувчи семаларга эга. Бу хайвонлар жинси, ёши, ранги ва б. жиҳатдан фарқли белгиларга эга. Лекин бу белгилар уларнинг турини белгиламайди. Шу боис тилда фарқли белгини қайд этувчи сўз хам бўлмайди ва улар фарқли белгилари билан гурухланмайди, бинобарин, тилда уларни (ўзи йўқ гурухни) қайд этувчи парадигма ҳам бўлмайди. Масалан, келтирилган жониворларнинг эркак ва ургочиси бор, лекин ўзбек тилида уларнинг эркак ва ургочисини номлайдиган сўз йўқ. Шу боис йўқ сўзлар билан тузиладиган парадигма ҳакида гап бўлиши ҳам мумкин эмас.

Хуллас, бу типдаги парадигма аъзолари ўртасидаги муносабатни ҳам тенг кийматли муносабат хисоблаш мумкин.

2. Жонли мавжудотларни номловчи лексемалардан ташкил топган (ташкил топадиган) парадигмаларнинг иккинчи турида ҳар бир парадигма умумий ва хусусий семага эга бўлган лексемалардан таркиб топади. Парадигма таркибидаги ўзаро фарқли белгига эга бўлган лексемага хос хусусиятлар турлича бўлиши, яъни ёшга кўра ёки яна бошқа жиҳатдан бўлиши мумкин. Масалан, *чўчқа* – қобон – мегажин лексик парадигмасида чўчқа умумий белгига эга. Қобон, мегажин лексемалари, шу белгига (семага) эга бўлгани ҳолда, «эркак» ва

«ургочи»лик белгиси билан бир-биридан фарқланади : қобон – эркак чўчқа, мегажин – ургочи чўчқа. Дўнон–гўнон–той лексик парадигмасида фарқли белги ёшга кўрадир. (умумий белги – от): дўнон – тўрт ёшли от; гўнон – икки яшар айғир (от); той – бир ёшдан икки ёшга-ча бўлган от. От – айғир – бия парадигмасида фарқли белги жинсга кўра: айғир – эркак от; бия – ургочи от. Жийрон – тўриқ – чавкар парадигмасида фарқланиш ранг-тусга кўра. Жийрон – қизгиш малла от; тўриқ – қора қизил тусли от; чавкар – ола-була, қора холли, хол-хол тусли от ва б.

Кўриниб турибдики, жийрон, тўриқ, чавкар сўзлари умуман предметнинг рангини эмас, отга хос кўриниш-тусни билдиради, шу билан отнинг турини номлайди, шу билан парадигмани шакллантирувчи бирлик, парадигма аъзоси ҳисобланади.

Хуллас, жониворларни билдирувчи лексемалардан тузилган парадигмаларнинг бир тури умумий белгиларга эга бўлган лексемалардан тузилади. Иккинчи тури эса умумий белгини билдирувчи ва фарқловчи белгига эга бўлган лексемалардан тузилади. Бунда фарқли белги жинсга кўра бўлса, парадигма уч лексемадан, ёшга кўра бўлса, уч ва ундан ортиқ лексемадан тузилади. Шу типдаги парадигмаларнинг ўзаро фарқли белгига эга бўлган лексемалари шу белгилари асосида ўзаро нисбатланади. Масалан, қўй – қўчкор – совлиқ парадигмасида қўчкор ва совлиқ лексемалари эркаклик ва ургочилик белгиси билан ўзаро нисбатланади. Лекин зидланувчи қисмларнинг ўзи парадигмани ҳосил қилмайди, бу икки лексема умумий белгини билдирувчи лексема билан бир бутунликни, парадигмани ташкил этади. Демак, бу типдаги парадигмаларни зидланиш муносабатига асосланган, шу асосда тузилган парадигма ҳисоблаш мумкин эмас. Ўзбек тили материалларининг кўрсатишича, лексик парадигманинг ўзаро зид маънога эга бўлган, факат шундай хусусиятли лексемалардан тузилган тури йўқ.

III. Инсоният оламини номловчи лексемалардан тузилган парадигмалар. Инсоният оламининг тузилиши янада мураккаб ва бу ҳолат ҳам тилнинг лексик системаларида ўз аксини топади, албатта. Инсоният оламига оид энг асосий тушунча 'шахе' тушунчасидир. Масалан, бу тушунчага қуидагича таъриф берилади: «Шахс – алохида индивид, моҳиятан яхлит ижтимоий-аҳлоқий олам. У ўзида инсон

мохиятини, унинг мавжудот сифатидаги қадриятини мужассам этади»¹. Шу таърифнинг ўзиданоқ маълум бўладики, 'шахс' – умумий тушунча, у инсоният оламига мансуб жонзотни билдирувчи лексемалар семемаси таркибида мавжуд бўлади – умумий сема хисобланади. Лексемалар ана шу сема асосида бирлашади, бутунликни (системани) ҳосил қиласди. Бундай гурухларнинг, парадигмаларнинг тузилишида икки асосий фаркли хусусият кузатилади: 1) парадигма умумий ва фаркли белги (сема)га эга бўлган лексемалардан тузилади, лекин парадигманинг фаркли семали аъзолари ўртасида ўзаро нисбатланиш, оппозиция бўлмайди; 2) парадигма ўзаро нисбатланувчи қисмлардан ташкил топади.

1. Биринчи турдаги парадигмаларда парадигма аъзолари ўзаро нисбатланмайди. Масалан, *дехқон*, *муаллим*, *санъаткор*, *спорччи* лексемалари 'шахс' семаси билан бир парадигмани ҳосил қиласди, лекин парадигма аъзолари ўртасида ўзаро нисбатланиш, оппозиция ходисаси йўқ. Умумий сема парадигма аъзоларидан ҳар бирининг изоҳида *шахс* лексемаси билан ифодаланади – вокеланади: *дехқон* – асосий касби ерга ишлов бериш, экин экиш, ҳосил олиш бўлган *шахс*. *Спорччи* – спорт билан шугулланувчи, спорт машқлари ва мусобақаларида қатнашувчи *шахс* ва б.

Бундай парадигмалар аъзоларига хос 'шахс' тушунчаси хамма вакт уларнинг изоҳида *шахс* лексемаси билан ифодаланиши шарт бўлавермайди. 'Шахс' тушунчаси шундай тушунчага эга бўлган бошқа лексема билан ифодаланиши мумкин. Масалан, *футбол*, *бокс*, *хоккей*, *тенис* лексемаларининг ҳар бири спортнинг бир турини билдиради ва 'спорт' семаси билан бир парадигмани ташкил этади, лекин парадигма таркибида *спорт* лексемаси йўқ. Бу белги парадигма таркибидаги лексемаларнинг изоҳида *шахс* ёки *спорччи* лексемаси билан вокеланади: «*футболчи* – спортнинг футбол тури билан шугулланувчи, шу турида фаолият кўрсатувчи *шахс*, *спорччи*». Маълум бўладики, бу типдаги парадигмаларнинг аъзоларига 'шахс' тушунчаси имконият ҳолида мавжуд бўлади. Парадигмадаги лексемаларнинг изоҳида у маълум лексема, масалан, *шахс* ёки *спорччи* лексемаси ёрдамида аниқ ифодаланади, вокеликка айланади.

Ўзбек тили материалларидан маълум бўлишича, 'шахс' семаси асосида тузиладиган парадигмалар инсон фаолиятига, касб-корига

¹Ўзбекистон миллий энциклопедияси. Тошкент, 2005. 10-ж., 15-б.

оид тушунчалар, харакат-холатларни билдирадиган лексемалардан ташкил топади. Бунинг сабаби ақлий ва жисмоний меҳнат килиш, меҳнатнинг барча соҳаларида фаолият олиб бориш инсонга хос хусусият эканлигидадир. Бу типдаги парадигмаларнинг кўпгина кисми ясама шахс отларидан бўлишининг (*иичи, комбайнчи, адабиётчинос* каби) сабаби ҳам шунда.

Фактлар яна шуни кўрсатяптики, бу турдаги парадигмаларнинг ассиий хусусияти жонсиз нарсалар ва жониворларни билдирувчи лексемалардан тузиладиган парадигмаларнинг 1-бандда кўрсатилганлари билан бир хил моҳиятга эга, яъни тенг қийматли лексемалардан тузиладиган парадигмалардир.

2. 'Шахс' семали лексемаларнинг парадигмаланишидаги иккинчи ҳодисанинг моҳияти шундан иборатки, биринчидан, бундай парадигмалер ўзаро нисбатланувчи (ўзаро муносабатда бўлган) лексемалардан тузилади. Иккинчидан, нисбатланувчи лексемаларнинг ҳар бирида умумий ва фарқловчи белги мавжуд бўлади. Масалан, *ака-ука, опасинги, тоға-амила* жуфтликларининг қисмлари 'шахе' семаси билан бир, жинс ва ёш жихатидан фарқли белгилари билан бошқа типдаги парадигмаларни ҳосил килади. Буларнинг ҳар бирига тўхталишни лозим топмаймиз.

Объектив борлиқнинг жонсиз мавжудот, жониворлар ва инсоният оламига мансуб нарсаларни билдирувчи лексемалардан шаклланадиган парадигмалар тадқиқидан маълум бўлдики, бундай парадигмалар икки ва ундан ортиқ лексемалардан тузилади. Парадигмаларни ўзига ёндош ҳодисалардан, лексик-семантик гурухлардан фарклашда ана шу ҳодиса доимо эътиборда бўлиши лозим. Қолаверса, бундай парадигмалар аъзолари ўртасидаги муносабатни (парадигматик муносабатни) белгилаш, талқин этишда ўзбек тилшунослигига ҳар хил фикрлар, ҳодисанинг моҳиятини тўғри қайд этмайдиган нуктаи назарлар мавжуд. Бу эса ишни шундай фикр-мулоҳаза, қарашлар ҳақида тўхталиб, уларга муносабат билдириш, сўнгра ҳар бир ҳодисанинг моҳияти ҳақида ўз фикримизни билдиришни тақозо этади. Шу асосда иш кўрилса, ҳар бир ҳодисанинг моҳиятини тушуниш ва тушунтириш янада осонлашади.

Парадигматик муносабат. Юқорида объектив борлиқка оид нарсалар, жонзотлар ва инсоният оламига хос системаларнинг тил системасидаги, аникроғи, лексик системадаги ифодаси юзасидан, яъни

лексик парадигмалар юзасидан умумий тарзда ўз мuloҳазаларимизни билдирилди. *Тил системаларини ўрганишдан мақсад тил бирликла-ри ўртасидаги алоқаларни, муносабатларни очиш*. деган муҳим эътирофдан келиб чиқилса, лексик системани ўрганишда ҳам бундай иш, яъни парадигма аъзолари ўртасидаги муносабатларнинг моҳиятини ёритиш ниҳоятда муҳим аҳамиятга молиқлиги маълум бўлади.

Лексик парадигманинг икки ва ундан ортик лексик бирликлардан ташкил топиши, бу бирликларда парадигма аъзоларидан ҳар бирининг моҳияти, уларга хос ўзаро муносабатнинг моҳияти катта аҳамият касб этади. Ана шу муносабат муайян парадигманинг моҳиятини белгилайди. Шунинг учун ҳам парадигма ҳақида гап борганида, унинг неча компонентдан ташкил топиши, парадигма аъзоларининг ўзаро муносабати, албатта, тилга олинади. Лекин мазкур масала юзасидан билдирилган фикрлар кўп ҳолларда бир-бирига мос келмайди, баъзиларини ўзбек тили материаллари тасдиқламайди. Шу боис бу масалалар юзасидан ўзбек тилшунослигига билдирилган фикрларга эътибор қаратиб, улар юзасидан ўз мuloҳазаларимизни билдиришни лозим топамиш.

Ўзбек тилшунослигига проф. Ҳ. Нематов ва Р. Расуловнинг систем лексикология масалаларига бағишлиланган иши борлигини кўрдик. Бу ишда «муносабатлар» масаласига алоҳида эътибор берилган, ҳар бир ҳодисанинг моҳиятини ўзбек тили материаллари асосида ёритишига, ҳал этишга ҳаракат қилинган, билдирилган фикр-мuloҳазалар эътиборга лойик: «7-§. «Муносабатлар» деганда бир бутунликнинг таркибий кисмлари – бирликлари асосидаги ўзаро алоқалар, бояланишлар тушунилади. Бундай алоқалар турлича бўлиши мумкин. Шакл, маъно ёки вазифа жиҳатидан ўхшашик ва фарқлар, тил бирликлари орасидаги ўзаро муносабатлар, алоқалар орасида, асосан, уч хил муносабат фарқланади: 1) ўхшашик (парадигматик) муносабатлари; 2) поғонали (иерархик) муносабатлар; 3) кўшничилик (сингатматик) муносабатлар»¹.

Булардан бевосита фақат лексик системаларга тегишли бўлгани «ўхшашик» («парадигматик») муносабатлариdir. Шу боис ишимиз давомида шундай муносабатлар билан юзага келган, юзага келадиган лексик системалар ҳақида фикр юритилади. Булардан ҳар бири ҳақида фикр юритишдан олдин бу муносабатларга нисбаба-

¹ Нематов Ҳ., Расулов Р. Юкорида кўрсатилган асар, 14-15-б.

тан кўлланаётган терминларга тўхтаб ўтишга тўғри келади. Чунки ходисанинг моҳиятини қай даражада аниқ, тўғри тушуниш унга нисбатан кўлланаётган терминнинг қай даражада талабга жавоб бериш-бермаслигига боғлиқ бўлади.

«Парадигматик муносабат» термини парадигма ҳодисасининг моҳиятидан келибчиқсанхолда ҳосил қилинган, шу боисбуҳодисанинг моҳиятини тўғри қайд этишига шубҳа бўлмаса керак: «**Парадигматик муносабат** – бир парадигмага бирлашувчи тил бирликларининг ўзаро муносабати»¹. Ўзбек тилшунослигига оид ишларда бупдай муносабат «ўхшашиблик муносабати», «уядошиблик муносабати»² деб ҳам юритиляпти. Бизнингча, терминни ўзбекчалаштириш мақсадида шундай килинаётган бўлса керак. Лекин «ўхшашиблик муносабати», «уядошиблик сўзлари» бу мақсад учун хизмат кила олмайди, яъни уларда «парадигматик муносабат»нинг моҳиятини *парадигма* сўзидан ҳам аникроқ, тўғрирок ифодалаш имконияти йўқ. Чунки парадигматик муносабатдаги асосий белги умумийлиқdir. Масалан, юқорида кўрилган *сада*, *терак*, *тол* лексемаларининг изохida бир хил сема, яъни умумий сема бор: 'илдиз', 'ёғочланган тана', 'шох-шабба' ва б. Булар шу лексемалар учун бир хил – умумий белги, лекин ўхшашиблик эмас, яна ҳам аникроқ қилиб айтганда, бу белги *даражат* лексемаси билдирган ўсимликда мавжуд, лекин *сада*, *чинор*, *терак*, *тол* сўзларининг илдизи, танаси, шохлари бир-бириникига ўхшамайди. Шунинг учун ҳам *парадигма* терминига «Умумий белгига кўра бирлашувчи, хусусий белгиси билан ўзаро фаркланувчи бирликлардан ташкил топган гурӯҳ (бутунлик)» деган таъриф берилади ва бу таъриф мутахассислар томонидан тан олинган, жумладан, лексик системанинг ҳам ўзаро фарқли белгига эга бўлган лексемаларнинг бир умумий белги асосида бирлашувидан ташкил топган лексик-семантик гурӯҳ (бутунлик) экани қайд этилади³. Парадигманинг бундай моҳиятини *ўхшашиблик* сўзи қайд эта олмаслиги аниқ сезилиб турибди. «**Уядошиблик муносабати**» термини ҳақида ҳам шуларни айтиш мумкин, яъни «**парадигматик муносабат**» ҳодисасининг моҳиятини «**уядошиблик муносабати**» термини ҳам аниқ ва тўғри қайд эта олмайди. Шундай экан, «**парадигматик**

¹Хожиев А. Тилшунослик терминларининг изохли лугати, 79-б.

²Нурмонов А. ва бошқалар. Юқорида кўрсатилган асар, 9-б.

³Лингвистический энциклопедический словарь. - С. 348 .

муносабат» термини ўрнида «ўхашлик муносабати» ёки «уядошлик муносабати» терминларини кўллаш ҳеч қандай ижобий натижа бермайди, аксинча, бундай қилиш лексик парадигмаларнинг шаклланиши ва бу жараёнда юз берадиган ҳодисаларнинг моҳиятини ёритишида салбий натижаларга олиб келади, хато фикр-мулоҳазаларнинг, бир-бирига зид қарашларнинг юз беришига сабаб бўладики, амалда шундай ҳолатлар кузатиляпти ҳам. Буни биргина парадигматик муносабатлар юзасидан билдирилган фикрлар мисолида аник кўриш мумкин.

«Парадигматик (ўхашлик) муносабатлар тил зиддиятларида (оппозицияларда) воқелашибади, «кўринади» ... Бу зиддиятларнинг энг асосийлари тўрт хилдир. Улар куйидагилар: 1) тенг қийматли (эквиполент) зиддиятлар; 2) мутаносиб (пропорционал) зиддиятлар; 3) даражали (градуал) зиддиятлар ва 4) ногўлиқ (приватив) зиддиятлар»¹. Бундай фикр умумтилшуносликка оид адабиётларда, шунингдек, ўзбек тилшунослигига оид адабиётларда ҳам мавжуд.

Лексик-семантик гурух, яъни парадигма аъзоларининг ўзаро муносабатига нисбатан, шу муносабатнинг моҳиятини қайд этиш учун ўзга тилшуносликка оид ишларда *оппозиция* сўзи кўлланади. Бу сўз (термин)ни бошқа тиллар учун кўллашнинг қанчалик мақсадга мувофиқлиги ёки мувофиқ эмаслиги ҳақида аник бир фикр айта олмаймиз (Бу бизнинг вазифамизга кирмайди ҳам). Лекин ўзбек тилидаги мазкур ҳодисага нисбатан *оппозиция* ёки *зидданиши* (*зидлик*) терминларини кўллаш талабга жавоб бермайди. Чунки бу сўзлар лексик парадигманинг моҳиятини тўғри ва аник қайд эта олмайди, қайд этиш имкониятига эга эмас, ҳатто ҳодисанинг моҳиятини тўғри, осон тушунишга тўскинлик киласи. Буни аник тасаввур этиш учун зиддиятнинг ҳар бир тури ҳақида билдирилган фикрларга алоҳида тўхташ ва уларга муносабат билдиришга тўғри келади.

«Парадигматик муносабатларнинг тил зиддиятларида воқеланиши» масаласига, бу ҳақдаги фикрларга тўхташдан олдин куйидаги бир жумлага эътиборни қаратамиз: «Тил бирликлари орасидаги фарқ кучайиб, зиддият даражасига этиши ҳам мумкин. Қиёсланг: [ок]: [кора]; [кун]: [тун]...»². Бу икки мисолдаги лексемалар орасида зиддиятнинг кучайиши ҳодисаси йўқ, яъни лексемалар билдирган

¹ Невъматов Х., Расулов Р. Юкорида кўрсатилган асар, 16-б.

² Невъматов Х., Расулов Р. Шуиш, 14-б.

ҳолат (*оқ ва қора, кун ва түн* лексемалари билдирган ҳолатлар)нинг қандайдир бошқача ҳолатдан, бошқача даражадан кучайишини тасаввур этиш мумкин эмас. Умуман тилда, жумладан, парадигма аъзолари ўртасида зиддиятнинг кучайиши ҳодисаси кузатилмайди.

Парадигматик муносабатларнинг юқорида келтирилган тўрт туридан ҳар бирига тўхташдан олдин, умуман, парадигматик муносабатларда зидланиш, зидлик ҳодисаси бор-йўклигини аниқ кўрсатувчи ва буни тасаввур этишни осонлаштирувчи бир фактга эътиборни қаратмоқчимиз.

Юқорида кўрдикки, *сада, арча, чинор, терак, тол* лексемаларининг ҳар бири ўзига хос фарқли белгига (семага) эга. Шу билан бирга, улар бир умумий белгига ҳам эга ва худди шу белгиси, семаси асосида бирлашади, бир лексик парадигмани ҳосил қиласди. Булардаги умумий белгини «ўхашашлик» ёки «уядошлиқ» белгиси дейиш, *умумийлик* сўзини *ўхисталик*, *уядошлик* сўzlари билан алмаштириш мумкин бўлмаганидек, парадигма аъзолари (лексемалар) ўртасида зидлик муносабати, умуман, зидланиш ҳодисаси йўклигига ҳам шубҳа қолмайди. Бундай парадигмаларда парадигма аъзоларининг бир умумий белги (сема) асосида бирлашуви, бутунлик ҳосил қилиши мухимдир, шундай белгисиз парадигма ҳосил бўлиши ҳакида гапириш мумкин эмас. Демак, ҳар қандай парадигманинг аъзолари ўзаро зидланишда бўлади, деган фикр ҳақиқатга тўгри келмайди.

Энди парадигматик муносабатларда юқорида келтирилган зиддият турлари ва улар ҳакида билдирилган фикрларга қисқатарзда тўхтаб ўтсак. «Тенг қийматли (эквиполент) зиддият деганда икки тил бирлигининг ўзига хос белги-хусусиятлари асосида ўзаро қарама-карши қўйилиши, зиддияти тушунилади. Масалан: [она]:[бола]. Бу зиддиятда бир тил бирлиги вояга етган, нисбатан катта ёшдаги шахсни, иккинчиси эса вояга етмаган, нисбатан кичик ёшдаги шахсни ифода этади. Яна қиёсланг: [қўй]:[қўчкор]. Бу зиддиятдаги тил бирликларидан бири «ургочилик», иккинчиси эса «эркаклиқ» маъносига эга. Шунга кўра ушбу тил бирликлари ўзаро зид муносабатдадир. [китоб]:[дафтар]; [қўй]:[эчки]; [от]:[эшак]; [оқ]:[кора]; [кизил]:[сарик]; [мен]:[сен] каби тил бирликлари орасидаги зиддиятлар ҳам тенг қийматли зиддиятлардир»¹.

Аввало айтиш керакки, лексик парадигмалар лексемалар маъносидаги фарқ (зиддият)лар асосида (умумий белгисиз) ташкил топмайди (Буни юқорида кўрдик). Шунинг ўзиёқ ўзбек тилида лексик

¹ Неъматов Х., Расулов Р. Ўша рисола, ўша бет.

парадигманинг бундай түри борлигини инкор этади. Қолаверса, бу таърифдан маълум бўладики, «тeng қийматли (эквиполент) зиддият» деганда икки нарса тан олинади: 1) парадигманинг икки қисм (компонент)дан таркиб топиши; 2) бу таркибдаги лексемаларнинг зид семаларга эга бўлиши. Бирок масалага парадигманинг биз юкорида кайд этган (бошқа ишларда ҳам кайд этилган) моҳияти асосида, яъни лексик парадигманинг ўзаро фарқли ва умумий белгига эга бўлган лексемалардан ташкил топиши асосида ёндашилса, келтирилган «ўзаро зид» бутунликнинг ўзи лексик парадигма бўла олмаслиги маълум бўлади. Келтирилган мисоллар ва улар ҳакида билдирилган фикрлар юзасидан эса қуидагиларни айтиш мумкин. Биринчидан, зиддиятнинг бу тури учун келтирилган [она]:[бола]; [кўй]:[кўчкор] ва [кўй]:[эчки], [от]:[эшак], [оқ]:[кора], [кизил]:[сариқ] типидаги бутунликлар бир хил моҳиятга эга эмас. Масалан, [она]:[бола] бутунлигини олайлик. Биринчидан, бу икки лексема ўзаро фарқли белгига эгалиги аник. Бунда бирлаштирувчи белги зидлик белгиси бўлиши ҳакида гапириш кийин. Иккинчидан, бу фарқ зидлик белгиси сифатида қабул килинган тақдирда ҳам, шу белги асосида парадигма тузилиши ҳакида гапириш мумкин бўлмайди (Бу нарса юкорида алоҳида таъкидланди). «Бу зиддиятда бир тил бирлиги вояга етган, нисбатан катта ёшдаги шахсни, иккинчиси эса вояга етмаган, нисбатан кичик ёшдаги шахсни ифода этади» деган изохнинг ўзиёқ буни очик-ойдин тасдиқлайди.

Кўй ва қўчкор сўзлари, уларнинг ўзаро муносабати ва бу муносабат асосида парадигманинг шаклланиши масаласида ҳам муаллифларнинг фикрига қўшилиб бўлмайди. Чунки қўй лексемаси маъноси таркибида 'ургочи' семаси йўқ, қўйнинг урғочиси *совлиқ* дейилади, яъни 'ургочи' семаси *совлиқ* сўзи семемаси таркибида бор ва у фарковчи сема хисобланади. Қўй лексемаси қўчкор ва *совлиқ* нисбатан кўлланаверади – у жинсга нисбатан бетараф. Демак, қўй умумий белгини билдиради, худди шу белги (умумий сема) асосида қўй – қўчкор – *совлиқ* лексемалари бир лексик-семантик гурухни, системани ташкил этади. Бинобарин, системанинг (парадигманинг) қўй ва қўчкор лексемалари маъно муносабати асосида шаклланиши ҳақидаги гап ҳақиқатга тўғри келмайди. Жонли мавжудотларни, жумладан, шахсни билдирувчи лексемаларнинг парадигма ҳосил қилишини, унинг моҳиятини белгилашда ана шу нарса доимо эътиборда тутилиши

талааб этилади. Бундай лексемалар система хосил қилишида турли-ча ҳолат бўлиши – зидланиш ҳодисаси бўлиши ҳам, бўлмаслиги ҳам мумкин. Масалан, қўй – қўчкор – совлиқ лексик-семантик гурухида умумий белги билдирувчи сема ('кўй') ҳам, фарқловчи сема ҳам бор ('эркак', 'ургочи'). Лекин зидланиш аҳамият касб этмайди, фарқли белги назарда тутилмайди, умумий белги аҳамият касб этади. *Отиона, чол-камтир, ака-ука, опа-сингил* кабиларда ҳам шундай ҳодиса кузатилади, яъни бу жуфтликларда жинс ёки ёшга кўра фарқланиш мавжуд, бу фарқ бирининг иккинчисига нисбатан «тескари» белги-га эгалигига ўз ифодасини топади. Шу жиҳатдан «зиддият», «зидланиш» ҳодисаси сифатида қаралади. Лекин улар парадигманинг аъзоси сифатида ўзаро фарқловчи белги (шундай мақомдаги белги) сифатида бўлади ва умумий белгиси билан бир парадигмани ташкил этади.

Шундай ҳолатлар борки, улар умумий ва бир хусусий белгини билдирувчи лексема ҳам бир лексик-семантик гурухни (парадигмани) ташкил этиши мумкинлигини, шундай ҳодиса борлигини тасдиклайди. Масалан, эчки сўзи сутэмизувчи ҳайвонларнинг бир турини билдиради (қўй сўзи каби). *Taka* – эчкининг эркагини билдиради. Лекин ўзбек тилида эчкининг ургочисини билдирадиган сўз йўқ (Балки ўзбек тили шеваларида бордир). Демак, ўзаро зидланадиган жуфтлик йўқ. Шунга қарамай, эчки ва *taka* сўзлари умумий ва хусусий белгиси асосида бир бутунликни, гурухни хосил қиласи. Бу факт ўзбек тилида ҳар кандай лексик-семантик гурух маънога кўра ўзаро зидланувчи сўзлардан ташкил топади, деган фикрни рад этади. X. Неъматов ва Р.Расулов ишида эса бундай ҳолатда ҳам зидланиш борлигини исботлашга ҳаракат қилинган ва бу зиддият «нотўлик (приватив) зиддият» деб таърифланган: «Нотўлик (приватив) зиддият иккита тил бирлиги (ёки бирликларнинг икки гурухи) орасида бўлади. Бу бирликлардан биттаси барқарор, доимий, ўзгармасдир. Масалан: [қўчкор] сўзи ҳамиша факат эркак қўйни англатиб келади, ургочи қўйни ифода эта олмайди. Шунга кўра [қўчкор] сўзининг маъно таркибидағи «эркаклик» белгиси доимий, барқарор, ўзгармасдир. [Кўй] сўзи эса [қўчкор] сўзига нисбатан акс хусусиятга эга. У асосан, ургочи қўйни атаб келишга хизмат қиласи. Аммо баъзи ҳолларда [кўй] сўзи «ургочилик» маъносини йўқотиб, «эркак кўй» [қўчкор]ни ҳам англатиб кела олади»¹. Бу ва бундан кейинги гапларнинг бирон-

¹Неъматов X, Расулов Р. Кўрсатилган асар, 17-б.

таси ўзбек тилида шундай зиддиятли қисмлардан ташкил топадиган лексик-семантик гурухни, парадигмалар бўлишини тасдиқламайди. «Кўй сўзи баъзи ҳолларда «урғочилик» маъносини йўқотиб, «эркак кўй» [кўчкор]ни ҳам англатиб кела олади» деган гапнинг ўзиёқ бунинг исботи бўла олади, яъни [кўй] сўзи «эркаклик» ва «урғочилик» семасига эга бўлмаган, бу маънолар («эркаклик» ва «урғочилик» семаси) қўчкор, совлиқ лексемалари семеси таркибида бўлган ва ҳозир ҳам бор. Бинобарин, қўй – қўчкор – совлиқ лексик-семантик гурухидан зиддиятни қидириш ва «урғочилик» семасига эга бўлган лексеманинг, яъни совлиқ сўзининг йўклиги боис бундай зиддият «нотўлик зиддият» деб аталиши ва буни исботлаш учун келтирилган далил ҳамда айтилган бошқа ғапларни ўзбек тили материаллари тасдиқламайди.

Маълум бўлдики, биринчидан, лексик парадигмалар икки ва ундан ортиқ лексемалардан ташкил топади. Иккинчидан, парадигманинг ўзаро фарқли белгига эга бўлган икки лексемаси фарқли белгининг ўзи билан парадигмани ҳосил қилмайди, зидланиш икки фарқли сема асосида, бирлашиш – умумий белги асосида юз беради. Зидланишнинг «нотўликлиги» масаласида шуни айтиш мумкинки, зиддият (бизнингча, фарқланиш) камида икки лексема ўртасида бўлади. Бир лексемада бундай ходиса бўлмайди. Шундай экан, жинсий белгининг биттасини (эркаклик ёки урғочилик белгисини) ифодалайдиган лексема бўладиган ҳолатларда зидланишнинг ўзи йўқ, унинг «нотўликлиги» хақида ҳам гапириш мумкин бўлмайди. Шу билан бирга, зидланувчи (фарқли) ва умумий белгини билдирадиган лексема қўлланмайдиган ҳолларда ҳам (аввало, бу ходиса кам учрайди) фарқли белги маҳсус лексема билан ифодаланади: эчки, тақа парадигмасида «урғочилик» белгиси ургочи лексемаси билан ифодаланади. Демак, бор белги ифодасиз колмайди. Яна бир эътиборга лойик ходиса шуки, ўзаро фарқли белгини ифодаловчи лексемалардан биттаси қўлланишнинг ўзиёқ унинг иккинчи тури ҳам борлигига ишора килиб туради. Масалан, ўзбек тилида эчкининг эркагини билдирувчи тақа сўзининг қўлланishi бу жоноворнинг (эчкининг) урғочиси ҳам борлигига ишора килиб туради ва, эҳтиёж бўлган тақдирда, албаттга ифодаланади («урғочи» сўзи билан).

Айтилганлардан ва келтирилган фактлардан маълум бўляптики, «нотўликлиқ» парадигма таркибида ўзаро муносабатда бўладиган

бир лексеманинг йўклиги билан характерланади. Шундай экан, бу ҳодисани «зиддиятнинг нотўликлиги» эмас, парадигманинг нотўликлиги деб тушуниш ва бундай парадигмаларни «нотўлик парадигма» деб юритиш мақсадга мувофик бўлади, деб ўйлаймиз.

Кўрилган рисолада «Мутаносиб зиддият» ҳакида, куйидагилар ёзилган: «Мутаносиб зиддиятлар деганда муайян бир белги асосида тузилган зиддият қатори тушунилади. Чунончи, «эркаклик» ва «ургочилик» белгиси асосида жуда кўплаб лугавий зиддиятлар хосил қилинади. Киёсланг: [қиз]:[йигит]; [эр]:[хотин]; [она]:[ота]; [кампир]:[чол]; [опа]:[ака]; [мегажин]:[қобон]; [сигир]:[хўкиз]; [байтал]:[айғир]... каби зиддиятлар ўзаро мутаносиблидир. Чунки бундай зиддиятлар айнан бир белги асосида ташкил топади. Мутаносиб зиддиятларни ҳисобга олиш тил бирликларининг моҳиятини аниклашда, санокли хусусиятларга кўра кўплаб нарса-предметнинг моҳиятини очишда катта ёрдам беради»¹.

«Мутаносиб зиддият» термини таржима термин бўлиб, унинг моҳияти ҳакидаги гапларни ўзбек тили материаллари тасдиқламайди, термин таркибидаги *мутаносиб* сўзи бирон-бир моҳиятни қайд эта олмайди. Шунингдек, зиддиятнинг бу турига берилган таъриф ҳам зиддиятнинг муайян бир турини қайд эта олмайди. Чунки «муайян бир белги асосида тузилиш» умуман парадигма учун хос хусусиятдир. Келтирилган мисолларнинг моҳиятан бир-биридан фарқли ҳодисалар эканлигининг ўзиёқ фикримизни тасдиқлайди.

Қолаверса, “эркаклик” ва “ургочилик” белгиси асосида лугавий зиддиятлар хосил қилинади» деган жумла фикрни аник ифодалай олмайди. Чунки бундай зиддиятли лексемалар, демакки, зиддиятли ҳолатлар хосил қилинмайди, балки тилда бор бўлади. Яна такрор айтамизки, парадигма ҳакида гап борганида, асосий нарса парадигма таркибидаги ўзаро фарқли лексемалар ўртасидаги «зидлик»ни белгилаш, зиддиятли ҳолатлар хосил қилиш эмас, балки парадигманинг ўзини, уни ташкил этувчи компонентларни, улар ўртасидаги муносабатни белгилашдир. Парадигмадаги ўзаро фарқли семали лексемаларнинг муносабати зидланиши бўлиши ҳам, бўлмаслиги ҳам мумкин, бу нарса ҳал қилувчи аҳамиятга эга бўлмайди.

Хусусий белгига эга бўлган лексемалар муносабатининг моҳияти зиддиятли бўлишида эмас, умуман, фарқли бўлишида экани яна ўша

¹ Нематов Ҳ, Расулов Р. Юкорида кўрсатилган асар, 16-17-б.

сада, арча, чинор, терак, тол лексемаларидан ташкил топган парадигма мисолида аник кўринади. Бу лексемалар учун умумий белги бакувват илдизли, ёғочланган танали, шохли бўлиши эканини кўрдик (даражатга хос белгилар). Шу билан бирга, бу белгиларнинг ҳар бири ҳар бир лексема билдирган нарсада (*сада, арча, чинор, терак, толда*) кўриниши, тузилиши, ўсиши ва б. жихатдан фарқли бўлади ва буни сезиш кийин эмас. Лекин бу фарқланишда хеч қандай зидланиш йўқ. Демак, парадигма аъзоларидан ҳар бирига хос белги 'зидланиш' ('зидлик') белгиси эмас, балки 'фаркловчи' белги бўлишидир.

Кўрилган ишда келтирилган зиддиятлардан навбатдагиси «даражали (градуал) зиддият»dir. «Даражали зиддият энг камида учта тил бирлиги асосида бўлади ва бу бирликлар муайян бир белги-хусусиятнинг даражасига – оз-кўплигига кўра ўзаро қарама-қарши қўйилади. Масалан, [тузук]:[дуруст]; [яхии]:[ажойиб]. Бу тил бирликларининг барчаси ижобий баҳо белгисини ифодалайди. Айни вактда ушбу белги [тузук]дан [ажойиб]га томон ўсиб боради. [ишивирла]:[тичирла]:[айт]:[гапир]:[бақир]:[ҳайқир]: ...қатори ‘овоз миқдори’ белгиси асосида тузилган бўлиб, бу белги [ишивирла]дан [ҳайқир] га томон ўсиб боради...

Даражали зиддиятлар тилнинг лугат бойлигини ўрганишда жуда катта аҳамиятга эгадир. Чунки даражали зиддиятлар тилнинг лугат тизимида жуда кенг тарқалган. [хужра]:[кулба]: [уй]:[ҳовли]:[қаср]:[коюона]... каби лугавий бирликларининг қаторлари шулар жумласидандир¹.

Бу «зиддият» хақида айтилганлар ўзбек тили лексик парадигмаларида зиддиятнинг шундай тури борлигини исботлай олмаганидек, келтирилган мисоллар ҳам уларни тасдиқламайди. Биринчидан, *тузук, дуруст, яхии, ажойиб* каби сўзлардан ташкил топган гурух, умуман, синоним гурухлар лексик парадигмалардан фарқли ҳодиса(лар) ҳисобланади (Бу хақда бир оз кейинрок тўхталамиз). Иккинчидан, лексик парадигманинг таркибий қисми деб қаралаётган лексемалар, аслида, парадигма ҳосил килмайди, бир парадигмага бирлашмайди. Масалан, *айт, гапир, бақир, ҳайқир* лексемалари, шунингдек, *хужра, кулба, уй, ҳовли, қаср, коюона* лексемалари парадигма ҳосил килмайди ва хоказо.

¹ Неъматов Ҳ., Расулов Р. Юқорида кўрсатилган иш, 17-б.

Хуллас, юкорида кўрилган тил фактларини ўрганишнинг муҳим аҳамиятга эгалигини инкор этиб бўлмайди. Бироқ уларни зўрма-зўраки ҳолда лексик парадигмалар қаторига киритиш ҳамда қандайдир “зиддият”га ёпишириш, шу асосда уларнинг моҳиятини белгилашга уриниш ҳеч қандай аҳамият касб этмайди, аксинча, тилда мавжуд бўлган тил ҳодисаларини, улардан ҳар бирининг моҳиятини тўгри, тўла ва аниқ ёритишга тўсқинлик қилади. Бу ҳол, айниқса, инсонни билдирувчи лексемалардан тузилган парадигмаларда аник кўринади. Масалан, *ота-бала*, *она-бала*, *ака-ука*, *опа-сингил*, *опа-ука*, *ака-сингил*, *амаки-тога*, *амма-хола* кабиларнинг барчасида нисбатла-ниш ҳодисаси бор. Изоҳли луғатларда, яъни шу сўзларнинг изоҳида муносабатнинг моҳияти қайд этилади: **Амаки...** Отанинг акаси ёки укаси (жиянларга нисбатан)¹. **Тоға...** Аёлнинг ака-укалари (унинг болаларига нисбатан)². **Амма...** Отанинг опаси ёки синглиси (жиянларга нисбатан)³ ва б. Умуман, қариндош-уругчилик, туғишганлик муносабатини билдирувчи лексемалардан тузилган парадигмаларда парадигма аъзоларининг моҳияти турлича бўлади. Лекин бу муносабатларни зиддият деб қараш мумкин бўлмайди. Ҳатто *ака-ука*, *опа-сингил* каби жуфтликларни ҳам зиддиятли муносабат ҳисоблаш тўғри бўлмайди. Шунинг учун ҳам жуфтликлар компоненти «Аканинг зидди (тескариси) ука»; «уканинг зидди (тескариси) ака» тарзида изоҳланмайди ва ҳоказо.

Юкорида айтилганлар ва келтирилган фактларнинг барчасидан маълум бўлдики, лексик парадигмаларни ташкил этувчи лексемалар икки хил белгига (семага) эга бўлади: 1) умумий (бирлаштирувчи) белги (сема); 2) фарқловчи белги (сема).

Бирлаштирувчи белги асосидаги муносабат билан лексик парадигма шаклланади. Парадигма аъзоларининг ўзаро фарқли маъно муносабати қандай бўлишидан, яъни зиддиятли, зиддиятсиз ёки бошқача бўлишидан қатъи назар, уларнинг парадигма таркибида тутган ўрни, мавқеи бир хил бўлади – фарқловчи белгили компонент ҳисобланади. Бунинг сабаби шуки, улар бир турдаги семаларни – номловчи семаларни ифодаловчи лексемалар бўлади.

¹ Ўзбек тилининг изоҳли луғати, I жилд. Тошкент, 2006. 76-б.

² Ўзбек тилининг изоҳли луғати, IV жилд. Тошкент, 2008. 164-б.

³ Ўзбек тилининг изоҳли луғати, I жилд, 79-б.

Объектив оламга хос системаларнинг, яъни жонсиз нарсалар, жониворлар ва инсоният оламига хос системаларнинг лексик системадаги ифодаси ҳакидаги гапларни якунлар эканмиз. Яна бир муҳим ҳодисага эътибор қаратишни лозим топамиз.

Аввало айтиш керакки, тил – объектив оламдаги нарса-ходисаларнинг ифодаловчиси деган сўз тил – борликнинг айнан акси (қандай бўлса; шундай ифодаси) дегани эмас. Буни лексик парадигмалар юзасидан кузатишларимиз ҳам аник тасдиклайди ва бунинг сабаблари бор, албатта. Масалан, ҳайвонот оламига мансуб жониворларнинг ёши, жинси, зоти ва бошка жиҳатдан фаркланиши маълум. Бу фаркланиш тилда ўз ифодасини топади – маълум тил бирликлари, жумладан, сўзлар билан ифодаланади. Лекин бу фаркли белгилар факат лексик парадигмаларда, яъни лексик парадигма аъзолари оркали ифодаланавермайди. Масалан, қўчкор–совлик, қобон–мегажин жуфтликларининг компонентлари умумийлик (кўй ва чўчқа) ва хусусийлик (жинс) белгиларига эгалиги билан – шу белгилар асосида алохида парадигмани; *шер –бия; дўёноп –гўноп –той* лексемалари жинс ва ёшга кўра хусусий белгиси ҳамда 'от' умумий белгиси асосида алохида алохида парадигмаларни ташкил этади. Биргина ҳайвонот оламининг ўзида уларнинг жуда кўп турлари жинсий жиҳатдан фаркқа эга. Лекин уларнинг умумий ва хусусий белгисини бирга ифодалайдиган сўзлар ўзбек тилида йўқ. Бу ҳодисани *шер, йўлбарс, қоплон* сўзлари мисолида кўрдик ва бунинг сабаби ҳам айтилди. Бундай ҳодисанинг мавжудлигини инсоният оламига мансуб жонзотлар мисолида ҳам кўплаб кузатиш мумкин. Ўз-ўзидан, «бунинг сабаби нимада?» деган савол тугилади. Бизнингча, бунинг сабаби тилнинг ихчамликка, аниқликка интилиши каби қонуниятлар билан изохланади. Шу билан бирга, бунга объектив борлик системаларини тилда факат парадигмалар билан ифодалаш талаб этилмаслиги, бунга эҳтиёж бўлмаслиги ҳам сабаб бўлади. Чунки, юкорида айтилганидек, объектив оламдаги нарса-ходисалар, эҳтиёж бўлган тақдирда, албатта, ўз ифодасини топади. Шундай экан, фаркли белгиларнинг парадигма ҳосил килувчи лексемалардан бўлишига эҳтиёж нисбатан кам бўлади. Масалан, эркак ва ургочи, ўғил ва қиз каби лексемаларнинг мавжудлиги тилда жинсий белгига кўра фаркни ифодалашни таъминлади. Демак, жинсга кўра фарқли белги (эркаклик ва ургочилик белгиси) билан умумий бел-

гини ('кўй' семасини) бирга ифодалаш талаби билан, шунга эҳтиёж бўлган ҳолларда парадигма ташкил этувчи лексемалар (*қўчқор*, *совлиқ* каби лексемалар) юзага келган. Колган ҳолларда жинсий фарқ *эркак*, *ургочи* каби сўзлар билан ифодаланаверган.

Шу ўринда яна бир факт эътиборга лойик. Масалан, янги туғилган, жуда ёш жонивор ёки инсон боласи жинс жиҳатдан фаркли бўлади – эркак ёки ургочи (ўғил ёки қиз) бўлади. Уларнинг фаркли умумий белгисини бирликда ифодалаб, парадигма ҳосил қилувчи лексемалар ўзбек тилида йўқ. Жинсий фарқ *эркак*, *ургочи*; *ўғил*, *қиз* сўзлари билан ифодаланаверади: *эркак қўзи*, *ургочи қўзи*; *ўғил бола*, *қиз бола*. Талаб бўлганки, вақти келиб, яъни улар вояга етиши билан *қўчқор*, *совлиқ*; *йигит* сўзлари (атамалари) юзага келган ва лексемалар умумий семаси билан парадигма ҳосил қиласидан бўлган: *қўчқор* – эркак кўй; *совлиқ* – ургочи кўй; *йигит* – жинсий ва жисмоний жиҳатдан вояга етган эркак; ёш эркак. *Қиз* – балоғатга етган, лекин эрга тегмаган аёл жинсига мансуб шахс. Кўриниб турибдики, *қиз* сўзи жисмоний жиҳатдан йигитга қарама-қарши маъно ҳам касб этган ва худди шу маъноси асосида *йигит* сўзи билан лексик парадигмани ҳосил қиласи (*йигит-қизлар*).

Хуллас, лексик парадигмалар умумий (бирлаштирувчи) ва фаркли семалар асосида юзага келади. Бунда қўйидаги ҳолатлар кузатилади: 1) парадигмалар бирлаштирувчи ва фаркли лексемалардан тузилади. Бирлаштирувчи семани билдирувчи сўз парадигмада қатнашмайди, бу сема парадигма аъзоларининг ҳар бирида мавжуд бўлади ва парадигма аъзоларидан ҳар бирининг изохида намоён бўлади. Масалан, *сада*, *арча*, *чинор*, *терак*, *тол* лексемаларидан ташкил топган парадигманинг бирлаштирувчи семаси *дараҳт* лексемасида намоён бўлади; 2) парадигмалар бирлаштирувчи ва ўзаро фаркли семага эга бўлган лексемалардан тузилади. Масалан, *қўй*, *қўчқор*, *совлиқ* лексемаларидан тузилган парадигмада *қўй* бирлаштирувчи семага, *қўчқор* ва *совлиқ* фаркли семага эга; 3) парадигма ўзаро фаркли белгига эга бўлган икки лексемадан тузилади: *ака* ва *ука*, *амма* ва *хола*, *келти* ва *куёв* лексемаларидан тузилган парадигмалар шулар жумласига киради. Булардаги муносабат (нисбатланиш) бошқа сўз ёки сўзлар оркали ифодаланади. Масалан, *тога* – онанинг ака-укаси (фарзандга нисбатан); *жиян* – опа ёки сингилнинг фарзанди (акага нисбатан). Худди шу

хусусияти билан улар бошқа типдаги лексик-семантик гурухлардан, жумладан, антоним жүфтіліклардан фарқланади.

Синоним лексемалар гурухи

Синонимия юн. *synonymia* “бир хил номга әғалик” ва **синоним** юн. *synonymos* “бир хил номли” маңноларини ифодалайды. Күринадики, бу сүзлар таркибидаги *опута* – “ном” сүзи 'шакл' маңносини эмас, балки 'маъно' ('номловчи маъно')ни билдиради. Шунга кўра, **синонимия** – бир хил маънога әғалик ҳодисасини, **синоним** эса бир хил маънога эга бўлган тил бирликларини билдиради. Бундай ҳодиса, яъни бир хил маънога эга бўлиш ўз ифода ва мазмун жиҳатига эга бўлган тил бирликлари, масалан, лексемалар учун ҳосдир. Демак, **синонимия** лексик бир хил маънога эга бўлган лексемалардан ташкил топади: *мусобақа, беллашув, кураши; мусибат, кулфат, ташвиши; озод, эркин, ҳур; ривожланмоқ, тараққий қилимоқ, ўсмоқ, юксалмоқ* ва б.

Бу тил ҳодисаси ва у билан боғлиқ ҳодисалар ҳакида сўз борар экан, биринчи навбатда, уларга нисбатан кўлланиб келаётган терминларга муносабат билдиришга тўғри келади.

Синоним, синонимия сўзлари 'бир хил маъноли', 'бир хил маънога әғалик'ни ифодалашини кўрдик. 'Бир хил маъноли' бирикмасига ҳос маънени маънодоши сўзи, 'бир хил маънога әғалик' ҳодисасини маънодошилик сўзи аниқ ифодалай олади. Шу боис ўрни билан бу сўзлардан фойдаланиш мумкин. Лекин асосий термин сифатида **синоним** ва **синонимия** терминларидан фойдаланган маъкул. Бу билан бошқа системадаги тиллар билан термин кўллашда бир хилликка эришилади, чунки шакл ва маъно муносабатига кўра баъзи тил бирликларига нисбатан омоним – **омонимия, антоним – антонимия** терминлари кўлланаётгани ҳолда, синоним, синонимия ҳодисасига келганда бу йўлдан чикиш мақсадга мувофиқ бўлмайди ва бошқалар.

Синонимлар гурухини «синонимик қатор», «синонимик уя» («синонимлар уяси») деб юритилиши маълум. Лекин бу терминлар ҳодисанинг моҳиятини қайд эта олмайди, яъни бу сўз бирикмалари таркибидаги қатор, уя сўзлари синонимлардан ташкил топган бутунликнинг моҳиятини – 'бутунлик', 'гурух' маъносини қайд эта олмайди,

бинобарин, *синонимик қатор*, *синонимик уя* бирикмалари талабга жа-
воб берадиган термин бўла олмайди.

Юкорида айтилдики, тил системаларини, жумладан, лексик сис-
темаларни умумий белгисига кўра бирлашган, уюшган тил бирликлари,
лексик бирликлар гурухлари ташкил этади. Лексик парадигма ҳам
шундай гурухлардан бири эканини кўрдик. Масалага шу нуқтаи назар,
шу талаб асосида ёндашилса, синонимлардан тузилган бутунликка,
синонимлар уюшмасига нисбатан ҳам гуруҳ сўзини қўллаш, *синоними-
лар гуруҳи* бирикмасини термин сифатида қўллаш мақсадга мувофиқ
бўлади. Демак, бу термин ҳам, худди *лексик парадигма* термини каби,
лексик системанинг бир турини, шу турга мансуб кичик бир система-
ни билдиради. Бу айтилганлардан яна шу нарса маълум бўляптики,
тил системасининг бу тури ҳақида гап борганида, биринчи навбатда,
унинг лексик парадигмалардан фарқли хусусиятлари, шаклланишида-
ги ўзига хосликлар ҳақида фикр юритиш талаб этилади.

Лексик парадигмалар лексемаларга хос умумий (бирлаштирувчи)
белги асосида шаклланишини кўрдик. Синонимлар гурухининг шакл-
ланишида ҳам шундай ҳодиса кузатилади. Фарқ шундаки, биринчидан,
лексик парадигмалар бир умумий сема асосида шаклланса, синоним-
лар бир умумий маъно (семема) асосида бирлашади ва муайян гурухни
ташкил этади. Иккинчидан, синонимлар гурухини ташкил этувчи лек-
семалар ўзига хос фарқли белги-хусусиятларга эга бўлади. Бу бел-
гилар синоним лексемаларнинг коннотатив белгилари (семалари)
хисобланади. Масалан, *бечора*, *шўрлик*, *боёғини*, *ўксиз*, *нотовон*, *ожиз*,
афтода сўзлари 'ачиниш, таассуф уйғотувчи ҳолатли', 'ночор' маъно-
си (умумий маъно) билан бирлашади. *Бечора* қўшимча белги-хусуси-
ятдан холи, *шўрлик* сўзида белги даражаси кучлирок, *боёғини* кўпроқ
оддий сўзлашувга хос. *Ожиз*, *нотовон* сўзларида иложсизлик оттен-
каси кучлирок; *ўксиз* кам қўлланади; *афтода* – эскирган сўз. Демак,
синонимик гуруҳ умумий семема ва коннотатив семаларга эга бўлган
лексемалардан тузилади.

Синонимик гурухнинг коннотатив белгига эга бўлмаган сўзлардан
тузилиши жуда кам, у ҳам бўлса, терминологик системада (терминлар
доирасида) учрайди: *тишиунослик* – *лингвистика* каби. Бунинг саба-
би шуки, хар жихатдан тенг белгига эга бўлган тил бирлигининг тилда
мавжуд бўлишига (яшашига) эҳтиёж сезилмайди.

Лексик парадигмани шакллантирувчи умумий белгининг моҳияти масаласида бир хил фикр мавжуд, яъни бунда умумий (бирлаштирувчи) сема назарда тутилади ва бу сема «номловчи сема» деб ҳам юритилади. Синонимик гурухни шакллантирувчи семема масаласида эса аҳвол бироз бошқачароқ.

Тил бирликларининг, жумладан, лексемаларнинг синонимлиги деганда, одатда, уларнинг бир хил ёки бир-бирига яқин маъноли бўлиши назарда тутилади. Лекин бир хил маънога эгалик билан маънога кўра бир-бирига яқинлик ўзаро фаркли ҳодисалардир. Шу боис айни бир ҳодисага нисбатан, жумладан, синонимия ҳодисасига нисбатан «бир хил маъноли», «бир-бирига яқин маъноли» бирикмасини бефарқ қўллаш мумкин бўлмайди, бундай қилиш ҳодисанинг моҳиятини аниқ белгилаш, тасаввур этишга халақит беради. Бинобарин, улардан бирини танлаш, ҳодисанинг моҳиятини тўғри ифодалайдиганини белгилаш ва шунисини қўллаш керак бўлади.

Юқорида айтилдики, маъносига кўра бир хил, бир-бирига тенг бўлган тил бирликлари деярли учрамайди. Шунга кўра, синонимларнинг бир хил (тенг) маъноли бўлиши мумкин эмаслиги айтилади ва бунинг исботи учун синонимларнинг бир-биридан фаркли белгига эга бўлиши факт сифатида келтирилади. Синонимларнинг шундай фаркли белги-хусусиятларга эга бўлиши тўғри ва буни юқорида бир синонимик гурух мисолида кўрдик. Лекин бу нарса синонимларнинг бир умумий белгига эга бўлишини ва шу белги асосида бирлашишини – синонимик гурух ҳосил қилишини инкор эта олмайди, аксинча, шундай бўлиши қонуний ҳол эканини тасдиклайди.

Синонимик гурухнинг, парадигмадан фаркли ҳолда, бир умумий (бирлаштирувчи) сема асосида эмас, умумий семема (номловчи маъно) асосида шаклланишини кўрдик. Бу маъно синонимик гурух аъзоларида бир-бирига яқин моҳиятга эмас, бир хил моҳиятга (кыйматга) эга бўлади. Худди шу хусусияти уларни бирлаштиради. Яна ҳам аникроқ, соддароқ қилиб айтганда, тил бирликларини ўзаро яқинлик эмас, бир хиллик, яқинлик бирлаштиради. Демак, синоним лексемалар ўзаро умумий ва фаркли белгиларга эга бўлади.

Шу айтилганлар асосида синонимлар ва синонимия ҳодисасига куйидагича таъриф бериш мумкин: *лексик синонимлар* – бир умумий семемага (маънога) эга бўлган лексемалар. *Лексик синонимия* – лек-

семаларнинг бир умумий семема билан бирлашиши, шундай муносабатда бўлиши ҳодисаси.

Лексик синонимия асосида лугавий маъно, лугавий маънонинг бир хил бўлиши ётар экан, шу билан боғлик баъзи ҳодисалар ҳакида тўхтаб ўтишга тўғри келади.

Синонимия ҳодисаси (лексик синонимия) муайян сўз туркумлари доирасида мавжуд бўлади. Бунинг сабаби шуки, лугавий маъно номловчи маъно бўлади (Бу ҳакда юқорида ҳам айтилди). Лексемалар объектив вокелиқдаги нарса, белги, ҳаракат кабиларни номлайди ва нимани номлашига кўра маълум гурухларга – сўз туркумларига бўлинади: от, сифат, феъл каби туркумларга мансуб бўлади. Лексик синонимия ҳодисаси ҳам сўз туркумларига мансуб бирликлар доирасида мавжуд бўлади: *баҳс, тортишув, мунозара, мубоҳаса* – от-синонимлар; *иноқ, аҳил, қадрдон, тотув, иттифоқ, қалин, атоқ-чапоқ* – сифат-синонимлар; *куймоқ, унамоқ, рози бўлмоқ* – феъл-синонимлар ва бошқалар.

Сўзнинг узуал ва окказионал маънога эга бўлиши маълум. Лексемалар фақат узуал маъно билан бир-бирига синоним бўлиши мумкин. Окказионал маънолар синонимияни юзага келтирмайди: *Фан, санъатнинг гуллари бутун, тўпланганда сұхбати учун* (Ойбек). *Кун ҳалияни иссиқ бўлса-да, ҳар ҳолда шабада йўргаларди* (М. Мусаев). Бу гаплардаги гул, йўргаламоқ сўзлари шундай маънони билдирадиган тўғри (узуал) маъноли сўз билан синоним бўла олмайди.

Лексик синонимлар гурухи лексемаларнинг бир хил семемаси асосида шаклланар экан, кўп маъноли сўзларнинг бирдан ортиқ маъносида бошқа сўзлар билан синонимик муносабатга киришуви мумкинлигини инкор этиб бўлмайди. Масалан, *ҳаёт* сўзи уч маъносида учта сўз – *тириклиқ, турмуши*, умр сўзлари билан синонимдир: *Мен ҳаёт эканман, ҳаётсан сен ҳам* (Зулфия). ...*ҳаёт* учун энг азиз ва мўътабар бўлган нон қадрланмай, исроф қилинмоқда (Газетадан). *Бундай нарсани ҳаётимда учратмаганман.* (Газетадан).

Кўп маъноли сўз бирор маъноси билан бошқа бир кўп маъноли сўзга синоним бўлиши мумкин. Масалан: *тоза, соф, бегубор, мусаффо* сўзларининг ҳар бири кўп маъноли. Лекин улар фақат бир маъноси билан – 'чанг-ғубордан ҳоли' маъноси билан синонимдир: *тоза ҳаво, соф ҳаво, бегубор ҳаво, ҳаво мусаффо*. Кўп маъноли сўзлар бирдан ортиқ маъносида ўзаро синоним бўлиши мумкин. *Алоҳида, айрим* сўзлари кўп маъноли, шулардан уч маъносида синоним: 1. 'Ўзига

мустакил, бошқалардан холи' маъносида: *Алоҳида хона ажратмоқ*. ...*атрофи айрим-айрим эшикли хоналар билан ўралган ҳовлига кирди* (Ойбек). 2. 'Бошқалардан фарқли, ўзига хос' маъноси билан: *Паст гўзаларга алоҳида эътибор берилмоқда* (Газетадан). Унга *айрим эътибор қилиши, шубҳасиз, яхши* (А. Қаҳхор). 3. 'Бошқаларга қўшмай, ўзини мустакил ҳолда' маъноси билан: *Бу ҳақда алоҳида тўхтатамиз. Бу масалани айрим ҳал қиласмиз* (П. Турсун).

Синонимларнинг семантик таркибида, номловчи маънодан ташқари, ифода семаси (коннотатив белги) ҳам бўлиши айтилди. Бундай белгилар синонимик гурух аъзосининг ҳар бирида ўзига хос, бошқасидагидан фарқли бўлади. Ана шу фарқли белгилар синонимлардан ҳар бирининг ўзига хос, алоҳида тил бирлиги бўлишини, тilda ҳар бирининг ўз кўлланиш ўрнини белгилайди.

Синонимларнинг бир-биридан фарқли белгилари, кўлланишдаги ўзига хосликлари турлича бўлиб, уларнинг асосийлари сифатида қўйидагиларни кўрсатиш мумкин:

1. Синонимлар бир-биридан маъно ҳажмига кўра фарқланади ва бу фарқ уларнинг кўлланиш имконини, кўлланиш доирасини белгилайди. Масалан, ўзаро синонимлардан бири қўшимча семага эга бўлмаслиги, бошқаси (бошқалари) ўзига хос белгига эга бўлиши мумкин. Мисолларга эътибор берайлик. *Ёрдамлашмоқ, кўллашмоқ, қарашимоқ, боқишимоқ* сўзлари 'ёрдам қўрсатмок' маъноси билан ўзаро синоним. Булардан *ёрадамлашмоқ* сўзининг маъно ҳажми кенг, у бирон қўшимча белгига (оттенкага) эга эмас. Бу сўз моддий жиҳатдан ёки иш-харакат билан, ёки бошқа бир йўл билан ёрдам қўрсатиш, кўллаб-куватлаш маъносига эга: *пул билан ёрдамлашмоқ, ўрнидан туришга ёрдамлашмоқ, масалани ечишга ёрдамлашмоқ* ва б. Шу хусусияти билан у маънодошларига нисбатан кенг кўлланади. *Кўллашмоқ, боқишимоқ* сўзлари эса, асосан, иш-харакат билан ёрдамлашиб маъносида кўлланади, яъни маъно ҳажми *ёрдамлашмоқ* сўзиникига нисбатан тор. Шу хусусиятига кўра унинг кўлланиш доираси чегараланган. *Кўп, анча, талай, сероб, мўл* сўзлари 'сон-миқдори меъёрдан ортиқ' маъноси билан синоним. Булардан *кўп* сўзининг маъно ҳажми кенг. У миқдорнинг, соннинг ўлчами меъёрдан ортиклигини, шунингдек, иш-харакатнинг меъёрдан ортиклигини ҳам ифодалайди: *одам кўп, сув кўп, вақт кўп, кўп ишлайди* ва б. *Мўл, сероб* сўзлари эса, асосан, нарсанинг миқдоран меъёрдан ортиклигини ифодалаш учун кўлланади.

Шунга кўра кўн сўзининг қўлланиш доираси кенг, қолганларининг қўлланиши чегараланган.

2. Вакт, белги, микдор, харакат кабиларни билдирадиган синонимлар даражанинг меъёрга кўра қандайлигини ифодалашига кўра ўзаро фарқланади, яъни вакт, микдор, белги кабиларнинг даражаси меъерий ҳолатда, меъёрдан ортиқ (кучли) ёки кам (кучсиз) даражада ифодаланиши мумкин. Масалан, *аввал*, *олдин*, *илгари*, *бурун*, *қадим* синонимларидан *аввал*, *олдин* сўзлари меъерий ҳолатни (ортиқ-камликка нисбатан бефарқ ҳолатни); *илгари* сўзи нисбатан ортикроқ белгини, *бурун* сўзи яна ҳам ортикроқ вактни, *қадим* сўзи бурун сўзига нисбатан ҳам ортикроқ вактни (белгини) ифодалайди. Кўч, *қувват*, *мадор*, *мажсол*, *дармон* синонимларидан *мадор*, *мажсол* сўзлари, асосан, кучкуватнинг меъёрдан паст ҳолатини ифодалашда қўлланади. Демак, синонимлар белгининг қандай даражасини ифодалашига кўра ҳам бир-биридан фарқланади. Бу нарса синонимларнинг қўлланиш даражасига ҳам таъсир этади, яъни даражанинг меъерий ҳолатини ифодалайдиган синонимлар (масалан *куч*, *қувват* сўзлари) даражанинг фарқли ҳолатини (кучли ёки кучсиз ҳолатини) ифодалайдиган синонимларга нисбатан кенг қўлланади.

3. Синонимик гурух аъзолари эмоционал бўёкли ёки эмоционал бўёқсиз бўлиши мумкин. Эмоционал бўёкли сўзлар салбий ёки ижобий бўёкли бўлиши (салбий ёки ижобий муносабатни ифодалаши) мумкин. Масалан, *бои*, *калла* синонимларидан *бои* эмоционал бўёқсиз, *калла* сўзи кўпроқ салбий эмоционал бўёқ билан қўлланади. *Юз*, *бет*, *афт*, *башара*, *чехра*, *жасиол* синонимларидан *юз*, *бет* сўзлари эмоционал бўёқсиз, *афт*, *башара* сўзлари салбий эмоционал бўёкли ва ҳоказо. Эмоционал бўёқсиз синонимлар эмоционал бўёкли синонимларга нисбатан кенг қўлланади.

4. Синонимлар услубга бўлган муносабатига кўра ўзаро фарқланиши, яъни услубнинг бирор турига мансуб бўлиши ёки услубга бефарқ (нейтрал) муносабатда бўлиши мумкин. Масалан, *совга*, *ҳадя*, *тортиқ*, *тұхфа*, *армугон* синонимларидан *совга* сўзи услубга бетараф, *тұхфа*, *армугон* сўзлари китобий услугуга мансуб ва бошқалар. Бундай синонимик гурух аъзоларидан услугуга бетараф бўлганлари кенг қўлланади, бошқаларининг қўлланиши эса маълум даражада чегараланган бўлади.

5. Синонимик гурух аъзоларидан бири (ёки бир-иккитаси) шева-

га мансуб бўлиши мумкин. Масалан, *қидирмоқ*, *изламоқ*, *ахтармоқ*, *истамоқ* синонимларидан *истамоқ* шевага хос (диалектал)дир.

Шу келтирилган фактларнинг ўзиданок кўриниб турибдики, синонимик гуруҳда ўзаро фарқли белгига эга бўлган лексемаларнинг ўзига хос фарқли хусусиятлари турли-тумандир. Шундай ҳоллар ҳам мавжудки, ўзаро синоним сўзларнинг бир-биридан фарқи сезиларсиз даражада бўлади. Лекин улар ҳам кўлланиш доирасининг кенглиги ёки чегараланганилиги билан фарқланади. Масалан, *боиқа*, *бўлак*, ўзга синонимларидан *боиқа* сўзи жуда кенг кўллангани ҳолда, *бўлак* сўзи нисбатан кам кўлланади. Ўзга сўзи эса бўлак сўзига нисбатан ҳам кам кўлланади.

Синонимлар бошқа сўзлар билан бирика олиши ёки бирика олмаслиги (валентлиги), маълум эркин ва турғун бирикмаларда кўлланиши ёки кўллана олмаслиги билан ҳам ўзаро фарқланади. Масалан, *таг*, *ост* сўзлари ўзаро синоним бўлгани ҳолда *таги нозик*, *тагига етмоқ*, *таг-туби билан* бирикмаларидағи *таг* сўзи ўрнида *ост* сўзини кўллаб бўлмайди. Оқ олтин (пахта) бирикмасидаги *олтин* сўзини *тилла* сўзи билан алмаштириш мумкин бўлмаганидек, қоплама тишни билдирувчи *тилла тии* бирикмасидаги *тилла* сўзи ўрнида *олтин* сўзи кўлланмайди ва ҳоказо.

Синонимик гуруҳдаги лексемалар кўриб ўтилган хусусиятлардан биттаси ёки бир нечтаси билан ўзига хосликка эга бўлиши, фаркланиши мумкин (Бу ҳол синонимик гуруҳ аъзоларининг миқдори – оз-кўплиги билан ҳам боғлик). Масалан, *яхши*, *тузук*, *дуруст*, *бинойи* (бинойидек), *жойида*, *соз*, *нозандай*, *ажабтовор*, *авло*, *қойил*, *қойилмақом* синонимик гурухидаги *дуруст*, *тузук* сўзлари *яхши* сўзига нисбатан белгини кучсиз даражада ифодалashi билан; *соз* сўзи белгини кучли даражада ифодалashi билан; *бинойи*, *бинойидек*, *ноzanдай* сўзлари аёллар нутқига хослиги билан; *қойил*, *қойилмақом* сўзлари белгини кучли даражада билан ифодалashi ва кўпроқ оддий сўзлашувда кўлланиши билан фарқланади.

Юқорида айтилганлар ва келтирилган фактлардан маълум бўладики, лексик синонимлар бир умумий белги (семема) билан бирлашсалар-да, уларнинг ҳар бири ўзига хос, фарқли белги-хусусиятга ҳам эга бўлади. Синонимлардан фойдаланишда, у ёки бунишини кўллашда улардан ҳар бирининг ўзига хос белгисини, фарқли

хусусиятини англаб етиш фикрни аник, равон, тұлалигича ифодалаш имконини беради. Демак, синонимларнинг ўзаро фарқли хусусиятлари тилнинг бойлигини, фикрни ифодалашдаги имконият даражаси-ни ҳам белгилайди. Вокеликка оид бир нарса-ходиса, белги, ҳаракат кабиларни ифодалаш учун бирдан ортиқ сўзнинг бўлиши фикр ифодасида талаб даражасидаги натижага эришиш имконини беради. Бу нарса тилдаги имконият хисобланади. Ана шунинг ўзиёқ синонимия ҳодисасининг тил амалиётида нақадар катта аҳамиятга эгалигини, тилнинг лексик системасида синонимик гурухларнинг – синонимик категорияларнинг – синонимик системаларнинг тутган ўрнини аник кўрсатади.

Синонимик гурухнинг икки ва ундан ортиқ лексемадан тузилишини кўрдик. Ҳар бир гурух, неча лексемадан таркиб топишидан қатъи назар, унда бир сўз асосий сўз хисобланади ва у *доминанта* деб юритилади. Синонимик гурухни, унинг таркибини белгилашда, таркибидаги ҳар бир лексеманинг ўзига хос белги-хусусиятини очишда шу гуруҳдаги доминантани тўғри белгилаш мухим роль ўйнайди, яъни доминантани тўғри белгилаш синонимик гурухнинг чегараларини, унинг аъзоларини тўғри, аник белгилаш имконини беради. Бу эса, айниқса, турли мақсаддаги синонимлар луғатини яратишда мухим аҳамият касб этади.

Синонимик гурухдаги доминанта ҳар жиҳатдан адабий меъёр талабига жавоб берадиган сўз хисобланади. Масалан, у эмоционал бўёқ ва услугга нисбатан бефарқ (нейтрал) бўлади, белгининг меъёрий даражасини ифодалайди ва х. к. (Булар ҳакида юқорида гапирилди). Шу хусусиятларига кўра ўз маънодошларига нисбатан кенг қўлланади.

Шуни алоҳида таъкидлаш керакки, синонимик гурух аъзоларининг ўзига хос хусусиятлари бир-бирига қиёсан эмас, балки доминантага қиёсан белгиланади. Масалан, *жуда, гоят (гоятда, бағоят), ниҳоятда (бениҳоя), аниаддий, ўтакетган, роса, тоза, хўн, бираим, чунон, бекиёс, мыслиз, обдан, чапидон, зап, кўп, ўта, уввало, ўлгудай (ўларча), қаттиқ...* сўзларининг синонимлиги фарқли белгиси тоза билан қаттиқ ёки ёмон билан кўп сўзини бир-бирига қиёслагандада эмас, балки уларнинг ҳар бири (хаммаси) гурухда доминанта хисобланувчи жуда сўзига қиёсланганда аник сезилади.

Тил тараққиёти жараённида, унинг лугат (лексик) қатламида бўлгани каби, синонимлар системаларида ҳам маълум ўзгаришлар

бўлиб туради. Бу жараён синонимлар гурухи аъзоларидан айримларининг истъемолдан чиқиши, айрим сўзларнинг тилда мавжуд бўлган бошқа сўз (сўзлар) билан маънодошлиқ касб этиши, янги синонимлар гурухларининг пайдо бўлиши каби ҳодисалар билан характерланади. Синонимлар гурухининг сўзнинг лугавий маъноси асосида шакланишини кўрдик. Демак, синонимлар системасининг тараккиёти жараёнида икки ҳодиса кузатилади, яъни ўзгариш икки сабаб билан юз беради: 1) луғавий маъноли янги сўзнинг пайдо бўлиши ёки тилда мавжуд бўлган сўзнинг янги маъно касб этиши билан янги синонимик гурух юзага келади. Масалан, ўзбек тилида *интеллигент* сўзи ўзлашуви билан у зиёли сўзининг маънодошига айланди ва зиёли – *интеллигент* жуфтлиги (синонимик гурух) юзага келди. *Овора* сўзи 'бирор мақсад йўлида, бирор нарса илинжида кезиш, тентираш ҳолатида' деган маъноси билан у *сарсон*, *саргардон* сўзлари билан бир синонимик гурухни ташкил этади: *Бу сарсон эл, бу овора эл Золимлардан олди ўчини* (Миртемир). *Муҳтожсликнинг золими қуюни Кильмас энди уни саргардон* (Ойбек).

Овора сўзининг маъноси асосида 'бирор иш-юмушни бажариш билан банд (машгул)' деган маъно юзага келди ва шу маъноси билан у *машгул*, банд синонимларининг маънодошига айланди; *машгул*, банд, *овора* синонимик гурухининг аъзосига айланди: *Ҳар ким ўз иши билан матаигул. Межмонларни кутуб олиши билан банд. Болаларни тинчитиши билан овора;* 2) тилдаги бирор сўзнинг истъемолдан чиқиши, кўп маъноли сўзнинг бирор маъносини йўқотиши билан синонимик гурух йўқолади ёки синонимик гурухнинг таркиби қисқаради. Масалан, ўзбек тилига *редактор* сўзи киритилиши билан у *муҳаррир* сўзининг маънодошига айланди ва *муҳаррир – редактор* синонимик гурухи юзага келади, *редактор* сўзи истъемолдан чиқиши билан синонимик гурух ҳам йўқ бўлди ва б. Бундай мисолларни кўплаб келтириш мумкин, лекин бунга эҳтиёж йўқ деб ўйлаймиз. Гап ана шундай ҳодисанинг мавжудлигида, бунга эса шубҳа йўқ.

Синонимлар гурухи икки ва ундан ортиқ сўзлардан таркиб тоши ва бу гурухда бир сўз ҳар қандай қўшимча белгидан, яъни коннотатив семадан холи бўлишини кўрдик. Демак, бу ҳолат синонимик гурухларни бошқа типдаги лексик-семантик гурухлардан фарқлайди ва синонимик гурухларда шундай хусусиятли сўзнинг бўлиши қонуний ҳолдир. Чунки объектив борлиқдаги нарса, белги, ҳаракат

кабиларнинг ҳар бирини номловчи сўзлардан тузилган гурухлар аъзоларининг ҳар бири айнан бир нарса, белги ёки харакатни муайян бир фарқли белги билан ифодалайдиган сўз бўлиши мумкин эмас. Аксинча, нарса, белги, харакатнинг қўшимча белги-хусусиятлардан холи бўлиши объектив ҳолат ҳисобланади ва шундай ҳолатга эга бўлган нарса, белги, харакатни ифодалайдиган сўзнинг бўлиши қонуний ҳисобланади. Шундай хусусиятли сўз синонимлар гурухида асосий сўз – доминанта ҳисобланади (Бундай сўзнинг хусусиятларини юқорида кўрдик).

Антоним лексемалар жуфтлиги (гурухи)

Антоним юн. *anti* “қарши” ва *oputa* “ном” сўзларидан иборат бўлиб, “ўзаро зид маъноли сўзлар” маъносини ифодалайди. Антонимлар бир сўз туркумига мансуб бўлади. **Антонимия** – ўзаро зид маъноли сўзларнинг семантик муносабати, шу типдаги семантик муносабат. Демак, антонимия ҳодисаси ҳам лексик парадигма ва синоним лексемалар гурухида, яъни синонимия ҳодисасида бўлгани каби, лексемаларнинг маъно муносабати асосида юз беради. Шу хусусияти билан ўзаро зид маъноли лексемалардан тузилган жуфтликлар (гурухлар) ҳам лексик системани ташкил этади. Икки асосий хусусияти (белгиси) билан эса бошқа типдаги лексик-семантик гурухлардан фарқланади: 1) икки компонентдан (лексемадан) тузилади; 2) компонентлари ўзаро зидлик муносабатида бўлади: *яҳши-ёмон, катта-кичик, тун-кун, баланд-паст, ўнг-чап, бормоқ-келмоқ, секин-тез* ва б.

Лексик парадигмалар лексемаларнинг умумий семаси, лексик синонимлар гурухи эса лексемаларнинг умумий семемаси асосида тузилишини (шаклланишини) кўрдик. Антоним жуфтликлар эса қарамакарши маъноли лексемалардан ташкил топади.

Лексик-семантик гурухлар, жумладан, лексик парадигмалар ва синонимлар гурухларида лексемаларнинг бирлашиши, бутунлик ҳосил қилишини кўрдик. Юзаки караганда, антонимларда бундай ҳодиса йўқдек, аксинча, уларда ажралиш ҳодисаси бордек туюлади. Аслида эса бундай эмас, «антоним жуфтлик» деган сўзнинг ўзиёқ бирлашиш, бутунлик ҳодисаси борлигини кўрсатади, ҳақиқатда ҳам шундай. Ана шуни исботлаш антонимларнинг, антоним жуфтликлар-

нинг моҳиятини белгилашда асосий вазифа хисобланади, худди шу масалада бир-биридан фарқли мулоҳазалар мавжуд.

Юкорида кўрдикки, антоним жуфтликнинг ҳар бир аъзоси фарқли, ўзаро зид белгига эга бўлади. Бу фарқ, ўзаро зидлик муайян асосга кўра намоён бўлади, белгиланади. Бу асос «мантикий асос» деб ҳам юритилади¹. Шундай асосни ифодаловчи сўз қайд этган тушунча *жинс* тушунчаси бўлади. Ўзаро антоним сўз билдирадиган тушунча тур тушунчалари хисобланади². Масалан, *каптта-кичик*, *кенг-тор* жуфтликларида зидланиш ҳажмга кўра, *иссиқ-совуқ* жуфтлигига ҳароратга кўра, *кўп-оз* жуфтлигига миқдорга кўра, *ширин-бемаза* жуфтлигига маза (таъм)га кўра, *кељмоқ-кетмоқ* жуфтлигига ҳаракатнинг йўналиш нуктасига кўра бўлади ва ҳоказо. Демак, 'ҳажм', 'ҳарорат', 'миқдор', 'маза', 'йўналиш нуктаси' келтирилган антоним жуфтликлар компонентларининг зидланиш асоси (мантикий асос) хисобланади. Ўзбек тишлинуослигига оид ишларда «мантикий асос» ўрнида «мантикий марказ», «оралик тушунча» бирикмалари ҳам қўлланади³. Лекин бу нарса бирикмаларнинг моҳиятини белгиловчи бирор тушунчани аник қайд эта олмайди. Шу боис улар асосида икки лексеманинг антоним ёки антоним эмаслигини тўғри белгилаш мумкин бўлавермайди. Бу ҳолни ўзбек тили антонимларига бағишланган ишларда аник кузатиш мумкин. Масалан, қариндошлиқ, туғишганлик муносабатини ифодаловчи *ака ва ука*, *она ва синги*, *айма ва хола*, *ота ва она* каби сўзлар баъзи ишларда антоним деб каралса, бошқа ишларда бунга қарши фикр билдирилади. Бу жиҳатдан Ҳ.А. Жамолхоновнинг ёз, куз, қии, баҳор сўзларининг ўзаро антоним бўлиш ёки бўлмаслиги ҳақидаги фикрлари эътиборга лойик. Муаллиф бу сўзлардан ёз ва қии, баҳор ва куз сўзларининг антонимлигини айтиб, бунга асос сифатида куз билан баҳор ўргасида қиши борлиги, қиши билан ёз ўргасида баҳор борлигини кўрсатади. Куз билан қиши ўргасида оралик тушунча (мантикий марказ) йўқлиги боис улар (куз ва қии сўзлари) антоним бўла олмаслиги айтилади⁴. Лекин фактлардан маълум бўляптики, «оралик тушунча» бирикмаси антонимия билан боғлиқ бирор моҳиятни қайд этолмайди. Шу боис «оралик тушунча» асосида иш кўриш антонимия

¹ Лингвистический энциклопедический словарь. -С. 39.

² Шу лугат, шу бет.

³ Жамолхонов Ҳ. А. Юкорида кўрсатилган асар, 38-б.

⁴ Жамолхонов Ҳ. А. Шу иш, 38-39-б.

ҳодисасини – антоним бўлиш ёки бўлолмасликни тўғри белгилаш имконини бермайди. Масалан, куз билан баҳор ўртасида киш борлиги учун куз ва баҳор сўзлари ўзаро антоним бўлади дейиш мумкин эмас. Бу тўрт сўздан фақат ёз ва қиши сўзлари ўзаро антоним, қолганлари, яъни куз ва баҳор, баҳор ва ёз, ёз ва куз, куз ва қиши сўзлари ўзаро антоним бўла олмайди. Чунки куз, қиши, баҳор: қиши, баҳор, ёз; баҳор, ёз, куз сўзлари орасидаги сўзлар мантикий марказни, оралиқ тушунчани билдирамайди. Шунинг учун ҳам бу уч сўз гурухланмайди, бутунлик ҳосил қилмайди. Демак, «оралиқ тушунча», «мантикий марказ» бирикмалари антонимия ҳодисасини белгиловчи бирор моҳиятни қайд эта олмайди. Шу боис бу «терминлар» антонимия ҳодисасини белгилашда нотўғри хуносаларга келиш учун хизмат қиласди, холос.

«Мантикий асос» бирикмасининг моҳияти ҳам анчагина мавхум. Чунки, юқорида кўрганимиздек, оз ва кўп, катта ва кичик сўзларининг антонимлиги меъёрга нисбатан белгиланади (асос 'меъёр' ҳисобланади); келмоқ ва кетмоқ сўзларининг антонимлиги ҳаракатнинг йўналиш нуктасига (ўрнига) кўра белгиланади, яъни 'меъёр' ва 'ҳаракатнинг йўналиш нуктаси' асос тушунча ҳисобланади, оз ва кўп; катта ва кичик; келмоқ ва кетмоқ сўзларининг маънога кўра зидланиши асос ҳисобланади. Ёз ва қиши, кечка ва кундуз, эрта ва кеч сўзларининг ўзаро зидланиши эса бошқача моҳиятга эга. Бу сўзлар бутуннинг икки қисмини билдиради. Демак, бундай антонимларда бутун ва қисм муносабати мавжуд: йилнинг маънога кўра зид бўлган икки қисмини ёз ва қиши сўзлари; сутканинг ўзаро зид қисмларини кечка ва кундуз сўзлари; куннинг зидланувчи икки қисмини эрта ва кеч сўзлари билдиради ва улар антоним жуфтликлар ҳосил қиласди ва ҳоказо. Биргина қиши ва ёз сўзларининг Қиши ўлдирма ёз ўлдир; Ёз ёпинчигингни қўйма, қиши – ўзинг биласан (Макол); Фузулий, икки оламда муҳаббат ошиноси бўл, Муҳаббатсиз кишининг кўнгли қиши, асло у ёз ўлмас (Фузулий) гапларидаги маъно муносабатига эътибор беринг.

Маълум бўлдики, антоним жуфтликлар ҳосил қилувчи сўзлар муайян нарса, белги, ҳаракат кабиларнинг ўзаро зидланувчи икки қисмини номлайди. Нимани номлашига кўра икки сўзнинг зидланиш асоси ҳам фарқли бўлади. Шу боис зидланиш асосини «оралиқ тушунча», «мантикий марказ» терминлари, ҳатто «мантикий асос» термини ҳам аник қайд эта олмайди. Шундай экан, «асос» тушунча-

сины сақлаган ҳолда, унинг моҳиятини, нимадан иборатлиги, антоним жуфтликлар аъзоларининг қайси туркумга мансублиги, нимани билдириши ва шу каби хусусиятлари билан боғлиқ ҳолда ёритиш мақсадга мувофиқ бўлади. Бунда яна бир эътиборга лойик фактга мурожаат килиш мумкин, яъни антоним жуфтликдаги ҳар бир сўзнинг изоҳида ўзаро зид бўлган сема ва зидланишдаги асосни қайд этувчи сўз катнашади: *Камта* – ҳажми, ўлчами мёърдан ортиқ. *Кичик* – ҳажми, ўлчами мёърдан кам. Зидланувчи сема – 'ортиқ' ва 'кам'; зидланиш асоси – 'мёър'. *Келимоқ* – юриш, учиш ёки бошқа йўл билан сўзловчи мавжуд бўлган жойга етмоқ, шу жойда хозир бўлмоқ. *Кетмоқ* – юриш, учиш ёки бошқа йўл билан сўзловчи мавжуд бўлган жойдан, маскандан бошқа томонга йўл олмоқ. Зидланувчи сема – 'сўзловчи томон' ва унга 'қарама-карши томон'; зидланиш асоси – сўзловчи мавжуд бўлган 'ўрин'. *Ёз* – йилнинг иссиқлиги ва бошқа белгилари билан қишига зидланадиган қисми; йилнинг ярми. *Қилин* – йилнинг совуклиги ва бошқа белгилари билан ёзга зидланадиган қисми: йилнинг ярми. Зидланувчи сема – ёз ва қишига хос белгилар; зидланиш асоси – 'йил'. Демак, антонимларнинг изоҳида ва уларни белгилашда ўзаро зид белги (белгилар) билан зидланиш асосини аниқлаш мухимдир.

Үзаро зид маънога эга бўлган икки лексема антоним жуфтлик ҳосил килишини кўрдик. Антонимларни белгилашда ана шу икки нарса, яъни икки қисм (лексема)дан тузилиш ва қисмларнинг зид муносабатда бўлиши доим эътиборда тутилиши керак. Шу асосда иш кўрилса, үзаро кетма-кетлик муносабатида бўладиган бирдан ортиқ лексемалардан антонимия юзага келмаслиги жуда аник бўлиб қолади. Мисол сифатида *ака* ва *ука*, *опа* ва *сингил* жуфтликларини келтириш мумкин. Бу жуфтликлар ёшга кўра фарқланади, фарқни билдиради. Шунингдек, *ака* ва *сингил*, *опа* ва *ука* жуфтликлари ёш ва жинсга кўра фарқланади. Лекин уларни антоним жуфтлик ҳисоблаш мумкин эмас. Чунки улар ёш ва жинсга кўра бутунлик ҳосил қилаётгани йўқ, балки 'бир ота-она фарзанди' белгиси билан бутунлик (гурух) ҳосил қилади. Демак, улар моҳиятан антоним жуфтликлардан тубдан фарқланади. Қолаверса, *ака* ва *ука*, *опа* ва *сингил*, *опа* ва *ука*, *ака* ва *сингил* каби муносабатда унинг компонентларидан бири ёки ҳар иккиси бирдан ортиқ бўлиши мумкин: *ака-укалар* (ака ёки ука ёки ҳар иккиси бирдан ортиқ бўлиши мумкин), *опа-сингиллар* (бунда ҳам бири ёки ҳар

иккиси бирдан ортиқ бўлиши мумкин) ва б. Мана бу факт уларнинг антоним жуфтликдан бошқа ҳодиса эканини жуда очик кўрсатади.

Юқорида ёз, қилинч, баҳор, куз сўзларида факат ёз ва қилинч сўзлари ўзаро антоним бўлиши, қолганлари антоним жуфтлик ҳосил қила олмаслиги ва бунинг сабаби ҳам маълум даражада айтилди. Лекин асосий сабаб бу сўзларнинг ўзаро кетма-кетлик муносабатидаги фаслларни билдиришидир. Фасл номлари сифатида бу сўзлар, ҳатто ёз билан қилинч сўзлари ҳам антоним бўла олмайди. Чунки улар ҳам ўзаро кетма-кетликда юзага келадиган фасллардан бири, ўзаро зидланмайдиган фасллардан бирини билдиради. Шунингдек, кетма-кетлик муносабатини қайд этувчи кечак, бўгун, эртага сўзлари (жумладан, кечак ва эртага сўзлари) антоним жуфтлик ҳосил қилмайди.

Антонимия икки сўзнинг маъноси (семемаси)даги ўзаро зидлик асосида юз берар экан, умуман, икки сўзнинг зидланиши (антонимлиги) ҳақида гапириш учнчалик тўғри бўлмайди. Айниска, буни кўп маъноли сўзлар мисолида аник кўриш мумкин. Кўп маъноли сўзлар барча маъноларида эмас, муайян маъноси (маънолари) билан ўзаро зидланиши – антоним бўлиши мумкин. Масалан, кўп ва кам сўзлари кўп маъноли. Нарсанинг меъёрдан (нисбатан) ортиқ ёки озлигини билдиришига кўра улар антоним: *Кўп ўйла, кам сўйла* (Мақол). Лекин кам сўзи ундан нимаси кам гапидаги маъноси билан кўп сўзига, кўп сўзи *Кўп яхши одам, Кўп пушаймон* бўлди гапларидаги маъноси билан кам сўзига антоним бўла олмайди ва ҳоказо. Бу факт ҳам сўз (лексема) ларнинг ҳар қандай турдаги гурухланиши – категория, система ҳосил қилиши семантик асосда юз беришини яна бир бор тасдиқлайди.

Антонимия ҳодисаси ҳақида гап борар экан, яна бир мухим масалага, яъни антонимиядаги зидланиш ҳодисаси билан тасдиқ ва инкор ҳодисасининг ўзаро муносабати масаласига тўхтаб ўтиш шарт бўлади.

Тил фактларининг кўрсатишича, зидланиш икки тил бирлиги ўртасида мавжуд бўлади (Буни юқорида кўрдик). Бунда ўзаро зидланувчи ҳар бир бирлик ўз ифода ва мазмун жиҳатига эга бўлади, маъносига кўра ўзаро зидланади. Бу ҳодисани икки тил бирлигидан бирининг иккинчиси маъносини инкор этиши деб тушунмаслик керак. Ўзаро зидланиш билан бири иккинчисини инкор этиш бошқа-бошқа ҳодисалардир. Ана шунга етарли эътибор бермаслик тил ҳодисаларининг моҳиятини белгилашда турли чалкашликлар-

га, хатоликларга олиб келади. Ўзбек тилшунослигига от туркумига хос сон категорияси мавжудлиги, у бирлик ва кўплик шакли асосида шакланиши; феъл туркумига хос бўлишли-бўлишсизлик категорияси мавжудлиги ва у инкор ва тасдиқ шаклларидан ташкил топиши тан олинган. Бироқ ўзбек тили фактлари ҳақиқий ҳолат тамомила бошқача эканлигини кўрсатади. Ўзбек тилида отнинг факат кўплик шакли мавжуд ва у -лар морфемаси билан ясалади: *болалар, китоблар, дараҳтлар...* Лекин предметнинг бирлигини билдирувчи морфема йўқ, бирлик сон шакли ҳақида гапириш ҳам мумкин эмас. Шунингдек, феъл туркуми харакатнинг инкорини билдирувчи шакл(лар) га эга: *кўрмадим, кўрган эмасман, кўрганим* йўқ каби. Лекин феълнинг бўлишли шаклини ясовчи морфема, умуман, тасдик маъносини билдирувчи феъл шакли ўзбек тилида йўқ¹. Шундай экан, ўзбек тилида отнинг сон категорияси, феълнинг бўлишли-бўлишсизлик категорияси борлиги ҳақида гапириш ҳам асосли бўлмайди.

Бу фактларни келтиришдан мақсад шу эдики, антонимида лексик-семантик гурухни (категорияни, системани) ташкил этувчи икки тил бирлиги – икки лексема мавжуд бўлади. Иккинчидан, бу икки тил бирлигидан ҳар бири иккincinnisinинг маъносини инкор этувчи бўлмайди, балки зидликни қайд этади. Масалан, *катта-кичик* жуфтлигига *катта* лексемаси кичикликни ва, аксинча, *кичик* лексемаси катталикни инкор этмайди, яъни *катта-кичик* деганда, 'катта эмас' ёки 'кичик эмас' деган маъно ифодаланмайди. Шунингдек, *бормоқ-келиоқ* жуфтлигига унинг компонентларидан бири иккincinnisinинг маъносини инкор этмайди, яъни *бормоқ* феъли келиш харакатини, *келиоқ* феъли бориш харакатини инкор этмайди. Аксинча, *катта-кичик* жуфтлигига ҳажмнинг (меъёрга нисбатан) зидлиги, *бормоқ-келиоқ* жуфтлигига харакат йўналишининг зидлиги ифодаланади. Антонимик жуфтлик ҳосил қилувчи лексемаларнинг ҳар бири (алоҳида холда) инкор билдирувчи восита билан қўлланганда, зидлик эмас, инкор маъноси ифодаланади ва бунда антонимик муносабат бўлмайди – антонимия ходисаси юз бермайди. Масалан, *катта эмас* (*кичик эмас*), *бормади* (*келимади*) шаклларида факат инкор

¹Бу ҳакда маҳсус маколаларимизда фикр билдирилган: Ҳожиев А. Ўзбек тилшунослигининг долзарб муаммолари (8-макола) / Ўзбек тили ва адабиёти, 2007. 5-сон. 26-33-б.: Ўзбек тилшунослигининг долзарб муаммолари (11-макола) / Ўзбек тили ва адабиёти, 2008. 2-сон, 27-30-б.

ифодаланади, лекин зидланиш, антонимия ҳодисаси йўқ. Хуллас, ўзаро зидланиш билан тасдиқ-инкор тамомила бошқа-бошқа ҳодисалардир.

Антонимия ҳодисаси тадқиқ этилганда, яна бир ҳодиса ҳақида аниқ фикр билдириб ўтишга тўғри келади. Бу ўзаро зидликнинг тўлиқ ва нотўлиқ бўлиши масаласидир.

Антоним жуфтликни ҳосил қилувчи лексемаларнинг қўлланишида икки ҳолат қузатилади: 1) жуфтликни ҳосил қилувчи ҳар бир лексема иккинчисининг маъносига зид, қарама-карши маънони билдиради, аниқроқ қилиб айтганда, антоним сўзлардан ҳар бирининг маъноси (семемаси) таркибида бир-бирига зидланувчи, зидликни ифодаловчи сема мавжуд бўлади, ана шу семалар ўзаро зидликни – антонимия ҳодисасини юзага келтиради. Масалан, *тун-кун, келмоқ-кетмоқ* жуфтликларида бу ҳол аниқ қузатилади. Бундай зидланиш “тўлиқ зидланиш”, “тўлиқ антонимлар” (“тўлиқ антонимия”) деб ҳам юритилади ва бунга эътиroz бўлиши мумкин эмас. Бундай жуфтликлардаги бир лексеманинг қўлланиши билан унга зид маъноли бўлган жуфти ёдга кела-ди, масалан, *тез-секин, ширин-бемаза, орқа-олд* жуфтликларига эъти-бор беринг; 2) иккинчи ҳолатда антоним сўзларнинг бири қўлланганда, иккинчисига бутунлай зид маъно ифодаланмаслиги мумкин. Масалан, *ёши ва кекса* ўзаро зид маънога эга. Шу билан бирга, *ёши* сўзи, умуман, ‘кари эмас’ деган маънони ҳам билдиради. Яъни у ‘кари’ (‘кекса’)нинг зиддини эмас, умуман, кексаликни инкор этади – ёш билан кексалик оралигидаги ҳолат ифодаланади. Ана шу ҳодиса адабиётларда «нотўлиқ зидланиш», «нотўлиқ антонимия» деб ҳам юритилади¹. Лекин қўриб ўтилган ҳар икки ҳолатни антонимия ҳодисаси, антонимиянинг икки тури деб хисоблаш мумкин эмас. Чунки, биринчидан, юкорида айт-тилганидек, зидланиш (зидлик) билан инкор тамомила бошқа-бошқа ҳодисалардир. Иккинчидан, «нотўлиқлик» («оралиқ ҳолат») бирон-бир тил бирлигининг моҳиятини акс эттира олмайди.

Қарама-карши маъноли икки сўз билан антоним жуфтликнинг фарқи ёзувда бирининг вергул ёки боғловчи билан ажратилиши, иккинчисининг дефис оркали ёзилиши билан жуда аниқ ифодаланади: *дўст ва душиман* (*дўст, душиман*), *дўст-душиман...*

Хуллас, лексик парадигмалар, синонимлар гурухи ва антоним жуфтликларнинг ҳар бири умумий (бирлаштирувчи) ва фарқловчи белги асо-сида гурухланади ҳамда лексик сатхнинг кичик бир системасини ташкил

¹Лингвистический энциклопедический словарь. -С. 36.

этади. Бу системаларнинг, яъни лексик парадигма, синонимлар гурухи ва антоним жуфтликларнинг ҳар бири шаклланишидаги ўзига хосликлар билан бир-биридан фарқланади. Ана шу ўзига хосликларни белгилаш, ёритиш лексик системани ўрганишдаги асосий вазифалардан бири хисобланади.

Лексик парадигмалар икки ва ундан ортиқ лексемалардан тузилади. Бунда: 1) парадигма аъзолари маъносидан уларнинг барчаси учун умумий бўлган белги (тушунча) ҳам сезилиб туради ва бу лексемалар маъносининг изоҳида умумий тушунча маҳсус сўз билан ифодалана-ди. Масалан, *чиллаки, чарос, ҳусайн, шивитони* парадигмаси аъзоларининг ҳар бирида 'узум' тушунчаси сезилиб туради ва бу лексемалар маъносининг изоҳида узум сўзи умумий белгини ифодаловчи сўз бўлиб катнашади; 2) умумий (бирлаштирувчи) белги ва фарқли белгилар алоҳида сўзлар билан ифодаланади: *от: айғир:байтал* парадигмасида *от* бирлаштирувчи семага, *айғир, байтал* сўзлари фарқли семага эга; 3) *ота ва она; амина ва хола; келин* ва куёв кабиларда нисбатланиш бошқа сўз (сўзлар) орқали воқеланади.

Синонимлар гурухи умумий семема ва коннотатив семага эга бўлган лексемалардан тузилади. Бундай гурухларда унинг бир аъзоси коннотатив белгидан холи бўлади ва у асосий сўз – доминанта деб юритилади.

Антоним жуфтликлар икки сўздан таркиб топади ва ундаги ҳар бир сўз муайян асосга кўра қарама-қарши (зид) маънони билдиради ҳамда шу белгилар асосида жуфтликни хосил қиласи.

УЧИНЧИ ҚИСМ

СҮЗ ЯСАЛИШИ СИСТЕМАСИ. ТИЛ БИРЛИГИ – ЯСАМА СҮЗ

Ўзбек тили сўз ясалишининг ўрганилиши

Ўзбек тили сўз ясалиши системасининг назарий масалалари-ни тадқик этишга ўтишдан олдин, умуман сўз ясалиши тарихи, бу жараённинг ўзига хос белгилари билан бир-биридан фарқланувчи босқичларини ажратиш, ҳар бир босқичда эришилган ютуклар, йўл қўйилган камчиликлар ва уларнинг сабабларини аниқлаш билан мазкур масала бўйича навбатдаги вазифаларни белгилаш, кун тартибига қўйиш имкони туғилади. Шу боис ўзбек тили сўз ясалишининг ўрганилиш тарихига қисқача тўхтаб ўтишни лозим топдик.

Ўзбек тили сўз ясалишининг ўрганилиш тарихини кузатишдан маълум бўляптики, бу тарихни икки асосий босқичга ажратиш мумкин: 1) сўз ясалишини тилшуносликнинг морфология бўлимида ўрганилиши босқичи; 2) тилшуносликнинг алоҳида бўлими сифатида ажратилиши ва ўрганилиши босқичи. Бу босқични ўз навбатида, икки босқичга ажратиш мумкин: а) тилни система сифатида ўрганишгача бўлган босқич; б) сўз ясалишини система сифатида ўрганишга ўтиш босқичи – ҳозирги босқич.

Сўз ясалишининг морфология бўлимида ўрганилиши босқичи. Бунинг асосий сабаби, бизнингча, ясама сўз ва сўз шаклининг аффикс, кўшимча билан ҳосил қилинишидир. Бу эса сўз ясалиши ва сўз шаклининг қандай тил берлиги деб тушунилиши билан боғлик, албатта. Бу босқичда сўз ясалиши ва ясама сўз билан боғлик қўпгина тушунчалар хақида умуман ёки етарли маълумот (тасаввур) бўлмаган. Масалан, 'ясама сўзининг таркиби', 'сўз ясалиш асоси', 'сўз ясовчи' тушунчалари шулар жумласидандир.

Сўз ясалишининг тилшуносликнинг алоҳида бўлими сифатида ажратилиши ва ўрганилиши босқичи. Бу босқич XX асрнинг иккинчи яримларидан ўзбек тилини система сифатида ўрганишга жид-

дий эътибор қаратилгунгача бўлган даврни ўз ичига олади. Бу босқич юкорида кўрилган босқичдан қуйидаги асосий хусусиятлари, ижобий натижалари билан фаркландади: 1) сўз ясалишининг ўзбек тилшунослигининг мустақил бўлими сифатида ажратилиши, тан олиниши билан; 2) сўз ясалишига хос асосий тушунчаларнинг, улардан ҳар бирининг мохияти белгиланиши билан. Масалан, ясама сўзнинг таркиби, сўз ясалиш асоси ва сўз ясовчи, сўз ясалиш маъноси, сўз ясалиш имконияти каби тушунчалар ва ҳар бирининг мохияти ҳақидаги фикрмуроҳазалар шулар жумласидандир; 3) сўз ясалиши билан боғлиқ кўпгина ҳодисаларнинг мохияти ҳақида янгича қарашлар юзага келиши билан. Масалан, узоқ вақтлардан бери сўз ясалишининг бир неча усули борлиги тан олиб келинган бўлса, аслида, унинг биргина усули – аффиксация усули мавжудлиги исботланди ва бошқалар. Сўз ясалишининг тилшуносликнинг алоҳида бўлими сифатида ажратилиши, алоҳида бўлим сифатида ўрганилиши билан ана шундай ютуқларга эришиш имкониятлари юзага келди, десак муболага бўлмайди. Булар ҳақида ўзбек тили сўз ясалишига бағишланган ишларда, жумладан, бизнинг илмий мақолаларимиз ва маҳсус рисоламиизда кенг маълумот берилгани боис уларни такрорлашни лозим топмаймиз. Факат алоҳида таъкидлаймизки, бу босқичда ўзбек тили сўз ясалиши бўйича жуда катта ютуқларга эришилган бўлса-да, лекин бирор ишда, жумладан, бизнинг маҳсус ишларимизда ҳам, сўз ясалиши морфологиядан ажратилиб, мустақил бўлим деб қаралгани билан ўзбек тилшунослигининг «Сўз ясалиши» деб аташ мумкин бўлган бўлими ва уни шакллантирувчи тил бирлиги борлиги исботлангани, бу бирликнинг мохияти ёритилгани йўқ (Буларнинг сабаблари бор эди, албатта. Улар ҳақида кейинроқ тўхталамиз).

Ўзбек тилини система сифатида ўрганишга жиддий эътибор қаратилишидан ҳозиргача бўлган босқич. XX асрнинг охирлари га келиб ўзбек тилини система сифатида ўрганишга алоҳида эътибор қаратилгандиги ва шундай ўрганишга жиддий киришилгандиги, бу эса ўз ижобий натижаларини берётганлиги маълум. Шунингдек, ўзбек тилини система сифатида ўрганиш билан эришилаётган ижобий натижалар бошка муҳим муаммоларни ҳам белгилашга ва ҳал этишга ижобий таъсирини кўрсатяпти. Шу боис ўзбек тилшунослиги тараққиётининг бу даврини алоҳида босқич сифатида ажратиш хато бўлмаса керак, деб ўйлаймиз. Зоро, тил системадан ибо-

рат экан, тилшунослик фани тил системаларини ўрганиши табиий – бошқача бўлиши мумкин эмас. Масалан, лексикологияда ҳар бир сўз туркумига мансуб сўзларнинг лексик-семантик гурухлари, морфологияда сўз шаклларининг категориялари (морфологик категориилар) ўрганилган. Булар тилнинг шу сатҳларига хос системалардир. Шу вақтгача тил сатҳларининг шундай системалари ўрганиб келинди. Лекин бу босқичларда тил системаларининг моҳияти, системани шакллантирувчи тил бирликлари ва ҳар бирининг моҳияти, бу тил бирликлари билан системаларнинг шаклланишида юз берадиган ҳодисаларнинг моҳияти каби назарий масалаларга деярли эътибор берилгани йўқ. Тилшунослигимизнинг ҳозирги босқичи, бошқа муаммолар билан бир қаторда, тил сатҳлари, уларнинг системаланиши билан боғлиқ энг муҳим назарий масалаларни ҳал этиш билан жиддий шуғулланаётганлиги, бу ҳаракатлар ўз ижобий натижаларини бераётганлиги билан характерланади.

Ўзбек тили сўз ясалишининг ўрганилиш тарихига кисқача тўхталар эканмиз, бир нарсани алоҳида таъкидлашни лозим топамиз. Умумтилшуносликда тилни система сифатида ўрганиш анча илгаридан бошланган бўлиб, бу борада эътиборга лойик натижаларга эришилган. Ана шундай ишларнинг, эришилган натижаларнинг таъсирида ўзбек тилшунослигида ҳам ўзбек тилини система сифатида ўрганишга жиддий эътибор қаратила бошланди ва бу масала юзасидан муайян ишлар ҳам юзага кела бошлади. Бироқ ўзбек тилини система сифатида ўрганишда умумтилшуносликда эришилган ютуклардан самарали, тўла ва тўғри фойдаланилди дея олмаймиз. Бу ҳол, айниқса, ўзбек тили сўз ясалиши системалари билан боғлиқ ҳодисаларнинг ёритилишида якқол кўзга ташланади¹.

Сўз ясалиши системаси

Тилнинг ҳар бир сатҳи, системаси шу сатҳ, шу системани шакллантирувчи тил бирлигига эга бўлади. Бундан сўз ясалиши системаси ҳам мустасно эмас. Шу боис тилнинг ҳар бир системасининг тадқики шу системани шакллантирувчи тил бирлигини белгилашдан бошланади – бу ҳам маълум факт. Бироқ ўзбек тили сўз ясалиши система-

¹ Булар ҳакида ишимизнинг лексик системаға бағишлиланган қисмида ҳамда «Ўзбек тили сўз ясалиши тизими» номли ишимизда (Тошкент: 2007) фикр билдирилган.

сини тадқиқ этишда ана шу асосий, мухим ва маълум фактга эътибор берилмади, яъни ўзбек тили сўз ясалиши тизими ва унинг тил бирлиги – шакллантирувчиси борми, деган масала ўртага қўйилгани ва бу хақда аниқ бир фикр билдирилгани йўқ. Бунинг сабаблари бор, албатта. Бизнингча, бунинг асосий сабаби сўз ясалиши системаси тил бирлигининг, яъни ясама сўзнинг бошқа системалар тил бирлигига нисбатан мураккаб моҳиятга эгалиги ҳамда тил системаларининг шаклланиши масаласида тўғри тасаввурга эга бўлмасликдадир. Лекин сўз ясалиши системасини шакллантирувчи тил бирлигининг моҳияти қай даражада мураккаб бўлмасин, бу тил бирлигини ва унинг моҳиятини аниқ белгиламай туриб, сўз ясалиши ва ясама сўзлар билан боғлик тил ҳодисаларининг моҳиятини тўғри ёритиш мумкин бўлмайди.

Ўзбек тилини система сифатида ўрганишга багишланган баъзи ишларда системани шакллантирувчи тил бирликларини белгилаш ва уларнинг моҳиятини талқин этишда бутунлай нотўғри асосда иш кўрилди ҳамда жиддий хатоликларга йўл қўйилди. Масалан, лексема ва сўз масаласидаги қарашлар бунга мисол бўла олади. Натижада лексема лисоний бирлик, сўз эса нутқ бирлиги, деган хulosса чиқарилди. Бундай нотўғри хulosса, ўз навбатида, янги-янги хатоликларнинг юзага келишига сабаб бўлди, сабаб бўляптики, уларни бартараф этишнинг ўзи ҳам мухим ва долзарб муаммоларга айланяпти¹. Ана шундай нохуш ҳолат ясама сўз масаласида ҳам юзага келди, ясама сўзнинг лисоний ёки нутқий бирлик экани ҳакида фикр билдирилган ишларда унинг нутқ бирлиги бўлиши таъкидланди – жиддий хатога йўл қўйилди. Ҳатто ясама сўз бирор тил системасининг тил бирлиги деб қаралмади. Сўз ясалиш системасининг тил бирлиги сифатида «қолип» («сўз ясалиш қолипи») тушунилди². Бу ҳам сўз ясалиши билан боғлик бўлган ҳодисаларнинг моҳияти масаласида ўзига хос хатоликларнинг юз беришига олиб келди. Хайриятки, бундай қарашларнинг хато, нотўғри эканлиги шу масалага багишланган ишларда ўз вақтида ис-

¹ Булар ҳакида маҳсус маколамиизда ва ишнинг лексик системага багишланган кисмида фикр билдирилган: Ҳожиев А. Ясама сўз лисоний бирликми ёки нутқ бирлигими? / Ўзбек тили ва адабиёти, 2004. 1-сон. 49-52- б.

² Бу қарашнинг нотўғрилиги ҳам маҳсус маколамиизда исботланган: Ҳожиев А. Ўзбек тилшунослигининг долзарб муаммолари (2-макола) / Ўзбек тили ва адабиёти, 2006. 3-сон, 30-36-б.

ботланди¹. Шу боис уларни такрорлаб ўтиrmай, ясама сўзнинг қайси системанинг тил бирлиги бўлиши ва унинг хусусиятлари ҳақида ўз мулоҳазаларимизни билдириш билан чекланамиз.

Ясама сўз – лисоний бирлик

Ясама сўзнинг лисоний бирлик экани шу мавзуда фикр юритилган ишларда, жумладан, бизнинг юқорида кўрилган ишларимизда етарли далиллар билан исботланган. Шунинг учун бу ўринда ясама сўзнинг тилнинг қайси системасини шакллантирувчи тил бирлиги бўлиши ҳақида ўз мулоҳазаларимизни билдириш билан чекланамиз.

Ясама сўзнинг моҳияти бошқа системалар тил бирлигининг моҳиятига нисбатан мураккаблиги ва бу мураккаблик унинг ясалма бирлик бўлиши билан bogлиqligi юқорида айтилди. Ҳакикатда ҳам шундай.

Ўзбек тилини система сифатида ўрганишга багишланган ишларда ясама сўз нутқ бирлиги деб каралганини кўрдик. Ана шу нутқни назарнинг ўзиёқ ясама сўзнинг моҳияти – тилнинг қайси системасини шакллантириши ва бошқа энг муҳим масалаларнинг моҳияти ҳақида тўғри хуносаларга келишга йўл қўймас эди. Чунки ясама сўзни нутқ бирлиги деб тан олишнинг ўзиёқ унинг синтактик бирлик эканини тан олишга мажбур этади. Ваҳдолонки, ясама сўзни шундай система тил бирлиги хисоблаш учун ҳеч қандай асос йўқ.

Хуллас, тилни система сифатида ўрганиш даъво қилинган ишларда, жумладан, лексик системани, ўзбек тили сўз ясалишини ўрганишга багишланган ишларда сўз ясалиши, ясама сўз ва унинг амалиёти билан bogliq ҳодисалар – сўз ясалиш системаси билан bogliq ҳодисаларнинг моҳияти, ҳатто ўзбек тилида сўз ясалиши системаси бор-йўқлиги масаласи ҳал этилмаганича қолаверди.

Проф. Ш. Раҳматуллаев сўз ясаш ҳодисаси тили «лексема ясаш» деб ҳам атайди, демак, ясама сўзнинг лексема бўлишини эътироф этади. Бирок муаллифнинг тил қурилишининг асосий бирликларига багишланган рисоласида ясама сўзнинг тил қурилиши бирлиги бўлиш-бўлмаслиги ҳақида ҳеч гап йўқ. Шунингдек, ишнинг тилшунослик соҳалари берилган жадвалида «сўз ясалиши» соҳаси келтирилмаган, лекин бунинг сабаби ҳақида ҳам бирор гап йўқ².

¹ Юқорида келтирилган ишларимизга каранг.

² Раҳматуллаев Ш. Тилқурилишининг асосий бирликлари. Тошкент: Университет, 2002.

Юқорида ясама сўзнинг мураккаб моҳиятли бирлик экани айтилди. Бунда унинг лугавий маъноли сўз, яъни лексема экани ва ясалма бирлика хос моҳияти назарда тутилади. Худди шундай моҳияти асосида ясама сўз тилнинг икки системасига мансуб, икки системани шакллантирувчи тил бирлиги бўлади: 1) лугат системасининг (лексик системанинг) тил бирлиги; 2) сўз ясалиши системасининг тил бирлиги.

Ясалма бирлик (лексик бирлик) сифатида ясама сўз жуда мураккаб моҳиятга эга тил бирлигидир. Унинг таркибий қисмларига хос хусусиятларни, уларнинг ўзаро бирикувидан ҳосил бўлган ясама сўзга хос хусусиятларни тўла ва тўғри белгиламай туриб, ясама сўзлар асосида сўз ясалиши системаларининг шаклланиши билан боғлиқ ҳодисаларнинг моҳиятини тўғри англаш ва ёритиш мумкин бўлмайди. Шу боис ўзбек тили сўз ясалиши билан боғлиқ масалаларга ўтишдан олдин, умуман, сўз ясалиши, ясама сўз билан боғлиқ ҳодисаларнинг моҳияти хақида ўз мулоҳазаларимизни билдиришни лозим топамиз.

Ясама сўз – лексик системанинг тил бирлиги

Сўз ясовчи морфемалар билан ҳосил қилинган ясама сўзлар лугавий маъноли тил бирлиги бўлиши билан туб ёки ўзи ясалган сўзлардан фарқланмайди. Масалан, *иши*, *ишила*, *ишилиз* сўзларининг ҳар бири лугавий маъноли сўз (лексема). Бу моҳияти билан уларнинг учаласи лексик системанинг тил бирлиги, лексик системани шакллантирувчи бирликлар ҳисобланади. Худди шу хусусияти туфайли изоҳли, икки тилли ва бошқа типдаги лугатларда ясама сўзлар ҳам берилади. Худди туб сўзлар каби ясама сўзларнинг маъноси ҳам изоҳланади. Худди туб сўзлардаги каби ясама сўзларнинг семеси (маъноси) ҳам семалардан ташкил топди. Ясама сўзлар ҳам, худди туб сўзлар каби, муайян сўз туркумига мансуб бўлади ва ҳоказо.

Хуллас, ясама сўзнинг лугавий маъноли бирлик сифатида лексик системанинг тил бирлиги бўлишини, лексик системани шакллантирувчи тил бирлиги эканини инкор этиб бўлмайди. Лекин бунда бир нарсани доим эътиборда тутиш лозим бўлади, яъни ясама сўз туб ёки ясама сўз билан муайян лугавий маъно асосида, бир лугавий маънога эга бўлган сўзларнинг умумий семеси асосида лексик-семантик гурух – кичик бир системани ташкил этади. Масалан, *иичи*, *дечқон*,

муаллим, галлакор сўзлари бир умумий сема – ‘шахс’ семаси билан бир лексик-семантик гурӯхни – системани ташкил этади. Бу сема *деҳқон, муаллим* сўзларининг семеси таркибида мавжуд бўлса, *иичи, галлакор* сўзларининг сўз ясовчи компонентида (-чи, -кор морфемаларида) мавжуд бўлади. Лексик-семантик гурӯҳдаги ҳар бир сўзнинг маъноси туб сўзларда умумий ва фарқли семалар асосида; ясама сўзларда эса сўз ясалиш асоси ва сўз ясовчи морфемага хос семалар асосида шаклланади. Сўз ясалиши системасининг тил бирлиги, унинг моҳиятида, бу тил бирлиги билан тил системасининг шакллашида тамомила фарқли хусусиятлар, фарқли ҳодисалар кузатилади (Бу ҳақда кейинрок тўхталашибиз).

“Ясалма бирлик” ҳақида. Ишнинг морфемаларга бағишланган биринчи қисмида морфеманинг ясовчи бирлик экани, сўз ёки сўз шаклини ясамиш айтилди. Шунинг ўзиёқ ясалма бирликнинг нимадандир ҳосил қилинишига, ясалиш асоси борлигига ишора қиласиди. Ана шу “нарса” – сўздир.

Ишнинг лексик система таҳлилига бағишланган иккинчи қисмида сўз тил бирлиги сифатида икки муҳим белгига, яъни лугавий маъно ва туркумлик маъносига эгалиги айтилди. Ана шу икки хусусияти билан у моҳиятан бир-биридан фарқли бўлган икки турдаги ясалма бирликларнинг ҳосил бўлишида асос бирлик (ясалиш асоси) вазифасини баҷаради – шундай вазифали тил бирлиги хисобланади. Бу тил бирлигининг сўзнинг қандай белгисига эга бўлишига кўра ясалма бирликнинг икки тури – ясама сўз ёки сўз шакли ҳосил бўлади, яъни сўзнинг лугавий маъноси асосида ясалган тил бирлиги ясама сўз, туркумлик маъноси асосида ясалган тил бирлиги сўз шакли (морфологик бирлик) бўлади. Ясалма бирликнинг ясалиш асоси хисобланувчи бирлик шу моҳияти билан сўз ясовчи бирликка зидланади. Масалан, *ишила, иини* сўзларининг бирида *иии* сўзи сўз ясалиш асоси, иккинчисида эса шакл ясалиш асоси мақомидадир. -ла, -ни аффикслари ясовчи бирлик – биринчиси сўз ясовчи, иккинчиси шакл ясовчи бирлик хисобланади.

Морфемалар мустақил тил бирлиги бўлмаганидек, ясалма бирликнинг иккинчи қисми ҳам мустақил бирлик хисобланмайди. Ясалма бирликлар сўз ясалиши ва морфологик системанинг тил бирликлариридир.

Ясама сўзнинг таркиби¹. Ҳар бир ясама сўз икки таркибий қисмдан, яъни сўз ясалиш асоси ва сўз ясовчидан ташкил топади: *иичан*<*ии+чан*, *иичи*<*ии+чи*, *иила*<*ии+ла* каби. Ясама сўзнинг маъноси ва бошқа хусусиятлари унинг таркибий қисмлари маъноси, шу қисмларга хос хусусиятлар асосида юзага келади. Шунинг учун ҳам сўз ясалиши ва ясама сўз билан боғлиқ ҳодисаларнинг моҳиятини ёритишда сўз ясалиш асоси ҳамда сўз ясовчи бирликка хос хусусиятларни тўгри, аниқ белгилаш мухим аҳамият касб этади, шу мақсадга эришиш билан ясама сўз асосида сўз ясалиши системасининг шаклланиши билан боғлиқ ҳодисаларнинг, демакки, сўз ясалиши системасининг моҳиятини тўла ва тўгри белгилаш имкони тугилади.

Сўз ясалиш асоси. Бу термин ўзбек тилшунослигида нисбатан кейинги вактларда юзага келди. Унгача ясама сўзнинг бу қисмига нисбатан сўз термини қўлланар эди. Ясама сўзнинг бу қисмини «сўз ясалиш асоси» деб аташ, яъни шу сўз бирикмасининг термин сифатида истеъмолга киритилиши тушунчанинг моҳиятини тўла ва тўғри англаш имконини берди. Бу эса, умуман, ясама сўзнинг моҳиятини тўғри аниқлашга ёрдам беради. Бироқ ўзбек тилшунослигида сўз ясалишига бағишланган ишларда бунга, яъни сўз ясалиш асоси ва унинг моҳияти масаласига ҳозирда ҳам жиддий эътибор берилаётгани йўқ. Аникрок қилиб айтганда, сўз ясалиш асосига нисбатан ҳам сўз, лексема терминлари бефарқ қўлланиб келмоқда. Масалан, *иичан* ясама сўзининг қисмини «сўз» («ясама сўз»), «лексема» деб, *иичан* ясама сўзининг *ии* қисмини «сўз» («туб сўз»), «лексема» деб юритиш ҳозир ҳам давом этмоқда. Бу эса сўз ясалиши ва ясама сўз билан боғлиқ ҳодисаларнинг моҳиятини ёритишда ўзига хос салбий натижаларини беряпти, албатта.

Сўз ясалиш асосининг моҳиятини белгилашда қуйидаги икки нарсага асосланиш керак бўлади: 1) ясама сўз умуман сўз (лексема)дан эмас, балки унинг муайян маъноси асосида ясалади. Масалан, *ҳаракатчан* сўзи *ҳаракат* сўзининг бир маъноси асосида -чан сўз ясовчи морфемаси ёрдамида ясалади. Ана шу маъно *ҳаракатчан* ясама сўзи маъносининг юзага келишида асос маъно ҳисобланади.

¹ Сўз ясалишига оид асосий тушунчалар ҳакида юкорида келтирилган «Ўзбек тили сўз ясалиши тизими» номли ишимиизда ҳам маълумот берилгани учун уларни тақрорлаб ўтирамаймиз. Факатгина сўз ясалиши системасининг шаклланишида амал киладиган тушунчалар, уларни билдирувчи терминлар ҳакида фикр билдириш билан чекланамиз.

Бу ясама сўз таркибида *ҳаракат* сўзи ва унинг маъноси шундай хусусиятга (мохиятга) эга экан, бу сўзниң ўзи ва унинг маъноси ҳам мустақил маъно хисобланмайди. Бу эса *ҳаракатчан* ясама сўзи таркибида «ҳаракат»ни мустақил бирлик, яъни сўз (от) хисоблашга йўл қўймайди. Демак, *ҳаракатчан* ясама сўзи таркибидаги «ҳаракат»ни сўз ясалиш асоси дейиш – шундай термин билан юритиш, биринчидан, унинг мустақил бирлик эмаслигини аниқ қайд этса, иккинчидан, *сўз ясалиш асоси* термини ясама сўзниң таркибий қисми эканини аниқ қайд этади. Бу билан *ҳаракатчан* ясама сўзининг мохиятини тўгри англаш, талқин этиш осонлашади. Сўз ясалиш асоси ясама сўзда ясама сўз, ҳаттоқи қўшма сўздан бўлиши мумкин. Лекин улар ҳам ясама сўз таркибида мустақил бирлик хисобланмайди, чунки ҳар қандай ясама сўзда сўз ясалиш асоси битта бўлади. Масалан, *терими-чи* сўзининг сўз ясалиш асоси – *терим*, *белбогли* ясама сўзининг сўз ясалиш асоси – *белбог*. Шу икки фактнинг ўзиёқ сўз (мустақил сўз), лексема ва сўз *ясалиш асоси* бир-биридан фарқли тушунчаларни билдиришини, бири ўрнида иккинчисини бефарқ қўллайвериш мумкин эмаслигини – бири лексик системанинг тил бирлиги эканини, иккинчиси (сўз ясалиш асоси) тилнинг бирор системасини шакллантирувчи бирлик эмаслигини аниқ тасдиқлади.

Сўз ясалиш асоси ҳақидаги гапни якунлар эканмиз, сўзниң лугавий маъноли бирлик сифатида сўз ясалишида, лугавий системанинг тил бирлигини ҳосил қилишда қатнашиши ҳамда сўз ясалиши системасининг тил бирлиги хисобланувчи ясама сўзниң таркибий қисми (сўз ясалиш асоси) вазифасини бажариши билан нақадар муҳим мохиятга, вазифага эга бўлган тил бирлиги эканини алоҳида таъкидлашни лозим топамиз. Бу вазифаларда сўз нутқ бирлиги хисобланмайди. Чунки сўз ясалиши ҳодисаси ва бунда қатнашувчи тил бирликларининг нутққа алоқаси йўқ – улар “нутққача” бўлган ҳодисалар, нутққача мавжуд тил бирликларидир. Демак, «лексема – лисоний бирлик, сўз – нутқ бирлиги», «лексема намоён бўлиши билан сўзга айланади» деган гаплар бирон-бир тил бирлигининг, бирон-бир тил ҳодисасининг мохиятини қайд эта олмайдиган қуруқ гаплардир.

Юқорида айтилганлардан яна шу нарса аниқ бўлдики, ясама сўз лексемадан эмас, сўздан ясалади (Чунки лексема сўздан фарқли, ўзича мустақил тил бирлиги эмаслиги боис сўз ясалиш асосида қўлланиши мумкин эмас). “Феълдан от ясалиши”, “отдан сифат ясалиши” би-

рикмаларидаги *февът, от, сифат* сўзлари ўрнида лексема сўзини кўллаш мумкин эмаслиги ҳам шу фикрни ҳамда ясалма бирлик ҳам сўз бўлишини аниқ тасдиқлади.

Сўз ясовчи. Ҳар қандай ясама сўз икки таркибий қисмдан – сўз ясалиш асоси ва сўз ясовчидан иборат бўлишини кўрдик. Ясама сўзнинг таркибий қисми сифатида сўз ясовчи ҳам сўз ясалиш асосига хос баъзи умумий хусусиятларга эга бўлади. Биринчидан, сўз ясалиш асоси каби, сўз ясовчи ҳам ясама сўзда битта бўлади: *терии< тер+и, теримчи< терим+чи* каби. Иккинчидан, сўз ясовчи бирлик аффикс (кўшимча) ёки сўз кўринишида бўлиши мумкин: *иичи, иихона, камдаромад* каби. Булар умуман ясовчи бирлик бўлиши билан морфем сатҳга (морфемикага) мансуб тил бирлиги ҳисобланади. Лекин, ясама сўзнинг таркибий қисми бўлган сўз ясалиш асосига нисбатан сўз терминини кўллаш асосли бўлмаганидек, сўз ясовчини «морфема» деб юритиш ҳам мақбул бўлмайди. Шунинг учун тилшуносликнинг сўз ясалиши бўлимида сўз ёки морфеманинг моҳияти эмас, балки, ясама сўзнинг таркибий қисми сифатида, ‘сўз ясалиш асоси’ ва ‘сўз ясовчи’ тил бирлиларининг моҳияти ўрганилади. Лекин улар мустақил тил бирлиги эмас, мустақил тил бирлигининг – ясама сўзнинг қисмлари ҳисобланади.

Ўзбек тилида сўз ясалиш асоси ва сўз ясовчидан таркиб топмаган, қандайдир бошқа йўл билан хосил бўлган сўзлар ҳам бор. Масалан, “кўшма сўз” деб юритилаётган белбоғ, опиқулоқ, бодомқовоқ каби сўзлар, устқурма каби калькалаш йўли билан хосил қилинган сўзлар шулар жумласидандир. Бундай сўзлар ясама сўз (сўз ясаш йўли билан хосил қилинган сўз) ҳисобланмайди. Шунинг учун ҳам ясама сўзларга хос моҳиятга эга бўлмайди ва ясама сўзлар каби гурухланиш, система хосил килиш хусусиятига ҳам эга эмас. Бинобарин, улар сўз ясалишининг, сўз ясалиши системасининг объектига кирмайди¹.

Ясама сўзнинг маъноси сўз ясалиш асоси ва сўз ясовчининг маъноси асосида юзага келиши, бунда сўз ясалиш асоси муайян бир луғавий маъноси билан қатнашиши айтилди. Сўз ясовчи эса мустақил тил бирлиги ҳисобланмайдиган ва мустақил маънога эга бўлмайдиган тил бирликлари – морфемалардан бўлади. Демак, ясама сўзнинг таркибидаги сўз ясалиш асоси сўз ясалишида муайян бир маъноси би-

¹ Булар хакида юкорида келтирилган «Ўзбек тили сўз ясалиши тизими» номли ишимиизда фикр билдирилган.

лан қатнашса, сўз ясовчи умумий маъно билан қатнашади. Шу хусусиятларига кўра, биринчидан, ҳар қандай ясама сўз таркибида сўз ясалиш асоси вазифасида муайян сўз қатнашса, сўз ясовчи бирдан ортиқ сўзлар ясади. Иккинчидан, сўз ясовчининг маъноси сўз ясалиш асосининг маъноси негизида воқеланади. Масалан, *гулламоқ*, *куртакламоқ*, *текисламоқ*, *тахиниламоқ* ясама феълларининг сўз ясалиш асоси алоҳида сўзлардан бўлса, сўз ясовчи -ла аффикси уларнинг барчасидан ва бошқа сўзлардан ҳам феъл ясади. Учинчидан, муайянлик, умумийлик хусусиятига эга бўлишидан катъи назар, ҳар бир ясама сўз таркибида сўз ясалиш асоси ҳам, сўз ясовчи ҳам бир маъноси билан қатнашади. Тўргинчидан, сўз ясалиш асоси вазифасида қўлланган сўз, лексик бирлик ҳолатида, кўп маъноли бўлиши мумкин. Лекин сўз ясовчи, мофема сифатида ҳам, кўп маънога эга бўлмайди (Булар ҳақида кейинроқ яна тўхталамиз).

Сўз ясалиши, ясама сўз, унинг таркибий қисмларининг моҳияти ҳақида айтилганлар сўз ясалиши системасининг тил бирлиги, яъни ясама сўзлар шаклланишида юзага келадиган ҳодисаларнинг моҳиятини белгилашда мухим аҳамият касб этади. Бинобарин, сўз ясалиш системасини тадқиқ этишда шу айтилганларни эътиборда тутган ҳолда иш кўриш ижобий натижаларга эришиш имконини беради.

Ясама сўз – сўз ясалиши системасининг тил бирлиги

Ясама сўз ясалма бирлик сифатида сўз (лексема)дан фаркли моҳиятга эга бўлади, шу моҳияти билан алоҳида тил бирлиги бўлади. У алоҳида тил бирлиги экан, муайян системанинг тил бирлиги (муайян системани шакллантирувчи бирлик) ҳисобланади. Бу эса ўзбек тилида ясама сўзлар асосида шаклланадиган системалар борлигига ишора қиласди. Демак, асосий масала ўзбек тилида ясама сўзлар асосида шаклланадиган системалар борлигини исботлаш ва бу системаларнинг шаклланиши билан боғлиқ тил ҳодисаларининг моҳиятини ёритишдан иборатдир. Афсуски, ўзбек тилшунослигида ана шу вазифа бажарилгани, асосий масала ҳал этилгани йўқ. Бунинг асосий сабабини ўзбек тилшунослигида ясама сўз, сўз ясалиши ҳодисаси бўйича килинган ишлар, эришилган ютукларимизнинг савия даражаси ҳамда бу борадаги муаммоларнинг ниҳоятда мураккаблиги билан ‘изоҳлаш мумкин.

Ишимизнинг лексик системага багишланган қисмида лексемалар лугавий маъноси, семемаси таркибидаги умумий семаси асосида бирлашиб, лексик-семантик гурухни, яъни кичик бир лексик системани ташкил этишини, бир оз юкорида эса ясама сўзлар ҳам лугавий бирлик сифатида шундай лексик-семантик гурухларда қатнашиши, лексик-семантик гурухнинг таркибий қисми бўлишини кўрдик. Сўз ясалиши системасининг шаклланишида эса икки муҳим ўзига хослик кузатилади: 1. Энг кичик сўз ясалиши гурухи (системаси) факат ясама сўзлардан ташкил топади. 2. Бундай гурухлар ҳам муайян лугавий маъно асосида ташкил топади. Лекин бу маъно лугавий маънодан бутунлай фарқли моҳиятга эга бўлади ва у умумтилшуносликка оид адабиётларда “сўз ясалиш маъноси” деб ҳам юритилади. Шу маънони аник белгилаш, тўғри англаш сўз ясалиши системасининг шаклланиши билан boglik ҳодисаларнинг моҳиятини тўғри ёритишга имкон яратади. Аникроқ қилиб айтганда, ана шу маънонинг моҳиятини аник белгиламай, у ҳақда аник тасаввурга эга бўлмай туриб, сўз ясалиши системаси билан boglik ҳодисаларнинг моҳиятини ҳам, ҳар бир системанинг моҳиятини ҳам тўғри белгилаш мумкин бўлмайди.

Шу ўринда ўзбек тилшунослигида сўз ясалиши билан boglik ҳодисалар учун кўлланаётган баъзи терминлар ҳакида ўз мулоҳазаларимизни билдириб ўтишни лозим топдик. Чунки тил ҳодисаларининг моҳиятини тўғри англаш ва талқин этишда ҳар бир ҳодисанинг моҳиятини тўғри, аник қайд эта оладиган терминни белгилаш муҳим аҳамият касб этади (Бу ҳақда юкорида айтилди). Шу жиҳатдан ёндашилганда, сўз ясалишига оид баъзи терминларнинг талабга жавоб бермаслиги ёки нотўғри кўлланиш ҳолатлари кузатилади. Ҳар икки ҳолатнинг сўз ясалишига оид масалаларни ёритишда, тадқиқ этишда ўзига хос салбий натижаларга олиб келиши шубҳасиз. Куйидаги терминлар шундай терминлар жумласига киради: *сўз ясалиши маъноси; категориал маъно; сўз ясалиши категорияси; сўз ясалиши типи; сўз ясалиши парадигмаси.*

Сўз ясалиши маъноси термини

Бу терминнинг кўлланишида бир-биридан фарқли икки ҳолат кузатилади: 1) сўз ясалишига оид тайинли бир тушунчани қайд эта

олмаслиги – шундай «термин» сифатида кўлланиши; 2) бир-биридан фарқли ҳодисаларнинг атамаси сифатида кўлланиши.

1. Ш. Ў. Мирзакуловнинг номзодлик диссертациясидаги фактлар биринчи ҳолатга мисол бўла олади. Диссертациянинг «Ўзбек тилида сўз ясалиши маъноси ва парадигмаси» деб номланишидан у худди шу масалага бағишлилангандек туюлади. Бироқ ишда на сўз ясалиши маъноси, на сўз ясалиши парадигмаси тўғри ёритилганини, тўғри талқин этилганини кўрамиз. Эътибор беринг: «Сўз ясалиш маъно типи бошқа сатҳларга хос маъно типлари билан боғлиқ бўлса-да, маълум белгилари билан улардан фарқланиб туради. Бу маъно категорияларо маъноларнинг синтезлашуви тарзида чиқувчи интегратив маъно характерида бўлиб, турли сўз туркумлари ва сўз гурухлари орасидаги маъноларнинг чатишувидан пайдо бўлади»¹. Бу жумлалар сўз ясалиши маъносинигина эмас, умуман, тилдаги бирор ҳодисанинг моҳиятини қайд эта олмайди. Аниқроқ килиб айтганда, ўзбек тилида бу жумлаларда айтилган гапларни тасдиқлайдиган тил бирлиги ёки тил ҳодисасининг ўзи йўқ. Куйидаги жумлалар эса диссертантнинг сўз ясалиши маъносининг моҳияти ҳакида аниқ тасаввурга эга эмаслигини, тилда бошқа моҳиятга эга бўлган ҳодисаларни сўз ясалиши маъноси деб тушунишини янада очик кўрсатади: «Ташқи ва ички ясалиш билан бөглиқ маъноларда айрим фарқлар ҳам кўзга ташланади. Ташқи ясалишда, масалан, феълдан от ясалганда, ясама сўз маъносида албатта предметлик маъноси устун туради ва аксинча. Ички ясалишда эса ҳосила (янги) сўзнинг лексик-семантик маъносида ўзгариш бўлади: бир лексик-семантик майдонга оид сўз бошқа лексик-семантик майдон ихтиёрига ўтади, мухими, ясама сўзнинг семантик структурасида кейинги майдонга хос белгилар асосий семантик бирлик тусини олади, имтиёзга эга бўлади»². Биринчидан, ташқи ва ички ясалишда ҳам янги луғавий маъноли ясама сўз ҳосил бўлади, яъни ҳар икки ясалишда ҳам лексик маъно юзага келади. Иккинчидан, сўз туркумини «семантик майдон» деб талқин этиш ўта қўпол, ҳеч бир ишда учрамайдиган хато. Ана шу фактларнинг ўзиёқ диссертантнинг сўз ясалиши маъноси ҳакида умуман тасаввурга эга эмасли-

¹Мирзакулов Ш. Ў. Ўзбек тилида сўз ясалиши маъноси ва парадигмаси. Филол.фн. номз. дисс... автореф.: Самарқанд: 1995. 16-17-б.

²Шу автореферат, шу бетлар.

гини аниқ кўрсатади (Шу боис диссертантнинг бу масаладаги бошқа нотўғри карашларини келтириб ўтирумаймиз).

2. Бу терминнинг бир-биридан фарқли икки тушунчани ифодалаш учун кўлланиши: 1) “ясама сўзларнинг маъноси” учун, яъни шу тушунчани ифодалаш учун; 2) “ясама сўзларни гурухловчи маъно” учун.

Бу терминнинг (“сўз ясалиши маъноси” терминининг) ясама сўзнинг лексик маъносини ифодалаш учун кўлланиши хато бўлмаслигини кўрдик. Унинг “ясама сўзларни гурухловчи маъно” учун қўлланиши баъзи ишларда кузатилади. Биз ҳам «сўз ясалиши маъноси» терминидан фойдаланганмиз. Лекин бизнинг ишларимизда бу термин “ясама сўзнинг маъноси” (лексик маъноси) тушунчасини билдириш учун қўлланмаган, аксинча, бу тушунчадан фарқли тушунчани ифодалаш учун, шу талаб билан қўлланган. Демак, бу термин сўз ясалишида мавжуд бўлган ҳодисани “ясама сўзнинг маъноси” тушунчасидан фарқлаш талаби билан қўлланган. Лекин кейинги кутишиларимиздан маълум бўляптиki, у сўз ясалиши билан boglik муҳим бир ҳодисанинг, аниқроғи, ўзбек тили сўз ясалишига оид ишларда келтирилмаган ҳодисанинг моҳиятини қайд эта олмас экан. Ана шу ҳодисанинг моҳияти ҳақида, унга нисбатан кўлланиши мумкин ва мақбул бўлган термин ҳақида ўз фикр-мулоҳазаларимизни билдиришга ҳаракат қиласиз.

Юқорида айтилдики, муайян ясама сўзнинг маъноси унинг таркибий кисмлари, яъни сўз ясалиш асоси ва сўз ясовчининг маъноси асосида шаклланади, вокеланади. Шунинг учун ҳам ясама сўзнинг маъноси сўз ясалиш асоси ҳамда сўз ясовчининг маъноси билан изохланади: *Боксчи* – ‘бокс билан шуғулланувчи шахс’, ‘асосий касби бокс (тушиш) бўлган шахс’. Бундай сўз (лексема)ларнинг қандай гурухланишини – система ҳосил қилишини кўрдик, яъни бунда фарқловчи семаларга эга бўлган лексемалар умумий семаси асосида гурухланади. Бирдан ортиқ ясама сўзларнинг гурухланиши эса бутунлай бошқа моҳиятга эга.

Юзаки қараганда, *боксчи*, *хоккейчи*, *футболчи*, ... сўзлари сўз ясовчи бирлик – -чи аффиксининг маъноси асосида гурухланаётгандек туюлади. Бундай гурухланиш ҳам бор, яъни -чи аффикси билан ясалган ясама сўзларнинг барчаси шахс отлари ҳисобланади. Лекин сўз ясовчининг маъноси асосида гурухланиш ясама сўзларнинг система-

сини шакллантиrmайди. Аниқроқ килиб айтганда, ясама сўзларнинг гурухланиши, система ҳосил қилиши ясовчи бирликнинг маъноси асосида юз бермайди.

Дикқат билан қаралса, бу ясама сўзларнинг гурухланиши ҳар бир ясама сўздаги сўз ясалиш асосига хос хусусийлик ва сўз ясовчига хос умумийлик белгиси асосида юз бераётгани йўқ, балки сўз ясалиш асосларига хос умумий белги (маъно) асосида -чи аффиксига хос ‘шахс’ белгиси (‘шахс’ маъноси) асосида юз беряпти. Аниқрок қилиб айтганда, бу ясама сўзлар гурухида ҳар бир ясама сўзларнинг ясалиш асоси (бокс, хоккей, футбол..), умуман олганда, спортнинг бир турини билдиради – бу улардаги умумийлик. Демак, ясама сўзлар улар таркибидағи ҳар бир ясама сўз асосига (сўз ясалиш асосига) хос маъно билан эмас, балки сўз ясалиш асослари учун умумий бўлган белги (маъно) асосида гурухланади. Шунинг учун ҳам ясама сўзлар гурухининг маъноси изоҳланмайди, балки сўз ясалиш асосларига хос умумий маъно ҳамда сўз ясовчининг маъноси билан таърифланади. Масалан, келтирилган боксчи, хоккейчи, футболчи, шахматчи ясама сўзлар гурухининг таърифи: “Сўз ясалиш асосларига хос умумий маъно+‘шахс’ маъноси” (сўз ясовчининг маъноси)дан юзага келади. Демак, “сўз ясалиш асосларига хос умумий маъно” биримаси сўз ясалиш асосларига хос умумийликни қайд этади. Бу умумийлик эса “спортнинг тури” маъносидир, яъни гурухдаги ҳар бир сўз спортнинг турини билдиради. Бундан яна шу нарса маълум бўляптики, бундай ясама сўзлар гурухидаги ҳар бир сўз “спортнинг тури” маъноси билан ҳам ўзаро бирлашади, гурухланади ва бир лексик-семантик гурухни ташкил этади – лексик системани шакллантиради. Бошқа сўз туркумiga мансуб ясама сўзларнинг гурухланиши ҳам худди шу тарзда юз беради. Масалан, *аррала*, *рандала*, *эговла*, *дазмолла* ясама феъллар гурухи “сўз ясалиш асослари билдирган нарса билан бажариладиган ишни қилмоқ, бажармоқ” маъносига эга. Сўз ясалиш асосларига хос умумийлик шуки, улар, умуман олганда, ‘асбоб’ маъносини (иш қуролини) билдиради. Шу умумийлик белгиси билан *арра*, *ранда*, *эгов*, *дазмол* бир лексик-семантик гурухни – лексик системани ташкил этади. Бу гурухдаги ҳар бир сўздан -ла аффикси ёрдамида феъл ясалиши билан умумий маънога кўра бирлашувчи ясама сўзлар гурухи юзага келади. Демак, гурухланиш сўз ясалиш асосларига хос умумий маъно – ‘асбоб’ (“иш қуроли”) маъноси ҳамда -ла аффиксига хос маъ-

но – ‘килмок’ (‘бажармок’) маъноси асосида юз беради. Ана шу маъно бизнинг ишларимизда “сўз яалиш маъноси” деб таърифланадиган эди. Бирок, ходисанинг моҳиятидан маълум бўляптики, *сўз яалиши маъноси* бирикмаси бу гурухланишнинг моҳиятини аниқ қайд эта олмайди. Бизнингча, бу маънонинг терминини белгилашда унинг бирлаштириш, гурухлаш хусусиятидан келиб чиқилса, муносиб (маъқул) термин белгилаш мумкин бўлади. Шундай қилинганда, бу маънони гурухловчи маъно сўз бирикмаси тўгри ифодалайди деб ўйлаймиз ва шу бирикмани термин сифатида кўллаш мақсадга мувофик бўлади. Айнан шу сўз бирикмаси терминга қўйиладиган талабларга жавоб бера олади, ходисанинг моҳиятини аниқ қайд этади.

Маълум бўлдики, ясама сўзларнинг гурухланишида ҳам сўз яалиш асосларига хос умумий белги муҳим роль ўйнайди. Ясама сўзларнинг сўз ясовчи бирликка хос маъно асосида бирлашиши, гурухланиши бутунлай бошқа ходиса бўлиб, бундай гурухланишда сўз яалиш системасига хос моҳиятлар ўз ифодасини топмайди. Ҳар бир ясама сўзга хос моҳият ҳам, ҳар бир ясама сўзлар гурухига хос моҳият ҳам сўз яалиш асоси ва сўз ясовчи, ясама сўзлар асослари ва сўз ясовчига хос хусусиятлар, белгилар асосида юзага келади.

Сўз яалиши типни терминни

Бир гурухловчи маънога эга бўлган ясама сўзлар гурухи “сўз яалиши типи” деб юритилади. Масалан, юқорида келтирилган ясама сўзларнинг ҳар бир гурухи сўз яалиши типларидир.

Сўз яалиши типи термини ходисанинг моҳиятини аниқ белгилашда, уни сўз яалиши системаси билан боғлиқ бошқа ходисалардан фарқлашда муҳим аҳамият касб этади. Шу боис бу термин билдириладиган ходисанинг моҳиятини тўгри белгилаш ва уни факат шу ходисага нисбатан кўллаш талаб этилади. Бирок амалда шундай бўлаётгани йўқ. Бу термин сўз яалишига оид ишларда умуман тилга олинмайди. Айрим ишларда эса биз юқорида қайд этган сўз яалиши типининг моҳиятига тўгри келмайдиган ходисага, ҳатто моҳиятнан бир-биридан бутунлай фарқли бўлган тил ходисаларига нисбатан кўлланиб келмоқда. Бу сўз яалиши системаси билан боғлиқ ходисаларни тадқик этиш ва моҳиятини ёритишда факат нотўғри хulosаларга олиб келиши табиий ва амалда шундай бўляпти ҳам.

Проф. А. Гуломовнинг сўз ясалишига оид ишларида *тип* сўзи сўз ясовчи воситаларга, сўз ясаш усулига нисбатан кўлланади. Эътибор беринг: "...ўзбек тилида сўз ясашнинг воситалари ҳар хил бўлиб, уларнинг типлари ўнда кўринишларга эга..."

...сўз ясашнинг кенг кўлланадиган энг унумли, етакчи типлари аффиксал йўл ва композиция – сўз кўшиш йўлидир¹. Шу ишда "тип" маъносида модель сўзи ҳам кўлланади (21-24- бетлар). Демак, "сўз ясашнинг типи" бирикмаси сўз ясалишига оид муайян ҳодисани, ту-шунчани қайд этмаган.

Бир гурухловчи маънога эга бўлган ясама сўзлар сўз ясалишининг бир типи ҳисобланиши айтилди. Бир хил гурухловчи маънога эга бўлишининг сабаби эса бундай ясама сўзларнинг бир хил лексик-семантик гурухга оид сўзлардан бир сўз ясочи ёрдамида ҳосил қилинишидир².

Ясама сўзларни ўзаро бирлаштирувчи маъно, бир томондан, бир типга оид ясама сўзларнинг ҳаммасини уларнинг сўз ясалиши асосларидан фарқлади. Иккичи томондан, сўз ясалишининг шу типини бошқа сўз ясалиши типларидан фарқлади. Учинчи томондан, бир типга оид ҳар бир ясама сўзнинг маъноси гурухловчи маънога тенг бўлмаслигини кўрсатади.

Сўз ясалиши типининг таърифига эътибор берилса, унда *бир, бир хил (бир лексик-семантик гурух, бир категорија) маъно, бир сўз ясовчи* сўзларининг, сўз бирикмаларининг такрорланишини кўрамиз. Бу нарса мазкур ҳодиса (сўз ясалиши типи) "умумийлик" билан характерланишини кўрсатади. Умумийлик эса системага хос, системани белгиловчилардан ҳисобланади. Шунинг учун ҳам сўз ясалиши типининг ўзиёқ сўз ясалиши сатҳи ўз системасига эга лигидан дарак беради. Яна шуниси ҳам мухимки, умуман сўз ясалиши сатҳигина эмас, балки сўз ясалиши ҳодисасига эга бўлган сўз туркумларининг барчасида сўз ясалиши типлари мавжуд. Ҳар бир сўз туркуми сўз ясалишидаги сўз ясалиши типлари мажмуи шу сўз туркуми сўз ясалиши системасини ташкил этади ва "от ясалиши системаси", "феъл ясалиши системаси" каби атамалар билан юритилади.

Муайян тилнинг ўзаро алоқадаги сўз ясалиши типлари мажмуи сўз ясалиши системаси ҳисобланади. Шунинг учун ҳам сўз ясалиши

¹ Ўзбек тили грамматикаси, I т., Морфология, 22-б.

² Бу – гурухланишдаги бир кўриниш. Бошкаси ҳакида кейинрок тўхталамиз.

билин боғлиқ ҳодисалар ва уларнинг моҳияти ҳар бир ясама сўзнинг ёки ҳар бир сўз ясалишининг ўзи мисолида эмас, сўз ясалиши типи (типлари) мисолида ёритилиши керак. Шу асосда сўз ясалиш системасининг таҳлили юзага келади.

Хозирга қадар сўз ясалиши ҳар бир сўз туркуми доирасида ўрганилди ва бунда асосий эътибор шу туркумдаги сўз ясовчининг хусусиятлари – қандай сўз ясаши, унумли-унумсизлиги ва бошқа хусусиятларига қаратилди. Натижада, ўзбек тили сўз ясалиши бўйича жуда кўп ишлар килинган бўлса-да, у система сифатида талаб дара-жасида ёритилмади.

Бирдан ортиқ семантик гурух сўзларидан бир сўз ясовчи ёрдамида ясалган сўзлар сўз ясалишининг бирдан ортиқ типига мансуб бўлади, яъни бунда айнан бир сўз ясовчи бирдан ортиқ сўз ясалиши типига оид сўзлар ясади. Масалан, феъл ясовчи -ла аффикси ёрдамида ҳосил килинган зираламоқ, тузламоқ, ўғитламоқ феъллари сўз (феъл) ясалишининг бир типи; бурдаламоқ, бўлакламоқ, тилимламоқ феъллари бошқа типи ҳисобланади.

Бу ҳодиса, яъни бир сўз ясовчи ёрдамида бирдан ортиқ сўз ясалиши типига мансуб сўзларнинг ҳосил килиниши, одатда, сўз ясовчининг кўп маънолилиги (бирдан ортиқ маънога эгалиги) деб тушунтирилади. Сўз ясовчи аффиксларни "бир маъноли" ва "кўп маъноли" каби гурухларга ажратиш ва таърифлашнинг сабаби ҳам шунда. Бирок бу ҳам тўгри эмас. Чунки, масалан, -ла сўз ясовчиси юкорида кўрилган феъллардан бошқа типдаги феълларни ҳам ясади: орқаламоқ, елкаламоқ, қўлтиқламоқ, қучоқламоқ, чангалламоқ; бошиоқламоқ, кўсакламоқ, гулламоқ ва бошқалар. Лекин бу нарса мазкур аффикснинг кўп маънога эгалигини кўрсатмайди. Чунки, келтирилган икки типдаги ясама феълларнинг ўзиданок кўриш мумкинки, бу ясама сўзларнинг икки хил сўз ясалиши типига мансублиги сўз ясалиш асосларининг икки хил семантик гурухга мансублигидандир.

Сўз ясалиш асоси ва сўз ясовчининг таҳлилида айтилдики, ясама сўз сўз ясалиш асосининг маълум маъноси ёки маънолари негизида ҳосил килинади. Агар кўп маъноли сўзнинг бирдан ортиқ маъноси асосида сўз ясалса, ясама сўз ҳам кўп маъноли бўлади. Савол туғилади: бундай ясама сўзларнинг сўз ясалиши типига муносабати қандай бўлади? Бошқача айтиганда, кўп маъноли ясама сўз ҳар бир

маъноси билан сўз ясалишининг алоҳида типига (типларига) кирадими ёки бу нарса (кўп маънолилик) сўз ясалиши типига мансубликни белгиловчи омил бўла олмайдими?

Сўз ясалиши типининг таърифидан кўрдикки, уни белгиловчилардан бири ясама сўзларнинг ҳар бирига хос муайян маъно эмас, уларнинг ҳаммаси учун умумий бўлган маъно – гурухловчи маънодир. Кўп маъноли ясама сўзнинг ҳар бир маъноси эса шу сўзнинг муайян маънолариdir. Ўз-ўзидан, кўп маъноли ясама сўзнинг бирдан ортиқ сўз ясалиши типига қиришини унинг кўп маънога эгалиги белгиламайди, балки бир ёки бирдан ортиқ гурухловчи маънога эгалиги белгилайди. Масалан, кўп маъноли *оғирлашмоқ* феъли *оғир* сўзининг ‘вазн’ семаси асосида ясалган сўз сифатида шундай семали *енгил* сўзидан ясалган *енгиллашмоқ* сўзи билан бир хил гурухловчи маънога эга бўлади ва улар сўз ясалишининг бир типини ташкил этади. *Оғир* сўзининг бошқа семаси асосида ясалган *оғирлашмоқ* феъли эса *ёмонлашмоқ* феъли билан бир сўз ясалиши типини ташкил этади: *аҳвол оғирлашди*.

Хуллас, муайян бир сўз ясовчининг сўз ясалишининг бир ёки бирдан ортиқ типига мансуб сўзлар ясами асос бўлувчи сўзнинг бир маъноли ёки кўп маъноли бўлишига эмас, балки бир ёки бирдан ортиқ семантик гурухга оид сўзлардан сўз ясалишига bogлиқ. Бу нарса келтирилган *оғирлашмоқ* ва *енгиллашмоқ* сўзларида яна ҳам аник сезилади, яъни *оғир* ва *енгил* сўзлари бир-бирига зид маъноли сўзлардир. Бу зидлик ҳар икки сўзнинг ўзига хос семаси асосида воқеланди. -*лаш* ясовчиси эса бу сўзлар учун умумий бўлган сема – ‘вазн’ семаси асосида сўз (*оғирлашмоқ*, *енгиллашмоқ* сўзларини) ясади. Шунинг учун ҳам улар бир хил категориал маънога эга бўлади ва сўз ясалишининг бир типига мансуб бўлади.

Ясама сўз кўп маъноли бўлиши, лекин унинг бирор маъноси сўз ясалиши асосида эмас, балки маъно кўчиши асосида хосил бўлган бўлиши мумкин. Бу маъносида у гурухловчи маънога эга бўлмайди ва сўз ясалишининг бирор типига мансуб бўлмайди. Масалан, *ишиламоқ* феъли *ии* сўзига -*ла* қўшимчасининг қўшилувидан хосил бўлган ясама сўз сифатида шу қўшимча ёрдамида ясалган феъллар билан сўз ясалишининг бир типини ташкил этади. Лекин “топмоқ”, “кўлга киритмоқ” маъноси билан (пул *ишиламоқ*, даромад *ишиламоқ*) феъл ясалишининг бирор типини хосил қўлмайди, унинг бирор типига кир-

майди. Чунки унинг бу маъноси *шила* сўзи юзага келгандан кейин маъно кўчиши йўли билан ҳосил бўлган. Худди шунингдек, *гулламоқ* феъли ‘гул чикармок’ маъноси асосида “кўкламок” феъли билан феъл яалишининг бир типини ташкил этади, лекин маъно кўчиши асосида ҳосил бўлган “ривожланмок” “тараққий қилмоқ” маъноси билан феълнинг бирон сўз яалиши типига кирмайди.

Маълумки, ҳаётда ҳамма нарса ўзаро алоқада, боғланишда бўлади. Буни инсон фаолиятига оид нарса-ҳодисаларда ҳам кузатиш мумкин. Бу нарса-ҳодисалар умумий белги-хусусиятларига кўра энг йирик турларни, бу турларга мансуб нарса-ҳодисалар ўзаро умумий белгиларига кўра ички тур ва турчаларни ташкил этади. Ана шу ўзаро боғланишдаги тур ва турчаларга мансуб нарсаларни билдирувчи (атовчи) сўзлар ҳам ўзаро боғланишда бўлиб, маълум бир лексик-семантик гуруҳни ташкил этади. Масалан, *санъат* ва *спорт* сўзлари фаолиятнинг икки йирик соҳасини билдиради. Шу хусусияти билан бир семантик гурухга оид сўзлар хисобланади. Шу гурухга оид сўзлардан (ҳатто шу икки сўздан) -чи аффикси ёрдамида ясалган сўзлар (*санъатчи*, *спортчи*) сўз яалишининг бир типини ҳосил қиласди. Спортнинг турини билдирувчи *кураши*, *футбол*, *теннис* сўзларидан шу аффикс ёрдамида ясалган *курашичи*, *футболчи*, *теннисчи* сўзлари сўз яалишининг бир типини ташкил этади. Курашнинг турини билдирувчи *самбо*, дзюдо сўзларидан ясалган *самбочи*, дзюдочи сўзлари сўз яалишининг яна бир типини ташкил этади ва ҳоказо. Фаолиятнинг бошқа соҳаларига, жумладан, *санъат*, *кишлөк* хўжалиги соҳасига оид тушунчаларни билдирувчи сўзлар яалишида ҳам худди шундай ҳолни кузатиш мумкин.

Муайян лексик-семантик гурухларга мансуб сўзлардан ясалган сўзларнинг бир сўз яалиши типи ҳисобланиши гурухланишнинг бир кўриниши экани юқорида айтилди. Маълум бўлдики, бундай сўз яалиши типларида сўз яалиши асоси ҳам, сўз ясовчи ҳам умумий маъноси билан қатнашади. Айни бир сўз ясовчи ёрдамида ясалган ясама сўзларнинг бирдан ортиқ гурухни ташкил этишлари сўз яалиши асосларининг умумий маъноси асосида юз беради. Масалан, *аррапаламоқ*, *рандаламоқ*, эговламоқ феълларининг гурухланиши сўз яалиши асосларининг ‘асбоб’ (‘иш куроли’) умумий маъносига эгаллиги туфайли юз беради – шу маъно гурухланишга асос бўлади. Шу билан бирга, хусусий белгилар ҳам сўз яалиш асосига – *арра*, *ранда*,

Эгэв кисмларига хос бўлади. Демак, бу типдаги ясама сўзлар гуруҳида умумийлик ҳам, хусусийлик белгиси ҳам сўз ясалиш асосига тегишли бўлади. Сўз ясовчи бирлик эса бир умумий маъноси билан қатнашади, гурухларни фарқламайди. Масалан, от ясовчи -чи, феъл ясовчи -ла аффикслари шундай хусусиятга эга. Бу факт ҳам ясовчиларга (морфемаларга) нисбатан кўп маънолилик ҳақида гапириш мумкин эмаслигини яна бир бор аниқ тасдиқлайди.

Ясама сўзлар гурухланишининг иккинчи кўриниши сўз ясалиш асосларининг бир лексик-семантик гурухни ташкил этмаслиги, бир лексик-семантик гурухга мансуб бўлмаслиги билан характерланади. Масалан, *-фуруши* шахс оти ясовчиси билан ясалган *атласфуруши*, *мевафуруши*, *чойфуруши*, *гиламфуруши*, *чопонфуруши* сўзлари сўз ясалишининг бир типи хисобланади. Уларнинг сўз ясалиш асослари бир лексик-семантик гурухни, демакки, лексик системани ташкил этмайди. Бу нарса сўз ясалишининг бундай типлари сўз ясовчига хос умумий белги (умумий маъно) асосида шаклланадигандай килиб кўрсатади. Аслида эса бундай эмас. Ҳар қандай ясама сўзнинг маъноси сўз ясалиш асоси ва сўз ясовчининг маъноси асосида юзага келганидек, гарчи сўз ясалиш асослари бир лексик-семантик гурухни ташкил этмасада, уларнинг барчасида умумий белги мавжуд бўлади, ана шу умумий белги уларни бирлаштиради ва бундай сўзлардан муайян сўз ясовчи ёрдамида ясалган ясама сўзлар сўз ясалишининг муайян бир типини ташкил этади. Эътибор билан қаралса, *-фуруши* сўз ясовчиси билан ҳосил килинган ясама сўзларнинг сўз ясалиш асослари (*атлас*, *мева*, *чой*, *гилам*, *чопон*), умумий олганда, сотиладиган нарсани билдиради, *-фуруши* сўз ясовчиси сўз ясалиш асослари билдирган нарсани сотиш билан шуғулланувчи шахсни билдиради – ‘сотувчи шахс’ семасига эга бўлади.

Маълум бўляптики, лугавий маъносида умумий сема бўлмаган, шу боис бир лексик-семантик гурухни – лексик системани ташкил этмайдиган сўзлардан сўз ясалишида ҳар бир сўз ясалиш асоси (асослари) маълум бир умумий белгига эга бўлади, шу белги асосида унга сўз ясовчи бирикиши ва янги сўз ҳосил қилиши имкони туғилади. Ана шундай моҳиятга эга бўлган бирдан ортиқ ясама сўзлар ўзаро бирлашиб, сўз ясалишининг бир типини ҳосил киласи. Қизиги шундаки, бундай ясама сўзлар гурухидаги ҳар бир ясама сўзнинг сўз ясалиш асоси касб этган янги белги, масалан, келтирилган мисоллардаги сўз

яасалиш асосининг ‘сотилиш’ белгиси сўз ясовчида ҳам ўз ифодасини топади (-*фуруши* сўз ясовчисидаги ‘сотувчи’ белгисига эътибор беринг).

Демак, ҳар бир ясама сўзнинг маъноси (лугавий маъноси) сўз яасалиш асоси ва сўз ясовчига хос маъно асосида юзага келади. Яасалиш эса муайян маъно асосида юз беради. Ясама сўзлар эса бирдан ортиқ сўз яасалиш асослари учун умумий бўлган белги (маъно) ва сўз ясовчига хос сема (умумий сема) асосида гурухланади.

Хуллас, “сўз яасалиши типи” тушунчаси сўз яасалиши системасининг асосий тушунчаларидан бири бўлиб, унинг моҳиятини тўғри англаш сўз яасалиши билан боғлик кўпгина асосий ҳодисаларнинг моҳиятини белгилашга ёрдам беради. Сўз яасалиши типи ҳақида айтилганларнинг ўзиёқ сўз яасалиши системасини сўз ясовчиларни таҳлил этиш йўли билан эмас, сўз яасалиши типларини таҳлил этиш йўли билан ёритиш тўғри йўл эканлигини кўрсатади. Шундай йўл билан иш кўрилганда, биринчидан, сўз яасалишига ўхшаб қўринган, лекин сўз яасалиши ҳисобланмайдиган ҳодисалар аниқ белгиланади ва сўз яасалиши обьектига киритилмайди. Иккинчидан, шу вактгача сўз ясовчига boglab ўрганилган кўпгина ҳодисалар (масалалар) энди сўз яасалиши типлари мисолида ўрганилади. (Масалан, маҳсулли-маҳсулсизлик ҳодисаси). Натижада ҳар бир ҳодисанинг моҳиятини тўғри, тўла ва аниқ ёритиш имкони туғилади. Бу билан сўз яасалиши системасини талаб даражасида таҳлил этиш ва ёритиш мумкин бўлади.

Сўз яасалиши парадигмаси (категорияси) термини

Сўз яасалиши парадигмаси масаласига ўтишдан олдин, умуман, “парадигма” тушунчаси ҳақида қисқача фикр билдиришга тўғри келади.

Парадигма деганда, асосан, бир умумий маъносида бирлашувчи хусусий маъноли шакллар гурухи тушунилади¹. Бу гурух ва унга хос маъно тилнинг маълум сатҳига хос категория ҳисобланади. Бу категориянинг таърифи унинг моҳиятини акс эттиради. Хусусийликлар эса шу парадигмага мансуб, ўзига хос маъноли шаклларда акс этади. Масалан, феъльнинг замон категорияси ҳаракатнинг нутқ пайтига муносабатини ифодалайди. Бу – замон шаклларининг ҳаммаси учун умумий хусусият – замон категориясининг моҳияти шундан иборат. Демак,

¹Ахманова О.С., Словарь лингвистических терминов. М.: 1966. -С. 310.

замон шаклларининг ҳаммаси шу умумий хусусияти билан бир парадигмани ташкил этади. Замоннинг ҳар бир тури эса ўзича умумийлик ва хусусийликларга эга. Масалан, ўтган замон феъли ҳаракатнинг нутқ пайтигача бўлишини билдиради, бу умумийлик – ўтган замон феълининг моҳияти. Бу замоннинг шакллари ана шу умумий маъно асосида бирлашади. Ҳар бири эса ўзига хос хусусиятга эга (Бу маълум факт бўлгани учун мисоллар келтириб ўтирумаймиз). Сўз ясалиши сатҳида ҳам ана шундай ҳодиса, яъни бир умумий маъносида бирлашувчи, хусусий маъноси билан фарқланувчи ясама сўзлар гурухлари бор. “Гурухловчи маъно”, “сўз ясалиши типи”га оид таҳлилларда бу нарса ёритилди ва худди шу ҳодисалар сўз ясалиши системасини белгилаши қайд этилди. Лекин ҳаммамизга маълумки, ўзбек тилшунослигида сўз ясалиши системасини ёритишда ясама сўзлар парадигмалар асосида ўрганилмаган, тўғрироги, бунда “парадигма” ёки “категория” сўзи кўлланмаган.

Сўз ясалиши парадигмаси, сўз ясалиши категорияси масаласига келсак, бу масала Ш. Ў. Мирзақуловнинг номзодлик диссертациясидагина маҳсус ўрганилган. Муаллиф сўз ясалиши парадигмаси бўйича, жумладан, қуидагиларни ёзди: "...сўз ясалиш парадигмаси ва уни ташкил этувчиларни қуидаги тартибда кўрсатмоқчимиз.

I. Фонология, морфемика, лексикология, морфология, синтаксисга зидлик, боғлиқлик асосида бош парадигма – сўз ясалиш системаси парадигмаси.

II. Сўз ясалиш сатҳининг бош – максимал парадигмаси таркиби қуидагича бирликлардан ташкил топади: 1. Сўз ясаш усуллари парадигмаси. 2. Сўз ясалиш категорияси парадигмаси. 3. Сўз ясалиш типлари парадигмаси. 4. Конкрет типли ясалмалар парадигмаси¹".

Бевосита парадигма тушунчасининг моҳиятидан келиб чиқилганда, яъни парадигманинг адабиётлардаги “бир умумий маъно-га эга бўлган (шу асосда бирлашувчи) шакллар гурухи” таърифидан келиб чиқилса, фақатгина муаллифнинг “Сўз ясалиш категорияси парадигмаси” деб атаётган парадигманинг борлигини тан олиш мумкин. Буни ҳам муаллиф тушунган тарзда кабул килиш мумкин эмас. (Бу ҳақда бир оз кейинроқ тўхттаймиз). Ажратилган бошқа парадигмалар “парадигма” деб аташ мумкин бўлган ҳодисалар эмас. Масалан, “сўз ясалиш системаси парадигмаси” деганда нима тушунилиши, қандай

¹ Мирзакулов Ш. Ў. Кўрсатилган автореферат, 12-б.

парадигма назарда тутилишини тасаввур этиб бўлмайди. Шунингдек, "сўз ясаш усуллари парадигмаси" ҳакида ҳам гапириш мумкин эмас. Чунки, аввало, усууларнинг парадигмаси бўлмайди. Қолаверса, ўзбек тилида сўз ясалишининг аффикс ва ёрдамчи сўз (сўз-морфема) ёрдамида сўз ясалишидан бошқа усули, жумладан, муаллиф қайд этаётган "композиция усули" йўқ. Шундай экан, "сўз ясаш усули парадигмаси" ҳакида гапириш мумкин эмас. Келтирилган бошқа парадигмалар ҳам "парадигма" дейиш мумкин бўлган ҳодисалар эмас (Булар ҳакида ўз ўрнида гапирилади).

Диссертация муаллифи бир умумий маънога эга бўлган сўз ясалиш шакллари гурухи бир парадигма экани ҳақидаги фикрни тан олади. Лекин унинг парадигма билан категорияни таърифлаши, бу ҳодисаларни тушуниши аник, қатъий ва тўғри эмаслиги аён бўлади. Эътибор беринг: "Сўз ясалиши парадигмасининг мухим тушунчаларидан бири сўз ясалиши категорияси тушунчасидир... отларда шахс оти ясовчи қўшимчалар -чи (*иичи, гулчи...*), -доши (*ватандоши, юртдоши...*), -бон (*боғбон, дарвозабон...*), -паз (*оипаз, сомсатаз...*) бир категория (шахс отлари ясалиши категорияси)ни ташкил этса.."¹.

Сўз ясалиши категорияси тушунчаси сўз ясалиши парадигмасининг тушунчаларидан бири, дейиш нотўғри. Бу жумла нафақат сўз ясалиши категориясини, умуман бирон-бир ҳодисани, унинг моҳиятини билдира олмайди, чунки парадигма маълум бир категорияга оид (шу категорияники) бўлади. Масалан, от туркумига хос эгалик категориясининг шакллари мажмуи шу категориянинг парадигмаси хисобланади.

"Сўз ясалиш типлари парадигмаси" деганда муаллиф сўз ясалиш типлари асосидаги парадигмани, "сўз ясалиш типи" деганда эса маълум бир сўз ясовчи ёрдамида ясалган сўзлар гурухини тушунади. Масалан, -чи аффиксли шахс отлари ясалиши типи; -доши аффиксли шахс отлари ясалиши типи ва б.².

Биринчидан, "сўз ясалиши типи" ҳодисасини бундай тушуниш тўғри эмас. Иккинчидан, парадигмани сўз ясовчиларга қараб белгилаш юкоридагидан (сўз ясалиши категорияси парадигмасидан) фаркланмайди.

¹ Мирзакулов Ш. Ў. Кўрсатилган автореферат, 13- б.

² Мирзакулов Ш. Ў. Кўрсатилган автореферат, 13- б.

Нихоят, "конкрет типли ясалмалар парадигмаси" деганда диссертант маълум бир типдаги сўз ясалиш асосидан ҳосил қилинувчи ясалмалар парадигмасини тушунади. Масалан, ранг-тус билдирувчи сўзлар асос бўлган ясалмалар. Бизнингча, сўз ясалишининг бундай парадигмаси йўқ.

Маълум бўлдики, сўз ясалиши парадигмаси махсус таҳлил этилган ягона бу ишда (номзодлик диссертациясида) ҳам мазкур ҳодиса аник белгиланмаган, ўз-ўзидан, унинг моҳияти ҳам очилмаган.

Шуни алоҳида қайд этиш керакки, сўз ясалиши парадигмаси ва категорияси ҳакида фикр юритилган ишларнинг биронтасида, парадигманинг турлари аник белгиланмаганлигидан ташқари (буни юқорида кўрдик), сўз ясалиши категориясининг улардан биронтасининг моҳияти очиб берилмаган, яъни биронтасининг аник ва тўғри таърифи берилмаган. Масалан, Ш.Ў. Мирзакуловнинг ишида шахс оти ясовчилар бир сўз ясалиши категорияси (шахс отлари ясалиши категорияси)ни ташкил этиши айтилганини кўрдик. Лекин бу гап, шахс оти ясалишининг ўзи, от ясалиши системасининг моҳиятини акс эттира олмайди, яъни системани белгилаш учун хизмат қила олмайди. Чунки у бу ҳодисанинг бир томонини, яъни шахс оти ясовчисининг шакли (шакллари) ва маъносини акс эттиради, холос. Бунда ясама отлар таркибининг иккинчи қисми (сўз ясалиш асоси) ва унинг маъноси акс этмайди. Ўз-ўзидан, от ясалишининг бу тури ҳақидаги гап унинг категория сифатидаги таърифи бўла олмайди.

Сўз туркумларига хос морфологик категорияларнинг таърифига эътибор берилса, таъриф шу туркумга оид сўзнинг категорияси маъносини билдирувчи сўз билан бошланади, сўнгра морфологик категорияга оид шаклнинг маъноси қайд этилади. Масалан, эгалик категориясининг таърифи "предметнинг" деб, замон категориясининг таърифи "ҳаракатнинг" деб бошланади. Сўнгра эгалик ва замон шакли ясовчисининг маъноси айтилади. Масалан, ҳаракатнинг нутқ пайтига муносабатини кўрсатувчи феъл шакллари умумий ва хусусий маъноси (маънолари) билан феълнинг замон категориясига хос парадигмани ҳосил қиласди. Ана шундай умумий ва хусусий маънолар асосидаги феъл шакллари ва улар билан белгиланадиган грамматик категорияларнинг ҳар бири феъл морфологиясидаги кичик система хисобланади. Уларнинг барчаси биргаликда эса феъл морфологияси системасини белгилайди. Сўз ясалиши системасида эса бундай ҳолни

кузатмаймиз. Масалан, “шахс отлари категорияси” деганда, от ясалиши системасига хос бирор белги, хусусият акс этмайди. Чунки у сўз ясалиши таркибининг биттасига, яъни сўз ясовчига тааллуқлидир. Категорияга хос маъно, яъни системани белгиловчи маъно эса ясама сўз таркибининг ҳар икки кисми (сўз ясалиш асоси ва сўз ясовчи маъносига)дан келиб чикувчи, сўз ясалиши типини белгиловчи маънодир. Юкорида кўрдикки, сўз ясалиши системасини сўз ясалиши типлари белгилайди.

Хуллас, сўз ясалиши системасининг таҳлилида ясама сўз таркибига хос бирликларнинг (сўз ясалиш асоси ва сўз ясовчининг) моҳиятини, уларнинг бирикишидан ҳосил бўладиган ясама сўз билан боғлиқ “гурухловчи маъно”, “сўз ясалиши типи” каби тушунчаларнинг моҳиятини тўғри ва аник белгилаш мухимдир. Шунга эришилса, сўз ясалишига оид бошқа ҳодисаларнинг (масалан, маҳсулли-маҳсулсизлик, сўз ясалиш имконияти каби ҳодисаларнинг) моҳиятини ёритишга имкон туғилади ва, охир-оқибат, сўз ясалиши системасини тўғри ва тўла ёритиш мумкин бўлади.

Шундай экан, “сўз ясалиши системасини белгиловчи, яъни кичик бир сўз ясалиши системаси ҳисобланувчи ясама сўзлар гурухига нисбатан *категория*, *парадигма* сўзларини кўллаш шартми?” деган савол туғилиши табиий. Бизнингча, аникроғи, ўзбек тили материалларининг кўрсатишича, бу сўзларни термин сифатида кўллашга унчалик эҳтиёж йўқ. Чунки, юкорида айтилганлардан маълум бўляптики, сўз ясалиши системаси билан боғлиқ ҳодисаларнинг моҳиятини ёритишида ‘гурухловчи маъно’, ‘ясама сўзлар гурухи’, ‘сўз ясалиши типи’ терминлари, улар билдирадиган тушунчалар асосида иш кўришнинг ўзи кифоя қилади. Сўз ясалиши категорияси, сўз ясалиши парадигмаси каби сўз бирикмалари мазкур терминлар билдирадиган (сўз ясалиши системасига оид) тушунчаларни шу терминлардан аникроқ қайд эта олмайди ёки улардан фарқли бўлган бирон-бир тушунчани билдирамайди. Ўз-ўзидан, бу сўзларни термин сифатида кўллаш сўз ясалиши системасига оид ҳодисаларнинг, тушунчаларнинг моҳиятини тўғри белгилашга, осон англашга эмас, балки бунинг аксига, яъни масалани мураккаблаштиришга, тадқиқотчини чалғитишига хизмат қилиши мумкин. Бу эса сўз ясалиши системасини тадқиқ этишда *категория*, *парадигма* сўзларини термин сифатида кўллашга эҳтиёж йўқлигини кўрсатади.

Маҳсулли ва маҳсулсизлик термини

Ўзбек тилшунослигига бу термин сўз ясовчilarга ва сўз ясаш усулига нисбатан қўллаб келинди, яъни маҳсулли ва маҳсулсизлик сўз ясовчilarга ва сўз ясаш усулларига, ҳатто сўз ясаш моделлари, сўз ясаш колипларига хос ҳодиса деб қаралмоқда¹. Бу ҳол ҳар бир ҳодиса (тушунча)нинг моҳиятини тўғри англамаслик, моҳиятни тўғри акс этирувчи термин қўлламасликнинг оқибатидир, ҳодисанинг моҳияти тўғри белгиланмаганлигини (ёритилмаганлигини) кўрсатувчи фактдир.

Хуллас, маҳсулли-маҳсулсизлик ҳакида гап борар экан, аввалио, унинг моҳиятини ва сўз ясалишига оид қайси тушунча билан боғлиқлигини аниқ белгилаб, шу асосда иш кўриш талаб этилади. Содда қилиб айтганда, биринчидан, "маҳсулли ва маҳсулсиз" деганда қандай ҳодиса тушунилиши, иккинчидан, бу ҳодисанинг сўз ясовчiga, сўз ясаш усулига ёки сўз ясалиш моделига (қолипига) оидлиги аниқ белгиланиши ҳамда ўзи алокадор бўлган ҳодиса доирасида ўрганилиши лозим бўлади.

"Маҳсулли-маҳсулсизлик" ("унумли-унумсизлик") терминидаги *маҳсулли* (унули) сўзи "маҳсули бор" ва "сермаҳсул" ("унуми бор" ва "унумдор", "серунум") маъноларида бефарқ қўлланиб келаётгани маълум. Бизнингча, бу ўринда, биринчи навбатда, икки ҳодисани фарқлаш лозим: 1) янги сўз ясалиши ёки ясалмаслиги; 2) кам миқдорда ёки кўп миқдорда сўз ясалиши.

Биринчи ҳодисанинг моҳиятини "маҳсулли-маҳсулсизлик" термини тўғри ва аниқ акс этиради, яъни янги сўз ясалаётган (ҳосил қилинаётган) бўлса – маҳсулли (маҳсули бор), янги сўз ясалиши йўқ бўлса – маҳсулсиз (маҳсули йўқ) бўлади. Иккинчи ҳодисанинг моҳиятига эса "сермаҳсул-каммаҳсуллик" термини мос келади, яъни кам миқдорда сўз ясалса – каммаҳсул, кўп миқдорда сўз ясалса – сермаҳсул бўлади. Ана шу икки терминдан бошқасини кўллашга эхтиёж йўқ.

¹Қаранг: «Ўзбек тили грамматикаси», I т., Морфология, 21-24-бетлар. Н.еъматов Х.. Расулов Р. Ўзбек тили систем лексикологияси асослари. А.ка биррова З. Сўз ясаш колиплари. уларда унумлилик ва унумсизлик / Ўзбек тили ва адабиёти, 2001. 6-сон, 68-70-бетлар.

Шу ўринда яна бир нарсани айтиш керакки, мазкур ҳодисага нисбатан "фаол-нофаол" ("актив" ва "пассив") терминлари қўлланиши ҳам кузатилади. Лекин буни маъқуллаб бўлмайди. Чунки *фаол*, *нофаол* сўзлари қўлланиш даражасига нисбатан бўлган белгини акс эттиради, уларда маҳсул бериш-бермаслик акс этмайди. Қолаверса, айтиб ўтганимиздек, *маҳсулли-маҳсулсизлик* ва *сермаҳсул-каммаҳсуллик* терминлари ҳодисанинг моҳиятини тўғри ва аниқ акс эттиргани холда, айни бир ҳодиса учун яна бошқа терминга ҳеч қандай эҳтиёж бўлмайди.

Сўз ясаш усули ҳакида фикр юритилган ишларимизда ўзбек тили сўз ясалиши системасида фонетик, композиция каби сўз ясаш усуллари йўклиги ишонарли далиллар билан асосланган. Шундай экан, умуман, сўз ясаш усулига нисбатан "маҳсулли-маҳсулсизлик" терминини (шунингдек, "сермаҳсул-каммаҳсуллик" терминини) қўллашга эҳтиёж йўқ. Қолаверса, бирор сўз ясовчи билан кўп ёки кам микдорда сўз ясалишига караб уни маҳсулли ёки маҳсулсиз (сермаҳсул ёки каммаҳсул) деб баҳолаган билан бу нарса сўз ясалишига оид бирор тушунчанинг (ёки тушунчаларнинг), охир-окибат, сўз ясалиши системасининг моҳиятини ёритиш учун бирон нарса бермайди. Масалан, "ўзбек тилида аффиксация усули сўз ясалишининг сермаҳсул усули" дейиш билан шу усулда кўп микдорда сўз ясалиши қайд этилади. холос.

Шуни айтиш керакки, у ёки бу сўз ясовчига нисбатан бу терминни қўллаш хато бўлмайди. Чунки улар ичida маҳсулли ва маҳсулсизи ҳам, сермаҳсул ва каммаҳсули ҳам бор. Шунинг учун ҳар бир сўз ясовчи ҳакида гап борганида, унинг ана шундай хусусияти айтилиши мумкин. Лекин бунда ҳам у ёки бу аффикс ёрдамида хозирда янги сўз ясалиши ёки ясалмаслиги, кам ёки кўп микдорда сўз ясалиши қайд этилади, холос. Унинг сўз ясалиши системасидаги бошқа хусусиятлари ёритилмай қолаверади. Юкорида сўз ясалиши системасини сўз ясалиши типлари белгилаши айтилди. Шундай экан, сўз ясалиши системасини ёритишда сўз ясалиши типларининг маҳсулли-маҳсулсизлигини (сермаҳсул-каммаҳсуллигини) белгилаш, бунинг сабаб-асосларини аниқлаш илмий ва амалий жиҳатдан муҳим аҳамият касб этади.

Бундан ташқари, у ёки бу сўз ясовчи ёрдамида кам ёки кўп микдорда сўз ясалиши факат шу ясовчининг хусусияти билангина

изохланмайди, балки бунда сўз ясалиш асосининг хусусияти ҳам мухим роль ўйнайди. Бу ҳол ҳам мазкур ҳодисани сўз ясалиши типига нисбатан қўллашни такозо этади.

Сўз ясалишининг бир типига оид сўзлар бир сўз ясовчи ёки бирдан ортиқ (вазифадош) сўз ясовчилар билан ҳосил қилиниши мумкин. Агар бир типдаги сўзлар биргина ясовчи ёрдамида ҳосил қилинса, бу сўз ясовчининг ва бу сўз ясалиши типининг маҳсулли ёки маҳсулсиз бўлиши сўз ясалишига асос бўладиган лексик-семантик гурухнинг ҳолати билан боғлик бўлади. Яъни шу лексик-семантик гурухга кирадиган янги-янги сўзлар пайдо бўлиб турса, шу типга оид сўзлар ясалиши давом этади ва сўз ясовчи ҳам, сўз ясалиши типи ҳам маҳсулли бўлади. Акс ҳолда, яъни сўз ясалишига асос бўладиган янги сўзлар юзага келмаса, семантик жиҳатдан бир турдаги сўзлар гурухида хеч қандай янгиланиш (бойиш) бўлмаса, сўз ясовчи шу типдаги янги сўз ясамайди ва сўз ясовчи ҳам, сўз ясалиши типи ҳам маҳсулсизга айланади. Масалан, сифат + *-ай* типида сўз ясалиши (*кенгай*, *торай*, *зўрай* каби) ҳозирда йўқ. Демак, сўз ясовчи *-й* ҳам, сўз ясалиши типи ҳам маҳсулсиз хисобланади. Демак, “сўз ясалиши типининг маҳсулсизлиги” деганда, ясама сўзлар гурухининг янги ясама сўзлар билан бойимаслиги назарда тутилади ва, аксинча, “сўз ясалиши типининг маҳсуллилиги” деганда, ясама сўзлар гурухининг янги ясама сўзлар билан тўлиб, кенгайиб бораётганлиги назарда тутилади.

Агар бирор сўз ясалиши типига оид сўз бирдан ортиқ (вазифадош) сўз ясовчи ёрдамида ясаладиган бўлса, икки ҳолат кузатилиши мумкин: 1) сўз ясалишига асос бўладиган бир типдаги сўзларниң янги-янгилари юзага келмаса, бу семантик гурухга оид сўзларниң ҳаммаси сўз ясаш вазифасини тўхтатади ва сўз ясалиши типи ҳам маҳсулсиз типга айланади; 2) акс ҳолда, яъни сўз ясалишига асос бўладиган сўзлар гурухи янги-янги сўзлар билан тўлиб (бойиб) бораётган бўлса, улардан, сўз ясовчи вазифадош аффикслардан бири шундай сўзлар ясаш вазифасини тўхтатиши мумкин, бошқаси ёки бошқалари эса сўз ясашда давом этади. Бинобарин, сўз ясалишининг бу типи маҳсулли тип хисобланаверади. Масалан, *-чи* қўшимчаси *тилчи*, *адабиётчи*, *тарихчи* каби бир сўз ясалиш типига мансуб бўлган сўзлар ҳосил килган. Ҳозирда эса бу вазифасини тўхтатган. Лекин бундай сўз ясалиш маъносига эга бўлган сўзлар *-иунос* қўшимчаси ёрдами билан ясалади: *тилишунос*, *адабиётшунос*, *тарихшунос*, *сиёсатшунос* ва б.

Бир сўз ясовчи бирдан ортиқ лексик-семантик гурух сўзларидан сўз ясаси, бунда сўз ясалишининг бирдан ортиқ типи мавжуд бўлиши айтилди. Бундай сўз ясалиши типларининг айримлари маҳсулли, баъзилари маҳсулсиз бўлиши мумкин. Буни биргина феъл ясовчи -ла ёрдамида ҳосил қилинган сўзлар мисолида аниқ кўриш мумкин. Масалан, унинг ёрдамида ясалган *мойтамоқ*, *зираламоқ*, *никелламоқ* ва *дасталамоқ*, *гарамламоқ*, *рулонламоқ* каби феъллар (феъл ясалишининг икки типи) маҳсулли типлар; *баландламоқ*, *настламоқ*, *ичкариламоқ* ва *иссиқламоқ*, *салқинламоқ*, *томоишламоқ* типидаги феъл ясалиши маҳсулсиз сўз ясалиши типлари ҳисобланади. Феъл ясалишининг келтирилган типларига хос маҳсулли-маҳсулсизлик ҳам сўз ясалишига асос бўладиган сўзлар семантик гурухидаги янгилашиш, янги сўзларнинг юзага келиши ёки бундай ҳолатнинг йўқлиги билан боғлиқ эканини сезиш қийин эмас.

Маҳсулли-маҳсулсизлик ҳақида айтилганлар ва келтирилган фактларнинг ўзиданок аён бўлдики, бу ҳодиса бевосита сўз ясовчига боғлиқ эмас, яъни сўз ясовчининг хусусиятидан келиб чикадиган ҳодиса эмас. Бу ҳодиса объектив сабабга эга бўлиб, у ҳам бўлса, сўз ясаш учун асос бўладиган, маълум лексик-семантик гурухга оид янги сўзларнинг юзага келиши ёки келмаслигидир. Шунинг учун ҳам маҳсулли-маҳсулсизлик ҳодисасини факат сўз ясовчига bogлаб (сўз ясовчи мисолида) ўрганиш тўғри бўлмайди ва у керакли натижани бермайди. Сўз ясалиши типи тушунчаси эса ана шу ҳолосага келиш имконини беради. Бу билан маҳсулли-маҳсулсизликка алоқадор бошқа ҳодисаларнинг моҳиятини, сабаб ва қонуниятларини ёритиш, белгилаш имкони ҳам тугилади.

Сермаҳсул-каммаҳсуллик масаласига келганда шуни айтиш керакки, биринчидан, бу ҳодиса ҳозирги сўз ясалишининг маҳсулли типларига хос, яъни маҳсулли сўз ясалиши типи нисбатан кам ёки кўп ясама сўзларга эгалиги, бу типга кирадиган ясама сўзлар кам ёки кўп ясалаётганлигига кўра сермаҳсул ёки каммаҳсул бўлиши мумкин. Масалан, -чи аффикси ёрдамида *динамочи*, *спартакчи*, *пахтакорчи* типидаги сўз ясалиши каммаҳсул; *футболчи*, *теннисчи*, *кураичи* типидаги сўз ясалиши эса нисбатан сермаҳсул. Иккинчидан, сермаҳсул-каммаҳсуллик ҳодисаси ҳам сўз ясалишига асос бўладиган янги-янги сўзларнинг юзага келиш-келмаслиги билан боғлиқ.

Сермаҳсул-каммаҳсуллик ҳодисаси ҳақида гап борганда, яна бир нарсани қайд этишга түғри келади. Юкорида айтдикки, бир турдаги ясама сўзлар бирдан ортиқ сўз ясовчилар ёрдамида ҳосил қилиниши мумкин. Масалан, шахс оти ясовчилар. Бундай (бир сўз ясалиши парадигмасига мансуб) сўз ясовчиларнинг айримлари кўп миқдорда, баъзилари кам миқдорда сўз ясаши, яъни каммаҳсул ёки сермаҳсул бўлиши мумкин. Бу ҳодиса ҳар бир сўз ясовчининг хусусияти (хусусиятлари) билан боғлиқ бўлади. Масалан, шахс оти ясовчи -чи аффикси шу типдаги бошка аффиксларга нисбатан, бирдан ортиқ типдаги шахс отлари ясаши билан ҳам, ясаган (ясаётган) сўзларининг миқдори жиҳатидан ҳам сермаҳсул ҳисобланади. Шахс оти ясовчи -фуруши, -наз аффикслари эса жуда кам миқдорда сўз ясади. Бунинг сабаби -чи аффиксининг бирон-бир қўшимча маънога ёки бошка хусусиятга эга эмаслиги, -фуруши, -наз аффиксларининг ‘шахс’ маъносидан ташқари ‘сотиш’, ‘пишириш’ни ҳам ифодалашидир: *атласфуруши, кабобпаз* каби.

Махсулли-махсулсизлик ҳодисаси ҳақидаги гапни якунлар эканмиз, махсулли сўз ясалиши типи (типлари) янги-янги сўзларни ясаш учун намуна бўлиб хизмат килишини алоҳида қайд этамиз. Чунки янги-янги сўзларни ҳосил килиш муайян сўз ясовчи билан боғлиқ ҳолда эмас, балки муайян сўз ясалиши типи (типлари) намунаси асосида амалга ошади. Буни ҳатто сўз ясалишининг янги-янги типлари юзага келиши мисолида ҳам кўриш мумкин. (Масалан, -ий/-вий аффикси ёрдамида сифат ясалиши ва унинг сермаҳсул сўз ясалиши типига айланба бориши бунга мисол бўла олади).

Сўз ясалини имконияти термини

Бу ҳодиса сўз ясалишига оид кўпчилик ишларда умуман тилга олинмайди. Ваҳолонки, сўз ясалишидаги махсулли-махсулсизлик, сермаҳсул-каммаҳсуллик ва бошка айрим муҳим ҳодисаларнинг сабаби, моҳияти худди мана шу сўз ясалиши имконияти билан боғлиқ, шу ҳодиса билан белгиланади. Ўзбек тилшунослигига оид ишларда “сўз ясовчи аффиксларнинг кўлланиш доираси сўз ўзгартувчи аффиксларникига нисбатан торрок” эканлиги қайд этилган¹. Ана шунинг ўзиёқ сўз ясовчиларнинг сўз ясаш имконияти чекланганлиги ҳақидаги гап-

¹ Ўзбек тили грамматикаси, I т., Морфология, 30-б.

дир ва бунга қўшилмаслик мумкин эмас. Лекин сўз ясаш имконияти ходисасини факат сўз ясовчининг ўзига боғлаб қўйиш, сўз ясашдаги чекланганлик-чекланмаганлик ходисасини сўз ясовчилар мисолида таҳлил этиш тўғри эмас ва бундай йўл тутиш ҳакикий ҳолатни тўла акс эттириш имконини бермайди.

Ҳ. Неъматов, Р. Расуловнинг юқорида қайд этилган ишида (37–38-бетлар) сўз ясалиш қолипининг имконияти чексизлиги ҳакида гапирилади. Лекин, биринчидан, сўз ясалиш қолипи имконияти нинг чексиз ёки чекланганилиги ҳакидаги гап умумий гапдан нарига ўтмайди, яъни сўз ясалишидаги бирор ходисанинг моҳиятини, сўз ясалишидаги чекланиш, чекланмаслик ҳамда унинг сабаблари ва бошқа нарсаларни кўрсата олмайди. Иккинчидан, сўз ясаш модели (колипи)нинг имконияти чекланганилиги инкор этиб бўлмайдиган факт. Бу ҳолнинг ўзбек тилшунослигига қайд этилганлиги юқорида айтилди ва бунинг маълум сабаблари бор.

Хозирги ўзбек тили материалларининг кўрсатишича, сўз ясаш имкониятининг чекланганилиги қўйидаги омиллар билан боғлик: 1) сўз ясалиш асосининг хусусияти билан; 2) сўз ясовчининг хусусияти билан; 3) объектив ҳолат билан.

Сўз ясалиши типи, маҳсулли-маҳсулсизлик каби ходисаларнинг таҳлилида кўрдикки, сўз ясовчиларнинг кўлланиши (сўз ясалиш) хатто сўз туркумлари доирасида ҳам чекланган. Шунинг ўзиёқ сўз ясаш имконияти нуқтаи назаридан катта чекланиш ҳисобланади ва бу ҳол сўз ясалиш асоси, унинг "танданиши" билан боғлик.

Яна шу нарса ҳам маълумки, бир ёки ундан ортик сўз туркумига оид сўзлардан сўз ясовчилар ҳам уларнинг маълум лексик-семантик гурухи (гурухлари)га оид сўзлардангина сўз ҳосил киласди. Масалан, энг маҳсулдор сўз ясовчи ҳисобланувчи -чи аффикси ҳам факат от туркумига оид сўзлардан, уларнинг ҳам маълум лексик-семантик гурухига оидларидан янги сўз ясади, холос. Шунинг ўзиёқ сўз ясалиш имкониятидаги, сўз ясалиш асоси билан боғлик яна бир катта чекланишни кўрсатади.

Бу айтилган чекланиш ҳоллари сўз ясалиш асоси билан бирга сўз ясовчига ҳам оид, яъни ҳар қандай сўздан янги сўз ҳосил қиласвермаслиги сўз ясовчининг ҳам имконий чекланишидир. Бундан ташкари, сўз ясовчи ўз хусусияти билан боғлик ва шу сўз ясовчининг ўзига хос сўз ясаш имконияти-

нинг чекланиши ҳам бор. Буни сўз ясалиши парадигмасига мансуб бирдан ортиқ маънодош сўз ясовчилар мисолида яккол кўриш мумкин.

Аввало айтиш керакки, бир типдаги сўзларни ясаш учун бирдан ортиқ сўз ясовчи бўлишининг ўзиёқ уларнинг кўлланишида (сўз ясашида) чекланиш бўлишига олиб келади. Чунки уларнинг ҳар бири ўзига хос белгига эга бўлиб, бирининг ўрнида иккинчисини кўллаш мумкин бўлмайди ёки мумкин бўлавермайди. Масалан, шахс оти ясовчи энг маҳсулдор -чи қўшимчаси оштаз типидаги сўз ясамайди. Ўз навбатида -паз қўшимчасининг сўз ясаш имконияти ниҳоятда чегараланган. Чунки унинг маъносида "пишириш" тушунчаси ҳам бор ва бу аффикс кўшиладиган сўз пишириб тайёрланадиган нарсани билдириши шарт. Қолаверса, у пишириб тайёрланадиган нарсани билдирадиган сўзларнинг ҳаммасидан ҳам шахс оти ясайвермайди. Масалан, ўзбек тилида *маставатаз* деган сўз йўқ. (Бунинг сабаблари ўз ўрнида айтилади).

Хуллас, сўз ясалиш асоси ва сўз ясовчига хос хусусият (лар) нинг ўзиёқ муайян сўз билан сўз ясовчини бириктириб, сўз ясаш имкониятини чеклаб кўяди.

Булардан ташқари, бирор сўзда ва сўз ясовчida уларни бириктириб сўз ҳосил килиш имконияти мавжуд бўлгани ҳолда, маълум бир объектив ҳолат бунга йўл кўймайди. Масалан, -хона қўшимчаси "сўз ясалиш асосидан англашилган иш, ҳаракат, нарса амалга ошириладиган жой" маъноли отлар ясади: *дориҳона*, *қабулхона*, *тўйхона* каби. Шу хусусиятига кўра -хона ясовчиси *танқид* сўзига бирикиб, сўз ҳосил килиши мумкин эди, яъни *танқид* сўзи билан -хона сўз ясовчисининг бирикиш имконияти (сўз ясаш имконияти) бор. Лекин ўзбек тилида *танқидхона* сўзи йўқлиги ва бундай сўз ҳосил қилинмаслиги маълум. Сабаби шуки, танқид учун маҳсус жой бўлмайди (маҳсус жой белгиланмайди). Демак, бу – сўз ясаш имкониятининг объектив ҳолат билан чекланишидир. Бундай мисолларни кўплаб келтириш мумкин.

Маълум бўлдики, ҳар қандай сермаҳсул сўз ясовчининг имкониятида турли сабаблар билан боғлик чекланишлар бор. Буларга эътибор қаратишдан мақсад шу фактни қайд этишдан иборатгина эмас. Гап шундаки, сўз ясалишидаги имкониятларни, имкониятдаги чекланишларни аниқ белгилаш, амалиётда улар билан хисоблашиш мухим аҳамиятга эга. Бу билан, бир томондан, сўз ясалишидаги маҳсулли-маҳсулсизлик ҳодисасининг сабабини тўғри белгилаш имконияти туғилса, иккинчи томондан, унумли сўз ясалиши типлари намунаси

асосида янги-янги сўзлар ҳосил қилишда хатога йўл қўймаслик имкониятига эга бўлинади.

Бундан ташқари, тил тараққиёти жараёнида сўз ясалиши системасининг ривожланиши айрим ҳодисаларнинг йўқ бўлиши ва янгиларининг пайдо бўлиши билан характерланади. Ана шундай ҳодисаларнинг юз бериши ва ундаги қонуниятларни белгилашда ҳам сўз ясалиши имконияти асосида иш кўриш тўғри хulosаларга олиб келади¹.

Сўз туркумларида сўз ясалиши масаласи

Ишнинг олдинги бўлимларида ўзбек тили сўз ясалиши системаси, уни шакллантирувчи тил бирлиги, шу тил бирлиги асосида сўз ясалиши системасининг шаклланиши билан boglik ҳодисалар, сўз ясалиши системасига оид асосий тушунчалар, улардан ҳар бирининг мохияти каби масалалар юзасидан маълумот берилди. Ҳар бир сўз туркумидаги сўз ясалиши системасини тадқиқ этишда ана шу айтилганлар асосида иш кўриш талаб этилади. Шундай йўл тутилганда, ҳар бир сўз туркумидаги сўз ясалиши системаси юзасидан ижобий натижаларга эришиш, тўғри хulosаларга келиш билан бирга бу масалада ҳар бир сўз туркумига мансуб ўзига хосликлар ҳам намоён бўлади. Шунингдек, муайян сўз туркумидаги сўз ясалиши системасига оид баъзи ҳодисаларнинг мохиятини тўғри белгилаш сўз ясалиши системаси учун умумий бўлган баъзи мураккаб ҳодисаларнинг мохиятини тўғри англашга ёрдам беради. Бу ишда барча сўз туркумларидағи сўз ясалиши системаси тадқиқ этилмайди. Фақатгина бир масала, яъни сўз туркумларида сўз ясалиши системасининг бор-йўклиги ва бунинг сабаблари ҳақида киска тарзда ўз мулоҳазаларимизни билдиришини лозим топамиз.

Сўз ясалиши системасининг тил бирлиги ясама сўз бўлар экан, аввало, у ёки бу сўз туркумидаги сўз ясалиши тизимининг бўлиш-бўлмаслиги, унда ясама сўзга хос мохиятга, хусусиятларга эга бўлган тил бирлигининг – шу туркумга мансуб ясама сўз(лар)нинг бор-йўклиги ва бунинг сабаблари асосида масалани ҳал этиш керак

¹ Булар ҳакида маҳсус маколамиизда фикр билдирилган. Ҳожиев А. Сўз ясалиши имкониятидан тўғри фойдаланайлик / Ўзбек тили ва адабиёти, 1996. 1-сон, 23-29-б.

бўлади. Қолаверса, сўз ясалиши системасини ташкил этувчи ҳар бир ясама сўзлар гурухи бирдан ортиқ ясама сўздан ташкил топар экан, ҳар бир сўз туркумида шундай гурух(лар)ни ташкил этувчи ясама сўзлар бор-йўклиги аниқ белгиланиши ва масалани шу асосда ҳал этиш керак бўлади.

Масалага шу асосда ёндашилса, сўз ясалиши ҳодисасининг, сўз ясалиши системасининг факат мустакил сўз туркumlари учун хос бўлиши табиий ҳолдир. Худди шу талабга кўра мустакил сўз туркумларидан сон ва олмош туркумлари сўз ясалиш ҳодисасига, сўз ясалиши системасига эга эмас (Шу боис ҳам ўкув юртлари учун чиқарилган ўзбек тилидан қўлланма ва дарсликларда сон ва олмош туркумларига бағишланган бўлимларда сўз ясалиши ҳодисаси келтирилмайди). Фақатгина равиш туркумида сўз ясалиши масаласида турли фикр-мулоҳазалар давом этяпти.

Маълумки, олий ўкув юртлари учун нашр этилган ўзбек тили дарсликларининг барчасида, бошқа мустакил сўз туркумлари қатори, равиш туркумида ҳам равиш ясалиши алоҳида мавзу сифатида берилади. Демак, ўзбек тилида равиш ясалиши ҳодисаси борлиги деярли барча мутахассислар томонидан тан олинади. Бироқ масалага юкорида айтилган талаблар асосида ёндашилса, ўзбек тилида равиш сўз туркuminинг сўз ясалиши системасига эга эмаслиги инкор этиб бўлмайдиган факт эканлиги маълум бўлади. Бу хақда маҳсус маколамиизда ўз мулоҳазаларимизни билдирган эдик¹. Лекин ўзбек тилида равиш ясалиши ҳодисаси борлигини тасдиқловчи фикрлар келтирилмаган ҳолда, жумладан, бу масаладаги бизнинг қарашларимизни инкор этадиган далиллар келтирилмаган ҳолда ўзбек тилида равиш ясалиши ҳодисаси, равиш ясалиши системаси борлигини даъво қилувчи ишларнинг янги-янгиларини ҳозир ҳам кузатиш мумкин. Равиш туркумига бағишланган биргина номзодлик диссертациясининг ўзиёқ фикримизни тасдиқлади². Ана шу ҳолат бу масалага жиддийроқ муносабат билдиришни тақозо этяпти. Қолаверса, ўзбек тили сўз ясалиши системасининг назарий масалаларига бағишланган кейинги ишларимиз ўзбек тилида равиш туркуми сўз ясалиши систе-

¹ Ҳ о ж и е в . А. Ўзбек тилида равиш ясалиши тизими масаласига доир / Ўзбек тили ва әдабиёти, 2001. 2-сон, 42-46-б.

² А с а д о в Т. Х. Сўз туркумлари тизимида равиш. Филол. фан. номз. дисс... автореф. Тошкент: 2009. 10-12-б.

масига эга эмаслигини янада аниқлаштирди. Ана шу далилларни ҳам мутахассислар эътиборига ҳавола этишни лозим топдик.

Бирор сўз туркумида сўз ясалиши системаси бор-йўклиги ҳакида фикр юритилар экан, аввало, бу сўз туркумида ясама сўзга хос мохиятга эга бўлган тил бирлиги, аникроғи, сўз ясалиш асоси ва сўз ясовчидан иборат таркибга эга бўлган тил бирликлари – ясама сўзлар бор-йўклиги белгиланиши керак бўлади. Масалага шу тарзда ёндашишнинг ўзиёқ ўзбек тилида равиш сўз туркуми сўз ясалиши системасига эга эмаслигини маълум қилиб кўяди. Буни ўзбек тилида энг фаол, сермаҳсул равиш ясовчи деб таърифланаётган биргина -ча аффикси мисолида аник кўриш мумкин. Ўзбек тили равиш ясалиши системаси ҳакида фикр юритилган ишларнинг барчасида -ча аффиксининг сермаҳсул равиш ясовчи эканлиги айтилади ва бу фикрни тасдиқлаш учун мисоллар келтирилади. Бироқ келтирилган мисоллар уларнинг таркибидага -ча аффиксининг равиш ясовчи, умуман, сўз ясовчи эмаслигини, унинг маъноси(кандай маъноли равиш ясаси) ҳакида айтилган гаплар ҳам мазкур аффикс сўз ясовчи бўла олмаслигини аник тасдиқлайди: «1. -ча. Бу аффикс от, сифат, олмош ва феълларга қўшилиб, ҳаракатнинг кай тарзда бажарилиши, ҳаракат процесси сўзнинг негизида ифодаланган предмет, ҳолатга ўхшатилганлиги ёки бир белгининг бошқа белги билан ўхшашлиги маъноларини англатган равишлар ясайди: ҳозирча, йигитча, болача, яштиринча, эскича, янгича, шошганича, сенча, бизнингча, астрофличча, илгаричча, кейинча, бултургича,.. ўзбекча, украинча, кечагичча, қисқичча, ўзиичча, билганинча»¹ (Бошқа ишларда ҳам бу аффикс ҳакида деярли шундай фикрлар билдирилган). Диккат билан қаралса, берилган таъриф ва келтирилган мисолларнинг ўзиёқ -ча аффикси сўз ясовчига хос хусусиятларга эга эмаслигини аник кўрсатади. Масалан, -ча аффиксли сўз “ҳаракат процесси сўзнинг негизида ифодаланган предмет, ҳолатга ўхшатилганлиги ёки бир белгининг бошқа белги билан ўхшашлиги маъноларини англатар” экан, бу сўзлар таркибидаги “-ча” ни сўз ясовчи (равиш ясовчи) дейиш мумкин бўлмайди, демак, айтилган фикр (муаллифлар фикри) “-ча” нинг сўз ясовчи эмаслигини тасдиқлаяпти. Чунки ўхшатиш, ўхшашлигини ифодалаш сўз ясовчиларга хос хусусият эмас, сўз ясовчи янги лугавий маъноли тил бирлиги – ясама сўз ҳосил қиласи. Қолаверса, биринчидан, ҳозирча, йигитча, бо-

¹ Турсунов У., Мухторов Ж., Рахматуллаев Ш. Ҳозирги ўзбек адабий тили. Тошкент: Ўқитувчи, 1975. 231-232-б.

лача, атрофлича ... сўзлари ‘сўз ясалиш асоси + сўз ясовчи’дан иборат таркибли бирлик – ясама сўз эмас, иккинчидан, шошганича, бизнингча, ўзичча, билганимча сўзларидаги -ча сўз шаклига кўшиляпти. Сўз ясовчи бирлик эса бундай хусусиятга эга эмас. Учинчидан, украинча, болача, илгаригича ясама сўз – лугавий бирлик эмас, шунинг учун изохли лугатларда бош сўз (изохланувчи сўз) сифатида берилмайди ва хоказо.

Хуллас, ўзбек тилидаги -ча аффикси сўз ясовчига хос хусусиятларга эга эмас. У ўз моҳиятига кўра шакл ясовчи морфемаларга, шунингдек, кўмакчиларга ўхшайди.

-ча аффикси сўз ясовчи бирликка хос хусусиятларга эга эмаслиги боис баъзи сўз шаклларига бирикканда ҳам ўз маъносини, мустақиллигини сақлади. Масалан, *дўстларча, қаҳрамонларча* сўзларидаги -ча аффикси отнинг кўплик шаклига: *тиклиганча, юргурганча* сўзларида феълнинг сифатдош шаклига кўшилган. Ўзбек тили равиш ясалиши ҳакида фикр юритилган ишларда бундай сўзлар таркибидаги “ларча” ва “ганча” -ча аффиксининг *-лар, -ган* аффиксига бирикишидан ҳосил бўлган қўшма аффикслар деб таърифланади. Ваҳолонки, бундай сўзларда унинг таркибидаги *-лар* ва *-ча, -ган* ва *-ча* аффиксларининг бирикишидан равиш ясовчи *-ларча* ва *-ганча* қўшма аффикслари юзага келган эмас, аксинча, *-лар, -ган* ва *-ча* аффикслари алоҳида-алоҳида, мустақил морфемалар ҳисобланади¹. Қолаверса, сўз ясовчи қўшма аффиксларнинг (морфемаларнинг) юзага келишида амал қиласидаган қонуниятларга кўра ҳам *-ча* морфемасининг отнинг кўплик шаклини ясовчи *-лар*, феълнинг сифатдош ясовчи *-ган* аффиксига бирикиши ва қўшма аффикс (*-ларча, -ганча* “аффикслари”) юзага келиши мумкинлигини инкор этади. Аниқроқ қилиб айтганда, ўзбек тилида бирдан ортиқ шакл ясовчи морфеманинг ўзаро бирикувидан сўз ясовчи, жумладан, равиш ясовчи қўшма аффикснинг юзага келиши ҳодисаси йўқ ва бўлиши мумкин ҳам эмас.

Айтилганларнинг барчасидан маълум бўлдики, *-ча* морфемаси сўз ясовчи морфемаларга хос моҳиятга эга эмас. Шунингдек, унинг бошқа бирон-бир морфема билан бирикишидан янги бир равиш ясов-

¹ Булар ҳакида куйидаги маколаларимизда кенг маълумот берилган: Хожиев А. Ўзбек тилшунослигининг долзарб муаммолари (13-макола) / Ўзбек тили ва адабиёти. 2008. 5-сон, 47-53-б.; Шу номдаги 14- макола, шу журнал, 2008. 6-сон. 30-43-б.; Шу номдаги 15- макола, шу журнал, 2009. 2-сон, 25-35-б.; шу номдаги 16- макола, Шу журнал, 2009. 3-сон, 27-30-б.

чи юзага келған эмас. Равиши ясалиши ҳақида фикр юритилған ишларда равиши ясовчи деб қаралған аффиксларнинг бирортаси ҳам равиши умуман, сўз ясовчи эмас (Буларнинг ҳар бири ҳақида тұхташни лозим топмаймиз). Шундай экан, яъни сўз ясалиши гурухлари (системалари) бирдан ортиқ ясама сўзлардан ташкил топар экан, ўзбек тили равиши туркuminинг сўз ясалиши системасига әгалиги ҳақида гап бўлиши мумкин эмас. Бизнингча, -ча морфемасини нокатегориял сўз шаклини ясовчилар қаторида, яъни тилшуносликнинг морфология бўлимида ўрганиш тўғри ва мақсадга мувофиқ бўлади. Равиши ясовчи деб қаралаётган бошқа аффиксларнинг баъзилари, умуман, сўз ясовчи эмас (масалан, -дек аффикси) ёки саноқли сўзлар таркибида учрайди, демакки, сўз ясалиши системасини ёки шакл ясалиши системасини (морфологик системани) шакллантирувчи бирликларни хосил қилмайди (масалан, *кунига*, *ёппасига*, *йигитчасига* сўзлари таркибидаги *-ига*, *-сига*, *-часига* шулар жумласига киради).

Равиши ясалиши ҳақидаги гапларни якунлар эканмиз, бир фактни алоҳида таъкидлашни лозим топамиз. Қизиги шундаки, ўзбек тили равиши ясалиши ҳақида фикр юритилған ишларда ясама равиши деб келтирилған факт-мисолларнинг барчаси ўзбек тилида равиши ясалиши ҳодисаси, равиши ясалиши системаси борлигини эмас, аксинча, йўқлигини исботлашга хизмат қилади. Бу ҳолат амалда қандай натижалар беришини ўзингиз тасаввур килаверинг. Бундай ҳолатнинг мавжудлиги эса сўз ясалиши системаси тил бирлигининг моҳияти ҳақида аниқ тасаввурга эга эмаслик, равиши туркумида шундай тил бирлиги бор-йўқлигини белгилашда ясама сўзга хос юкорида кўрилган хусусиятлар асосида иш кўрмаслик оқибатидир.

Хуллас, ясама сўз – лисоний бирлик. Чунки у киши мияси хотираси марказида мавжуд ҳолдаги бирлик ҳисобланади. Ясама сўз бир марта ясалади ва лугат сатхининг бирлигига айланади. Тайёр ҳолдаги тил бирлиги бўлганидан янги сўзлар ясалишида сўз ясалиш асоси вазифасида ҳам қатнашади. Лугавий бирлик сифатида лугатларда берилади, изоҳли лугатларда маъноси изоҳланади. Лугавий бирлик сифатида лексикологиянинг предмети – ўрганиш обьекти ҳисобланади. Ясама сўз лугавий бирлик сифатида лексик-семантик гурухларни шакллантириш учун хизмат қилади – лексик-семантик гурухларнинг таркибий қисми ҳисобланади.

Ясама сўз ясалма бирлик сифатида сўз ясалиши системасининг тил бирлиги ҳисобланади. Бу тил бирлиги билан боғлиқ ҳолда юз берадиган барча ҳодисалар тилшуносликнинг «Сўз ясалиши» бўлимида ўрганилади.

Ясама сўзнинг ҳар бири ўзига хос мохиятга эга бўлган икки қисмдан – сўз ясалиш асоси ва сўз ясовидан таркиб топади. Сўз ясалиш асоси вазифасида лугавий маъноли бирлик – туб ёки ясама сўз қўлланади: *терим* (тер – сўз ясалиш асоси), *теримчи* (терим – сўз ясалиш асоси). Ясама сўз таркибида сўз ясалиш асоси мустақил тил бирлиги, яъни сўз (лексема) ҳисобланмайди. Шунинг учун ҳам «сўз ясалиш асоси» термини лексикология эмас, сўз ясалиш баҳсига хос тушунчани билдиради. Ҳар бир ясама сўз сўз ясалиш асосининг муайян маъносидан ҳосил қилинади. Шунинг учун ҳам бир сўз ясовчи ёрдамида ясалган бир неча ясама сўз таркибида сўз ясалиш асоси муайян маънога эга бўлган лугавий бирликлардан бўлади. Масалан, -чи аффикси билан ясалган отлар, -ла аффикси билан ясалган феълларнинг сўз ясалиш асосларига эътибор беринг.

Ясама сўзнинг иккинчи таркибий қисми сўз ясовчи морфема ҳисобланади. Ҳар бир ясама сўзда сўз ясалиш асоси битта бўлганидек, сўз ясовчи ҳам битта бўлади. Масалан, *темирчилик* ясама сўзининг (касб отининг) сўз ясалиш асоси *темирчи* (ясама сўз), -лик сўз ясовчи (касб оти ясовчи) морфема.

Сўз ясалиш асоси ҳар бир ясама сўзда битта бўлса, ҳар бир сўз ясовчи бирдан ортиқ сўз ясади, бинобарин, бирдан ортиқ ясама сўзлар таркибида мавжуд бўлади. Бу ҳол сўз ясовчининг маъноси умумий маъно бўлиши билан боғлиқ. Масалан, -чи сўз ясовчиси жуда кўп миқдорда шахс оти ясади ва шу шахс отларининг таркибида мавжуд бўлади, уларнинг барчасида ‘шахс’ маъноси билан (умумий маъно билан) қатнашади. Сўз ясалиш асоси эса бу ясама отларнинг ҳар бирида алоҳида сўздан бўлади ва муайян лугавий маъно билан қатнашади. Сўз ясовчи бирлик умумий маъноси билан ясама сўзларни бирлаштиради, гурухлайди.

Ясама сўзнинг маъноси сўз ясалиш асоси ва сўз ясовчининг маъносидан юзага келади ва бу маъно лугавий маъно (лексик маъно) ҳисобланади. Бу маъноси билан ясама сўз лексик сатҳнинг тил бирлиги ҳисобланиши юқорида айтилди. Ясалма бирлик сифатида сўз сўз ясалиши системасининг тил бирлиги бўлиши ҳам айтилди. Сўз яса-

лиши системасининг тил бирлиги – ясама сўзлар маълум умумий белги асосида муайян гурухларни ташкил этади. Ана шу умумий белги, умумий маъно ясама сўзларни гурухловчи маъно хисобланади. Шунга кўра бу маънони, ўз моҳиятига кўра, ‘гурухловчи маъно’ деб юритиш, яъни шу сўз бирикмасини термин сифатида қўллаш мақсадга мувофиқ бўлади, деб ўйлаймиз.

Бир гурухловчи маъно билан бирлашган ясама сўзлар сўз ясалишининг бир типини ташкил этади ва ҳар бир сўз ясалиши типи кичик бир сўз ясалиши системаси хисобланади. Демак, сўз ясалиши системаси сўз ясалиши типлари мисолида тадқиқ этилади. Бу билан сўз ясалиши системасининг шаклланиши билан боғлиқ барча ҳодисаларнинг моҳиятини аниқ ва тўла ёритиш мумкин бўлади. Сўз ясалиши билан боғлиқ ҳодисаларни сўз ясовчilar мисолида ўрганиш эса бу системага хос барча ҳодисаларни қамраб ололмайди, чунки ҳар бир ясама сўзининг, ясама сўзлар гурухининг моҳиятини сўз ясалиши асосидан холи ҳолда ёритиш мутлақо мумкин эмас, зеро, сўз ясалиши системасининг тил бирлиги сўз ясовчи эмас, балки ясама сўздир. Ясама сўзининг моҳиятини факат сўз ясовчининг ўзи қайд эта олмас экан, сўз ясалиши билан боғлиқ, сўз ясалиши системасига оид ҳодисаларнинг моҳиятини сўз ясовчи мисолида ёритиш мумкин эмаслиги ўз-ўзидан маълум.

Сўз ясалиши типларининг ҳар бири сўз ясалишининг кичик бир системасини ташкил этар экан, сўз ясалиши системаси билан боғлиқ, сўз ясалиши системасининг шаклланиши билан боғлиқ ҳодисаларнинг моҳиятини сўз ясалиши типлари асосида ёритиш мумкин экан, бунда сўз ясалиши категорияси, сўз ясалиши парадигмаси бирикмаларини термин сифатида қўллашга эхтиёж қолмайди.

Ясама сўз сўз ясалиш асоси ва сўз ясовчидан юзага келар экан, бу тил бирлигига хос хусусиятларни ана шу икки қисм мисолида ёритиш, изоҳлаш керак бўлади. Масалан, сўз ясалишидаги маҳсулли-маҳсулсизлик, сермаҳсул-каммаҳсуллик ҳодисаси шу вактга қадар сўз ясовчига тегишли ҳодиса деб қаралади ва сўз ясовчи мисолида ўрганиб келинади. Ваҳлонки, сўз ясовчининг маҳсулли-маҳсулсиз ёки сермаҳсул-каммаҳсул бўлиши тилда янги сўз ясалиши учун асос (сўз ясалиш асоси) бўладиган янги сўзларнинг пайдо бўлаётган-бўлмаётганлиги, бундай сўзларнинг кўплиги ёки кам бўлишига

бөғлиқ. Шунга қараб сўз ясалишининг янги типлари юзага келади ёки юзага келмайди; тилда бор ясама сўзлар гуруҳи янги ясама сўзлар билан тўлади, кенгаяди ёки бундай ходиса юз бермайди. Демак, бу ходисалар сўз ясовчининг ўзига тегишли эмас.

Сўз ясалиши ходисаси мустакил сўз туркумларида мавжуд. Мустакил сўз туркумларининг ҳам от, сифат ва феъл туркумлари сўз ясалиши системасига эга. Ясама сўзнинг ва сўз ясалиши типларининг мохияти асосида иш кўрилса, бунинг сабаблари, жумладан, ўзбек тилида равиш ясалиши ходисаси йўклиги, равиш турқуми сўз ясалиши системасига эга эмаслиги ҳам маълум бўлади. Шу асосда эътибор билан қаралса, ясама равиш деб келтирилаётган факт-мисолларнинг барчаси ўзбек тилида равиш ясалиши ходисаси ҳам, ясама равишлар ҳам йўклигини тасдиқлайди.

ТҮРТИНЧИ ҚИСМ

МОРФОЛОГИК СИСТЕМА. ТИЛ БИРЛИГИ – СҮЗ ШАКЛИ

Тил сатхларининг хар бирига хос ходисалар, шунингдек, тил сатхларининг системаларини, уларнинг шаклланиши билан боғлиқ ходисаларни тадқиқ этишда, ёритишида шу система тил бирлигини, унинг мөҳиятини тўла ва тўгри белгилаш мухим аҳамиятта эга бўлишини ишнинг аввалги бўйимларида кўрдик. Бу гапни морфологик системанинг тил бирлигига нисбатан ҳам айтиш мумкин.

Морфологик системанинг тил бирлиги сўз шакли экани, морфология сўз шакллари ҳакиқаги таълимот экани тилшуносликка оид адабиётларда тўгри қайд этилган. Лекин бу тил бирлиги ва унинг таркибий қисмларига хос хусусиятлар ўзбек тилшунослигига тўла ва тўгри ёритилган деб олмаймиз. Булар ҳакиқаги карашларнинг тўлик эмаслиги, бор фикрларнинг бир-бирига мос келавермаслиги, ҳатто бир-бирига зиддигининг ўзиёқ фикримизни тасдиқлайди (Ўз ўрнида буларнинг ҳар бирига маҳсус тўхталашибиз).

Ўзбек тили морфологиясига оид ишларда сўз шаклининг аффикслар ва ёрдамчи (кўмакчи)лар билан ясалиши, аффикслар ёрдамида ясалувчи сўз шакллари “синтетик шакл”, кўмакчилар ёрдамида ясаладиган сўз шакллари “аналитик шакл” деб юритилиши маълум. Сўз шаклининг бу икки тури мөҳиятан бир-биридан бутунлай фарқланади. Бу фарқли хусусиятларни аниқ тасаввур этиш учун уларнинг ҳар бирини, яъни синтетик ва аналитик шаклларни, улар асосида юз берадиган ходисаларни алоҳида-алоҳида тадқиқ этишни лозим топамиз.

Синтетик шакллар

Ўзбек тилшунослигининг морфология бўлимида, одатда, сўз шаклининг аффикслар ёрдамида ясаладиган тури, яъни синтетик шакллар ва улар билан боғлиқ морфологик ходисалар ўрганилади, уларнинг мөҳияти ёритилади. Бу бежиз эмас, албатта. Чунки сўз шакли билан боғлиқ морфологик ходисаларнинг барчасига хос хусусиятлар синтетик шаклларда ўз ифодасини топади. Шу боис

бизнинг ишимиизда ҳам, асосан, морфологик система билан боғлиқ назарий муаммоларни синтетик шакллар мисолида ёритишга ҳаракат қилинди.

Сўз шаклининг таркиби

Ишнинг сўз ясалиши системасига бағишланган қисмида кўрдикки, ясалма бирлик сифатида ясама сўзниң таркибий қисмларини, улардан ҳар бирининг моҳиятини аниқ белгилаш ясама сўз билан боғлиқ барча ҳодисаларнинг моҳиятини тадқиқ этишда, ёритищда муҳим аҳамият қасб этади. Буни ясалма бирлик бўлмиш сўз шакли ва у билан боғлиқ ҳодисаларнинг моҳиятида ҳам аниқ кузатиш мумкин. Шу боис сўз шакллари билан морфологик системаларнинг шаклланишини тадқиқ этишдан олдин морфологик бирликнинг (сўз шаклининг) таркибий қисмлари, улардан ҳар бирининг моҳияти ҳамда бу қисмлардан юзага келадиган сўз шаклига хос умумий хусусиятлар ҳакида фикр юритишга тўғри келади.

Ишнинг морфемикага бағишланган қисмида айтилдики, ясама сўз ҳам, сўз шакли ҳам морфемалар ёрдамида ясалади. Ҳар кандай ясама сўз сўзниң луғавий маъноси асосида ясалади. Сўз ясалиш асоси туб ёки ясама сўздан бўлиши мумкин, лекин бу ҳолат сўз ясалиш асоси ва ясама сўзниң моҳиятига таъсир этмайди. Шакл ясалишида эса бошкacha ҳолат кузатилади. Масалан, шакл ясовчиларнинг асосий қисми фақат сўзниң шаклсиз ҳолатидан, унинг туркумлик маъноси асосида сўз шаклини ясади. Шу билан бирга, фақат сўз шаклидан шакл ясовчи морфемалар ҳам бор. Ҳар икки ҳолатда моҳиятан бир-бираидан фарқли бўлган сўз шакллари хосил бўлади. Биринчи ҳолатда категориал шакллар, иккинчисида нокатегориал сўз шакллари хосил бўлади. Бирок ўзбек тилшунослигида бунга етарли эътибор берилгани йўқ, категориал ва нокатегориал сўз шакллари деганда бутунлай бошқа ҳодисалар назарда тутилмоқда.

Ўзбек тилшунослигида, яъни унинг морфология бўлимида, асосан, сўз шаклини ясовчи бирликлар, улар ёрдамида ясалган сўз шакллари ва улар билан боғлиқ тил ҳодисалари ўрганилади. ‘Шакл ясалиш асоси’, ‘сўз шаклининг таркиби’ каби тушунчалар шу вақтга қадар ўз аксини топмаган. Ваҳолонки, бу тушунчалар ҳакида аниқ тасаввурга эга бўлмай туриб, сўз шакли билан боғлиқ ҳодисаларни, улардан ҳар бирининг моҳиятини тўла ва тўғри ёритиб бўлмайди.

Аввало айтиш керакки, шакл ясалиш ҳодисаси фақат от ва феъл туркумларида мавжуд. Ҳар икки сўз туркумидаги сўз шакллари шакл

ясалиш асоси ва шакл ясовчидан таркиб топади¹. Шу билан бирга, шакл ясалиш асосининг қандай тил бирлигидан бўлиши, сўз шаклида шакл ясовчининг миқдори ва шу кабиларда от ва феъл туркумига мансуб сўз шакллари ўзаро фарқли хусусиятларга эга. Шу боис уларнинг ҳар бирини алоҳида-алоҳида ўрганиш мақсадга мувофик бўлади.

От туркумига мансуб сўз шаклларининг таркиби. Ясама сўзларнинг сўз ясалиш асоси туб ёки ясама сўздан бўлиши мумкинligини кўрдик. Сўз шаклининг асоси (шакл ясалиш асоси) ҳам туб ёки ясама сўзлардан бўлиши мумкин: *теримни* (*терим+ни*), *теричини* (*теричи+ни*). Лекин от туркумига мансуб сўз шакллари сўз шаклидан ясалмайди, демак, сўз шакли шакл ясалиш асоси вазифасида қўлланмайди. Масалан, *теричиларимизни* сўзида шакл ясалиш асоси – *териччи*, -лар, -(и)миз, -ни эса шакл ясовчилардир. Демак, бу сўзниң *териччи* қисми сўз шакли эмас. Шунингдек, *китобларимни* сўзида ҳам -лар қисми *китоб* сўзининг кўплик шаклини, -(и).и эгалик шаклини, -ни келишик шаклини ҳосил қиласди – ҳаммаси шакл ясовчилар, *китоб* эса шакл ясалиш асоси, лекин сўз шакли эмас. Шунинг учун ҳам, биринчидан, *китобларини* сўз шаклидаги кўплик, эгалик ва келишик шакллари (шу шаклларни ясовчилар) бир-бирининг маъносига таъсир кўрсатмайди. Иккинчидан, ундаги қайси шакл ясовчи туширилса, шу шаклга хос маъно йўқолади: *китобларим*, *китоблар*, *китоб*; *китобим*, *китобни* ...

Сўз ясалишида кўрдикки, ҳар қандай ясама сўз сўзниң луғавий маъноси асосида ҳосил қилинади. Сўз шакли эса сўзниң туркумлик маъноси – ‘предмет’ маъноси асосида ясалади. Содда қилиб айтганда, кўплик, эгалик, келишик шакллари от туркумига оид сўздан ясалади.

Маълум бўляптики, ясама сўз бир сўз ясалиш асоси ва бир сўз ясовчидан таркиб топса, от туркумига хос сўз шакллари бир шакл ясалиш асоси ва бир ёки бирдан ортиқ шакл ясовчидан таркиб топиши мумкин. Шакл ясовчи бирдан ортиқ бўлганида, ҳар бир шакл ясовчи шакл ясалиш асосидан отнинг алоҳида, мустакил бир шаклини ҳосил қиласди. Масалан, *китобларимни* сўз шаклидаги -лар, -(и).и, -ни шакл ясовчиларнинг ҳар бири отнинг алоҳида шакллари – сон, эгалик ва ке-

¹ Ўзбек тилшунослигига оид ишларда «сўзшакл» термини ҳам қўлланади. Бу термин рус тилидаги *словоформа* терминининг таржима-кўчирмасидир. Ўзбек тили материалларининг кўрсатишича, уни қўллаш учун асос ҳам, эхтиёж ҳам йўқ.

лишик шаклларини ясайди. Шунинг ўзиёқ от туркумидан сўз шаклидан сўзниң категориал шакли ясалиш ҳодисаси йўклигини кўрсатади.

Феъл туркумига мансуб сўз шаклларининг таркиби. Ўзбек тили материалларидан маълум бўлишича, феъл шакллари моҳиятан бир-биридан фаркли бўлган икки хил сўз ясалиш асосидан ясалади: 1. Феълнинг шаклсиз ҳолатидан шакл ясалиши. Бунда шакл ясовчи бирлик феълнинг туркумлик маъноси – ‘харакат’ маъноси асосида феъл шаклини ясайди: *келди*<*кел+ди*, *келсин*<*кел+син*, *келмоқчи*<*кел+моқчи*, *келса*<*кел+са*, *келган*<*кел+ган* каби. 2. Феъл шаклининг феъл шаклидан ясалиши. Бунда икки ҳолат кузатилади: 1) феълнинг айнан бир категориясига мансуб шакли шу категорияга мансуб бошқа шаклдан ясалади. Масалан, *келтирилди*<*келтир+ил*, *илинтируди*<*илин+тиру...*; 2) феълнинг бирор шаклидан бутунлай бошқа моҳиятга эга бўлган феъл шакли ясалиши. Масалан, *келтириди*<*келтир+ди* (нисбат шаклидан ўтган замон шакли ясалиши), *келтириб*<*келтир+иб* (нисбат шаклидан равишдош шакли ясалиши), *келаман*<*кела+ман* (равишдош шаклидан ҳозирги-келаси замон, 1-шахс шакли ясалиши) ва бошқалар.

Феъл шаклини ясовчи аффикснинг феълнинг қандай шаклига бирикиши ва феълнинг қандай шаклини ясами мумкин ёки мумкин эмаслигининг ўз сабаблари бор, бунда маълум қонуниятлар амал қиласи.

От туркумидаги сўзлардан шакл ясалишида кўрдикки, бу туркумга мансуб сўз шакллари сўз (от)нинг шаклсиз ҳолатидан, отнинг туркумлик маъноси асосида ясалади. Феъл туркумига мансуб барча сўз шакллари ҳам феълнинг туркумлик маъноси – ‘харакат’ маъноси асосида ясалади ва бу қонуний ҳол, исбот талаб қилмайди, мисол келтириш ҳам шарт эмас.

Феъл шаклининг феъл шаклидан ясалиши ёки ясалмаслиги шакл ясалишига асос бўладиган қисм, яъни феъл шакли билан ундан шакл ясовчи бирлик ҳосил қиладиган феъл шаклининг моҳиятига боблик бўлади. Масалан, феълнинг барча шакллари унинг нисбат шаклидан ясалиши мумкин: *ёздирраб*, *ёздирган* (равишдош ва сифатдош шакли), *ёздирса* (шарт майли шакли), *ёздирди*, *ёздиряпти* (ўтган ва ҳозирги замон шакллари) ва бошқалар. Бунинг сабаби шуки, нисбат шакллари факат грамматик маънога эга бўлмай, феълнинг семантикасида ҳам маълум ўзгариш юзага келтиради. Масалан, ортирма нисбат шак-

ли объектсиз феълни объектли феълга айлантиради: *кел – келтир*, *ухла – ухлат* каби. Шунинг учун ҳам орттирма нисбат шакли феълнинг шаклсиз ҳолатидан ёки бир нисбат шакли бошқа нисбат шаклидан ясалади. Аникроқ қилиб айтганда, феълга биринчи навбатда нисбат шакли бирикади. Феъл шаклини ясовчи аффиксларнинг бирикиш тартибида бундан бошқа қонуниятлар ҳам амал қиласи. Масалан, ҳар қандай ҳаракат инкор этилиши мумкин. Шунга кўра феълнинг бўлишсиз шаклини ясовчи аффикс феълга нисбат шаклидан кейин қўшилади. Шунингдек, ҳаракат макон ва замонда юз беради. Бу қонуний ҳол. Шунга кўра майл ва замон шакллари феълга унинг бўлишсиз шаклидан сўнг қўшилади. Шахс-сон шаклини ясовчи морфема эса майл ва замон шаклларидан кейин қўшилади: *ёздирмаянти*, *ёздирмасан*, *ёздирмайман* ва бошқалар.

Демак, феъл шаклини ясовчи ҳар бир аффикс ўз маъносига эга бўлган феъл шаклини ҳосил қиласи ва у ўзи бириккан феъл шаклиниң моҳиятига таъсир этмайди. Аникроқ қилиб айтганда, ҳар бир феъл шаклида ясама феъл шакли эмас, балки феълнинг ‘ҳаракат’ маъноли кисми шакл ясалиш асоси вазифасида бўлади. Шунинг учун ҳам ҳар қандай феъл шакли маъносининг таърифи феълнинг туркумлик маъноси – ‘ҳаракат’ маъноси билан бошланади, феъл шаклининг маъноси шакл ясалиш асоси ва шакл ясовчи аффикснинг маъноси асосида юзага келади: *ёзdir* – ҳаракатни (ёзишни) сўзловчидан ўзга шахс бажариши; *ёзdirma* – ҳаракатнинг бўлишсиз маъноси; *ёзdirmasa* – ҳаракатнинг бажарилмаслик шарти маъноси, *ёзdirmаянсан* – ҳаракатнинг ҳозирги замонга, иккинчи шахсга оидлиги маъноси; *ёзdirмоқчиман* – ҳаракатнинг бажарилиши мақсади ва биринчи шахсга оидлиги маъноси ва бошқалар.

Шакл ясалиши ва сўз шакли ҳақида айтилганлардан маълум бўлдики, ҳар қандай сўз шакли ҳам икки қисмдан – шакл ясалиш асоси ва шакл ясовчидан таркиб топади. Бу таркибда шакл ясалиш асоси мустакил бирлик ҳисобланмайди.

Хуллас, шакл ясалиши, сўз шакли ва унинг таркибий қисмлари, ҳар бир қисмнинг моҳияти ҳақида айтилганлар морфологик система ва унинг шаклланиши билан боғлиқ тил ҳодисаларининг моҳиятини ёритишида, бу борадаги назарий муаммоларни ҳал этишда мухим аҳамият касб этади, ҳодисаларнинг моҳиятини тушуниш ва тушунтиришни осонлаштиради. Энди шундай муаммоларни белгилаш ва

моҳиятини ёритишга ҳаракат қиласиз. Шулардан бири шакл ясов-чисиз сўз шаклининг бўлиш-бўлмаслиги масаласидир. Шундай шакл бўлишини, борлигини тан олувчилар уни “ноль кўрсаткичли шакл”, “ноль шакл” деб юритадилар. Лекин ўзбек тилшунослигига ноль кўрсаткичли шакл деб каралаётган “шакл”ларнинг моҳияти шу вактга қадар тўғри ёритилмаган. Бу эса улар билан боғлиқ тил ходисаларининг моҳиятини тўла ва тўғри ёритишга тўсқинлик қиляпти. Шу боис, категориал ва нокатериоид сўз шакллари масаласига ўтишдан олдин грамматик категорияга бетараф бўлган тил бирлиги билан ноль кўрсаткичли шаклни, яъни бир-биридан фарқли икки ходисанинг моҳиятини аниқ фарқлаб олиш талаб этилади.

Бетараф тил бирлиги ва ноль кўрсаткичли шакл

Ўзбек тилшунослигига оид адабиётларда “ноль шакл” деганда, отнинг бирлик сон ва бош келишик шакли, феълнинг бош нисбат ва бўлиши шакли назарда тутилади, шу “шакллар”нинг маъно ва вазифалари ҳакида фикр юритилади. Бошданоқ шуни айтишни истардикки, бу “сўз шакллари”нинг моҳияти, маъно ва вазифалари ҳакида айтилган гапларни тасдиқлаш учун келтирилган факт-мисолларнинг ўзи ўзбек тилида сўзнинг шундай шакллари борлигини тасдиқлаш учун хизмат килади. Эътибор беринг: “*Сўзшакл ва унинг асосий типлари: ноль шакл, синтетик, аналитик, аралаш, жуфт ва такрорий шакллар.*” Лексема нутққа чиққанда, албатта, грамматик шаклланган бўлади... *Мен саргузашт китобларни севиб ўқииман* гапидаги сўзларга диккат қилайлик. *Мен олмоши онгда лексема сифатида ҳеч қандай грамматик шаклга эга эмас.* Бироқ у мазкур гапда бош келишик шаклида ва бирлик сонда... Лексеманинг нутқда воқеланганди кўриниши **сўзшакл** атамаси билан юритилади... сўз ясовчилардан бошқа қўшимчаларнинг барчаси **грамматик шакл** деб юритилади.

Бир лексеманинг бир системага кирувчи грамматик шакллари бир бутун ҳолда парадигмани ташкил этади. *Масалан, олма, олманинг, олманни, олмага, олмада, олмадан* сўзшакллари *олма* лексемасининг келишик парадигмасидир...

Ўзбек тилида сўз бир грамматик кўрсаткичли ёки бир неча грамматик кўрсаткичли бўлиши мумкин. Масалан, юкорида келтирилган

саргузашт сўзи бир грамматик кўрсаткичли (оддий даражада)...”¹. Бу жумлаларда нафақат ноль шаклнинг, умуман, сўз шаклининг моҳияти ҳам тўғри талқинини топмаган. Биринчидан, лексема нутққа чикиб сўз шаклига айланмайди, балки муайян сўздан шакл ясовчи ёрдамида сўз шакли ҳосил қилинади. Келтирилган парадигма ҳам олма лексемасининг эмас, олма сўзидан ҳосил қилинган сўз шаклларининг парадигмаси хисобланади. Иккинчидан, “сўз ясовчилардан бошқа кўшимчаларнинг барчаси грамматик шакл деб юритилмайди”, балки улар ёрдамида ясалган сўз шакллари грамматик шакл (морфологик бирлик) хисобланади. Учинчидан, келтирилган мисолдаги *саргузашт* сўзи бир грамматик кўрсаткичли эмас, балки грамматик кўрсаткичсиз (шакл ясовчисиз) сўз ва у оддий даражада шаклида эмас ва бошқалар.

Сўз шаклининг, жумладан, ноль шаклнинг моҳиятини шу тарзда тушуниш ноль шакл деб юритилувчи бирлик сон, бош келишик, бош нисбат, бўлишилил “шакллари”нинг талқинида ўзига ҳос ноаникликларни, хатоликларни келтириб чиқариши шубҳасиз. Буни ўзбек тили морфологиясига оид бошқа ишларда ҳам кузатиш мумкин.

Ноль шакллар бор-йўклиги ҳақида гап борар экан, икки ҳодисани алоҳида-алоҳида ўрганиш мақсадга мувофиқ бўлади: 1) парадигматик шакллардаги ноль шакл масаласи; 2) муайян бир сўз шаклига нисбатан белгиланувчи ноль шакл масаласи.

Ана шу икки ҳодисани алоҳида-алоҳида олиб қараш уларнинг моҳиятини, улар ҳақида билдирилган фикрларнинг қай даражада асосли ёки асосли эмаслигини тушуниш ва тушунтиришни осонлаштиради.

Парадигматик шакллардаги ноль шакл деганда, келишик категорияси парадигмасидаги ноль кўрсаткичли шакл, яъни бош келишик шакли ҳамда нисбат категорияси парадигмасидаги ноль кўрсаткичли шакл, яъни бош нисбат шакли назарда тутилади.

Отнинг ноль кўрсаткичли шакли ҳақида гап борар экан, аввало, унга нисбатан қўлланётган «бош келишик» термини, унинг нимани англатиши ҳақида қисқача тўхтаб ўтишга тўғри келади.

Келишик шакллари ҳақида фикр юритилган ишларнинг деярли барчасида бош келишикнинг бошқа келишик шаклларига нисбатан

¹ С а й ф у л л а е в а Р. ва бошқалар. Ҳозирги ўзбек адабий тили. Морфология, II (ўкув қўлланма). Тошкент: 2005. 29-30-б.

(нисбатлаб) белгиланиши айтилади. Эътибор беринг: «Бош келишикнинг формаси қолган беш (аффиксли) келишикка зидлаб, ноль кўрсаткичи форма деб белгиланади.

Бош келишикнинг грамматик табиати анчагина мураккаб»¹. «Отнинг бошқа сўзлар билан синтактик муносабатини кўрсатувчи маънолар ва бу маъноларни ифодаловчи формалар системаси **келишик категорияси** дейилади...

50-§. Бош келишиқдаги сўз ким?, нима? деган сўроқларнинг бирига жавоб бўлади. Бош келишик формаси маҳсус морфологик кўрсаткичга эга эмас. Шунинг учун ҳам у ноль кўрсаткичи форма ҳисобланади»². «**Бош келишик.** Бош келишик (қисқ. БК) 0 шаклли келишик бўлиб, унинг моҳияти бошқа келишикларга қарама-қарши қўйилиши асосида белгиланади»³. Бошқа ишларда ҳам келишикка деярли шундай таъриф берилади.

Бош келишикка берилган таърифларнинг барчасида бу келишикнинг бошқа келишикларга нисбатланиб (зидланиб, қарама-қарши қўйилиб) белгиланиши таъкидланади. Лекин зидланишининг (нисбатланишининг) моҳиятини тушунишда бир хиллик йўқ. Масалан, кўпгина ишларда бош келишикнинг, шакл кўрсаткичига эга бўлмаса ҳам, келишик шакли ҳисобланиши назарда тутилади. Лекин шунинг ўзи ўзбек тилида келишикнинг шаклсиз тури бор дейиш ва уни “бош келишик” деб аташ учун асос бўла олмайди. Чунки ҳар қандай тил бирлиги, жумладан, сўз шакли (морфологик бирлик) маънодан холи бўлмайди. Келишик шаклларининг таърифида ҳам уларнинг шакл ва мазмун жиҳати акс этади. Бош келишик шаклининг таърифларида эса унинг мазмун жиҳати ўз аксини топмайди ва бу бесабаб эмас, яъни от туркумига мансуб шаклсиз сўз морфологик маънога эга бўлмаслиги табиий. Тўғри, бош келишик ҳақида фикр юритилган ишларда, жумладан, келтирилган «Ўзбек тили грамматикаси»да бош келишикнинг табиати анчагина мураккаблиги таъкидланиб, унинг моҳияти, хусусиятлари ҳақида кўп гаплар айтилади. Лекин айтилган гаплар ва уларни тасдиқлаш учун келтирилган мисоллар ўзбек тилида отнинг ўз шакл, маъносига эга бўлмаган ва бош келишик деб аташ мумкин бўлган ке-

¹ Ўзбек тили грамматикаси. I т., Морфология. Тошкент: Фан, 1975. 191-б.

² Ш о а б д у р а х м о н о в Ш. ва бошқалар. Ҳозирги ўзбек адабий тили. I кисм. Тошкент: Ўқитувчи, 1980. 226-б.

³ С а й ф у л л а е в а Р. ва бошқалар. Келтирилган иш, 50-б.

лишик тури борлигини тасдиқламайди (Шу грамматиканинг 191-204-бетларига каранг).

Р. Сайфуллаеваларнинг келтирилган ишида ҳар қандай сўз шаклининг ўзига хос моҳиятга эга бўлиши назарда тутилган. Бироқ бош келишикнинг моҳияти ҳам бошқа келишикларга қарама-карши қўйилиши қайд этилган. Демак, таърифда бош келишик шаклининг моҳияти, мазмун жиҳати ўз ифодасини топмаган (Шундай бўлишининг табиийлиги ва сабаби юқорида айтилди).

Бош келишикнинг моҳияти, семантикасига эътибор қаратилган баъзи ишларда унинг семантик жиҳатдан жуда бойлиги, кенг қамровли экани, бу хусусиятлари унинг барча келишиклар ўрнини боса олишидан келиб чиқиши ҳақида гапирилади. Лекин бу гаплар ҳам ўз исботини топмаган ва топиши ҳам мумкин эмас. Чунки бош келишик “шакли”нинг бошқа барча келишиклар ўрнида кўлланиши ўзбек тилида учрамайди. Аслида, ана шу хусусиятидан келиб чиқилса, шакл кўрсаткичига эга бўлмаган отни келишик шакли ҳисоблаш ва “бош келишик” деб аташ мумкин эмаслиги маълум бўлиб қолади.

Баъзи ишларда бош келишикдаги сўзнинг ким? нима? деган сўроқларнинг бирига жавоб бўлиши айтилади (Буни юқорида кўрдик. Р. Сайфуллаеваларнинг юқорида кўрилган ишида ҳам шу фикр билдирилган; 110-б.). Шу фикрнинг ўзиёқ ўзбек тилида келишикнинг шаклсиз тури борлигини эмас, аксинча, йўклигини тасдиқлайди. Яъни ким? нима? сўроғига жавоб бўлиш от туркумига мансуб бирор сўз шаклига эмас, балки от туркумига мансуб сўзга хос белги – худди шу сўроқлардан бирига жавоб бўлиши билан, ‘предметлик’ маъноси билан сўзлар от туркумига киритилади, “от” деб аталади.

Нихоят, ўзбек тили морфологияси оид ишларда келишик категориясининг, келишиклар шаклларининг умумий белгиси ҳақида айтилган гапнинг ўзиёқ бу тилда “бош келишик” деб аталиши мумкин бўлган келишик тури йўклигини тасдиқлайди. Келишик категорияси, келишик шакллари парадигмасига таъриф берилган ишларнинг барчасида уларнинг (келишик шаклларининг) барчаси муносабат кўрсатиши қайд этилади. Ҳакикатда ҳам шундай. Масалан, *китоб* сўзининг, *китобни*, *китобнинг*, *китобга*, *китобда*, *китобдан* шаклларининг умуман муносабат кўрсатиши шу ҳолатида ҳам, яъни матндан ташқарида ҳам сезилиб туради. *Китоб* нинг ўзи эса бундай хусуси-

ятга эга эмас. Бу эса унинг келишик шакли бўла олмаслигига шубҳа қолдирмайди.

Юқорида айтилганлар ва келтирилган фактлар шакл кўрсаткичига эга бўлмаган отни сўз шакли (морфологик бирлик) хисоблаш ва уни келишиклар каторига (парадигмасига) киритиш мумкин эмаслигини тасдиқлади, деб ўйлаймиз. Шу боис бу ҳақда гапни давом эттиришни ортиқча деб биламиз. Шу билан бирга, бош келишикнинг моҳияти ҳакидаги бир фикрни келтиришни лозим топамиз: "Келишик бир сўзнинг бошқасига тобелигини кўрсатадиган грамматик категория дейилган умумий таърифдан бош келишик мустаснодир"¹. Ана шу фикрнинг ўзи шакл кўрсаткичига эга бўлмаган отнинг келишик шаклларидан бутунлай бошқа моҳиятга эга бўлган тил бирлиги эканини тасдиқлади, уни келишиклар сирасига киритиш мумкин эмаслигига эътиroz бўлишига ўрин қолдирмайди. Афсуски, бош келишик ҳакида фикр юритилган ишларнинг бирортасида ана шу фикр, ана шу эътироф эътиборга олинмади, унинг нотўғрилиги ҳакида ҳам ҳеч қандай фикр билдирилмади. Ҳатто муаллифнинг ўзи ҳам бош келишикнинг борлигини тан олган ҳолда унинг моҳиятини бошқача талқин этди. Муаллиф фикрининг давомини келтирамиз: "Чунки қаратқич, жўналиш, тушум, ўрин-пайт ва чиқиш келишиклари бир сўзни бошқа сўзга тобелашиб учун хизмат қиласа, бош келишик, аксинча, бошқа сўзни бош келишикдаги отга тобелайди. Масалан, кесим вазифасидаги сўз эгага – бош келишикдаги сўзга тобе бўлади. Шунинг учун бош келишик тўғри келишик (прямой падеж) дейилади, колган бешта келишик эса воситали келишик (косвенные падежи) деб ҳам юритилади"². Лекин шу жумлада билдирилган фикрлар бош келишик борлигини кўрсата олмаганидек, унинг моҳияти ҳакидаги гаплар ҳам ҳақиқатга тўғри келмайди. Чунки, биринчидан, шакл кўрсаткичига эга бўлмаган от ҳеч қандай муносабат кўрсата олмайди. Иккинчидан, эга-кесим муносабатида муносабат кўрсатиш кесимга (кесим вазифасидаги сўз шаклига) хос. Бунда эганинг ҳоким (тобеловчи) бўлак экани ҳакидаги гап ҳақиқатга тўғри келмайди³. Учинчидан, "тўғри ке-

¹ Мирзаев М., Усмонов С., Расулов И. Ўзбектили. Тошкент: Ўқитувчи. 1978. 88-б.

² Келтирилган асар, шу бет.

³ Кейинги пайлардаги кесимнинг ҳоким бўлак бўлиши ҳакидаги карашлар ҳам келишик кўрсаткичисиз шаклнинг муносабат кўрсата олмаслиги ҳакидаги фикримизни кувватлайди. Қаранг: Махмудов Н. Кесимнинг гапдаги макоми /

лишик” бирикмаси келишик категориясига хос бирор моҳиятни қайд эта олмайди, бинобарин, термин ҳам бўла олмайди.

Бош келишик хақида айтилган шу фикр-мулоҳазалардан сўнг кўйидаги хақли бир савол туғилиши табиий: “Келишик категорияси хақида фикр юритилган ишларнинг барчасида бош келишикнинг борлиги тан олингани ва унинг моҳияти (маъноси ва бошқа хусусиятлари) хақида жуда кўп гаплар айтилгани ҳолда бу фикрларнинг исботланмай қолиши, тил фактлари уларни тасдиқламаслигининг сабаби борми? Аслида, келишик кўрсаткичига эга бўлмаган отнинг моҳияти хақида нималар дейиш мумкин?” Бу саволни жавобсиз қолдириш мумкин эмас.

Аввало айтиш керакки, масалага бевосита ўзбек тили морфологик бирлиги, яъни сўз шаклиниң моҳиятидан келиб чиқиб эмас, балки умумтилшуносликда мавжуд бўлган тушунча асосида ёндашиш шундай ҳолат юз беришига сабаб бўлган. Яъни у ёки бу сўз туркумiga мансуб морфологик категорияга, парадигмага шакл кўрсаткичига эга бўлмаган шу туркумга оид сўз ҳам киради, деган тушунча ҳозир ҳам мавжуд. Ўзбек тилида келишикнинг «бош келишик» деб аталувчи тури бор дейишда ҳам худди шу “тушунча”, шу ақида асосида иш кўрилган (Оқибатини кўрдик).

Тилдаги ҳар бир ҳодиса маълум бир сабаб ва тил тараққиётининг конуниятлари асосида юз беради. Бу гап шаклсиз (шакл кўрсаткичисиз) тил бирлиги бўлиш-бўлмаслиги ҳам тегишли. Яна шу нарса ҳам аниқки, тilda бирор маъно ёки бошқа хусусиятни ифодалаш талашиби бўлса, албатта, у яратилади, юзага келади. Жумладан, тилдаги муайян грамматик (морфологик) маънонинг ифодаси учун муайян шакл юзага келади ва шундай бўлиши қонуний. Чунки шаклсиз мазмун, мазмунсиз шакл бўлмаслиги конунияти шуни талаб этади¹. Шундай экан, морфологик тил бирлигининг шакл кўрсаткичига эга бўлмаслиги хақида гапиришнинг ўзи мантиқсиз бўлади, шунингдек, морфологик бирлик хисобланмайдиган тил бирлигидан, масалан, шакл кўрсаткичига эга бўлмаган отдан грамматик (морфологик) маъно ахтариш ҳам кулгили гап бўлади, холос. Шакл кўрсаткичига эга бўлмаган отнинг келишик шакли бўлиши, унинг келишик эканлиги

Ўзбек тили ва адабиёти. 2009. 1-сон, 44-48-б.

¹ Фалсафа. Комусий лугат. 232-233-б.

бошка келишик шакллариға нисбатланиб (зидланиб) белгиланиши, бош келишик шаклининг табиати мураккаблиги, семантик жиҳатдан жуда бойлиги, кенг қамровли экани ва бошқа хусусиятлари ҳақида билдирилган фикрларнинг бирортаси исботланмаганлигининг, қуруқ гаплигича қолганлигининг сабаби ҳам ана шунда. Демак, шакл кўрсаткичига эга бўлмаган отни парадигматик шакллар – келишик шакллари қаторига киритиш ва шундай шакл сифатида эмас, шаклсиз бирлик сифатида ўрганиш тўғри бўлади. Шундай қилингандা, ўзбек тилида шаклсиз тил бирлиги ҳам борлиги қонуний ҳол экани маълум бўлади ва унинг моҳиятини, барча хусусиятларини тўла ва тўғри белгилаш мумкин бўлади.

Ўзбек тили материалларининг кўрсатишича, отнинг шакл кўрсаткичига эга бўлмаган ҳолати мавжудлиги, шундай ҳолатда қўлланиши тилдаги катта имкониятлардан бири ҳисобланади. Адабиётларда бош келишик шакли ҳақида айтилаётган гапларнинг барчаси шакл кўрсаткичига эга бўлмаган отга тегишли экани, ҳатто барча келишик шакллари келишикка бетараф бўлган отдан ясалиши маълум бўлади ва ҳоказо. Демак, бу нарса шакл кўрсаткичисиз отнинг тилда мавжудлиги қонуний ҳолат эканлигини, тилда шундай тил бирлигига эҳтиёж бўлганлигини ва борлигини кўрсатади. Унинг моҳиятини, имкониятларини ёритиш эса асосий вазифалардан ҳисобланади. “Келишик категорияси” мавзууда шакл ва мазмун жиҳатига эга бўлган тушум, қараткич, жўналиш, ўрин-пайт ва чикиш келишикларини ўрганишнинг ўзи кифоя, бу билан ҳеч нарса йўқотилмайди. Хуллас, келишик категориясига бетарафлик, мансуб эмаслик отнинг шаклсиз ҳолатига, шаклсиз тил бирлигига хос хусусиятдир. Шу боис бу тил бирлигига нисбатан “ноль кўрсаткичли шакл”, “ноль шакл” атамаларини қўллаш ҳам тўғри бўлмайди. Уни ўз моҳиятига кўра номлаш, яъни морфологик категорияга бетарафлиги асосида “бетараф тил бирлиги” деб юритиш тўғри бўлади. Бу билан мазкур тил бирлигининг ўзига хос моҳиятга – маъно, вазифага эга бўлиши инкор этилмайди. Шунингдек, келишик категориясида, келишиклар парадигмасида йўқотиш бўлмайди, аксинча, бу парадигма келишик шакли ҳисоблаш мумкин бўлган сўз шаклларидан таркиб топади – ҳақиқий ҳолат ўз ифодасини топади.

Бош нисбат, унинг шакли ва бу шаклнинг моҳияти, маъноси ва

бошқа хусусиятлари масаласида ҳам худди бош келишик ҳакида юкорида кўрилган ҳолатлар қузатилади.

Ўзбек тилидаги нисбат категорияси ҳақида фикр билдирилган ишларда у харакатнинг объект ва субъектга муносабатини билдирувчи категория сифатида таърифланади. Демак, харакатнинг объект ёки субъектга муносабатини кўрсатиш нисбат категориясининг барча шакллари (турлари) учун умумий хусусият, шу хусусияти билан улар бир парадигмани ҳосил қиласди, бир категорияни ташкил этади. Шу билан бирга, уларнинг (nisbat шаклларининг) ҳар бири ўзига хос маъно ва хусусиятга эга бўлиши алоҳида таъкидланади. Бу фикрларга қўшилмаслик мумкин эмас. Шундай экан, бирон-бир бирликнинг нисбат категориясига муносабатини белгилашда, аввало, унинг нисбат категориясига хос умумий белгига эга ёки эга эмаслигига (харакатнинг объект ва субъектга муносабатини кўрсатувчи шаклга эга ёки эга эмаслигига), сўнгра унинг нисбат парадигмасига мансуб бошқа шакллардан фарқли белги-хусусияти бор-йўқлигига эътибор қаратиш керак бўлади.

Феълга хос бу категорияга, унинг биз фикр юритмоқчи бўлган турига нисбатан кўлланаётган терминларга қисқача тўхтаб ўтамиш.

Дастлабки даврларда бу категория “даража категорияси” деб юритилар эди¹. Лекин термин таркибидаги “даража” сўзи мазкур категориянинг хусусиятини (моҳиятини) қайд эта олмаслиги боис у кейинча “нисбат категорияси” термини билан алмаштирилди.

Феълнинг “ноль кўрсаткичли нисбат тури” учун кўлланаётган “бош нисбат”, “аниқ нисбат” терминларига келганда шуни айтиш керакки, *аниқ нисбат* термини нисбат категориясининг бирор турини, унинг моҳиятини қайд эта олмайди, яъни нисбат категориясининг бошқа нисбат шаклларидан аниқликни ифодалаш билан фаркландиган тури йўқ. “Бош нисбат” термини таркибидаги “бош” сўзи эса, “бош келишик”, “бош даража” каби терминлардаги “бош” сўзи каби, шаклсиз ҳолатни (“ноль кўрсаткичли ҳолат”ни) қайд этади, лекин у ҳам мазкур категориянинг ўз шаклига эга бўлган турларидан фарқли бўлган алоҳида турини қайд эта олмайди, нисбатнинг бундай турининг ўзи йўқ.

Юкорида айтилдики, нисбат категориясининг ҳар бир тури муай-

¹ Фуломов А. Феъл. Т. 1954. 56-б.: Ҳозирги адабий ўзбек гили. I. Тошкент: Фаиз, 1966. 269-б.: Шоабдурахмонов III. ва бошқалар. Кўрсатилган дарслик, 328-б.

ян шакл ясовчи морфема билан хосил қилинади, уларнинг ҳар бири ўзига хос (бир-биридан фаркли) ҳамда бирлаштирувчи маъно (белги-хусусият)га эга бўлади. Нисбат категориясига берилган таърифда бу факт алоҳида таъкидланади. Эътибор беринг: “Феъллардаги даража категорияси харакатнинг субъекти ва обьекти орасидаги муносабатни – уларнинг ўзаро алоқасини кўрсатади. Бу муносабат феълдаги маҳсус аффикслар орқали ифодаланиб туради”¹. “Феъл нисбати маҳсус форма ясовчи аффикслар ёрдами билан ясалади”².

Нисбат категорияси ҳакидаги бу фикр, бу таъриф унинг моҳиятини жуда тўғри акс эттиради, шу билан бирга, унга кўра шакл кўрсаткичига эга бўлмаган феълни нисбат шакллари сирасига киритиш (нисбат шакли ҳисоблаш) мумкин эмаслиги ҳам маълум бўлади. Бироқ, нисбат категориясининг моҳияти шундай тушунилгани ҳолда, деярли барча ишларда унинг ноль кўрсаткичли шакли борлиги ҳам эътироф этилади ва у “бош нисбат” (“аниқ нисбат”) деб номланади. Ҳатто унинг моҳияти ҳакида фикр билдирилади (унга таъриф берилади). Бироқ бу таърифларнинг бирортаси ўзбек тилида нисбат категориясининг шундай тури борлигини кўрсата олмайди. Қуйидаги икки таърифга эътибор беринг: “Бош нисбатда феъл англатган харакатни билдирувчи шахс субъектга teng келади. Бош нисбатнинг маҳсус аффикси йўқ. Бу нисбат маъноси феъл асоси орқали ифодаланади”³. “Бош даражада. Бу даражада маъноси феълларнинг ўзак шакли орқали, даражада ясовчи формантсиз ифодаланади”⁴. Кўриниб турибдики, ҳар икки таърифда ҳам бош нисбатнинг маҳсус шакли йўқлиги, унга хос маънонинг феъл асоси, ўзак шакли орқали ифодаланиши эътироф этилади. Шу эътирофнинг ўзиёқ нисбат категориясининг “бош нисбат” деб аташ мумкин бўлган тури йўқлигини аниқ кўрсатади. Чунки морфологик категорияга хос маъно сўзнинг (жумладан, феълнинг) ўзаги ёки асоси билан эмас, балки муайян сўз шакли (феъл шакли) – морфологик бирлик билан ифодаланади.

Баъзи ишларда бош нисбатдаги феъл “харакатнинг эга билан ифодаланган шахс ёки предмет томонидан бажарилишини кўрсатиши”

¹ Фуломов А. Кўрсатилган иш, 56-б.

² Мирзаев М. ва бошкалар. Келтирилган асар. 120-б.

³ Турсунов У. ва бошкалар. Ҳозирги ўзбек адабий тили. Тошкент: Ўзбекистон, 1992. 269-б.

⁴ Ҳозирги ўзбек адабий тили. Тошкент: Фан, 1966. 269-б.

айтилади¹. Бирок бундай таърифнинг нисбат категориясига мутлақо дахли йўқ, яъни унда ҳаракатнинг объект ва субъектга бўлган муносабати (хар бир нисбат шаклига хос хусусият) ўз ифодасини топмайди.

Яна бир ўкув кўлланмасида бу нисбат “тури” “аниқ нисбат” деб аталади ва унинг “моҳияти” ҳақида кенг маълумот берилади: “**Аниқ нисбат**. Бу нисбатда субъектга муносабат феълнинг лугавий маъноси орқали ифодаланади ва шакл УГМси “ҳаракатнинг эга билан ифодалangan шахс ёки предмет томонидан бажарилиши ёки бажрилмаслигини билдириш”dir... Бу нисбатдаги феъл ўтимли (*олди*) ёки ўтимсиз (*ухлади*) бўлиши мумкин.

Ноль шакл УГМсида ўзи мансуб категориянинг моҳиятини бошқаларига нисбатан тўлароқ акс эттиради. Маълумки, феълнинг барча шаклларини иккига – категория ичидағи шаклларнинг ўзаро зиддиятида аниқ бир белгига эга бўлган шаклларга (масалан, аниқ нисбатдан бошқа нисбат шакллари) ва бу зиддиятда аниқ белгига эга бўлмаган шаклларга (масалан, аниқ нисбат шакли) ажратиш мумкин. Биринчи гуруҳ шакллар ўзлари мансуб категориянинг УГМСидан аниқ бир кўринишни “хусусийлаштириб” олади. Иккинчи гуруҳ шаклларида хусусийлашма ноаниқ бўлади. Иккинчи гуруҳ шакллари (бизнингча, аниқ нисбат) ўзи мансуб категориянинг умумий намояндаси бўлади. Шунинг учун улар матн ва шароит талаби билан бошқа шакллар маъносини ифодалаши мумкин. Аниқ нисбат ҳам белгисиз шакл сифатида бошқа нисбат шакллари ўрнида бемалол кўлланавериши мумкин”².

Аниқ нисбат ва унинг моҳияти ҳақидағи фикрларни тўла ҳолда келтиришдан мақсад шуки, бу гаплар ўзбек тилида нисбат категориясининг шундай тури (шакли) борлиги ва унинг “аниқ нисбат” деб аташ кераклиги ҳақида эмас, аксинча, унинг йўклиги ҳақида аниқ тасаввур беради. Чунки, биринчидан, “бу нисбатда субъектга муносабат феълнинг лугавий маъноси орқали ифодаланади” деган гапнинг ўзи бу маънонинг грамматик шаклга (“аниқ нисбат шакли”га) алоқаси йўклигини эътироф этишдир (Буни юқорида ҳам кўрдик). Иккинчидан, “аниқлик нисбати нисбат категориясининг умумий намояндаси” деган гап нисбат категориясига хос бирор хусусиятни қайд эта олмай-

¹ Фуломов А. Кўрсатилган иш. 57-б.; Мирзаев М. ва бошқалар. Кўрсатилган асар. 120-б.

² Сайфулласова Р. ва бошқалар. Келтирилган иш. 69-б.

ди, яъни “умумий намояндаси” жумласи хеч нарсани билдирмайды (хатто нисбатнинг бир тури эканлигини инкор этади). Учинчидан, “аниқлик нисбат” шакли матн ва шароит талаби билан бошқа шакллар маъносида қўлланиши мумкин... белгисиз шакл сифатида бошқа нисбат шакллари ўрнида бемалол қўлланавериши мумкин” деган гап ҳам ўзбек тилида нисбат категориясининг ўзига хос маънога эга бўлган ва “аниқ нисбат” деб аталиши лозим бўлган нисбат тури йўклигини кўрсатади ва ҳоказо.

Янги бир ўкув қўлланмаси ва бир дарсликда нисбат категориясининг умумий моҳияти, шунингдек, “бош нисбат” (“аниқ нисбат”) ҳақида билдирилган фикр-мулоҳазалардан маълум бўлдики, нисбат категориясининг моҳиятини аниқ ёритишдан кўра, унинг моҳиятига тўғри келмайдиган фикрлар кўпайган. Айниқса, “аниқ нисбат” ва унинг “моҳияти” ҳақидаги фикрларни ўзбек тили материаллари мутлақо тасдиқламайди.

Рус тилида ёзилган туркий тилларга оид ишларда нисбат кўрсаткичига эга бўлмаган феълга нисбатан “действительный залог”, “основной залог”, “прямой залог”, “исходный залог” терминлари қўлланади¹. Лекин бу терминларнинг бирортаси нисбат категорияси (nisbat шакли) билан бофлиқ бирор ҳодисани, нисбат категориясининг шундай тури борлигини қайд эта олмайди. Аксинча, “бош нисбат” деб аталувчи феъл “шакл”ининг нисбат категориясига хос шакл сифатида аниқ бир моҳиятга – нисбат категориясига хос моҳиятга эга эмаслигини жуда аниқ кўрсатади. Шунингдек, бაъзи ишларда нисбатнинг шундай тури тилга олинса-да, фақат унинг маҳсус шакли йўклиги айтилиб, моҳияти ҳақида хеч қандай фикр билдирилмайди, шакл кўрсаткичига эга бўлган нисбат турлари таҳлил этилади, холос². Шунинг ўзиёқ кўрсатадики, ўз шакл кўрсаткичига эга бўлган нисбат шакллари қаторида шаклсиз холат ҳам алоҳида нисбат тури сифатида тилга олинса-да, лекин бирон ишда нисбат категориясининг шундай тури борлиги исботини топмаган, унинг моҳияти ҳақида ҳам бир хил

¹ Грамматика современного башкирского литературного языка. М.: Наука, 1981. -С. 244; Б а с к а к о в Н . А . Каракалпакский язык, II, Фонетика и морфология, ч. 1, М.:1952. -С.334.

² Серебренников Б.А., Гаджиева Н.З. Сравнительно-историческая грамматика тюркских языков. М., 1986. -С. 200-205; Грамматика азербайджанского языка. Баку: 1971. -С. 224; Абдурахмонов Ф., Шукуров Ш. Ўзбек тилининг тарихий грамматикаси. Тошкент: Ўқитувчи, 1973. 186-б.

фикрга келинмаган ва шундай бўлиши табиий, яъни ўзи йўқ шаклнинг “моҳияти” ҳақида нима ҳам дейиш, уни қандай исботлаш мумкин?

Маълум бўлдики, феъл туркуми категорияларига, унинг парадиг-маларига мансуб эмаслик, бетарафлик “бош нисбат” деб юритилаёт-ган тил бирлигига хос хусусият. Шунинг учун бу бирликка нисбатан “ноль кўрсаткичли шакл”, “ноль шакл” терминларини қўллаш ҳам тўғри бўлмайди.

Ўзбек тилидаги отнинг бош келишик шакли масаласида айтилдики, уни “ноль шакл” деб қараш ҳамда келишик категориясининг бир тури (шакли) ҳисоблаш ҳақиқатга тўғри келмайди. Ўзбек тилида шаклсизлик ҳолатининг мавжудлиги шу тилга хос катта имкониятлардандир. Бу гапни “бош нисбат шакли”га нисбатан ҳам айтиш мумкин, яъни феълнинг нисбат кўрсаткичига эга бўлмаган ҳолатининг (“шакл”нинг) “барча нисбат шакллари ўрнида қўллана олиши” ҳам ана шундай имкониятни кўрсатади. Шундай экан, нисбат шаклига эга бўлмаган феълни маҳсус кўрсаткичли ва ўзига хос маъноли нисбат шакллари категорига киритиб, зўрма-зўраки ҳолда унга нисбатлик белгисини ёпиширишга уринишдан кўра, шаклсиз ҳолатнинг моҳиятини ёритишга эътибор қаратиш муҳимдир. Шундай қилингандা, бу борадаги ортиқчаликлар, хатоликлар, бир-бирига зид фикр-мулоҳазалар ва шу каби салбий оқибатларнинг барчасига чек қўйилади.

Отнинг бирлик сон, феълнинг бўлишли шакли масаласи. Ўзбек тилшунослигида отнинг шакл кўрсаткичига эга бўлмаган, ноль кўрсаткичли “шакли” бирлик сон шакли деб, феълнинг шакл кўрсаткичига эга бўлмаган шакли, бўлишсиз шаклига нисбатланиб, **бўлишли шакл** деб қаралади. Шундай тушуниш сабабли ўзбек тилида отнинг бирлик ва кўплик шакли асосида сон категориясининг, феълнинг бўлишли ва бўлишсиз шакли асосида бўлишли-бўлишсизлик категориясининг шаклланиши қайд этилади. Лекин бирор ишда от ва феъл туркумида сўзнинг шундай шакллари (бирлик сон ва бўлишли шакллари) борлиги ва бу шаклларнинг кўплик ва бўлишсиз шакллари билан биргалиқда сон ва бўлишли-бўлишсизлик категориялари юзага келиши исботланмаган; бу “категориялар”нинг моҳияти ҳақида билдирилган фикрлар ҳам қуруқ гаплигича қоляпти. Энди шу фикримизни асослашга ҳаракат қиласиз.

Юқорида кўрдикки, от туркумида бош келишик шакли, феъл туркумида бош нисбат шакли бор дейишга у ёки бу сўз туркумига

мансуб сўз шу туркумдаги грамматик категориялардан, категорияларнинг шакллар парадигмасидан четда қолиши, четда бўлиши мумкин эмас, деган ақида асосида иш кўриш сабаб бўлган. Бирлик сон ва бўлиши шакл масаласида ҳам ана шундай ақидалардан бирига таяниб иш кўриш бутунлай нотўғри хulosалар чиқаришга сабаб бўлган. Аникроқ қилиб айтганда, якка ҳодисалар категория хисобланмайди, грамматик категориялар камида икки ва ундан ортиқ сўз шаклларидан юзага келади, деган нуктаи назар асосида иш кўриш оқибатида бирор ҳодиса ва унинг моҳияти ёритилмаганича қолган. Эътибор беринг: "Умумий тилшунослик нуктаи назаридан тилларда турли грамматик маънолар учрайди. Лекин бу грамматик маънолар ва уларнинг ифодаланиши ҳамма тиллар учун умумий, универсал эмас. Ҳар бир тилнинг ўзига хос грамматик маънолари, уларни ифода қилувчи воситалари мавжуд. Улар айрим-айрим мавжуд бўлмай, балки маъно турлари-нинг яқинлигига караб гурух-гурухларга бирлаштирилади. Бундай гурухларда улар сон жихатидан камида иккита ва ундан ортиқ бўлиши мумкин. Ана шундай бирималар тилшуносликка оид адабиётларда грамматик категориялар деб номланади. Шундай қилиб, грамматик категория – умумлашган грамматик маъно бўлиб, у тилнинг қайси морфологик типига кишини кўрсатади... Умумий грамматик маънени ташкил этувчи хусусий маънолар бир-бираига зид бўлади, бир-бирини инкор қиласи ва шу билан бирга бир-бирини доимо тақозо қиласи. Масалан: *уй – уйлар, китоб – китоблар, чироқ – чироқлар...*

Чап ва ўнг томондаги сўзларнинг грамматик маънолари бир-бираига зид: бирлик ва кўплик. Лекин ана шу бир-бираига зид икки грамматик маъно биргаликда сон категориясини ташкил этади. Шу билан бирга, бу категорияга киравчи бирлик ва кўплик маънолари доимо бири иккинчисини тақозо қиласи: тилларда бирлик маъноси борлиги учун кўпликни ажратса оламиз ва аксинча, тилларда кўплик маъноси борлиги учун бирликни фарқлаймиз"¹ (Бу жумлалардаги бирлик ва кўплик сон турига тегишли бўлмаган хато ва камчиликларга тўхташни лозим топмаймиз).

Аввало айтиш керакси, умумтилшуносликка оид ишларда бир-икки тилга оид ҳодисалар ҳакида эмас, умуман, тилларга оид ҳодисалар ҳакида фикр юритглади ва тиллар материаллари асосида хulosha чиқарилади.

¹ Содиков А., Абдуазизов А., Ирискулов М. Тилшуносликка кириш. Тошкент: Ўқитувчи, 1981. 154-155-б.

Бошқа системага оид тиллар учун бу фикрларнинг қай даражада ҳакикатга мос келиш-кељмаслиги ҳақида фикр билдира олмаймиз (Бу бизнинг вазифамизга кирмайди ҳам). Лекин ўзбек тили нуктаи назаридан бу фикрлар қуруқ гапдан бошқа нарса эмас, дея оламиз – ўзбек тили материаллари грамматик категориянинг моҳияти, бирлик ва кўплик соннинг хусусиятлари ҳакидаги фикрларни мутлақо тасдиқламайди.

Масалага бевосита ўзбек тили материаллари асосида ёндашилса, юқоридаги жумлада билдирилган фикрларни уч гурухга ажратиб, уларга ўз муносабатимизни билдириш мақсадга мувофиқ бўлади: 1) грамматик категория учун ўзаро муносабатда бўлган камида икки хил маънонинг бўлиши шартлиги; 2) бу икки хил маънонинг бир-бирига нисбатан (бир-бирига зидланиб) белгиланиши; 3) буларнинг бир-бирини тақозо этувчи маънолар бўлиши.

Биринчи масала юзасидан аввало шуни айтиш керакки, нима учундир грамматик категория ҳақида гап борганида, фактат грамматик маъно, бир-бирини тақозо китувчи маънолар назарда тутилади, грамматик шакл ҳақида эса хеч нарса дейилмайди. Бундай ҳолда эса бир-бирини тақозо қитувчи маънолар бўлишини, борлигини исботлаб бўлмайди. Қолаверса, бир сўз шаклининг (морфологик бирликнинг) грамматик категория ҳосил қиласлиги умумий ва хусусий тилшуносликка оид ишларда кўп бора айтилган ва айтилмоқда. Лекин бирон-бир ишда бунинг исботини кўрмадик. Ўзбек тили нуктаи назаридан эса бу ҳам қуруқ гап, холос (Бу ҳақда кейинроқ, грамматик категория ва грамматик шакллар юзасидан фикр юритилган ўринларда тўхтаймиз).

Иккинчи масалага келганда шуни алоҳида таъкидлаш керакки, ўзбек тилининг от турқумига мансуб сон категорияси ҳақида фикр юритилган ишларнинг барчасида бирлик ва кўплик сон шаклларининг, шунингдек, бирлик ва кўплик маъносининг бир-бирига нисбатан белгиланиши ҳақида эмас, балки фактат бирлик сон шаклининг кўплик сон шаклига нисбатланниб белгиланиши айтилади, холос. Яъни кўплик сон шаклининг ва маъносининг бирлик сон шакли ва маъносига нисбатланиниб белгиланиши ҳақида хеч қандай гап йўқ ва бу бежиз эмас, албаттта. Чунки кўплик сон шакли ва маъносининг бирлик сонга нисбатан белгиланиши мантиқсиз, кулгили гапдан бошқа нарса эмас. Ахир, кўплик сон шакли шакл ясовчи маҳсус аффикс (-лар аффикси) билан ҳосил килинар экан, яъни отнинг кўплигини билдирувчи маҳсус шакл бор экан, бу шакл ва маънонинг шаклсиз ва бирлик маъносига эга

бўлмаган отга нисбатлаб белгиланиши ҳақида гапириш мумкинми?!
Бу бор нарсанинг борлиги йўқ нарсага нисбатлаб белгиланади, дейишнинг ўзи-ку!

Учинчи масалага, яъни бирлик сон маъносининг кўплик сон шакли маъносига қараб белгиланиши масаласига келганда шуни айтиш мукинки, ўзбек тилида отнинг маҳсус шакли ифодалайдиган кўплик маъносининг борлиги бу тилда шу шаклга зидланадиган шакл бор ва у бирлик маъносини билдиради, дейиш ҳам қуруқ гапдан бошқа нарса эмас. Масалан, юкорида бирлик ва кўплик деб келтирилган *уй – уйлар*, *китоб – китоблар*, *чироқ – чироқлар*, аслида, шакл ва маъно жиҳатдан зидланадиган жуфтликни хосил килмайди. Булардаги *уй*, *китоб* ва *чироқ* сон шаклига ҳам, бирлик сон маъносига ҳам эга эмас, шундай маънони билдира олмайди.

Хуллас, бу иш умумтилшуносликка оид бўлса ҳам, унда сон категорияси, бирлик ва кўплик сон турлари, ҳар бирининг моҳияти тиллар, жумладан, ўзбек тили нуктаи назаридан тўғри, ишонарли тарзда ҳал этилмаган. Бу ҳам якка ҳодисалар, якка сўз шакллари категорияни ташкил этмайди, бундай категориялар бўлиши мумкин эмас, деган ақида билан иш кўришнинг оқибатидир.

Туркий тиллар, жумладан, ўзбек тили тарихига оид ишларда бирлик сон шакли тарихан бўлмаганлиги ва ҳозир ҳам йўклиги алоҳида таъкидланади. Шу билан бирга, от туркумига оид сон категорияси таҳлил этилганида, сон кўрсаткичига эга бўлмаган от сон (миқдор) нуктаи назаридан бирор маъно, жумладан, бирлик (бирлик сон) маъносини ифодалай олмаслиги айтилади ва отнинг кўплик шакли таҳлил этилади, холос¹. Бу эса тилдаги ҳақиқий ҳолатни тўғри акс этдиради. Фақат шуни айтиш керакки, бу ишларда тилдаги ана шу ҳодисанинг (шаклсиз ҳолатнинг) сабаби, унинг моҳияти масаласига етарли эътибор берилмаган. Кейинчалик бу масалага эътибор қаратилди, лекин ҳодисанинг моҳияти бевосита тил фактларидан келиб чиқиб ҳал этилгани йўқ.

Ўзбек тилидаги бирлик сон шакли ва унинг маъноси ҳақидаги фикрларга дикқат билан карапса, ҳодисанинг моҳияти тўғри илгангани сезилади. Эътибор беринг; “Сўзнинг предмет тушунчача-

¹ Щербак А.М. Грамматика староузбекского языка. М.: 1962. -С.117; Абдурахмонов Ф., Шукуров Ш. Келтирилган асар, 28-б; Серебренников Б.А., Гаджиева Н.З. Келтирилган асар, 76-б.

сини ифода қилувчи ҳолатининг ўзи, яъни ноль кўрсаткичли формаси бирликдир¹. “Сўзнинг предмет тушунчасини ифода қилувчи ҳолатининг ўзи... бирликдир” деган жумла отнинг шакл кўрсаткичига эга бўлмаган ҳолати предмет тушунчасини ифодалашини жуда тўғри қайд этади. Бу маънонинг сўз (от)нинг шаклига алоқаси йўқ. Бинобарин, отнинг шундай моҳиятга эга бўлган ҳолатини “бирликдир” дейиш ҳақиқатга тўғри келмайди.

Бу масалада проф. Ш. Раҳматуллаевнинг эътиборга лойик фикрлари бор; “Ҳақиқатда, ўзбек тилида яккани ифодаловчи форма (форма единичности) йўқ, турдош от лексема маълум контекстдагина якка предметни билдира олади, ўзича эса сон жиҳатдан ноаник бўлади. Асли бола каби формага биринчи галда “умуман” маъноси хос, “битта” маъноси эса -лар аффиксининг “бир неча” маъносига зидланишида юзага келади. Демак, бола каби сўз асли грамматик сон жиҳатдан нейтрал. Ана шундай нейтраллик сабабли бу формадаги от олдидан ортиқни ифодалайдиган сифатловчи келтиравериш мумкин: *битта бола, бир неча бола, анча бола каби. Кўринадики, маъно тараққиёти қўйидагича бўлган*: умуман бола – битта ёки бир нечта бола. Кейинги болалар кўплик формаси асосида бола бирлик формаси юзага келган”².

Таърифдаги эътиборга лойик фикр – ноль кўрсаткичли ҳолатнинг (шаклсиз ҳолатнинг) бирлик ва кўпликка, умуман, сон маъносига бетараф бўлишидир. Шу ҳодиса, шу факт ҳозир ҳам мавжуд. Қолган гаплар, яъни ноль шаклнинг маъно тараққиёти, бу жараёнда юз берган ўзгаришлар, охир-оқибат унинг кўплик шаклига нисбатан бирлик сон маъносини касб этиши ва шу каби фикрлар исботлаб бўлмайдиган гаплардир. Таърифдаги «Асли бола каби формага биринчи галда “умуман” маъноси хос» жумласида «умуман бола» бирикмаси ҳодисанинг моҳиятини жуда тўғри қайд этади. Бу бирикма шаклсиз отнинг воқеликни (болани) номлашини, унинг грамматик маънога дахлсизлигини билдиради ва ҳозир ҳам шундай. Ҳудди шу моҳият асосида иш олиб борилганида эди, шубҳасиз, отнинг шаклсиз ҳолати ҳакида тўғри хulosаларга келинган бўлур эди.

Отнинг бош келишик, феълнинг бош нисбат тури ҳакида фикр юритилган ўринларда айтилдики, ўзбек тилида келишик ва нисбат ка-

¹ Ш о а б д у р а ҳ м о н о в Ш. ва бошқалар. Келтирилган асар, 217-218-б.

² Ўзбек тили грамматикаси. И. Морфология. Тошкент: 1975. 105-б.

тегориялари, уларни шакллантирувчи парадигмалар бор, лекин ноль кўрсаткичли от ва ноль кўрсаткичли феълни келишик ва нисбат парадигмасига киритиш мумкин эмас (Бунинг сабаби ҳам айтилди). Ноль кўрсаткичли (шаклсиз) отнинг сон шакли эмаслигини, кўплик шакли билан зидлана олмаслиги, демакки, парадигма ҳосил қила олмаслигини унинг шаклсизлиги асосида асослаш, англаш яна ҳам осонрок кўчади.

Ўзбек тили морфологиясига оид ишларда парадигма, унинг аъзоларининг моҳияти жуда тўгри ва аниқ таърифланган. Уларда хусусий белгисига кўра ўзаро фаркли, умумий белгисига кўра бирлашувчи сўз шакллари парадигмани ташкил этиши таъкидланади: “Парадигма аъзолари ўз ичидаги ўзаро зидлик муносабатида бўлади. Ана шу муносабат парадигма аъзосини тўғри тасвирилаш ва унинг системадаги қийматини тўғри белгилаш имконини беради”¹. Масала-га ана шу фикрлар асосида ёндашилганда ҳам “бирлик сон шакли” деб қаралаётган шаклсиз отни бирлик сон шакли, умуман, сон шакли ҳисоблаш асоссиз эканлиги маълум бўлиб қолади. Хусусий маъноси билан фарқланувчи, умумий маъноси билан бирлашувчи сўз шакллари парадигмани ҳосил қиласар экан, бу факт шаклсиз отни билан кўплик шаклининг ўзаро зидланиши, шундай муносабатда бўлиши ҳақида гапиришга ўрин қолдирмайди. Демак, отнинг ноль кўрсаткичли шакли кўплик сон шаклига зидланади, шу асосда от туркумига хос сон категорияси юзага келади деган ғаплар якка ҳодисалар (бу ўринда кўплик шакли) категория ҳосил қилмайди, деган ақида асосида иш кўриш оқибатида юзага келган қараш, шу йўл билан уни асослашга ҳаракат қилиш билан юзага келган қуруқ ғаплардан бошқа нарса эмас. Шу боис ҳам бу фикрлар ҳанузгача ўз исботини топгани йўқ ва топиши мумкин ҳам эмас.

Бу масалада эътиборга лойиқ яна бир факт шуки, ўзбек тилида *сон категорияси*, *кўплик категорияси* терминлари кўп ишлатилади. Лекин “бирлик категорияси” термини кўлланганини учратмадик. Бу – бир томондан. Иккинчи томондан, адабиётларда бирлик сон тури борлиги тан олинса-да, лекин, асосан, кўплик шаклининг маъноси (маънолари) ва бошқа хусусиятлари ҳақида фикр билдирилади. Бирлик сон шакли ҳақида эса, яъни унинг маъноси (маънолари) ва бошқа

¹ Н у р м о н о в А. ва бошкалар. Ўзбек тилининг назарий грамматикаси. Морфология. Тошкент: Янги аср авлоди, 2001. 101-б.

хусусиятлари ҳақида ҳеч гап йўқ. Бунинг ҳам сабаби бор, албатта, яъни ўзи йўқ нарсанинг маъноси, моҳияти ҳақида нима ҳам дейиш мумкин?!

Сўз охирида яна бир ҳодисага эътиборни қаратмоқчи эдик. Сўз шакли ҳақида умумий маълумот берилган ўринларда айтилдики, сўз шакллари, жумладан, парадигматик шакллар бир-биридан эмас, балки сўзнинг туркумлик маъноси асосида ясалади. Бу гап отнинг кўплик шакли ясалишига ҳам таалуқли, яъни кўплик шакли ҳам -*лар* аффикси ёрдамида отнинг туркумлик маъноси – ‘предмет’ маъноси асосида ясалади. Отнинг шакл кўрсаткичига эга бўлмаган ҳолатини бирлик сон шакли деб ва унинг бирлик сон маъносини ифодалаши тан олинадиган бўлса, кўплик шаклининг бирлик шаклидан ясалишини тан олиш керак бўладики, бундай ҳодисани исботлаш мутлақо мумкин эмас. Чунки бундай бўлиши шакл ясалишида амал қиласидиган қонунга зиддир. Қолаверса, бир-бирига қиёсланиш бир турдаги тил бирликларида бўлади, сўз шакллари парадигмасида ҳам шундай. Яъни маълум бир парадигмага мансуб сўз шакллари бир-бирига қиёсланади, лекин шаклсиз бирлик билан сўз шакли бир-бирига қиёсланмайди. Демак, бирлик сон деб қаралётган шаклсиз тил бирлигининг (отнинг) -*лар* аффикси билан ясалувчи кўплик шаклига нисбатланиши ҳақида гап бўлиши мумкин эмас. Бу тил бирлиги ҳам, яъни шаклсиз от ҳам грамматик категорияга бетараф. Унинг хусусиятларини ёритишида унинг “бетараф”лиги асосида иш кўриш тўғри хulosаларга келиш имконини беради.

Хуллас, ўзбек тилида отнинг бирлик сон маъносига эга бўлган ва кўплик сон шаклига зидланадиган ноль кўрсаткичли шакли йўқ. Шундай шаклни бор дейиш шаклсиз отнинг моҳиятини ёритишига тўскинлик қиласи, холос. Бунинг ўрнига отнинг грамматик (морфологик) бирлик ҳисобланмайдиган, шаклсиз ҳолати мавжудлигини, бунинг қонуний ҳолат эканини, ўзига хос имкониятларини тўла ёритиши илмий, амалий жиҳатдан муҳим аҳамият касб этадики, масаланинг шу томонига эътиборни қаратиш асосий вазифа ҳисобланади.

Феъл туркумига оид грамматик категориялар ҳақида фикр юритилган ишларда бўлишли-бўлишсизлик категориясининг келтирилиши маълум. Бу ишларнинг деярли барчасида бўлишли турнинг шакл кўрсаткичига эга эмаслиги (ноль кўрсаткичли шакл экани), бўлишсиз

шаклнинг асосан -ма аффикси билан ҳосил қилиниши, бўлишли шаклнинг тасдиқ, бўлишсиз шаклнинг инкор маъносига эгалиги айтилади. Бу ўринда бўлишли ва бўлишсизлик шаклларининг маъносиги (маънолари), кўлланишидаги хусусиятлари ҳақида батафсил тўхташни лозим топмаймиз. Фақат бўлишли-бўлишсизлик ва тасдиқ-инкор ҳодисаси ҳамда “ноль кўрсаткичли шакл” деб таърифланувчи “шакл” ҳақида ўз мулоҳазаларимизни билдириш билан чекланамиз.

Аввало айтиш керакки, бу ҳодиса “бўлишли-бўлишсизлик категорияси” деб номланса-да, аслида тасдиқ ва инкор ҳодисаси ҳақида гап боради. Таърифларга эътибор берайлик: “Ҳар бир феълнинг бўлишли ёки бўлишсиз формада туриши унинг феъллик белгиларидан бири-дир. Бўлишли феъл тасдиқ билдиради, бўлишсиз формадаги феъл инкор билдиради”... “Феълнинг бўлишли формаси инкор формасининг йўклиги билан характерланади¹. “Бўлишли ёки бўлишсиз формада бўлиши феълга ҳос асосий хусусиятлардан ҳисобланади. Ҳар қандай феъл ё бўлишли ёки бўлишсиз формада бўлади. Бўлишли форма ҳаракатнинг тасдиғини, бўлишсиз форма эса инкорини билдиради: ёзди – ёзмади. Бўлишли форманинг маҳсус грамматик кўрсаткичи йўқ”². “Феъллар бўлишли ва бўлишсиз шаклда бўлади. Феълнинг бўлишли шакли ҳаракатнинг бажарилиши ҳақида тасдиқни билдиурса, бўлишсиз шакли эса ҳаракатнинг бажарилиши ҳақида инкорни билдиради... Феълнинг бўлишли шакли маҳсус аффиксга эга эмас”³.

Бу таърифларни ўқигач, қуйидаги бир саволнинг тугилиши табиий, яъни: “Феълга ҳос бу категориянинг моҳияти тасдиқ ва инкорни ифодалаш бўлса, нима учун у “тасдиқ ва инкор категорияси” деб аталмайди, шундай аташ мумкин эмасми?” Бизнингча, мумкин эмас. Чунки тасдиқ ва инкор – тафаккур шакли бўлмиш ҳукм билан боғлик ҳодиса. Ҳукм эса “доимо тасдиқ ёки инкор шаклидаги фикрдан иборат бўлади... Ҳукмлар тилда ... асосан дарак гаплар орқали ифодаланади. Фақат дарак гаплардагина фикр тасдиқ ёки инкор ҳолда бўлади”⁴.

Демак, тасдиқ ёки инкор феълларга (феъл туркумига) ҳос тушунча эмас, феълнинг “бўлишли” ва “бўлишсиз” деб аталаётган шакли тасдиқ ёки инкор маъносини билдиrmайди. Шунинг учун

¹ Ф у л о м о в А. Кўрсатилган иш. 7-,8-б.

² Ўзбек тили грамматикаси. I т. Морфология. 455-б.

³ Т у р с у н о в У. ва бошкалар. Кўрсатилган иш. 317-б.

⁴ Фалсафа. Комусий лугат. 491-492-б.

ҳам феълларга ҳос бу ҳодиса учун “бўлишли-бўлишсизлик категорияси”, “бўлишли-бўлишсизлик шакли” терминлари қўлланган деб ўйлаймиз. Тўгри, “бўлишли”, “бўлишсиз” сўзлари ҳодисанинг моҳиятини аниқ қайд эта олмайди (Тилда бундай лугавий бирликлар йўқ). Лекин ҳодисанинг моҳиятини тўғри ва аниқ белгилагунча ҳамда уни тўғри ифодалайдиган термин топилгунча, мавжуд терминларнинг ўзини қўллаб турган маъқул.

Асосий гап терминда ҳам эмас. Масаланинг муҳим томони шундаки, ўзбек тили материаллари бу тилда “бўлишли-бўлишсизлик категорияси” ҳамда “бўлишли шакл” борлигини тасдиқламайди. Шунингдек, тасдиқ ва инкор, юқорида кўрилганидек, гапга (фикрга) ҳос. Феъллар эса, биринчидан, бўлишсизликни билдирувчи шаклга эга эмас, бино-барин, “бўлишли маъно” хақида гапириш ҳам мумкин эмас. Иккинчидан, феълнинг -ма аффикси, эмас, йўқ ёрдамчилари билан ясаладиган шакллари инкор эмас, бўлишсизлик маъносини билдиради.

Дарак гапнинг кесими бўлишсиз шаклдаги феъл билан ифодалангандаги, гап инкор мазмунли бўлади. Лекин шундай ҳолларда ҳам инкор маъноси гапга (фикрга) оид бўлиб, бўлишсизлик маъноси феълга (феълнинг бўлишсиз шаклига) ҳос бўлади. Масалан, *Мажслис ўз вақтида боишланмади* гали инкор мазмунли гап, *боишланмади* феъл шакли эса бўлишсизликни, яъни харакатнинг юзага келмаганини, бўлмаганлигини билдиради. Аникроқ қилиб айтганда, харакатнинг юз бермаганлиги (бўлмаганлиги) маъноси шу феъл шаклининг ўзига ҳос¹.

Феълнинг харакат номи, сифатдош ва равишдош шакллари -ма аффикси билан (бўлишсиз шаклда) қўлланганида, унинг инкорга дахли йўклиги (факат бўлишсизлик ифодаланиши) янада ойдинлашади. Куйидаги мисолларга эътибор берайлик: *Бу соқеани ҳеч кимга айтмасликка қарор қилди. Тўйга таклиф этишмаган килишлар ҳам келди. Хонага рухсат сўрамай кирди.* Учала гап ҳам тасдиқ мазмунли. Улардаги харакат номи, сифатдош ва равишдош бўлишсиз шаклда ва бўлишсизлик маъносини билдиради, холос. Маълумки, кесимлар феълдан бошқа сўзлар билан ҳам ифодаланади ва эмас, йўқ сўзлари улар таркибида қўллангандаги, инкор ифодаланади. *Хослининг сатҳи унчалик катита эниас.* Бу факт ҳам инкорнинг феълнинг бўлишсиз шаклига дахли йўклигини кўрсатади.

¹ Баъзи ишларда феълга ҳос бўлишсизлик (“инкор”) маъноси шундай изохланади ҳам. Қаранг: Ғуломов А. Кўрсатилган иш, 7-б; Турсунов У. ва бошкалар. Кўрсатилган асар, 317-б.

Феълнинг бўлишли-бўлишсизлик категорияси ҳақида фикр юритилган ишларда инкор маъносининг *на* ёрдамчисини такрор қўллаш билан ифодаланиши айтилади: *У на ўқиди, на ёзди каби*. Бундай гапларда инкор ифодаланиши тўғри. Лекин бу ходисани феълнинг бўлишсизлик шакли хисоблаш ва бунда бўлишсизлик ифодаланиши ҳақида гапириш тўғри бўлмайди.

Маълум бўлдики, гап мазмунига (фикрга) оид инкор билан феъл шаклига хос бўлишсизлик маъносини фарклаш керак. Тасдиқ ва бўлишслик ходисаси буни янада очикроқ кўрсатади.

Бўлишли-бўлишсизлик ҳақида фикр юритилган ишларнинг барчасида бўлишли шаклнинг маҳсус кўрсаткичи йўқлиги (ноль кўрсаткичли шакл экани) эътироф этилиши юкорида айтилди: *келди – келмади, ёзди – ёзмади* каби. Шунингдек, бўлишсиз шаклнинг, бўлишслик маъносининг бўлишсиз шаклга зидланишида белгиланиши ҳам эътироф этилади. Аслида эса феъллар (феъл туркуми) бўлишслик маъносини ифодаловчи шаклга эга эмас. Уларни “бўлишли шакл экани, бўлишсиз шаклга ва унинг маъносига зидланнишда белгиланиши” ҳақидаги фикр куруқ гаплардир, холос. Ҳатто шундай гапларнинг ўзи феълнинг бўлишли шакли (шаклнинг шундай тури) борлигини эмас, аксинча, йўқлигини тан олиш бўлади. Чунки морфологик бирликларнинг ўзаро зидланиши (зидлиги) ҳақида гапириш учун зидланувчининг ҳар бири зидланувчи маънога ва уни ифодаловчи шаклга эга бўлиши шарт. Шаклсиз бирлик (сўз) билан шаклли бирлик (сўз шакли) ўзаро зидланмайди (Бу ҳақда юкорида ҳам гапирилди).

Ноль кўрсаткичли шакллар ҳақида фикр юритилган ўринларда кўп бора таъкидланадики, мустакил сўзлар нарса (предмет), белги ёки ҳаракатни номлаш (аташ) вазифасига эга. Масалан, *гул, яхши, сўрамоқ* сўзлари шу холатида от, сифат, феъл туркумига хос бирор грамматик шаклга (грамматик шаклга хос маънога) эга эмас. Лекин бу сўзларнинг ҳар бири муайян нарса, белги, ҳаракатни қайд этади, номлайди. Қайд этилар (ифодаланаар) экан, ўз-ўзидан, у бор нарса, бор белги, бор ҳаракат холатида бўлади. Бошқача айтганда, бу сўзлар муайян нарса, белги, ҳаракатни “борлайди” (сунъийроқ бўлса-да, шу сўзни кўлладик). Демак, мавжудлик, бўлишслик тушунчаси шу сўзларнинг номлаш (аташ) хусусияти билан боғланган. Бу тушунчани ифодалаш учун мазкур сўзларнинг қандайдир

шаклда (сўз шаклида) бўлишига эҳтиёж йўқ. Уларнинг инкори, бўлишсизлиги эса инкор, бўлишсиз маъноли маҳсус бирликлар (-ма, эмас, йўқ кабилар) ёрдамида ифодаланади: *гул эмас, яхши эмас, сўраганим йўқ* каби.

Маълум бўлдики, бўлишилик тушунчаси (маъноси) феълнинг, бошқа сўз туркумларига мансуб сўзлардаги каби, номлаш (аташ) вазифаси билан боғлиқ ҳолда воқеланади. Бу эса бўлишиликнинг ифодаланиши учун тарихан ва ҳозир ҳам эҳтиёж бўлмаганлигини, эҳтиёж йўклигини, шу боис ўзбек тилида феълнинг бўлишиликни ифодаловчи маҳсус шакли юзага келмаганлигини аниқ тасдиқлади. Шундай экан, ўзи йўқ “шакл”ни бор деб, уни “ноль шакл” (“ноль кўрсаткичли шакл”) деб аташ, ўзи йўқ нарсанинг (“шакл”нинг) “ўзига хос хусусиятлари” ҳақида куруқ гапларни айтиш тил ҳодисасининг моҳиятини тўгри ёритишга тўқсинглик киласи, ҳолос ва бунга гувоҳ бўлиб турибмиз.

Хуллас, ўзбек тилида феъл фақат бўлишсиз шаклга эга. Феъл туркумининг морфологик системаси таҳлил этилганда, шу шаклнинг маъноси, қўлланишидаги хусусиятлари ёритилса, шунинг ўзи кифоя. Бу билан ҳеч нарса йўқотилмайди. Аксинча, биринчидан, ўзбек тили учун характерли бўлган ҳодиса тўгри, аниқ ифодасини топади, бу ҳодисани тушунтириш ва тушуниш жуда осонлашади. Иккинчидан, ҳодисанинг моҳиятини аниқ қайд эта олмайдиган “бўлиши-бўлишсизлик” терминидан воз кечиб, “феълнинг бўлишсизлик шакли” ёки “инкор шакли” терминини қўллаш мумкин бўлади. Бу билан гапга (фикрга) хос инкор ҳодисаси билан феълга хос инкор бир хил бўлиб қолмайди. Чунки, биринчидан, ҳукмга хос инкор ҳамма вақт тасдиқка зидланышда бўлади (тасдиқнинг зидди бўлади). Феълда эса, юқорида кўрганимиздек, тасдиқ шакли йўқ. “Инкор шакли” деб аталадиган шакллар эса факат феълга хос ва феъл билдирган ҳаракатнинг бажарилмаслигини-бажарилишнинг инкорини ифодалайди.

Демак, феълнинг шаклсиз ҳолати, “бирлик сон”, “бош келишик”, “бош нисбат” деб юритилаётган тил бирликлари каби, морфологик категорияга бетараф, парадигматик шакллар билан муносабатда бўлмайдиган тил бирлигидир.

Ноль шакл деб юритилаётган бирлик сон, бош келишик, бош нисбат ва бўлишсиз “шакллар” ҳақида айтилганлардан маълум

бўлдики, уларнинг барчаси шаклсиз, грамматик (морфологик) категорияларга бетараф тил бирликларидир. Ана шу бетарафлик уларнинг тилда парадигматик шакллардан фарқли хусусиятларга эга бўлган тил бирликлари сифатида амал қилишини белгилайди. Ҳатто грамматик (морфологик) категорияларга эга бўлган сўз туркумларида, масалан, от ва феъл туркумларида шундай тил бирликлари, яъни бетараф тил бирликлари мавжудлигининг ўзи ҳам тилда шундай бирликларга эҳтиёж борлигини қўрсатади.

Бетараф тил бирликлари (“бирлик сон”, “бош келишик”, “бош нисбат”, “бўлишли шакл” деб юритилаётган тил бирликлари) туркумлик маъноси билан от ва феъл туркумларига мансуб бўлади. Ана шу хусусиятнинг ўзи, яъни муайян сўз туркумига мансублик от ва феълларга хос категориал белгидир. Чунки туркумлик маъноси асосида гурухланиш ҳам категорияланиш ҳисобланади, ҳар бир сўз туркуми категориал гурух (категория) ҳисобланади. Ҳар бир туркумга мансуб сўзлар ҳам категориал бирлик ҳисобланади. Демак, мазкур тил бирликларининг морфологик категорияларга дахли йўқ. Шу боис бундай тил бирликларининг моҳияти, маъно ва вазифаси ўзи мансуб бўлган сўз туркуми доирасида тадқиқ этилади.

Бу тил бирликларига “ноль қўрсаткичили шакл”, “ноль шакл” тамгасини ёпишириш мумкин эмас. Бетарафлик билан шакл қўрсаткичига эга эмаслик (ноль қўрсаткичлилик) бутунлай бошқабошқа ходисалардир. Бу ҳақда фикр юритишдан олдин “бетараф шакл” ҳақидаги қарашларимизга муносабат билдирилган бир мақолага ўз мулоҳазаларимизни билдиришни лозим топамиз.

Бирлик сон, бош келишик, бош нисбат ва бўлишлилик “шакли” ҳақида эълон қилинган мақолаларимиз билан танишган баъзи тилшунносляримиз бу шакллар парадигматик шакллардан чиқарилмоқчи, деган хаёлга бораётганга, уларда шундай тасаввур пайдо бўлаётганга ўхшайди. Р. Сайфуллаева, Ш. Шаҳобиддиноваларнинг «Ўзбек тили ва адабиёти» журналида чоп этилган мақоласида шундай тасаввур, шундай тушунча ўз ифодасини топган.

Муаллифларнинг фикрича, бу муаммо «лисоний парадигмалар структураси ва бирликларининг табиати билан шуғулланган юзлаб тилшунносляр ишида муҳокама этилди. Ўзбек тилшуннослигида ҳам бу муаммо – истаган турдаги лисоний категория/парадигмада шу парадигманинг бошқа аъзоларидан семантик-функционал жиҳатдан жид-

дий фарқланадиган битта нейтрал бирликнинг зарурийлиги ва у бу парадигмада ўзига хос вазифа бажариши, парадигма бутунлигини таъминлаши, парадигманинг ҳам маркази, ҳам умумий намояндаси (репрезентанти) сифатида намоён бўлиши ўрганилган¹. Шундан кейин бу муаммо бўйича эълон қилинган ишлар кўрсатилиб, сўнгра проф. Ҳ. Нематовнинг монографиясида лисоний микросистеманинг бундай бирлигига берилган таъриф келтирилади: «Грамматик категория шакллари сирасида биттаси шу категориянинг бошқа аъзолари учун хос бўлган белги-хусусият ва вазифаларга нисбатан нейтрал, бефарк бўлиши шарт. Бу категория шаклларининг ҳар бири учун зарур ва имконли бўлган маъно, вазифа хусусиятлардан ҳеч бири нейтрал шакл учун мажбурий/зарурий ҳам, имконсиз ҳам эмас; у қўшимча семантический, лексик, грамматик, контекстуал ва х.к. воситалар ёрдами ва таъсирида бундай маъно ва вазифаларининг барчасини ифодалай олади. Нейтрал шакл ўзи мансуб бўлган грамматик категориянинг умумий намояндаси (репрезентанти) мавқеида бўлиб, категориянинг барча шаклларини бир-бирига боғлаб, унинг бутунлигини, шу категориянинг бошқа категориялар билан алоқаларини таъминлайди»².

Аввало айтиш керакки, бу муаммони неча юзлаб тилшунослар муҳокама этгани эмас, шунча муҳокамадан сўнг унинг ҳал этилган ёки ҳал этилмаганлиги муҳимдир. Ҳал этилган бўлса, ҳал этилган иш ёки ишлар келтирилиши керак эди. Лекин бундай иш (ишлар) кўрсатилмаган. Маколадан маълум бўлишича, муаллифлар ўзбек тилшунослигида бу муаммо Ҳ. Нематов томонидан ҳал этилганлигини тан оладилар, унинг бу ҳақдаги фикрларини келтирадилар. Бунга қарши эмасмиз, албатта. Гап шундаки, Ҳ. Нематовнинг ишларидан биз ҳам хабардормиз. Лекин уларда, жумладан, Л. Ҳ. Нематовнинг номзодлик диссертациясидан келтирилган фактда «бетараф бирлик» деб олинган бирликнинг парадигмага мансуб бўлиши ва унинг моҳияти ҳакида билдирилган фикрларни ўзбек тили материаллари тасдиқламайди. Шундай экан, мақола муаллифлари ўз фактлари, материаллари билан бу ишларда «бетараф бирлик» ҳакида билдирилган фикрларни асослашлари, тасдиқлашлари керак эди. Акс ҳолда, ўзбек тилшунослигида маълум бўлган фикр-мулоҳазаларни такрор келти-

¹ Сайфуллаева Р., Шахобиддинова Ш. Нейтрал лисоний бирлик формал ва структурал тилшуносликда / Ўзбек тили ва адабиёти, 2008. 5-сон. 64-бет.

² Ўша макола, ўша бет.

риш фан учун нима беради?! Демак, мақолада бетараф тил бирлиги ҳақидаги бизнинг фикрларимизни Ҳ. Неъматовнинг фикрлари билан инкор этишга ҳаракат қилинган, холос. Шундай экан, журналдаги мақола ҳақида эмас, асосан, Ҳ. Неъматовнинг бетараф тил бирлиги ҳақидаги фикрларига ўз муносабатимизни билдиришга тўғри келади.

1. Морфологик категория, парадигматик шакллар ҳақида, уларни ташкил этувчи бирликлар ҳақида гап борар экан, факат сўз шакли, морфологик бирлик назарда тутилиши, шу тил бирлиги билан боғлик ҳодисалар ҳақида фикр юритилиши керак бўлади. Шундай экан, сўз шакли ҳисобланмайдиган тил бирлиги билан шакл кўрсаткичига эга бўлмаган шаклни, яъни ноль кўрсаткичли шаклни бир-биридан аник фарқлаш талаб этилади. Чунки шаклсиз тил бирлиги билан сўз шакли бир-биридан фарқли бирликлардир. Бунга бефарқ қараш сўз шакли, парадигматик шакллар, уларни шакллантирувчи аъзоларнинг моҳиятини ёритишда турлича хатоларга йўл қўйилишига олиб келади. Буни Ҳ. Неъматовнинг келтирилган ишида ҳам кузатиш мумкин.

“Бетараф бирлик” деганда, тил бирлигининг шакл кўрсаткичисиз бўлиши эмас, балки сўзнинг шаклсиз бўлиши, шаклсиз ҳолати – шаклсиз сўз назарда тутилади. Шунинг учун ҳам, яъни шаклсиз бирлик бўлгани учун ҳам морфологик категорияга, парадигмага мансуб бўлмайди, бетараф бирлик ҳисобланади. Сўз шакли эса, кўрсаткичли ёки шакл кўрсаткичига эга бўлмаслигидан қатъи назар, морфологик бирлик сифатида категорияга, парадигмага мансуб бўлади. Ҳ. Неъматовнинг монографиясида, ҳатто журналдаги мақолада нейтрал бирликнинг қўшимчали ва қўшимчасиз бўлиши тасдиқланади¹. Ана шу тушунча ўзига хос хатоларнинг юз беришига сабаб бўлган.

2. Бетараф тил бирлиги билан ноль кўрсаткичли шаклни фарқламаслик оқибатида «Грамматик категория шакллари сирасида биттаси шу категориянинг бошқа аъзолари учун хос бўлган белги-хусусият ва вазифаларга нисбатан нейтрал, бефарқ бўлиши шарт. Бу категория шаклларининг ҳар бири учун зарур ва имконли бўлган маъно, вазифа хусусиятлардан ҳеч бири нейтрал шакл учун мажбурий/зарурий ҳам, имконсиз ҳам эмас; у қўшимча семантик, лексик, грамматик, контекстуал ва ҳ.к. воситалар ёрдами ва таъсирида бундай маъно ва вазифаларининг барчасини ифодалай олади. Нейтрал

¹Қаранг: Ўша макола. 64-65- бетлар.

шакл ўзи мансуб бўлган грамматик категориянинг умумий намоянда-си (репрезентанти) мавқеида бўлиб, категориянинг барча шакллари-ни бир-бирига боғлаб, унинг бутунлигини, шу категориянинг бошқа категориялар билан алоқаларини таъминлайди», деган гаплар айтиладики, бу гаплар сўз шакли (яъни морфологик бирлик) мисолида тил қонуниятлари асосида ўзбек тили материаллари билан исботланмаган, исботланиши мумкин ҳам эмас. Бу гаплар юзасидан қуидаги саволлар бўлиши табиий ва жавоб берилиши ҳам шартdir.

Биринчидан, ҳар қандай сўз шакли (шакл кўрсаткичига эга ёки эга эмаслигидан қатъи назар) морфологик бирлик сифатида, ўз маъносига эга бўлади (бошқача бўлиши мумкин эмас). Шу сабабли ҳар бир сўз шакли парадигмани ҳосил қилувчи бирлик, парадигма аъзоси хисобланади. Шундай экан, грамматик категория шакллари сирасида биттасининг шу категориянинг бошқа аъзолари учун ҳос бўлган белги-хусусият ва вазифаларга нисбатан нейтрал, бефарқ бўлиши, умуман, тилда шундай сўз шакли бўлишини қандай исботлаш мумкин? Бизнингча, исботлаш мумкин эмас; бу нарса бирор ишда, жумладан, Ҳ. Нематовнинг мазкур ишида ҳам исботланмаган. Масалан, келишиклар парадигмасидаги ҳар бир сўз шакли хусусий белгисига ва уларни бирлаштирувчи умумий белгига эга. Шу белгиси билан улар бир парадигмани (гурухни, бутунликни) ташкил этади. Шундай хусусиятта эга бўлмаган тил бирлиги қандай килиб категория парадигмасига мансуб шакл – нейтрал шакл бўлиши мумкин?! Монографияда айтилган гапларнинг бирортаси бунга жавоб бўла олмайди. Иккинчидан, нейтрал шакл парадигманинг барча аъзоларига ҳос маъно ва вазифаларда қўллана олар экан, ўз шакл ва маъносига эга бўлган тил бирликларининг (масалан, келишик шаклларининг) мавжудлигини нима билан исботлаш мумкин, яъни ортиқчалик тил табиатига тўғри келмайди-ку! Учинчидан, парадигма аъзолари бир умумий белгиси асосида парадигмани, бутунликни ташкил этар экан, парадигма аъзоларини бир-бирига боғлайдиган, унинг бутунлигини таъминлайдиган қандайдир бетараф бирлишка тилда эҳтиёж бўлиши мумкинми? ва ҳоказо. Бу саволларнинг бирортасига жавоб йўқ ва бўлиши мумкин ҳам эмас. Шундай экан, бетараф шакл (нейтрал шакл) ҳақидаги гапларнинг барчаси куруқ гаплигича қолаверади. Ана шундай гапларга йўл қўймаслик учун аввало, бетараф (шаклсиз) тил бирлигини шакл кўрсаткичи бор ёки шакл кўрсаткичи йўқ бўлган сўз шаклидан

фарқлаш, морфологик системага хос ҳодисаларни факат сўз шакли мисолида тадқиқ этиш, баён қилиш талаб этилади. Шу талаб нуқтаи назаридан ёндашилганда, ўзбек тилшунослигига бирор ишда бу икки тил ҳодисаси бир-биридан фарқланганини кўрмаймиз. Бу эса бетараф тил бирлиги билан сўз шаклини тадқиқ этишда улардан ҳар бирининг моҳиятини тўла ва тўғри ёритишга тўсқинлик қиласиди, ҳозирда бунинг гувоҳи бўлиб турибмиз.

Ҳ. Неъматовнинг ишидан келтирилган иқтибосда турли грамматик категорияларда қуйидагилар нейтрал бирлик мавкеида бўлиши қайд этилади:

– сўз туркумлари тизимида – морфологик энг ривожланган феъл ва диффуз тақлид туркумлар;

– сон категорияси тизимида – бирлик сон шакли;

– келишиклар тизимида – бош келишик шакли;

– шахс-сон тизимида – III шахс, бирлик сон шакли;

– феълнинг функционал формалари тизимида – сифатдошлар;

– замон тизимида – ҳозирги-келаси замон (аорист) шакли;

– майллар тизимида – хабар/дарак майли¹.

Шу иқтибос асосида мақола муаллифлари қуйидаги фикрни билдирадилар: «Бу иқтибосдан – бундан қарийб 40 йил олдин шарҳланган умумий қонуниятдан кўриниб турибдикি:

– биринчидан, нейтрал бирлик қўшимчали ҳам, қўшимчасиз ҳам, ҳатто бир куршовда қўшимчали (чунончи, шахс/сон тизимида III шахс бирлик сон шакли ёзади сўзшаклида -ди қўшимчасига эга), қўшимchasiz ҳам (чунончи, ёзди шаклида) бўлиши мумкин; ...»².

Кўриниб турибдикি, мақола муаллифлари Ҳ. Неъматов фикрларининг ўз материаллари билан далиллаётганлари йўқ, факат уни шарҳлаяптилар, тушунтиряптилар, холос. Бу билан Ҳ. Неъматов қарашларини асослаш, тасдиқлаш мумкин эмас. Ҳақиқатда ҳам, шундай бўлган.

Ҳ. Неъматовнинг ишидан келтирилган иқтибос ҳақида фикр билдиришига келганда, аввало шуни айтиш керакки, бетараф тил бирлиги билан сўз шакли, яъни морфологик бирлик умуман фарқланмаган (Бу нарса факат Ҳ. Неъматов ишлари учун эмас, умуман, ўзбек тилшунослиги учун хос бўлган ҳолат). Масалан, морфологик категорияга, пар-

¹ Ўша макола, 64- бет.

² Ўша макола, 65- бет.

дигмага бетараф бўлган отнинг шаклсиз ҳолатлари билан категорияга мансуб бўлган, парадигманинг аъзоси хисобланувчи III шахс шакли, ҳозирги-келаси замон шакли бир хил факт деб, яъни бетараф (нейтрал) бирлик деб қараляпти. Ваҳлонки, «бирлик сон», «бош келишик», «бош нисбат», «бўлиши шакл» деб юритилаётган бирликларга хос умумий хусусиятлар «ноль кўрсаткичли шакл», «ноль шакл» деб юритилаётган тил бирликларига хос эмас. Ноль кўрсаткичли шакллар ҳар қандай ҳолатда морфологик категорияга, парадигмага мансуб бўлади ҳамда ўзига хос маънога ҳам эга бўлади (Буни исботлашга эҳтиёж бўлмаса керак). Шундай экан, уларнинг грамматик категория ва парадигмага бетараф (нейтрал) бирлик эканини тасаввур этиб бўладими?!

Ўзек тили тарихи ва ҳозирги ўзек тили материалларидан шу нарса маълум бўляптики, морфологик категорияга бетараф бўлган тил бирликлари тилнинг кейинги тараққиётида ҳам шундай тил бирлиги бўлиб қолади, яъни грамматик категория ва парадигмаларга кирмайди, демакки, грамматик шаклга ҳам эга бўлмайди. Чунки тилда шундай бирликларга (бетараф бирликларга) эҳтиёж бор, грамматик шаклларнинг бирортаси, ҳатто янгиси пайдо бўлган тақдирда ҳам, бетараф бирликлар ўрнини, улардан бирортасининг ўрнини боса олмайди. «Ноль кўрсаткичли шакл», «ноль шакл» деб қаралётган шаклларда эса тамомила бошқача ҳодисалар, бетараф тил бирликларида кузатилмайдиган белги-хусусиятлар мавжуд.

Энг асосий хусусияти шуки, улар грамматик категорияга мансуб бўлади. Шундай экан, албатта, грамматик маънога ҳам эга бўлади¹ ҳамда бу маъно қай тарзда бўлса ҳам, ифодаланади, воқеланади. Масалан, ижро майлининг (*дарак майли, ҳабар майли* деб ҳам юритилади) маҳсус кўрсаткич йўқ. Лекин бу майлга хос моҳият феълнинг замон шаклларининг ўзида воқеланади, яъни замон шаклларининг ўзи ҳаракатнинг воқеликка муносабатини кўрсатади². Демак, бу майл тури учун маҳсус кўрсаткич бўлиши учун эҳтиёж йўқ (Тил ортиқчаликка йўл кўймайди). Бу ҳодисага зид ўлароқ, тилдаги талаб эҳтиёж туфайли, янги-янги сўз шаклларининг пайдо бўлиши ҳам бор факт. Мақсад маъноли феъл шаклининг юзага келиши (*кўрмоқчи*) бунга мисол бўла олади³.

¹ Ана шунинг ўзиёқ уларни бетараф бирлик хисоблашга йўл кўймайди.

² Ҳожиев А. Феъл. Тошкент. 1973. 127-бет.

³ Ҳожиев А. -мокчи аффикси билан ясалган феъл формаси ҳакида // Ўзбек тили ва адабиёти, 1966, 4-сон, 25-29-бет.

Парадигмага мансуб шаклнинг нейтрал бирлик бўла олмаслиги-нинг асосий сабабини айтдик. Уларнинг кўрсаткичли ва кўрсаткичсиз бўлишининг эса ўз сабаблари бор. Масалан, ҳозирги ўзбек тилида -ган аффиксли сифатдошдан ясалувчи ўтган замон феълининг учинчи шахси шахс кўрсаткичига эга эмас: *боргандан*, *боргансан*, *борган*. Ҳозирги ва ҳозирги-келаси замон феълларининг учинчи шахси хам аслида шахс кўрсаткичига эга бўлмаган: *кеяпти*, *келади* шаклларида-ги -ти/-ди кўрсаткичлари *турур/дурур* боғламасининг қисқарувидан фақат учинчи шахсда қолган ва шу шахснинг кўрсаткичига айланган¹. Демак, тилда шунга эҳтиёж (аниқликка эришиш эҳтиёжи) ва унинг юзага келишига имконият ҳам бўлган. Агар учинчи шахс категорияга, парадигмага бетараф (нейтрал) бўлганида, бундай ҳодиса юз бермас эди ва ҳоказо. Бу фактлар хам бетараф тил бирликлари билан шакл кўрсаткичига эга эмаслик тамомила бошқа-бошқа ҳодисалар эканини аниқ тасдиқлайди.

Ана шу айтилганларнинг ўзиёқ кўрсатадики, бетарафлик, бетараф бирлик масаласи, мақола муаллифлари ўйлаганидек, бундан 40 йиллар олдин кимнингдир ишларида ҳал этилган эмас, ҳатто ўзбек тилшунослигида бу масалада ҳозир ҳам бир фикрга келинганича йўқ. Бизнинг ҳам бу масалани ҳал қилдик, деган даъвоимиз йўқ. Шу боис бу ҳақдаги гапни давом эттиришни лозим топмаймиз ва муаллифларнинг «бундай нейтрал бирликни (бирлик сон, бош келишик кабиларни – А.Х) категория бирликлари сирасидан, тизимидан чиқариб қўйиш мумкинми? мазмунидаги саволига қисқа тарзда ўз муносабатимизни билдирамиз. Муаллифлар бундай килиш мумкин эмаслигини Л.Х. Неъматованинг номзодлик диссертациясидаги факт ва фикрлар билан асосламоқчи бўлгандар-у, лекин асослай олмаганлар (Келтирилган фактнинг грамматик категорияга, парадигмага алоқаси йўқ).

Аслини олганда, бизнинг ишларимизда ҳам гап бетараф шаклларни категориядан чиқариш ҳакида бораётгани йўқ, балки кўриб ўтилган тил бирликларининг категорияга, парадигмага бетарафлиги ҳакида боряпти, шу нарсани исботлашга ҳаракат қилинди. Бу тил бирликларининг шу вактга қадар морфологик категорияларда берилаётганилиги сабабли бизнинг фикрларимиз муаллифлар назарида, уларни категория (парадигма)лардан чиқариш ҳаракатидек бўлиб ту-

¹ Булар ҳакида «Ўзбек тилида ҳозирги замон феъли» номли номзодлик диссертация-мизда (Тошкент, 1959) тўлиқ маълумот берилган.

юлган. Ахир парадигмага (категорияга) бетараф бўлган (категорияга, парадигмага мансуб бўлмаган) тил бирлигини категориядан чиқариш ҳақида гап бўлиши мумкинми? Демак, муаллифларнинг бетараф тил бирликларини категорияларга киритиш ҳақида мулоҳазалари бўлса, шу ҳақдаги фикрларини билишни истардик.

Ноль кўрсаткичли шакл, ноль шакл ҳақида айтилдики, булар категорияга бетараф бирлик эмас, балки категорияда бор, парадигмага мансуб бирликлар. Шундай экан, уларни категорияга киритиш ёки категориядан чиқариш ҳақида гап бўлиши мумкин эмас.

Категориал ва нокатегориал сўз шакллари

Категориал ва нокатегориал сўз шакллари масаласи ўзбек тилшунослигida тўғри ҳал этилмаган. Шу мавзуда фикр юритилган ишларнинг ўзиёқ фикримизни тасдиқлади. Бетараф тил бирлиги ва ноль шакл (ноль кўрсаткичли шакл) юзасидан юкорида билдирилган фикрмулоҳазаларимиз ҳам бу ҳақда аниқ тасаввур беради. Морфологик тил бирлигининг, яъни сўз шаклининг бу икки турини аниқ фарқламай, ҳар бирининг асосий моҳиятини аниқ белгиламай туриб, морфологик системага оид тил ҳодисаларини, уларнинг моҳиятини тўғри ёритиб бўлмайди.

Категориал ва нокатегориал сўз шакли ҳақида гап борар экан, аввало, уларни қандай белги асосида шундай икки турга ажратилиши масаласида аниқ ва тўғри хulosага келиб олиш керак бўлади, яъни фарқланишнинг асоси тўғри белгиланиши талаб этилади. Худди шу масалада шу вақтга қадар тўғри бир фикрга келинганича йўқ.

Ўзбек тили морфологиясига оид ишларда “категориал сўз шакли” деганда, морфологик категорияларга мансуб шакллар, яъни парадигмани хосил килувчи сўз шакллари назарда тутилади. Масалан, отнинг келишик ва эгалик категорияларини шакллантирувчи, феълнинг замон, шах-сон категорияларини шакллантирувчи сўз шакллари категориал сўз шакллари ҳисобланади. Ана шундай моҳиятга эга бўлмаган сўз шаклларининг барчаси “нокатегориал шакл”, “функционал шакл” каби номлар билан юритилади. Бироқ бу ҳол масалага илмий асосда ёндашишнинг эмас, балки “морфологик категорияга мансуб бўлса, категориал шакл, акс ҳолда, нокатегориал шакл бўлади” деган ўта жўн қарашнинг самарасидир. Шу боис ҳам масалага бу тарзда ёндашиш

уни тўгри ҳал этиш имконини бермади, аксинча, бу борада ҳақиқатга тўгри келмайдиган хulosаларга олиб келди.

Шакл ясалиши ва сўз шаклининг таркиби ҳақида билдирилган фикр-мулоҳазалардан маълум бўлдики, сўз шакли моҳиятан ўзаро фарқли бўлган икки тил бирлигидан ясалади: 1) сўздан (сўзнинг шакл-сиз ҳолатидан) унинг туркумлик маъноси асосида ҳосил қилинади; 2) сўзнинг муайян шаклидан ҳосил қилинади. Ана шу нарса сўз шаклларининг икки турини ва ҳар бир турнинг моҳиятини белгилайди, яъни шакл ясалиш асосининг қандай тил бирлиги бўлиши сўз шаклларининг моҳиятини белгилайди; биринчисида, яъни сўздан ясалганида – категориал шакл, иккинчисида (сўз шаклидан ясалганида), нокатегориал шакл ҳосил бўлади. Кўйида буларнинг ҳар бири ҳақида алоҳида-алоҳида фикр юритилади.

Категориал сўз шакли

Категориал шакл бирикмаси ‘категорияга мансуб’ маъносини, *нокатегориал шакл* бирикмаси ‘категорияга мансуб эмас’ деган маънони билдиради. Шундай экан, биринчи навбатда, “категория” турушунчасининг моҳиятини аниқ белгилаш керак бўлади. Шу мақсадга эришилса ва масалага категориянинг моҳияти асосида ёндашилса, сўз шаклининг иккала турини бир-биридан аниқ ва тўгри фарқлаш мумкин бўлади.

Ишимизнинг лексик системага бағишлиланган қисмида айтилдики, сўзлар лугавий маъноси асосида гурухларга бирлашади, гурухларни ташкил этади, бу гурухларнинг ҳар бири кичик бир лексик система хисобланади ҳамда шундай гурухларга нисбатан ҳам *парадигма*, *категория* терминлари кўлланади. Бунинг сабаби гурухнинг умумийлик белгиси асосида юзага келишидир. Масалага шу тушунча, яъни ‘категория’ тушунчаси асосида ёндашилганда, сўз туркумига нисбатан ҳам *категория* терминини кўллаш мумкин бўлади. Чунки сўз туркумидаги ҳам умумийлик ва хусусийлик белгиси, булар асосидаги ўзаро муносабат, боғланиш ҳодисаси мавжуд.

Қолаверса, “Умумлаштириш амалининг чегараси энг умумий тушунча, яъни категория”¹ экани хисобга олинса, туркумликини қайд этувчи маънони (тушунчани) категориал маъно хисоблаш тўгри

¹ Фалсафа. Қомусий луғат. 408-б.

бўлади деб ўйлаймиз. Шундай экан, категориал маъно (туркумлик маъноси) асосида юзага келадиган сўзлар гурухи, яъни сўз туркумлари ҳам категориялар хисобланади ва ҳар бир туркумга мансуб сўз ҳам категориал бирлик хисобланиши керак бўлади. Лекин у, айтиб ўтилган моҳияти билан, лексик системанинг тил бирлиги бўлмиш сўз (лексема)дан ҳам, морфологик системанинг тил бирлиги бўлмиш сўз шаклидан ҳам фарқланади¹. Туркумлик маъноси грамматик (морфологик) маъно эмас. Ана шу факт ҳам туркумлик маъносига эга бўлган шаклсиз сўзнинг грамматик категорияларга (парадигмаларга) бетараф бўлишини яна бир бор тасдиқлади. Бундан келиб чиқадиган яна бир муҳим хулоса шуки, сўзнинг туркумлик маъноси асосида ясалган ҳар қандай сўз шакли ҳам муайян категорияга (сўз туркумига) мансуб бўлади. Бу эса уларни категориал шакл хисоблаш мумкинлигини, шартлигини кўрсатади, шундай шакл хисоблашга асос бўлади.

Масалага шундай асос билан ёндашилса, ҳар бир сўз туркумидаги (асосан, от ва феъл туркумидаги) категориал шаклларни белгилаш осонлашади ҳамда тўғри хулосаларга келиш имкони тугилади. Аввалио, категориал шакллар камида икки ва ундан ортиқ, ўзаро муноса-батда, бир-бирига зидланишда бўладиган компонентлардан ташкил топади, деган фикр шаклларга хос асосий моҳиятни кайд эта олмайди.

От туркумига мансуб сўз шакли деб қаралаётган бирликнинг морфологик категорияга бетараф бирлик, шаклсиз бирлик экани, шунингдек, унинг кўплик шакли билан зидланишда бўла олмаслиги айтилди. Шундай экан, ўзбек тилида отнинг сон категорияси борлигини эмас, балки отнинг туркумлик маъноси асосида *-лар* аффикси ёрдамида ясаладиган кўплик шакли борлигини ва у от туркумига мансуб категориал шакл бўлишини тан олишга тўғри келади. От туркуми морфологиясида шу сўз шаклининг маъноси ва бошқа хусусиятлари ўрганилади.

Ана шундай моҳиятга эга бўлган от туркумига мансуб сўз шаклларидан бири *-ники* аффикси билан ясаладиган қарашлилик шаклидир. *От килиничи минганини* (Мақол). *Талабаларники, раисники..* Бу шакл ҳам отнинг туркумлик маъноси асосида ясалади ва шунинг ўзи уни от туркумига мансуб сўз шакли – категориал шакл хисоблаш учун

¹ Туркумлик маъноси, сўзларнинг туркумланиши билан бөглик ходисалар хакида маҳсус маколамизда кенг маълумот берилган: Ҳо ж и е в А. Ўзбектилшунослигининг долзарб муаммолари (б-мақола) / Ўзбек тили ва адабиёти, 2007. З-сон, 3-13-б.

асос бўла олади. *-лар* ва *-ники* аффикслари билан ясалган сўз шакли от туркумига мансуб бўлгани учун уларнинг таърифида туркумликни қайд этувчи сўз – *предмет* сўзи (*иахс ёки нарса* сўзи) қатнашади: *гуллар* – кўплик шакли: шакл ясалиш асосидан англашилган предметнинг кўплигини билдиради.

-ники аффиксли сўз шакли, аслида, қаратқич келишиги кўрсаткичи шаклига *-ки* аффиксининг қўшилишидан ҳосил бўладиган сўз шакли, яъни сўз шаклидан ясалувчи сўз шакли бўлган. Ундаги қаратқич келишиги кўрсаткичи ўз шаклини йўқотиши билан *-ники* морфемаси юзага келган: *-нин^ки->-ники*. Натижада *-ники* сўзнинг ўзидан (шаклсиз ҳолатидан) унинг туркумлик маъноси асосида категориал сўз шаклини ясовчи морфемага айланган.

Хуллас, от туркумидаги эгалик ва келишик категорияларига мансуб сўз шакллари ҳамда *-лар* аффикси билан ясалувчи кўплик шакли, *-ники* аффикси билан ҳосил бўладиган қарашлилик шакли категориал шакллар ҳисобланади.

Феъл морфологиясига оид ишларда факат морфологик категорияларга оид парадигматик шакллар категориал шакллар ҳисобланади. Категория (парадигма) ҳосил қилмайдиган феъл шаклларининг барчаси функционал ёки нокатериал шакл деб қаралади. Лекин масалага юкорида қайд этилган белги, яъни категориал шаклнинг туркумлик маъноси асосида ясалиш хусусиятидан келиб чиқилса, категория (парадигма) ҳосил қилмайдиган шаклларни ҳам категориал шакл ҳисоблаш кераклиги маълум бўлади. Масалан, феълнинг функционал шакллари деб қараладиган сифатдош ва равишдош шаклларининг барчаси феълнинг туркумлик маъноси асосида ясалади ва шу туркумга мансуб тил бирликлари – феъл шакллари ҳисобланади. Шунинг ўзи уларни категориал шакл ҳисоблаш учун асос бўла олади. Қолаверса, сифатдош ва равишдош шакллари замон категорияси (морфологик категория)нинг шаклланишида ҳам хизмат қиласи, яъни замон шаклининг таркибий қисми ҳисобланади: *келиман*, *келибсан*, *келибди* (*келиб* – ўтган замон эшитилганлик феълининг асоси); *келаман*, *келасан*, *келади* (*кела* – ҳозирги-келаси замон феълининг асоси); *ишилайман*, *ишилайсан*, *ишилайди* (*ишилай* – ҳозирги-келаси замон феълининг асоси). Демак, ўзбек тилидаги *-ган* аффиксли сифатдош шакли предметнинг ҳаракат-ҳолат белгисини билдириш (*келган меҳмон* каби) ва феълнинг ўтган замон шаклини ясаш учун хизмат қиласи. *-(и)б*, *-а/-й*

аффикслари ҳаракат белгисини билдирувчи феъл шаклини (*кулиб гапирди, тура қочди, югурга-югурча чарчади каби*) ясади, бу шакл эса ўтган замон ва хозирги-келаси замон шаклларининг асоси вазифасида қўлланади. Ҳар икки вазифасида ҳам қайд этилган сифатдош ва ра-вишдош шакллари категориал сўз шакли ҳисобланади: биринчиси па-радигма ҳосил қилмаслиги, иккинчиси эса парадигмага мансуб шакл бўлиши билан ўзаро фарқланади. Бу билан ҳар бир ҳодиса, унинг моҳияти тўғри талқин этилади.

От туркумiga мансуб *-ники* аффикси билан ясалувчи сўз шакли ҳақида фикр юритилган ўринда маълум бўлдики, бу шакл, асли нокатегориал шакл бўлган, кейинчалик категориал шаклга айланган. Бундай ҳодиса, яъни нокатегориал шаклнинг категориал шаклга айланishi феъл туркумida кўпроқ кузатилади (Булар хусусида нокатегориал шакллар ҳақида фикр юритилган қисмда маълумот берилади).

Хуллас, ҳар қандай тил ҳодисасининг моҳиятини белгилашда муайян тилнинг ўз материалларини тадқиқ этиш асосида хулоса чиқариш керак бўлади. Масалага шу талаб асосида ёндашилганда, ўзбек тилидаги отнинг кўплик шаклини, феълнинг бўлишсизлик шаклини, парадигма ҳосил қилмаслигидан қатъи назар, категориал шакл (морфологик тил бирлиги) ҳисоблашга эътиroz бўлиши мумкин эмас. Морфологик системанинг тил бирлиги, бинобарин, ўрганиш обьекти категориал сўз шаклларидир.

Нокатегориал сўз шакли

Ўзбек тилшунослигига “категориал шакл” деб аталиши мумкин бўлган сўз шакллари нисбатан яхши ўрганилган, уларнинг асосий хусусияти ҳақида бир хил фикрга келинган. Аникроқ килиб айтганда, ўзбек тили морфологик системасини худди шу турдаги сўз шакллари ташкил этади, шакллантиради. Шу билан бирга, баъзи сўз шаклларининг сўз шаклидан ясалиши, ўзбек тилида шундай ҳодиса ҳам борлиги ва моҳиятан категориал шакллардан тубдан фаркланиши ҳам айтилди. Тан олиш керакки, бундай сўз шаклларига ўзбек тилшунослигига етарли эътибор қаратилмаган, баъзилари умуман тилга олинмаган, айримларининг моҳияти ҳақида хато, бир-бирига зид фикр-мулоҳазалар билдирилган. Ваҳолонки, ўзбек тилида сўз шакли билан боғлиқ кўпгина тил ҳодисаларининг тўғри ва тўла ёритилиши

сўз шаклидан ясалувчи шакллар моҳиятининг тўгри белгиланишига ҳам боғлик. Демак, бундай сўз шакллари ва уларнинг амалиёти билан боғлик тил ҳодисаларининг моҳиятини ёритиш ўзбек тилшунослигининг муаммоларидан бири бўлиб турибди.

Бу турдаги сўз шакллари яхлит ҳолда (алоҳида тур сифатида) ўрганилмагани боис уларга нисбатан ягона термин ҳам қўлланмаган. Биз ҳам уларни категориал шаклга зидлаган ҳолда, уларга нисбатан “нокатериоал шакл” терминини қўллаб турамиз (Термин масаласига кейинроқ тўхталамиз).

Нокатериоал шакллардан ҳар бирининг моҳиятини, шунингдек, барчаси учун умумий хусусият(лар)ни тўғри белгилаш ва тўгри, аниқ тасаввур этиш учун уларни сўз туркumlари бўйича алоҳида-алоҳида ўрганиш яхши натижа беради. Бунда ҳар бир нокатериоал шаклнинг ясалишида асос (шакл ясалиш асоси) бўладиган шакл билан нокатериоал шакл ясовчини, ҳар бирининг моҳиятини аниқ белгилаш билан ҳар бир нокатериоал шаклнинг моҳиятини тўғри ёритиш имкони юзага келади.

От туркумига мансуб категориал шакллардан нокатериоал шакл ясалишида, асосан, -ча ва -ги морфемалари қўлланади. Ўзбек тилшунослигига оид бирор ишда бу морфемалар нокатериоал шакл ясовчи сифатида ўрганилмаган, умуман, бу икки морфема билан ясаладиган сўз шаклларининг моҳияти юзасидан бир фикрга келинмаган.

От туркумига оид категориал шакллардан нокатериоал сўз шакли ясалишида шакл ясалиш асоси вазифасида кўплик шакли, эгалик шакли ва жўналиш келишиги шакли қўлланади: *оталар+ча >оталарча, фикрим+ча >фикримча, уйга+ча>уйгача*.

Демак, -ча аффикси ёрдамида ясаладиган бу нокатериоал шаклларнинг ҳар бирини алоҳида ўрганиш керак бўлади. Чунки нокатериоал шаклнинг асоси (шакл ясалиш асоси)нинг қандай тил бирлигидан бўлиши нокатериоал шаклнинг моҳиятини белгилайди.

Хозирги ўзбек тилида -ча аффиксининг сўзга (сўзнинг шаклсиз ҳолатига) бирикиши ҳам бор. Лекин бу ҳол саноқли сўзлар доирасида учрайди ва бунда икки ҳодиса кузатилади: 1) бу сўзларда -ча аффиксининг мустақиллиги сезилиб туради: *осонликча< осонлик+ча, яширинчча<яширин+ча* каби: *Йўқтамаган ҳар кунинг йилча бўлурму, ҳай-ҳай.. Кўнгилгининг нозиклиги қилча бўлурму, ҳай-ҳай...* Қиноатда *Сайда филча бўлурму, ҳай-ҳай.* (С.Зуннунова). Лекин -ча аффиксининг

бундай кўлланиши саноқли сўзлардагина учрашидан ташқари, келтирилган мисолдаги *йилча*, *қилча*, *филча* сўз шаклларининг қўлланиши шеъриятга хосдир. Уларга хос қиёс, ўхшатиш маъноси шу маънога эга бўлган *сингари*, *каби*, *ўхшаши* каби сўз-морфемалар ёки бошқа воситалар (-дек, -чалик морфемалари) билан ифодаланади.

Хуллас, -ча морфемасининг сўзнинг шаклсиз ҳолатига қўшиб қўлланиши (*йилча*, *қилча* каби) ҳозирги ўзбек адабий тили учун умумий ҳолат деб қарааш, сўз шаклининг ўзини эса категориал шакл хисоблаш мумкин эмас. Бу ҳодиса нокатериоал шаклга хос маънони шеъриятда категориал шаклда ифодалаш имкониятидан фойдаланиш деб баҳоланиши керак.

Кўплик шаклидан ясалувчи нокатериоал шакл. Ўзбек тилидаги *оталарча*, *болаларча*, *дўстларча* сўз шаклидаги “*ларча*” қисми адабиётларда яхлит бир аффикс – кўшма аффикс деб қаралиши ва у равиш ясовчи ҳисобланиши юкорида айтилди. Бироқ ўзбек тили материаллари бу фикрни мутлақо тасдиқламайди. Юкорида кўрганимиздек, -ча морфемаси сўз ясовчи ҳам, отнинг категориал шаклини ясовчи ҳам эмас, балки нокатериоал сўз шаклини ясовчи морфемадир. *-лар* эса отнинг кўплик шаклини ясаши маълум. Юкоридаги сўз шаклларида ҳам ҳар икки морфема (*-лар* ва *-ча*) ўзига хос хусусиятини саклайди, яъни уларда *-лар* аффиксига хос кўплик маъноси, *-ча* морфемасига хос қиёс, ўхшатиш маъноси (“*каби*”, “*сингари*”, “*ўхшаш*” деган маъно) сезилиб туради. Шу икки фактнинг ўзиёқ бундай сўз шаклларида *-лар* ва *-ча* морфемасидан фарқли бўлган мустақил (сўз ясовчи) морфема бор дейишга ўрин қолдирмайди. Аксинча, уни отнинг *-лар* аффиксли шаклига *-ча* аффиксининг бирикувидан хосил бўладиган, қиёс, ўхшатиш маъноли, шундай маъноли муносабат кўрсатувчи нокатериоал сўз шакли хисоблаш ҳақиқатга тўғри келади.

Шу ўринда яна бир фактга эътибор қартишни лозим топамиз. Маълумки, муайян сўз туркумига мансуб сўз шаклини, яъни категориал шаклни ясовчи морфемалар шу туркумга оид деярли барча сўзлар доирасида амал қиласди, яъни шу туркум сўзларининг деярли барчасидан сўз шаклини ясайди. *-лар* морфемаси ҳам от туркумига мансуб сўзларнинг деярли барчасидан кўплик шаклини ясайди. *-ча* аффикси билан отнинг *-лар* аффиксли шаклидан нокатериоал шакл ясалиши эса жуда кам сўзлар доирасида чегараланган. Бундай шакл ясалиши, асосан, инсонга оид нарса ёки белгини билдирувчи сўзлар доираси-

да кузатилади. Белги билдирувчи баъзи сўзлардан шундай шакл ясалиши ҳам бор. Лекин бу сўзлар ҳам отлашган бўлади: *төлбаларча*, *ваҳшийларча*, *шармандаларча*, *ҳаёсизларча* ва б. Бу мисоллардан яна шу нарса ҳам маълум бўлятики, мазкур сўз шаклида *-лар* морфемаси (шу морфемали шакл) кўплик маъноси билан эмас, балки жамлик, умумлаштириш маъноси билан қатнашади, яъни бу шаклда унинг шу маъноси устун туради. Масалан, *оталарча*, *болаларча* сўз шаклларида ота ёки боланинг бирдан ортиклиги эмас, ‘барча ота’, ‘умуман ота’, ‘барча бола’, ‘умуман бола’ маъноси устун туради.

Қолаверса, *-лар+ча* аффиксли сўз шакли от туркумига оид иккича сўздагина учрайди. Бу типдаги сўз шакли, асосан, белги билдирувчи сўзлар доирасида кузатилади ва бундай сўз шаклларида *-лар* морфемасининг кўплик ифодаламаслиги аниқ сезилади: *дўстларча*, *сурбетларча*, *ваҳшийларча*, *төлбаларча* ва б. Бу типдаги сўз шаклларининг тожикча *-она* аффиксли шаклда ҳам кўлланиши, биринчидан, улардаги “*лар*”нинг кўплик ифодаловчи эмаслигини, иккинчидан, бу шаклнинг тожикча *-она* морфемаси билан ясаладиган сўз шакли таъсирида юзага келганлигини аниқ тасдиқлайди: *қаҳрамонларча* – *қаҳрамонона*, *дўстларча* – *дўстона*, *ваҳшийларча* – *ваҳшиёна*, *фидокорларча* – *фидокорона* ва б. *-лар+ча* шаклидаги баъзи сўзлар “*лар*” морфемасисиз ҳам кўлланади: *чатаниларча* – чатанича, *чатаничасига* ва б. Бу факт ҳам кўриб ўтилган шаклларда *-лар* морфемасининг асосий вазифаси кўплик (бирдан ортиклик) маъносини ифодалаш эмаслигини тасдиқлайди.

Хуллас, кўплик шаклидан *-ча* аффикси ёрдамида ясалган нокатегориал сўз шакли ўзи боғланиб келган сўзга хос белги, хусусиятни шакл ясалиш асоси билдирган шахс(лар) учун хос умумий белгига қиёсан ифодалайди: *оталарча ғамхўрлик* – ота(лар)га хос ғамхўрлик, *дўстларча муносабат* – дўст(лар)га хос муносабат ва б. Демак, буларда қиёсланиш асоси шакл ясалиш асосига (*оталар*, *дўстлар* шаклига) хос бўлиб, *-ча* морфемаси муносабат билдиради. Шу икки хусусият асосида *оталар*, *дўстлар* шаклига *-ча* аффиксининг бирикиши билан белгини қиёсан ифодаловчи нокатегориал сўз шакли ҳосил бўлади.

Сўз охирида яна бир нарсани айтишга тўгри келади. У ҳам бўлса, кўриб ўтилган шаклларга ҳеч қандай шакл ясовчи морфема қўшилмаслигидир. Бунинг сабаби *оталарча*, *дўстларча* сўз шаклининг боғловчи шакл эканлигидир, яъни бу шакллар сўзни ўзидан ке-

йинги сўзга боғлайди. Бундай сўз шаклига яна қандайдир морфеманинг бирикуви мумкин эмас¹.

Хуллас, кўриб ўтилган типдаги сўз шаклида шакл ясалиш асоси -лар аффиксли шакл бўлса-да, лекин у кўплик категорияси (кўплик шакли) мақомида бўлмайди, балки у -ча аффикси билан ясалувчи шаклнинг асоси хисобланади. Ундан ясалган шакл эса от туркумига мансуб сўз шакли хисобланмайди. Шунинг учун ҳам бу шаклга от туркумига мансуб сўз шаклига бериладиган таъриф каби таъриф бераб бўлмайди. Масалан, от туркумига мансуб категориал шаклларнинг таърифида “предмет”, “нарса” сўзи қўллансан, *оталарча*, *дўстларча* сўз шакли таърифида бу ҳол кузатилмайди. Юқорида кўрдикки, *оталарча*, *дўстларча* типидаги сўз шаклининг асоси (асос шакли) -лар аффикси қўшилган асос (*ота*, *дўст*)га хос умумий белгини, хусусиятни билдиради. -ча морфемаси эса бошқа сўз (асосан, белги оти) билдирган нарсанинг хусусиятини шакл ясалиш асосига хос хусусиятга қиёслайди, шу тарзда қиёсий муносабат юзага келади, шунинг учун ҳам бу сўз шакли *каби*, *сингари* морфемаси билан хосил бўладиган сўз шаклларига маънодош (синоним) шакл бўлади: *оталарча* – *оталар каби*, *дўстларча* – *дўстлар сингари*. Муносабат ифодалаш эса “кўмакчи” деб юритилаётган барча сўз-морфемаларга хос хусусиятдир. Бундай сўз шакли таркибида -ча морфемасининг кўмакчиларга маънодош, вазифадош бўлишининг ўзиёқ унинг сўз ясовчи ёки категориал шакл ясовчи бўла олмаслигини тасдиқлайди.

Ана шу айтилган хусусиятларнинг барчаси, яъни, биринчидан, -ча аффиксининг сўздан эмас, сўз шаклидан (-лар аффиксли шаклдан) шакл ясами, иккинчидан, асос шаклининг (*оталарча* каби шакл) таркибида категориал шакл бўлмаслиги, учинчидан, ясама шаклининг от туркумига мансуб сўз шакли хисобланмаслиги категориал шаклга хос бўлмаган, категориал шакл хусусиятларига зид бўлган белгилардир – шу хусусиятлари билан у категориал шаклларга зидланади. Бинобарин, бу фактлар мазкур сўз шаклини (*оталарча*, *дўстларча* типидаги шаклини) “нокатегориал шакл” деб аташга йўл кўяди, деб ўйлаймиз.

-ча морфемасининг эгалик шаклига бирикиши ҳам фикр, тахмин каби саноқли сўзлар доирасида кузатилади: *Унинг фикрича*, энди қатъий ҳаракат қилиши вақти етган эди (Т.Малик).

¹ Бундай сўз шаклига хос хусусият -лар аффиксисиз қўлланган йигитча, чапанича каби уч-тўрт сўзда ҳам кузатилади.

Бу вазифада -ча морфемаси феълнинг -(и)ши аффикссли ҳаракат номи шаклига, ҳаракат номининг ҳам шаҳе шаклига бирикади: *билишимича, айтишиларича* каби. Бундай қўлланиш ҳам *айтмоқ, билмоқ, сезмоқ* каби саноқли сўзлар доираси билан чекланган. Кўриниб турибдики, буларда ҳам -ча аффикси ҳаракат номи шаклининг ўзига эмас, балки унинг шахс (эгалик) шаклига бирикади. Чунки ҳаракат номи шакли ҳам, худди сифатдош ва равишдош шакли каби, феъл туркумига мансуб шакл – категориал шакл ҳисобланади. Демак, ҳаракат номи шакли унинг шахс шаклида (от туркумига хос шаклда) қўлланиши учун имкон бўлса, шаҳе шакли унга -ча морфемасининг бирикиши учун имкон ҳисобланади.

Демак, биринчидан, -ча аффиксининг шахс шаклига бирикиши от туркумига оид сўзлар учун умумий ҳодиса эмас. Иккинчидан, бундай шаклларда эгалик шакли мустакил шакл (категориал шакл) бўлмайди, балки шакл ясалиш асоси – асос бирлик ҳисобланади, -ча аффиксли шаклнинг таркибий кисми бўлади. Бу шаклда эгалик маъноси бўлмайди, фақат шаҳе маъноси сақланади. Натижада унга -ча аффиксининг бирикуви билан бошқа бир гапга хос фикр асос шакл билдирган шахсга (I, II ёки III шахсга) нисбатланади, шундай муносабатни ифодаловчи сўз шакли ҳосил бўлади: *Фикринча, бунга рози бўлмайди. Айтишиларича, бу ишлардан уларнинг хабари йўқ*. Бундай қўлланишда -ча морфемаси ва унинг ёрдамида ясалувчи сўз шаклига кўра, қарагандা сўз-морфемалари ва улар ёрдамида ясалган шакл билан вазифадош, маънодош бўлади: *тахминимча – тахминимга кўра (қарагандা), айтишиларича – айтишиларига қарагандা*.

Бу шаклдаги сўз -лар аффиксли морфема билан қўлланиши мумкин. Лекин унинг маъносида, қўлланишида ўзгариш бўлмайди. Чунки буларда шакл ясалиш асоси (асос шакл) шахс кўрсаткичли шакл ҳисобланади: *уларнинг айтишиларича (-лар кўпликни билдиради); дадамнинг айтишиларича (-лар хурмат билдиради)*. Нима учундир, -ча морфемасининг от туркумига оид сўз ва феълнинг -(и)ши аффиксли ҳаракат номига (уларнинг шахе шаклига) бирикишидан ҳосил бўладиган бундай нокаториал сўз шакли, унинг моҳияти ҳақида ўзбек тилшунослигига оид ишларда бирон-бир фикр-мулоҳаза билдирилмаган. Шахс олмоши -ча морфемаси билан қўлланганда, *фикр, тахмин* каби сўзлар (улардан бири) қўлланмаслиги мумкин. Бунинг

сабаби, биринчидан, олмошларнинг шахсни (I, II ёки III шахсни) аник ифодалаши бўлса, иккинчидан, фикрнинг алоҳида гап билан ифодаланишидир. Масалан, *Менинг ҳисобимча, маблағ етарли* гапи *Менимча, маблағ етарли* тарзида ифодаланиши мумкин. Бунда асосий фикр “маблағ етарли” жумласи билан, шахс маъноси мен олмоши билан ифодаланади. Демак, бундай тузилмалар учун талаб этиладиган икки компонент – «фикр» ва «шахс» компоненти мавжуд бўлади. Ана шу нарса бундай гапларда *фикр, таҳмин, ҳисоб* каби сўзларнинг кўлланмаслигига, эллипсисга учрашига йўл қўяди.

Умуман, бундай сўз шаклларида эгалик аффикси шахсни (уч шахсдан бирини) аник ифодалаш талаби билан кўлланади (лекин бу шакл, яъни асос шакл “эгалик” маъносига эга бўлмайди). Куйидаги бир мисолда буни аник кўриш мумкин: *Алланарсаларни ўзича шивирлади. Кейин, одатича, ариқ бўйида юваниб, ҳужрага кирди* (Ў. Умарбеков). -ча морфемасининг сўз шаклига бирикиши айтилди. Шу талабга кўра келтирилган мисолда *одат* сўзининг учинчи шахс шаклига бирикиши ва шу шаклга хос маънонинг ифодаланиши конуний ҳол. Агар шахс маъноси ифодаланмайдиган бўлса, ифодаланиши талаб этилмаса, *одат* сўзи бу шаклда кўлланмайди, унга -ча аффикси бирикмайди. -ча аффиксига хос маъно кўра сўз-морфемаси билан ифодаланади: *одатга кўра, таомиғга кўра* каби.

Хуллас, -ча аффиксининг шахс кўрсаткичли шаклга бирикувидан хосил бўладиган сўз шаклларида ҳам шакл ясалиш асоси (шахс кўрсаткичли шакл) мустақил бирлик эмас, сўз шаклининг таркибий кисми мақомида бўлади. Шу боис у отнинг эгалик категорияси шаклларига хос моҳиятга эга бўлмайди – категориал шакл хисобланмайди.

-ча аффикси отнинг келишик шаклларидан факат жўналиш келишиги шаклига бирикади: *уйғача, мактабгача, баҳоргача* каби. Маълумки, жўналиш келишиги шакли кўп маъноли бўлиб, шулардан бири “йўналиш” маъносидир. -ча морфемаси жўналиш келишиги шаклига унинг худди шу маъноси асосида бирикади. Аниқроқ қилиб айтганда, жўналиш келишиги шакли худди шу маъноси билан *уйғача, қузгача* типидаги сўз шаклида шакл ясалиш асоси вазифасида бўлади: *уйға+ча, қузга+ча*. Лекин ана шу шаклнинг моҳияти анча мураккаб бўлиб, уларнинг баъзилари ҳақида шу вақтга қадар бир фикрга келинмаган, айримлари эса умуман эътибордан четда қолиб келмоқда. Масалан, бу шаклнинг таркибий кисми, уни ташкил этувчи бирлиқ-

лар ҳақида узок вактлардан бери турлича мулоҳазалар давом этиб келмоқда. Баъзи ишларда бундай шакллар таркибидаги “гача” яхлит бир морфема – қўшма морфема деб қаралса, баъзи мутахассислар бу фикрга қўшилмайди. Демак, бундай шакллар моҳиятини аниқ белгилаш учун улар таркибидаги “-га” ва “-ча”нинг мустақил морфема эканини ёки ўзбек тилида -гача қўшма морфемаси борлигини аниқ белгилаб олиш керак бўлади. Чунки бу шакллардаги “-га” ва “-ча” мустақил тил бирликлари бўлса, улар иштирокида ҳосил бўлувчи сўз шакли ўзига ҳос моҳиятга эга бўлган тил бирлиги ҳисобланади.

Шуни айтиш керакки, ўзбек тилида чегара маъносини билдирувчи (чегара маъноли сўз шаклини ясовчи) -гача қўшма аффикси борлигини тан оловчилар ҳам бу аффикс ва унинг ёрдамида ясалувчи сўз шаклининг моҳияти ҳақида бир хил фикрда эмаслар. Масалан, проф. Ҳ. Неъматов шу масалага бағишлиланган маҳсус мақолосида -гача аффикси отнинг келишик шаклини ҳосил қилишини айтиб, бу шаклни чегара келишиги шакли ҳисоблайди¹. Лекин бу фикр етарли даражада асосланмаган. Бунинг учун уйгача, қўчагача типидаги келишикнинг алоҳида турига, жуда бўлмагандан, ўзбек тилида келишикнинг шундай турига (уни ифодаловчи шаклга) эҳтиёж борлиги, -га ва -ча аффиксларида эса ўзаро бирикиб, шундай келишик шаклини ҳосил қилувчи тил бирлигини юзага келтириш имкони борлиги исботланиши керак эди, шунингдек, жўналиш келишиги шакли асосида бошқа (янги) келишикнинг юзага келиши мумкин ёки мумкин эмаслигига ҳам эътибор қаратиш талаб этилар эди. Маколада эса бу талабларга жавоб йўқ².

Ш. Раҳматуллаев уйгача, қўчагача типидаги сўз шаклидаги -га ва -ча ни мустақил тил бирликлари ҳисоблайди ва бў масала юзасидан икки мақола эълон қилган. Биринчи мақолосида бу шаклдаги -ча нинг юклама эканлигини таъкидлайди³. Лекин бу фикр ҳам асосланган эмас.

Биз отнинг бундай шаклларида “гача”ни бир аффикс (қўшма аффикс) ҳисоблашда икки ҳодисани назарда тутган эдик: 1) чегара маъносининг ифодаланишида -га ва -ча нинг доим бирга қўлланиши;

¹ Неъматов Ҳ. Чегара келишиги / Ўзбек тили ва адабиёти, 1974. 4-сон, 38-39- б.

² Аслида бу фикр А.М. Шчербакнинг ишларида айтилган: Щербак А.М. Грамматика староузбекского языка. М.-Л.: 1962. -С.109-110.

³ Раҳматуллаев Ш. От лексемага қўшиладиган баъзи форма ясовчилар / Ўзбек тили ва адабиёти, 1975. 2-сон, 39-40- б.

2) бу шаклда жўналиш келишиги қўшимчаси (-га) ўз моҳиятини тўла сакламаслиги, аникроқ килиб айтганда, масалан, уйгача шаклини ҳам келишик, ҳам чегара шакли дейиш мумкин эмаслиги¹. Лекин -ча морфемасининг муайян сўз шаклларига қўшилишидан хосил бўладиган турли типдаги шаклларнинг таҳлилидан маълум бўляптики, бундай шаклларнинг барчасида -ча морфемаси ўз хусусиятини, мустакиллигини сақлайди. Шу билан бирга, бу морфема қўшиладиган сўз шакли (асос шакл) ҳам ўзига хос моҳиятга эга бўлган бирлик – асос бирлик ҳисобланади. Булар эса мазкур сўз шаклидаги -га ва -ча ўзаро бирикиб, бир аффиксга (қўшма аффиксга) айланган дейишга йўл қўймайди.

Хуллас, уйгача, кўчагача типидаги сўз шаклида -га ва -ча морфемалари моҳиятан бир-биридан фарқли бўлган сўз шаклини ясовчи мустакил морфема ҳисобланади. -га аффикси отнинг туркумлик маъноси асосида категориал сўз шаклини хосил қўлса, -ча морфемаси жўналиш келишиги шаклидан нокатегориал сўз шаклини ясади. Жўналиш келишигининг ясалишида туркумлик маъносига эга бўлган сўз (от) шакл ясалиш асоси вазифасида бўлса (уй+га), -ча аффикси билан сўз шакли ясалишида жўналиш келишиги шакли шакл ясалиш асоси бўлади: уйга+ча. Шу фактнинг ўзиёқ уйгача сўз шаклида “ча” нинг мустакил тил бирлиги – нокатегориал сўз шаклини ясовчи морфема эканлигини кўрсатади.

Демак, -га ва -ча аффиксли уйгача типидаги сўз шакли ҳақида гап борганида, ҳал этилиши лозим бўлган асосий масала нима учун чегара маъносининг ифодаланишида -ча аффиксининг жўналиш келишиги шаклига бирикиши, бунда жўналиш келишиги шаклининг асос шакл (шакл ясалиш асоси) бўлиб хизмат қилиши сабаби ҳамда унга -ча аффиксининг қўшилиши билан “чегара” маъносининг ифодаланиши ва бошка ҳодисаларнинг сабабини исботлаш талаб этилади.

А.М. Шчербак -ча ва -гача аффикси отнинг чегара келишиги шаклини ясовчи ҳисоблаганини кўрдик. Аммо бу фикрга қўшилиш кийин. Чунки, биринчидан, -ча аффикси тарихан ҳам келишик шаклигина эмас, умуман, чегара маъноли сўз шаклини ясовчи бўлмаган. Асарда келтирилган фактлар ҳам муаллиф фикрини тасдиқламайди.

¹ Xожиев А. Отнинг чегара формаси / Ўзбек тили ва адабиёти, 1977. 4-сон, 63-66-бетлар; Шоабдурахмонов Ш. ва бошкалар. Ҳозирги ўзбек адабий тили, I кисм. Тошкент: Ўқитувчи, 1980. 248-249-б.

Юкорида кўрдикки, -ча аффикси ҳозирги ўзбек тилида саноқли сўзларга қўшилганда гина “чегара” маъноси ёки шунга яқин маъно ифодалайди. Буни А.М. Шчербак асарида келтирилган мисоллар ҳам тасдиқлайди. Демак, -ча аффиксининг чегара маъносини ифодалаши от туркумига мансуб сўзлар учун умумий ҳодиса бўлмаган, ҳозир ҳам шундай. Иккинчидан, агар -ча аффикси чегара маъносига эга бўлганида, шундай маъноли сўз шаклини ясай олганида, унинг худди шу маънени ифодалаш учун жўналиш келишиги шаклига қўшилиб, чегара маъноли шаклни ҳосил қилишига ва -га+ча аффиксли сўз шаклининг юзага келишига эҳтиёж бўлмас эди.

-ча аффиксининг жўналиш келишиги шаклига бирикиши ва “чегара” маъноли сўз шаклини ҳосил қилишига келганда шуни айтиш мумкинки, бундай шаклнинг ясалиши учун асос вазифасини бажариш (асос шакл бўлиш) имконияти жўналиш келишиги шаклида мавжуд, худди шу шакл чегара маъносининг аниқ воқеланиши учун хизмат килади.

Оталарча, қадрдонларча типидаги сўз шаклида *оталар*, *қадрдонлар* шакли кўплик (бирдан ортиклик) маъноси билан эмас, балки жамлаш, умумлаштириш маъноси билан қатнашишини, шу хусусияти асосида унга -ча морфемаси бирикишини кўрдик. Бу морфеманинг жўналиш келишиги шаклига бирикишида ҳам шундай ҳодиса кузатилади. Демак, -ча морфемасининг жўналиш келишиги шаклига унинг қайси хусусияти асосида бирикиши, қайси хусусияти билан жўналиш келишиги шакли шакли ясалиш асоси бўлишини белгилаш керак бўлади. Бу билан *уйғача*, *қўчагача* типидаги нокатегориал шаклнинг моҳиятини тўғри белгилаш мумкин бўлади. Бу ишни эса адабиётларда жўналиш келишиги шаклига берилган таърифлардан бошлишга тўғри келади. Чунки бу келишик шаклининг моҳияти масаласида ҳам аниқ ва тўғри бир фикрга келингани йўқ. Эътибор беринг: “Отларда жўналиш келишиги битта маънени – ҳаракатнинг йўналиш нуктасини ифодалайди. Объект, ўрин, пайт оттенкаларининг ифодаланиши бу келишик формасини олган ва уни бошқарган негизнинг лексик маъносига боғлик”¹. “Бу келишикдаги от иш-харакат йўналган предметни англатади: мактаб+га – мактабга, иш+га – ишга, завод+га – заводга...”². Юзаки қараганди, бу икки таъриф, асосан, бир хилдек туюлади. Бирок

¹ Ўзбек тили грамматикаси. I, Морфология. Тошкент: Фан, 1975. 138-б.

² Ҳозирги ўзбек адабий тили, I кисм. Тошкент: Ўқитувчи, 1980. 236-237-б.

иккинчи таъриф мутлақо талабга жавоб бермайди. Чунки, биринчидан, ‘предмет’ маъноси сўз шаклига эмас, сўзнинг ўзига мансуб маънодир. Масалан, *китобни, китобнинг, китобага, китобдан, китобда* шакларининг барчасида ‘предмет’ маъноси *китоб* сўзига хос. Ундан ясалган келишик шакларининг ҳар бири ўз маъносига эга. Иккинчидан, келтирилган *мактабга, ишга, заводга* шакларининг ўзи (якка ҳолда) ҳеч қандай маънони қайд эта олмайди. Биринчи таърифга келганда шуни айтиш керакки, биринчидан, ‘харакатнинг йўналиш нуктаси’ маъноси бу келишик шакли ҳар қандай феълларга бирикканда эмас, балки ‘йўналиш’ семали феълларга бириккан ҳоллардагина ифодаланади. Бинобарин, “жўналиш келишиги шакли бир маънога эга”, дейиш ҳақиқатга тўғри келмайди (Деярли барча ишларда унинг бирдан ортиқ маънога эгалиги қайд этилган). Иккинчидан, объект, ўрин, пайт маънолари жўналиш келишиги шаклининг маъно оттенкалари эмас, балки шакл ясалиш асосига – сўзга хос маънолардир¹.

Жўналиш келишиги шакли ҳақида фикр юритилган ишлардан маълум бўлдики, уларнинг кўпчилигига “харакатнинг йўналиши” ва “харакатнинг каратилиши” бирикмаси бефарқ қўлланади. Баъзи ишларда бу икки ҳодиса фарқлангандек кўринади-ю, лекин келтирилган фактлар уни тасдиқламайди. Кўйидаги икки таърифга, яъни бу келишикнинг икки хил маъноси ҳақидаги фикрга эътибор беринг: “Жўналиш келишигида келган сўз куйидаги маъноларни билдиради:

1. Ҳаракат ва ҳолат йўналган шахс ёки предметни билдиради. *Комила хурсанд бўлиб, қалам-қозони ўртоғига тутқазди* (О.).

2. Жўналиш келишигида келган сўз пайт, ўрин билдирувчи сўз бўлганда, ҳаракат каратилган вакт, ўрин маъноларини билдиради: (электростанциянинг) очилиши маросими иккинчи *февралга белгиланди*. (А.Қ.)².

Биринчи бандда келтирилган *тутқазмоқ* феъли билдирган ҳаракат билан олтинчи банддаги *қолдирилмоқ* феъли билдирган ҳаракат бир-биридан фаркланиши тўғри. Лекин биринчиси ҳаракатнинг

¹ Бу ўринда жўналиш келишиги шаклининг барча хусусиятларига тўхташ масадимиз йўқ. Фақатгина унга -ча морфемасининг бирикуви билан ‘чегара’ маъносининг вокеланишида бу шаклининг кайси хусусияти роль ўйнашини, кайси белгиси асосида ‘чегара’ маъноси вокеланишини аниклаш билан чекланамиз.

² Турсунов У.. Мухторов Ж., Рахматуллаев Ш. Ҳозирги ўзбек адабий тили, 269-270-б.

‘йўналишини’, иккинчиси харакатнинг ‘қаратилишини’ ифодалайди деган фикр ҳақиқатга тўғри келмайди.

Ўзбек тили материалларидан маълум бўладики, баъзи феъллар ‘йўналиш’ семасига эга бўлади, улар билдирган ҳаракат маълум бир нуктадан бошқасига қараб йўналган, шу нукталар оралигига давом этадиган ҳаракат бўлади. Демак, бундай феъллар бажарилишида ‘йўналиш’ ва ‘давом’ тушунчалари бўлади.

Шундай феъллар бошқарган сўз эса йўналма ҳаракат қаратилган нуктани билдиради, бу нукта ҳаракатнинг тугаш (охирги) нуктаси бўлади: *идорага борди, мактабга кетди*. Ана шундай феъллар бошқарган сўз (жўналиш келишигидаги сўз) -ча морфемаси билан қўлланганда, “чегара” маъноси воқеланади. Бундай ҳолларда “чегара” маъносининг аник ифодаланишига хизмат қиласидиган сўз ёки бошқа воситалар ҳам қўлланиши мумкин: *идорагача баҳсласиб бордик. Бекатгача велосипедда бордим...* Демак, *мактабга шакли йўналма ҳаракатнинг сўнгги нуктасини билдиришининг ўзиданоқ “чегара” маъноси сезилиб туради, яъни “ҳаракатнинг тугаш нуктаси” “ҳаракатнинг тугаш чегараси”* демакдир. Лекин бу маъно воқеланмаган, имкон тарзидаги маънодир. Бу сўз шакли -ча морфемасини олиши билан “чегара” маъноси аник воқеланади. Шу тариқа -га аффиксли шаклдан -ча аффикси ёрдамида ҳосил қилинган (уйгача каби) нокатегориал сўз шаклида шакл ясалиш асоси (*уйга*) жўналиш келишиги шаклига ҳосмоҳиятини деярли йўқотади, нокатегориал шаклнинг таркибий қисми – шакл ясалиш асоси мавқеида бўлади. Бу фактлар ҳам мазкур нокатегориал шаклни отнинг чегара келишиги шакли (категориал шакл) ҳисоблаш мумкин эмаслигига шубҳа қолдирмайди.

Шу ўринда бир ҳодисага эътиборни қаратмоқчи эдик. Чегара маъносининг воқеланишида “йўналиш”, “охирги нукта”, “давом” тушунчалари мавжуд бўлишини кўрдик. Лекин бундай феъллар билдирган ҳаракат муайян сатҳда, фазода бажариладиган ҳаракат бўлади, деб тушунмаслик керак. Масалан, *юзгача сана гапида ҳам “чегара” маъноси – санашнинг чегараси юз сўзи билдирган миқдор экани ифодаланади, яъни санаш “бир”дан “юз”га қадар давом этади, “юз” билан тугайди. Демак, асосий моҳият феъл билдирган ҳаракатнинг тугаш нуктаси, шу нуктага йўналиши, шу йўналиш бўйлаб давом этишидир.*

-ча аффиксли сўз шакли “йўналиш” семасига эга бўлмаган феъл, шунингдек, феълдан бошқа туркумга мансуб сўз билан бошқарилиши

мумкин ва бунда “чегара” маъносидан бошқачароқ маъно ифодаланиши кузатилади. Бундай ҳолларда ҳам -га+ча морфемали сўз шаклига хос маънонинг “чегара” маъносига яқинлиги (алоқадорлиги) сезилиб туради: *У берган пулнинг тийинигача қайтариб, иссиқинча хайрлашиб чиқиб кетди* (Х. Гулом). *Бу ернинг қушларигача у китобда яхши таърифланган* (Мирмуҳсин). *Минут, секундигача айтиб бераман соатимги қараб* (Ў. Умарбеков). *Пашинадан тортиб туягача – ҳаммаси бизники* (Ч. Айтматов). *Оиласвий сиринггача уларга маълуми* (Т. Малик). Кўриниб турибдики, *тийин, қуш, тужа* сўзлари ва *оиласвий сир* сўз бирикмасини -ча аффиксли нокатегориал шаклда қўллаш билан шу сўзлар билдирган нарсадан бошқа нарсалар ҳам назарда тутиляпти. “Тийин”, “куш” сўзлари, “оиласвий сир” бирикмаси бошқа нарсалар сирасида (каторида) охирги, якунловчи нарсани билдиради. Демак, буларда ҳам “давомийлик” ва “охирги нукта” тушунчаси бор. Шу тушунчалар ва -ча морфемасига хос хусусият асосида бу шаклларда ҳам “чегара” маъноси вожеланади. Лекин нокатегориал шаклни бошқарувчи сўз “йўналиш” семали феъл бўлмаганидан, буларда харакатнинг тугаш (охирги) чегара маъноси аниқ ифодаланмайди. Лекин ҳар икки ҳолатда бу нокатегориал шакл, асосан, бир моҳиятга эга бўлган боғловчи сўз шакли хисобланади. Куйидаги мисолларга эътибор беринг: *Қизини кўриб, қулоқларигача қизарип кетди* (Т. Малик). ...*бу гап миясига қайтма урилиб, товонигача зирқиратиб юборди* (Т. Малик).

Икки оғиз сўз термин ҳакида. Ш. Раҳматуллаев *уйгача* типидаги сўз шаклидаги -ча ни мустақил аффикс – юклама-аффикс хисоблаши айтилди. Муаллиф кейинги ишларида унга нисбатан “кўмакчи аффикс” (“аффикс-кўмакчи”) терминини қўллаяпти¹. Бу терминни қўллашда маълум асос бор. Биринчидан, бу морфема юкламага хос хусусиятга эга эмас. Иккинчидан, бунда мазкур морфеманинг ўзбек тилшунослигига “кўмакчи” деб атаб келинаётган “ёрдамчи сўз”ларга хос хусусиятга эгалиги назарда тутилади. Шу асосда масалага ёндашилса, муаллифнинг фикрига кўшилиш мумкин. Бироқ, гап шундаки, “ёрдамчи сўз”, “кўмакчи” деб аталаётган тил бирликлари юзасидан олиб бораётган кузатишларимиз бу терминлар бирон-бир тил бирлигининг моҳиятини тўғри қайд эта олмаслигини кўрсатяпти².

¹ Раҳматуллаев Ш. Ҳозирги адабий ўзбек тили (дарслик). Тошкент: 2006, 151-б.

² Хожиев А. Ўзбек тилшунослигининг долзарб муаммолари (7-макола) / Ўзбек тили ва адабиёти, 2007. 4-сон, 30-37-б.

Масалан, кўмакчи сўзи муайян моҳиятга эга бўлган тил бирлигини, жумладан, –ча аффиксининг вазифасини, унинг ёрдамида ясаладиган сўз моҳиятини қайд эта олмайди. Аникроқ килиб айтганда, “кўмакчи морфема”, “кўмакчи шакл” биримаси бу морфема ва унинг ёрдамида ясалувчи сўз шаклини категориал шакл ясовчи морфема ва улар ёрдамида ясалувчи сўз шаклларига зидлай олмайди, демакки, улар терминга кўйиладиган асосий талабга жавоб бермайди – термин бўла олмайди.

–ча аффикси ёрдамида от туркумига мансуб сўз шаклларидан ясалувчи нокатегориал шаклларнинг таҳлилидан маълум бўлдики, бунда –ча аффикси бирикадиган шакл от туркумига хос шакл – категориал шакл бўлмайди, балки нокатегориал шаклнинг таркибий қисми – шакл ясалиш асоси ҳисобланади. Шакл ясалиш асоси мустақил шакл (категориал шакл) бўлмаганидан таркибий қисмларга бўлинмайди. Масалан, *оталарча, фикримча, уйгача* типидаги шакллар *оталар+ча, фикрим+ча, уйга+ча* тарзида таркибий қисмларга бўлинади, асос қисм эса *ота+лар, фикр+им, уй+га* каби қисмларга бўлинмайди.

Маълумки, от туркумига мансуб сўз қўплик, эгалик ва келишик категорияси шаклларида қўлланиши мумкин: *Қариндошлиаримизга хабар бердик*. Бунда ҳар бир шакл мустақил бўлади – от туркумига мансуб бир грамматик категориянинг шакли бўлади. Шу боис бу шакл мустақил қисмларга бўлинади: *қариндоши+лар+имиз+га*. Демак, бу шаклларнинг ясалиш асоси битта – қариндоши сўзи. *Қариндошлиаримизгача* сўз шакли эса бутунлай бошқача таркибга эга: *қариндошлиаримизга+ча*. Бу шакл таркибида шакл ясалиш асоси (*қариндошлиаримизга*) мустақил шаклларга (*қариндоши+лар+имиз+га* каби қисмларга) бўлинмайди.

Куйидаги бир факт ҳодисанинг моҳиятини янада ойдинлаштиради ва масалани тўғри ҳал этишни осонлаштиради. Маълумки, у ёки бу сўз туркумига мансуб грамматик категория, категорияга хос сўз шаклига бериладиган таъриф таркибида шу туркумнинг моҳиятини билдирадиган сўз қатнашади: “*Кўплик шакли предметнинг бирдан ортиқтигини билдиради*”. “*Ҳаракатнинг нутқ вақтига муносабатини билдирувчи шакллар замон категорияси шакллари*” ва б.¹ –ча

¹ Хо ж е в А. Ўзбек тилшунослигининг долзарб муаммолари (13-макола) / Ўзбек тили ва адабиёти. 2008. 5-сон.

морфемаси билан ясаладиган нокатеториал сўз шаклларининг таърифидаги бу ҳолат кузатилмайди, чунки бу шакллар катеториал сўз шаклига хос мохиятга эга бўлмайди. Масалан, *оталарча*, *фикримча*, *уйгача*, *оталаримизгача* шаклларидағи *ота*, *фикр*, *уй* сўzlари от туркумига мансуб, лекин бу нокатеториал сўз шаклларини от туркумига мансуб сўз шакллари сифатида (катеториал шакл сифатида) таърифлаб бўлмайди.

Шу ўринда яна бир муҳим масалага – нокатеториал сўз шаклининг сўз шаклидан ясалиши масаласига аниқлик киритиш керак бўлади. Аниқроқ қилиб айтганда, нокатеториал шакл асосига нисбатан “сўз шакли” иборасини кўллаш ҳақида фикр билдириб ўтишга тўғри келади.

Нокатеториал сўз шаклининг от туркумига оид муайян катеториал шаклдан, яъни кўплик, эгалик ёки келишик шаклидан ясалишини кўрдик. Ана шу нарса -ча морфемаси катеториал шаклдан нокатеториал шакл ясади, деган тасаввур пайдо қиласди. Бу эса мазкур ҳодисани шакл ўзгариши деб ҳисоблаш керак, деган фикрга олиб келиши мумкин. Лекин ҳодисанинг мохияти бундай ҳулоса чиқаришга йўл қўймайди. Чунки, кўриб ўтилганидек, *оталарча*, *фикримча*, *уйгача* сўз шаклларида шаклларнинг ясалиш асоси (*оталар*, *фикрим*, *уйга*) мустакил шакл эмас, балки шакл ясалиш асоси, нокатеториал шаклининг таркибий қисми ҳисобланади. Асос бирлик сифатида улар кўплик, эгалик ва келишик шаклига, яъни катеториал шаклга хос мохиятга эга бўлмайди, аксинча, асос бирлик сифатида ўзига хос мохиятга эга бўлади, унинг мохияти асосида -ча морфемаси нокатеториал сўз шаклини хосил қиласди (буни юқорида кўрдик). Демак, -ча аффикси билан от туркумига мансуб сўз шаклларидан нокатеториал шакл ясалишида шакл ўзгариши, яъни катеториал шаклининг нокатеториал шаклга айланиши ҳодисаси йўқ.

-ча аффикси билан от туркумига оид сўз шаклларидан ясалган нокатеториал шаклларнинг шу сўз туркумига мансуб катеториал сўз шаклларидан фарқли яна бир умумий белгиси шуки, уларнинг қўлланиш доираси, даражаси, аниқроги, ясалиш имконияти катеториал сўз шакллариникига нисбатан жуда чегараланганди бўлади.

Ўзбек тили морфологик системасини ўрганишга бағишлиланган ишларда факат от ва феъл туркуми морфологик системаси таҳлилида катеториал ва нокатеториал шакллар ҳақида гап боради. Бошқа сўз

туркмлари тахлил этилганда эса сўз шакларининг бундай турлари бор-йўқлиги ҳакида ҳеч нарса дейилмайди. Бу ҳол “грамматик категория”, “категориал ва нокатегориал шакл” тушунчалари ҳакида, шунингдек, ҳар бир сўз туркумига мансуб сўз шакларининг моҳияти юзасидан бир фикрга келинмаганлиги билан изоҳланади. Буни сон туркумига мансуб сўз шакллари мисолида ҳам кўриш мумкин¹. Куйида сон туркумига оид сўз шаклидан -ча аффикси ёрдамида ясаладиган нокатегориал сўз шакли ҳакида қисқача тўхтalamиз. Адабиётларда -ча аффиксли ўнтача, йигирматча типидаги сўз шаклининг саноқ сондан ясалиши айтилади ва унинг таркиби куйидагича кўрсатилади: ўн+та+ча, йигирма+та+ча². Лекин бу фикр нокатегориал шаклнинг таркибинигина эмас, ҳар бир шаклнинг моҳиятини ҳам тўғри қайд эта олмайди.

Юкорида айтилдики, категориал шакл сўздан, нокатегориал шакл сўзнинг муайян шаклидан ясалади. Масалага шу асосда ёндашилса, бештача, ўнтача, юзтача сўз шаклини нокатегориал шакл хисоблаш тўғри бўлади. Чунки бу шакл бевосита сон-сўздан эмас, балки унинг -та аффиксли шаклидан ясалади. Шунинг учун ҳам беитча, ўнтача, юзтача шаклида ифодаланган “чама”, “тахмин” маъноси бешта, ўнта, юзта сўз шаклларига хос “дона”, “миқдор” маъноси ҳамда -ча аффиксига хос маъно билан вокеланади, яъни -та аффиксли сон шакли ‘дона’ маъносини, -ча аффикси донанинг тахминийлигини вокелантиради. Бу факт ҳам -ча аффиксининг маъноси шакл ясалиш асосининг маъноси таъсирида аниқ воқеланишини кўрсатади.

Маълумки, ўзбек тилида хисоб сўzlари (нумеративлар) предметнинг сон (миқдор), ҳажм, ўлчов ва ш.к. га кўра белгисини билдиради: беит дона, беит гектар, беит тонна, беит қадам ва б. Шундай сўzlар ҳам -ча аффикси билан қўлланади: беит гектарча, беит тоннacha, беит қадамча: Мана, бир соатча бўлди. кўз очмайди (Ў. Умарбеков). Кўриниб турибдики, бундай қўлланишларда ҳам -ча морфемаси -та

¹ Биз ҳам сўз шаклига багишлиланган рисолимизда “сон туркуми бирон-бир грамматик категорияяга эга эмас. Бинобарин, соннинг категориал формаси бўлмайди” деган фикрни билдирган эдик: Ҳожиев А. Ҳозирги ўзбек тилида форма ясалиши. Тошкент: 1979. 58-б.

² Ш о а б д у р а х м о н о в Ш . ва бошкалар. Ҳозирги ўзбек адабий тили, 257-б.; Баъзи ишларда чама сон шакли -та аффиксли дона сон шаклидан ясалиши айтилса-да, лекин унинг моҳияти тўғри ёритилмаган. Қаранг: Турсунов У., Мухторов Ж., Рахматуллаев Ш. Ҳозирги ўзбек адабий тили, 296-297-б.

аффиксли сўз шаклига бирикканда ифодаланадиган маъносига эга бўлади. Бу фактлар унинг сон туркуми доирасида ҳам нокатегориал сўз шаклини ҳосил қилишига шубҳа қолдирмайди.

-ча морфемасининг сон туркумига мансуб сўз шаклидан нокатегориал шакл ҳосил қилиши ҳақидаги мулоҳазаларни якунлар эканмиз, унинг бу вазифада кўлланишида ҳам маълум чекланиш мавжудлигига эътибор қаратмоқчимиз. Бу аффикс ҳар қандай сон-сўзнинг *-та* аффиксли дона сон шаклидан эмас, балки чама, тахмин тарзда ифодаланиши мумкин бўлган дона сон шаклидан нокатегориал шакл ясай олади. Масалан, юзга яқин, юз атрофидаги ноаник миқдорни ифодалаш учун *юзта* шаклидан *юзтacha* нокатегориал шакл ясалади. Лекин *битта*, *иккита*, *ўн битта*, *ўн иккита* шаклидан -ча аффикси билан чама сон шакли ясалмайди, чунки *бир*, *икки* сўzlари билдирадиган миқдорни чама, тахмин тарзида ифодалаш мумкин эмас. Шунингдек, *бир килограммча* дейиш мумкин, лекин *бир донача* дейилмайди. Чунки “*бир килограмм*” қанчадан-қанча граммлардан таркиб топади, шу боис уни чама (тахмин) тарзда ифодалаш мумкин бўлади.

Хуллас, сон туркумига оид сўз шаклидан -ча аффикси ёрдамида ясалган нокатегориал шаклда ҳам от туркуми шаклларидан ясаладиган нокатегориал шаклларга хос умумий хусусиятлар кузатилади, яъни: 1) бу нокатегориал шакл ҳам сўз шаклидан ясалади; 2) бундаги шакл ясалиш асоси ҳам категориал шаклга хос хусусиятга эга бўлмайди, нокатегориал шаклнинг таркибий қисми бўлади; 3) нокатегориал шаклларнинг ясалишидаги чекланиш ходисаси бу типдаги шакл ясалишида ҳам кузатилади.

От туркумига мансуб категориал сўз шаклидан нокатегориал шакл ясовчи морфемалардан яна бири *-ги* морфемасидир. Бу морфеманинг маъно ва вазифаси ҳақида гап борганида, икки масалага эътиборни қартиш ва уни ҳал этиш керак бўлади: 1) бу морфеманинг сифат ясовчи бўлиш-бўлмаслиги масаласи; 2) *уйдаги*, *ёздаги* каби сўз шаклининг моҳияти масаласи.

Биринчи масала юзасидан шуни айтиш керакки, ўзбек тилшунослигига унинг сўз ясовчи экани тан олинган, яъни у деярли барча ишларда сифат ясовчи морфемалар қаторида берилади. Лекин ўзбек тили материаллари бу ҳақда бошқачароқ мулоҳаза билдиришни тақозо этади. Мавжуд адабиётларнинг бирортасида ҳам мазкур морфеманинг

ҳақиқий маънода сўз ясовчи (сифат ясовчи) экани ўз исботини топган эмас. Демак, масала муаммолигича турибди.

Юқорида категориал шаклнинг сўздан, нокатегориал шаклнинг эса сўз шаклидан ясалиши айтилди. Масалага шу асосда ёндашилса, -ги морфемаси билан ясалувчи тил бирлигининг моҳияти, умуман, бу морфеманинг асосий вазифаси тўғри белгиланиши мумкин бўлади.

-ги морфемаси сифат ясовчи морфемалар қаторида берилган ишларда у сўз ясалиш асосидан англашилган ўрин ёки пайтга муносабатли белгини билдирувчи сифат ясовчи, деб таърифланади: “Бу аффикс ясаш асосидан англашилган ўрин ва пайтга муносабатни, унга асосланганликни билдиради: ёзги, кузги, бугунги, кейинги, қадимги, тунги, ички, таиски, кечки каби”¹. Бошқа ишларда берилган таърифларнинг мазмуни ҳам шундай ва уларда келтирилган мисоллар ҳам деярли бир хил. Демак, -ги морфемаси ёрдамида сифат ясалиши деганда, унинг пайт маъноли сўзга бирикишидан ҳосил бўладиган тил бирликлари (ясама сўзлар) назарда тутилади.

Баъзи ишларда бу морфема ўрин келишиги шаклига бириккандага ҳам шу типдаги сифат ясалиши қайд этилади: -ги аффикси ўрин-пайт келишиги қўшимчаси (-да)дан кейин кўлланганда, ўрин ва пайтга ҳослик, муносабат маънолари янада аниқлашади, умумий ҳослик конкретликка ўтади... ёздаги (саёҳат), ойдиндаги (сухбат), бозордаги (галва)... Баъзи ишларда эса уйдаги, ёздаги каби сўзларнинг уй+даги, ёз+даги каби таркибий кисмга эгалиги, яъни буларда -даги ажралмас, мустакил морфема бўлиши таъкидланади. Ана шу уч ҳолат, яъни -ги морфемасининг сўзга бирикиши, ўрин келишиги шаклига бирикиши ва уйдаги, куздаги каби сўз шаклида -даги мустакил морфема эканлиги масаласида бир фикрга келинмаганлик бу морфеманинг амалиёти билан юз берадиган ҳодисаларнинг моҳиятини тўғри белгилаш имконини бермади. Шу боис уларнинг ҳар бирига алоҳида-алоҳида тўхташни лозим топамиз.

1. **-ги морфемасини сифат ясовчи хисоблаш мумкин ёки мумкин эмаслиги масаласи.** Аввало айтиш керакки, тил амалиёти жараённида, жумладан, сўз ясалиши ва шакл ясалиши жараённида муайян қонуниятлар амал қиласи. Шу қонуниятлардан бирига кўра сўз ясовчи морфема сўз шаклига бирикмайди – сўз шаклидан янги сўз ясамайди, яъни шу нарса қонун кучига эга. Демак, -ги морфемаси ҳақиқий

¹ Ўзбек тили грамматикаси. І.т., Морфология, 275-б.

маънода сўз ясовчи бўлса, унинг ўрин келишиги шаклига биринчи ҳакида гап бўлиши мумкин эмас. Шундай экан, кузги, қишики, остики, ташкини каби сўзлар таркибида -ги (-ки, -қи) морфемасининг қандай вазифали тил бирлиги эканини белгилаш асосий вазифа хисобланади.

Туркий тиллар морфологияси, сўз ясалиши соҳалари бўйича йирик мутахассислардан бири хисобланган А.М. Шчербак -ги аффиксининг сифат ясаш ва сўз шаклини ясаш “хусусияти”га эътибор қаратган ва бундай ҳодисаларни “промежуточные морфологические явления” деб қарайди ҳамда биринчи бўлиб -ки (-ги) морфемаси ва унинг амалиёти билан боғлик тил ҳодисалари ҳакида фикр юритади¹. Қизиги шундаки, муаллиф -ги (-ки, -қи) морфемаси билан ясалиш ҳодисаларини «оралиқ ясалиш» хисобласа-да, лекин келтирилган мисолларнинг ўзи ҳам бу морфеманинг сифат ясовчи эканини тасдиқламайди. Эътибор беринг: “Фикр юритилаётган аффикс мансублик (қарашиблик) маъносини, шунингдек, макон ва замон муносабатларини ифодалайди”². Бу фикр -ги (-ки, -қи) морфемасининг моҳиятини, яъни сўз ясовчи бўла олмаслигини жуда тўғри қайд этади. Э. Фозилов -ки аффикси тарихан сифат ясовчи бўлганлигини эътироф этади. Бироқ ишда келтирилган мисолларнинг ўзиёк -ки аффиксининг тарихан сифат ясовчи бўлмаганлигини аниқ кўрсатади³.

-ги морфемали сўзларнинг нисбий белги билдириши деярли барча ишларда айтилган. Ўзбек тилида -лик, -(и)й, -вий ва бошқа морфемалар ҳам шундай маъноли сифат ясаш учун кўлланади⁴. Демак, биринчи навбатда, -ги морфемасининг нисбий сифат ясовчи бошқа морфемалардан фарқли хусусиятини белгилаш керак бўлади. Шу нарса тўғри белгиланса, -ги аффиксининг вазифаси, унинг қандай тил бирлигини ҳосил қилиши анча ойдинлашиб қолади. Бунда қуйидаги ҳодисаларни алоҳида таъкидлаш керак бўлади. Биринчидан, -ги морфемали сўзнинг нисбий белги ифодалаши факат ўрин ёки пайт маъноли, санокли сўзлардагина кузатилади: *оҳирги, бугунги, пастки, кечки, қишики* каби. Бундай ҳолат нисбий сифат ясовчи бошқа морфемаларда кузатилмайди. Масалан, -лик, -(и)й, -вий аффикси билан ясал-

¹ Шербак А. М. Очерки по сравнительной морфологии тюркских языков (Имя). Л.: 1977. -С. 96-98.

² Ўша асар, 96-б.

³ Фозилов Э. Ўзбек тилининг тарихий морфологияси. Тошкент: 1965. 53-б.

⁴ Ҳожиев А. Ўзбек тили сўз ясалиши тизими. Тошкент: 2007. 314-144-б.

ган куйидаги ясама сифатларга эътибор беринг: *уруглик* (картошка), *кўйлаклик* (мато), *иериклик* (иш), *қишилик* (кийим); *синфий* (душман), *оилавий* (шароит) ва бошқалар. Иккинчидан, -ги морфемаси ҳозирги ўзбек тилида сифат ясаш вазифасига эга эмас (сифат ясаш учун кўлланмайди). Нисбий сифат ясовчи бошқа морфемалар эса ҳозирда ҳам шу вазифада кўлланади. Учинчидан, -ги морфемасининг асосий вазифаси муносабат ифодалаш хисобланади. Бу вазифада у ўрин ёки пайт билдирувчи сўзларга бирикишини кўрдик. Лекин ўрин ёки пайт маъноли сўзларнинг ҳаммасига эмас, баъзиларигагина бириккан ва шу сўзлар таркибида гина сифат ясовчикек тасаввур этилган. Масалан, бу морфема ёз, куз, қиши, баҳор сўзларига бириккани ҳолда (*ёзги*, *кузги*, *қишиги*, *баҳорги*), кун, ҳафта, ой, йил сўзларига кўшилмаган (ҳозир ҳам шундай). Бу сўзлардан -лик морфемаси ёрдамида нисбий сифат ясалади: *кунлик режса*, *ҳафталик натижса*, *ойлик маоши*, *йиллик даромад* ва бошқалар. Шунингдек, жой (ўрин) билдирувчи *ост*, *уст*, *паст*, *охир* сўзларига кўшилгани ҳолда (*остки*, *устки*, *пастки*, *охирги*), жануб, *шимол*, *шарқ*, *гарб* сўзларига кўшилмайди. Бу сўзлардан -ий аффикси нисбий сифат ясади: *жанубий*, *шимолий*, *шарқий*, *гарбий*. Бу фактлар ҳам кўрсатадики, -ги аффикси муносабат ифодалаш вазифасида ҳам (сўз ясовчи сифатида эмас) ўрин, пайт маъноли баъзи сўзларгагина бириккан ва бунда шу сўзлар билдирган ўрин ва пайтга нисбатан белги англашилган, натижада бу сўзлар нисбий белги билдирувчи сўзга хос хусусиятга эга бўлган – нисбий сифат деб қаралган. Демак, бунда -ги аффикси бирикадиган сўзнинг моҳияти муҳим роль ўйнаган. Бу ҳодиса маълум сўзлардагина кузатилиши сабабли -ги морфемаси сифат ясовчи каммаҳсул аффикс деб баҳоланиб, шундай аффикс деб қараб келиняпти¹. Аслида эса, юқорида кўрилганидек, бу морфема умуман сўз ясовчи (сифат ясовчи) бўлмаган. Куйида бунга ишонч ҳосил қиласиз.

2. Ўзбек тилида «даги» мустакил морфемаси борми ёки ...?

Бу саволга тўғри жавоб топиш ҳозирги ўзбек тилидаги -ги морфемасининг асосий вазифасини янада ойдинлаштиради, бу билан эса сўз шакли билан боғлиқ муҳим бир ҳодисанинг моҳиятини тўғри белгилаш имкони туғилади.

Ўзбек тилида сифат ясалиши ҳакида фикр юритилган ишларда бу

¹ Грамматика азербайджанского языка. Баку: 1971. -С. 279; X о ж и е в А. Ўзбек тили сўз ясалиши тизими, 134-135-б.

тилда сифат ясовчи *-даги* морфемаси борлиги ва у, худди *-ги* аффикси каби, ўрин ва пайтга нисбатли белгини билдирувчи сифат ясалиши қайд этилган. Шу фикрнинг, шу фактнинг ўзи уч нарсани: биринчидан, *-ги* морфемаси сифат ясовчи эмаслигини; иккинчидан ҳозирги ўзбек тиляда *-даги* мустақил морфемаси йўқлигини; учинчидан, *-ги* морфемаси муносабат ифодаловчи нокатегориал сўз шаклини ясовчи морфема эканини аник тасдиқлади.

-ги морфемаси ўрин, пайт маъноли саноқли сўзларга бирикканда-гина шу сўзлар билдирган ўрин ёки пайт муносабати ифодаланиши, буни сифат ясалиши ҳодисаси ҳисоблаш мумкин эмаслиги айтилди. Демак, бу ҳодисани муайян сўз туркумига хос шакл ясалиш ҳодисаси ҳисоблаш ҳам мумкин эмас. *Уйдағи, синфдаги, баҳордаги, ёзданғи* каби сўз шаклларида бутунлай бошқа ҳодисалар кузатилади. Биринчидан, бундай сўзларда ўрин, пайт маъноси бевосита ўрин келишиги шаклига (*уйда, синфда, баҳорда, ёзда шаклига*) хос маъно. Иккинчидан, бу маъно маълум сўзлар доираси билан чекланмаган, шу келишик шакли учун умумий маънодир. Учинчидан, *-ги* морфемаси отнинг худди шу шаклига бирикади ва ўрин, пайт маъноли муносабатни ифодаловчи сўз шаклини – нокатегориал сўз шаклини ҳосил қиласи. Демак, бундай сўз шаклларининг ясама сифат эмаслигини, унинг таркибида сифат ясовчи деб караш мумкин бўлган *-даги* морфемаси йўқлигини кўрсатади. Улар *уй+даги, синф+даги, баҳор+даги, ёз+даги* каби таркибий қисмга эмас, *уйда+ги, синфда+ги, баҳорда+ги, ёзда+ги* каби таркибий қисмларга бўлинади. Бу эса сўз шаклидан шакл ясалиши бўлиб, шаклнинг ўзи нокатегориал сўз шакли эканлигини тасдиқлади.

Айтилганларнинг ҳаммаси *-ги* морфемасининг ҳозирги ўзбек тилидаги асосий вазифаси ўрин келишиги шаклидаги ўрин ва пайт маъноли муносабатни ифодаловчи нокатегориал сўз шаклини ясаш эканлигини кўрсатади.

Бунда ўрин ва пайт маъноси *-да* аффиксли сўз шаклига хос бўлиб, *-ги* морфемасининг вазифаси шундай маъноли нокатегориал шаклни ҳосил қилишдир¹.

¹ Худди шу хусусияти асосида бу шаклни «отнинг ўрин белгиси шакли» деб атаган ҳдик: (Х о ж и е в А. Ҳозирги ўзбек тиляда форма ясалиши. Тошкент: 1979. 54-55-б.). Лекин сўз шаклларининг сўз ёки сўз шаклидан ясалиши асосида иш кўриш мазкур типдаги сўз шаклини нокатегориал шакл ҳисоблаш тўғри бўлишини кўрсатди.

-да морфемаси ўрин ёки пайт маъносини билдириши, бу сўз шаклига -ги аффикси бирикиши билан ўрин ёки пайт муносабатли тил бирлигининг юзага келишини кўрдик. Ҳакиатда ҳам, -да аффиксли келишик шаклига хос асосий хусусият, шакл ясалиш асосининг моҳиятига кўра, ўрин ёки пайт маъносини ифодалашdir. Шуннинг учун ҳам бу келишик шакли «ўрин-пайт келишиги шакли» деб ҳам юритилади. Лекин бу келишик шакли ўрин ва пайт маъносидан бошқа маъноларга ҳам эга ва улар ҳакида адабиётларда маълум фикрлар билдирилган. Кизиги шундаки, бу маъноларнинг ўрин ва пайт маъноси билан алоқадорлиги сезилиб туради. -ги морфемаси шундай хусусиятли ўрин келишиги шаклидан ҳам нокатериорал сўз шаклини хосил қиласди. Т. Маликнинг «Шайтанат» номли асаридан келтирилган кўйидаги мисолларнинг ўзиёқ фикримизни тасдиқлай олади:
Балки энг сўнгги нусхадаги китобларни ҳам йўқ қилишгандир. Дастлабки учрашув чигални ечишдаги дастлабки уринини бўлмоги мумкин. Соқчобоши раҳбарлигидаги аскарлар эртасига ўрмонга чиқдилар. Ургулар тарихдаги ўз шарафли ўринларини эгаллаяптилар.

Хуллас, -ги (-ки, -қи) морфемаси ҳозирги ўзбек тилида ўрин ва пайтга нисбатли белгини билдирувчи сўз шаклини ясаш вазифасига эга. Бу шаклнинг ясалишида отнинг -да аффиксли сўз шакли шакл ясалиш асоси вазифасини бажаради; -ги морфемаси шу асосдан нокатериорал сўз шаклини хосил қиласди.

-ча морфемаси ёрдамида нокатериорал шакл ясалиши ҳодисаси феъл туркумida ҳам мавжуд. Бундай нокатериорал шакл ясалиши асоси вазифасида -ғат аффиксли сифатдош шакли қўлланади, яъни -ча морфемаси фақат сифатдошнинг шу шаклидан нокатериорал шакл ясади: *юргурганча* (кетди) *тиклиганча* (қолди), *ховлиқсанча* (кириб келди) каби.

Туркий тиллар тарихига оид адабиётлардан маълум бўлишича, бу сўз шакли анча илгаридан мавжуд. Шундай бўлишига қарамай, тил тарихига оид материаллар асосида ҳам, ҳозирги ўзбек тили материаллари асосида ҳам бу сўз шаклининг моҳияти тўла ва тўғри ёритилган эмас. Шу боис ҳам бу шакл ҳақидаги фикр-мулоҳазалар бир-бирига мос келавермайди. Ҳатто сўз шакли ҳақида фикр юритилган баъзи ишларда бу сўз шакли умуман тилга олинмайди (Бунинг сабаблари бор, албатта. Асосий сабаб – унинг мураккаб моҳиятга эгалигидир).

Туркий тиллар тарихини қиёсий ўрганишга бағишенгандын махсус ишда бу сўз шакли феълнинг равишдош шакли деб, унинг таркибидаги *-ганча* равишдош шаклини ясовчи бир аффикс деб тан олинади¹. Лекин бу фикр туркий тиллар материаллари асосида исботланмаган.

F. Абдурахмонов ва Ш. Шукуровнинг ўзбек тили тарихий грамматикасига бағишенгандын ишида бу сўз шакли ҳакида қуйидаги фикрлар билдирилган: “Ўтган замон сифатдоши аффиксларига *-ча//чэ* кўшилиши асосида ҳосил бўлган *-ганча/-гэнчэ//кэнчэ...* аффикслари билан ясалган формалар ҳам баъзан юқоридаги равишдош (*-гунча* аффиксли равишдош – A.X.) маъносида қўлланади. Масалан: *Подиоҳ мутаважжих бўлгонича иш кўринмайдур* (БН, 459). *To келганингча отлар безор, ароба қурсун* (Мук., 812).

Бу формаларнинг асосий функцияси равиш маъносини ифодалашдан иборат бўлиб, қуйидаги мисолларда шу маънода қўлланган: *Сиз қила олганча Мирза давлатига муносаб ишларга саъ бўлунг* (Нав, Мнш., 16). *Ҳар ерга айагим барганча барсам яхши бўлгай* (БН, 124)². Бу жумлада билдирилган фикрлар юзасидан қуйидагиларни айтиш мумкин. Биринчидан, *-ча* аффикси сифатдош ясовчи *-ган* аффиксига бирикмайди, балки сифатдош шаклига бирикади. Иккинчидан, тарихан ва ҳозир ҳам *-ган* билан *-ча* аффиксининг бирикувидан *-ганча* аффикси юзага келган эмас. Учинчидан, “*-ганча* аффиксли сўз шаклининг асосий функцияси равиш маъносини ифодалашдан иборат” деган жумла бу сўз шаклининг моҳиятини қайд эта олмайди. Шу айтилганларнинг ўзиданок маълум бўладики, бу ишда ҳам *-ган* аффиксли сифатдош шаклига *-ча* аффиксининг бирикувидан ҳосил бўладиган сўз шаклининг моҳияти, бирон-бир хусусияти тўғри ва аниқ ифодасини топмаган.

Ҳозирги ўзбек тилига оид ишларда бу сўз шаклига нисбатан икки хил муносабат кузатилади: 1) кўпгина илмий ишлар, шунингдек, ўқув қўлланмалари ва дарслкларда бу сўз шакли умуман тилга олинмайди; 2) биргина ишда феълнинг равишдош шаклини ясовчилар қаторида *-ганча* морфемаси ҳам келтирилади³.

¹ Серебренников Б.А., Гаджиева Н.З. Сравнительно-историческая грамматика тюркских языков. -С. 230.

² Абдурахмонов F., Шукров Ш. Ўзбек тилининг тарихий грамматикаси. Тошкент: 1973. 133-б.

³ Сайфуллаева Р. ва бошкалар. Ҳозирги ўзбек адабий тили. Морфология, II (ўқув қўлланма), 82–83-б.

Ҳозирги ўзбек тилида *-ган* аффиксли сифатдошга *-ча* аффикси-нинг кўшилувидан ҳосил бўладиган сўз шакли борлигини инкор этиб бўлмайди. Кўпгина ишларда унинг эътибордан четда қолишининг асосий сабаби, бизнингча, сўз туркumlари морфологиясини ўрганища, асосан, ҳар бир туркумга мансуб морфологик категорияларнинг шакллари, парадигматик шакллар назарда тутилганлигидир. Ана шу фактнинг ўзиёқ ўзбек тилида равишдош шаклини ясовчи *-ганча* морфемаси йўклигидан далолатdir.

Хуллас, бу нокатериал шакл ҳакида фикр юритилганда, биринчи навбатда, нима учун *-ча* аффиксининг факат *-ган* аффиксли сифатдош шаклига бирикиш сабабини аниқлаш талаб этилади. Бу билан эса шу типдаги сўз шакллари билан бөглиқ ҳодисаларнинг моҳиятини тўғри ёритиш имкони юзага келади.

-ча морфемасининг от туркумига оид кўпллик, эгалик ва жўналиш келишиги шаклига уларнинг муайян маъносига хос бир белги, хусусият асосида бирикишини кўрдик. Бу ҳодиса мазкур аффикснинг *-ган* аффиксли сифатдош шаклига бирикишида ва кўрилаётган нокатериал сўз шаклининг моҳиятида яна ҳам аниқроқ акс этади.

-ган аффиксли феъл шакли атрибутив вазифада ҳам, предикатив вазифада ҳам статик ҳолатни, яъни ҳаракатнинг амалга ошган ҳолатини ифодалashi билан феълнинг бошқа шаклларидан (сифатдош ва ўтган замон шаклларидан) фарқланади. Мисол: *Деразадан ётиришиб кираётган қуёши нури токчадаги кафтдек кўзгуга урилиб, шифтга санчиганича қотган. Хонтахта устида ичилмай совиб қолган ярим пиёла чойга тушган қуёши нури эса шифтда беором титрайди* (Т.Малик). *-ча* аффикси феълнинг *-ган* аффиксли сифатдош шаклига унинг худди шу хусусияти (белгиси) асосида бирикади, натижада феълни бошқа феълга боғловчи нокатериал шакл ҳосил бўлади. Буни келтирилган мисолдаги *санчиганича* сўз шаклида ҳам аниқ кўриш мумкин. Демак, бу типдаги нокатериал шаклда шакл ясалиш асоси (*-ган* аффиксли шакл) сифатдош ҳам, ўтган замон шакли ҳам бўлмайди, яъни у предметнинг белгисини билдирувчи ва ўтган замон маъносини ифодаловчи шакл ҳисобланмайди, балки ҳаракатнинг мавжуд, амалга ошиб турган ҳолатини, шундай белгисини билдириши билан нокатериал шаклнинг ясалиш асоси вазифасида қўлланади. Худди шу хусусият *-ган* аффиксли сифатдошнинг нокатериал сўз шакли ясалишида асос шакл (шакл ясалиш асоси) вазифасида қўлланниш имконини таъ-

минлайди. Асос шакл (шакл яалиш асоси)га хос бу хусусият ундан нокатегориал шакл яалиш имкониятини чегаралаб күяди (Бундай чегараланиш бошка нокатегориал шаклларда ҳам борлигини юқорида күрдик). Демак, бу хусусияти билан мазкур нокатегориал шакл бошка нокатегориал шакллар билан умумийликка эга.

-*ган* аффикси билан ясалувчи сифатдош ҳозирги замон ва ҳозирги келаси замон шаклларида ҳам қўлланиши маълум: *китоб ўқиётган талаба, университетда ўқийдиган йигит, эртага келадиган меҳмонлар* каби. Биз учун муҳими шуки, -ча морфемаси сифатдошнинг бу шаклларидан нокатегориал сўз шаклини ясалиди. Аниқроқ қилиб айтганда, сифатдошнинг бу шакллари -ча аффикси билан нокатегориал шакл яалишида шакл яалиш асоси вазифасида қўлланмайди. Чунки сифатдошнинг бу шаклларида ҳаракатнинг мавжуд ҳолати (ҳаракатнинг баҳарилишидан юзага келган ҳолати) ифодаланмайди, балки ҳаракат жараён сифатида (динамик ҳолат сифатида) ифодаланади. Қиёсланг: *келган одам – келаётган одам – келадиган одам*. Ана шу нарса *келаётган, келадиган* сифатдош шаклининг нокатегориал шаклининг яалиш асоси вазифасида қўлланишига йўл кўймайди, яна ҳам аниқроқ қилиб айтганди, *келаётган, келадиган* шаклида ҳамма вакт сифатдош шаклига хос хусусият, яъни предметнинг ҳаракат белгисини билдириш хусусияти сакланади. Бу хусусияти билан эса нокатегориал шаклининг асоси (яалиш асоси) вазифасида қўлланиши мумкин эмас. Чунки нокатегориал шакл яалишида асос бўлиб қўлланадиган -*ган* аффиксли шакл предметнинг белгисини кўрсатиш хусусиятига – сифатдош шаклига хос хусусиятга эга бўлмайди (Бу ҳақда юқорида гапирилди). Бу ҳодиса ҳам -ча аффикси ёрдамида -*ган* аффиксли феъл шаклидан нокатегориал феъл яалишида ўзига хос чекланишни юзага келтиради.

Юқорида айтилдики, -*ган* аффиксли сифатдош шаклидан -ча аффикси ёрдамида ясалган сўз шакли баъзи ишларда равишдош шакли хисобланади, унинг таркибидағи -*ганча* равишдош ясовчи аффикс (бир морфема) деб қаралади. Аслида бундай эмаслиги юқорида кўрилган фактлардан ҳам маълум бўлди, деб ўйлаймиз. Лекин шундай фикрга келишининг сабаби ҳам йўқ эмас.

-*ча* аффикси билан ясаладиган бошка нокатегориал сўз шаклларида бўлгани каби, *югурганча, тикилганча* типидаги сўз шаклида ҳам унинг маъноси шакл яалиш асоси (*югурган, тикилгин*) билан -ча морфемасининг маъноси асосида юзага келади. Бунда мазкур нокатегориал

шаклдаги феъл билдирган ҳаракатнинг бажарилиш ҳолатида, шу ҳолат давомида шу сўз шакли боғланган феъл билдирган ҳаракатнинг бажарилиши ифодаланади: *Қариялар ҳам гулдор қизит үўлгарни бармоқларига қистириб олганча лагмонни шаштаҳа билан ея бошлади* (Т. Малик). Бу хусусият мазкур сўз шаклининг ғанча қисмини бир аффикс (кўшма аффикс)дек тасаввур этишга, сўз шаклининг ўзини эса равишдош шакли деб карашга сабаб бўлган. Лекин бу сўз шакли равишдошнинг барча шаклларидан тубдан фарқланади. Бу ҳақда қўйидагиларни айтиш мумкин: биринчидан, *югурганча, тикилганча* типидаги сўз шакли шакл ясалиш асоси (*югурган, тикилган*) ва -ча морфемасидан иборат таркибий қисмга эгалигининг – шундай қисмларга бўлнишининг (*тиклиган+ча* каби) ўзиёқ бу шаклда -ганча морфемаси йўқлигини билдиради; иккинчидан, бундай нокатегориал сўз шакли таркибида, яъни шакл ясалиш асоси билан -ча аффикси ўртасида кўплик ва эгалик аффикси кўлланиши мумкин: ...*кеҳса аёлнинг зарб билан келаётганини қўриб, шошилганларича йўл беришарди.* (Ў.Умарбеков) Кўлларини қовуштирганича Анварга орқа қилиб турди. (Т. Малик); учинчидан, бундай сўз шакли таркибидаги -ча морфемаси ўрнида ҳолда, кўйи каби кўмакчилар кўлланиши мумкин: *қўлларини қовуштирганича – қўлларини қовуштиргани ҳолда...* Ана шу уч фактнинг ўзиёқ ўзбек тилида равишдош шаклини ясовчи -ганча морфемаси йўқлигини, -ча эса -ган аффиксли сўз шаклидан нокатегориал сўз шаклини ясовчи мустақил морфема эканини тасдиқлайди.

Кўйидаги мисолларда яна бир эътиборга лойик ҳодиса кузатилади: *Бу Зелихон учун муаммолигича ҳолди* (Т. Малик). *Вой болам, юпунлигингча қолавердинги?* (Т. Малик). Кўриниб турибдик, .муаммо ва юпун сўzlари ҳам ҳолат билдиради. Уларнинг -лик аффиксли шакли нокатегориал шакл ясалиши учун асос вазифасида кўлланади. -ча аффикси шу асосдан ҳолат муносабатини ифодаловчи нокатегориал сўз шаклини ҳосил қиласи. Шунинг учун ҳам бундай шакллардаги -ча морфемаси ўрнида ҳол(да) кўмакчисини қўллаш мумкин бўлади: *муаммолигича – муаммо ҳолича (муаммо ҳолида); юпунлигингча – юпун ҳолингча (юпун ҳолда).* Лекин бундай шакллар жуда кам сўzlардангина ясалади, яъни нокатегориал шакл ясалишидаги чекланыш бу нокатегориал шакл ясалишида ҳам бор.

-ча морфемаси сон туркумига мансуб сўзнинг -та аффиксли турига (дона сон турига) бирикканда, микдорнинг тахминийлиги, “ноаник миқдор”, “чама” маъноси ифодаланишини кўрдик: *ўнтача,*

юзтача... Бу ходиса, яъни тахминий миқдор (тахминий даражада) ифодаланиши -ча аффиксининг -ган аффиксли сифатдош шаклига бириншидан ҳосил бўладиган нокатегориал сўз шаклида ҳам кузатилади. Масалан, *билиганингча айтиб бер* гапидаги *билиганингча* шакли билишнинг ноаник даражасини, яъни “канча билсанг, шуларни”, “билиганинг кадар” деган маънони англатади. Куйидаги мисолларга эътибор беринг: *Демак, ҳамма эплаганича юлиб олади бу неъматни* (Т. Малик). *Мана сенга олам-олам гул, этагингга сиққанича ол* (Х. Олимжон). *Сени одам бўлур, деб ўйладим, муҳтожсларни қўлимдан келганича суядими* (Т. Малик). Бу мисолларда ҳам эплаганича, сиққанича, қўлимдан келганича сўз шакллари “канча эпласа, шунча”, “канча сиғса, шунча”, “канчалик қўлимдан келса, шунча” деган маънони билдиради. Бундай маънонинг ифодаланишида феълнинг семантикаси ҳам роль ўйнайди, яъни маълум семантик хусусиятга эга бўлган феълларнинг -ган аффиксли сифатдош шаклидангина -ча аффикси билан нокатегориал сўз шакли ясаш мумкин бўлади. Демак, бу типдаги нокатегориал сўз шакллари ясалишида ҳам маълум чекланиш мавжуд. Бундай нокатегориал шакллардаги -ча морфемаси қадар кўмакчиси билан маънодош бўлади.

Хуллас, -ча морфемасининг -ган аффиксли сифатдош шаклига бириншидан ҳосил бўладиган сўз шакли нокатегориал шаклларга хос умумий белги-хусусиятларга эга, яъни: 1) бу шакл феълнинг муайян шаклидан ҳосил қилинади; 2) бу шакл шакл ясалиш асоси (-ган аффиксли сифатдош) ва -ча аффиксидан таркиб топган; 3) шакл ясалиш асоси феълга хос ҳаракатни ҳолат (мавжуд ҳолат) тарзида ифодалайди. Шу нарса унга -ча аффиксининг биринши учун имконият бўлади; 4) шакл ясалиш асоси ва феъл семантикасига хос хусусиятлар -ча аффиксининг нокатегориал шакл ясаш имкониятини чеклаб қўяди, ҳатто бундай шакл ясалиши санокли сўзлар доирасидагина мумкин бўлади; 5) бу нокатегориал сўз шаклларида қўлланган шахс кўрсаткичлари шахс-сон кўрсаткичлари бўлмайди, чунки бу шакл феъл туркумига мансуб шакл ҳисобланмайди.

Категориал ва нокатегориал сўз шакллари ҳақида фикр юритилганида, бир масалага – категориал ва нокатегориал шаклнинг ўзаро муносабати масаласига, аниқроғи, нокатегориал шаклнинг категориал шаклга айланиши масаласига тўхтамаслик мумкин эмас. Ка-

тегориал шакл ясовчи баъзи морфемалар ҳам худди шу ҳодиса ту-файли юзага келган.

От туркумига мансуб категориал шакллардан нокатеториал шакл ясалиши таҳлил этилганда кўрдикки, ҳозирги ўзбек тилида -ничи морфемаси билан ясаладиган *мактабники* типидаги категориал сўз шакли қараткич келишиги асосида ясаладиган нокатеториал сўз шакли бўлган. Бу шаклининг категориал шаклга айланиши билан янги морфема -ничи морфемаси юзага келган. Бундай ҳодиса феълнинг категориал шаклларидан ясалган нокатеториал шаклларнинг категориал шаклга айланишида кўпроқ кузатилади. Ҳозирги ўзбек тилидаги -гунча морфемаси билан ясалувчи равишдош шаклининг ҳамда ушбу морфеманинг пайдо бўлиши бунга яққол мисол бўла олади.

Ҳозирги ўзбек тилида -гунча – равишдош шаклини ясовчи морфема эканлиги адабиётларда қайд этилган, бунга шубҳа йўқ. Лекин, шу билан бирга, *келгунча, етгунча, қайтгунча* феъл шаклида -ча морфемасига хос маъно, хусусият сезилиб туради. Бундай сўз шаклидаги -ча ни қадар кўмакчиси билан алмаштириш мумкинлиги ҳам бу сўз шаклининг аслида нокатеториал шакл бўлганлигига ишорадир.

-гунча аффиксли феъл шаклининг ҳозирги ўзбек тилидаги бошқа равишдош шаклларидан фарқли хусусиятини аниқ белгилаш учун унинг асли қандай моҳиятли сўз шакли бўлганлигини аниқлаш ва шу асосда иш кўриш тўгри хulosага келиш имконини беради.

Проф. А.М. Шчербак ўзбек тили грамматикасига багишлиланган асарида *ўлгучча* (*ўлгунча*), *тонг отгунча*, *куйдирмагунча* шаклларини “чегара”, “чеклаш” шакли, -ча ни эса шу шаклни ясовчи деб карайди ва бу шакллар ишнинг “чегара шакли”га (“чегара келишиги”га) багишлиланган қисмида берилади¹. Лекин, биринчидан, бу шаклни от туркумига хос сўз шакли ҳисоблаш мумкин эмас. Чунки у от туркумига мансуб сўздан эмас, балки феълнинг сифатдош шаклидан ясалади. Иккинчидан, *уйгача* ва *ўлгунча* типидаги сўз шаклларини чегара, чеклаш маъноли сўз шакли дейиш мумкин эмас. Учинчидан, *уйгача* ва *ўлгунча* шаклларининг шакл ясалиш асоси бир-биридан фарқли тил бирликлари бўлишининг ўзиёқ бу шакллар бир хил маъно ва вазифага эга бўлмаслигини, моҳиятан ўзаро фарқли тил

¹ Щербак А.М. Грамматика староузбекского языка. М.-Л.: 1962. -С.110.

бирликлари бўлишини кўрсатади. Тўртингидан, *уйгача*, *ўлгунча* сўз шаклларининг ясалиш асоси бир-биридан фарқли бирликлар бўлганидан, ўзбек тили тараққиётида уларнинг ҳар бирида ўзига хос ўзгаришлар юз берган. Масалан, *уйгача* сўз шакли тарихан ва ҳозир ҳам *уйга+ча* таркибига эга бўлган нокатегориал сўз шакли ҳисобланса, *ўлгунча* шаклида бутунлай бошкacha ўзгариш юз берган, яъни асли нокатегориал шакл бўлган шакл категориал шаклга – ра-вишдош шаклига айланган.

Ғ. Абдурахмонов ва Ш. Шукуровнинг ўзбек тили тарихий грамматикасига багишланган ишида -*гу/-гу/-қу/-қу* аффикси билан ясалувчи сўз шакли ҳақида қўйидагилар айтилади: "... бу формани ҳаракат номи формалари группасига шартли киритиш мумкин. Чунки бу формада сифатдошга хос бўлган грамматик белгилар ҳам мавжуд"... "Бу даврларда (XV аср ва ундан кейинги даврларда – А.Х.) ...асосан келаси замон феълини ҳосил қилишда иштирок этган"¹. Ишда бу аффикснинг келаси замон феъли ясами айтилган ва мисоллар билан тасдиқланган².

-*гу* морфемасининг аслида ҳаракат номи ёки сифатдош шаклини ясовчи бўлганини исботлаш бизнинг вазифамизга кирмайди. Лекин -*ған* морфемасининг сифатдош шакли экани, у билан ясалган сифатдош ўтган замон маъносига эгалиги ҳамда -*ча* аффикси ундан нокатегориал сўз шаклини ясами -*гу* морфемасининг ҳам аслида шакл ясовчи бўлганидан, -*ған* морфемасидан фарқли ҳолда, келаси замон сифатдош шаклини ясаганлигидан, -*ча* аффикси унинг нокатегориал сўз шаклини ясаганлигидан далолат беради. Буни ҳозирги ўзбек тилида -*гунча* морфемаси билан ясалувчи равишдош шаклига хос бўлган баъзи хусусиятлар ҳам тасдиқлайди. Мисол: *Бу бемалолхўжса ўйлаб ўйига етгунча жиноятчи ишини битириб бўлади*. (Т. Малик). *Юринглар, машина камтирини ташлаб кетгунча қирга чиқиб тушибиз* (И. Раҳим). Иккала мисолдаги -*гунча* аффиксли сўз шакли билдириган ҳаракат хали бажарилмаган, энди (бундан кейин) амалга ошадиган ҳаракатдир. Бундай ҳаракатни билдириш келаси замон феъл шаклига хос хусусиятдир (Келаси замон феъл шакли ҳаракатнинг нутқ пайтидан **кейин** бажарилишини билдиради). Қолаверса, -*гунча*

¹ Абдурахмонов Ғ., Шукуров Ш. Юкорида келтирилган грамматика. 119-120-б.

² Шу иш, 180-181-б.

аффиксли равишдош шаклида ҳали -ча аффиксига хос ‘чегара’ маъноси сезилиб туради: *келгунча* – *келгунга қадар*, *ниигунча* – *ниигунга қадар*.

Юқорида айтилганлар ва келтирилган мисоллардан *келгунча* шакли асли нокатериоал шакл бўлганлиги ойдинлашиб колди. Бу жараёнда юз берган икки ҳодисага эътибор каратиб, унинг сабаби аникланса, ҳакиқатда ҳам шундай бўлганлиги маълум бўлади: 1) *кел+гун+ча* шакли таркибидаги “гун”нинг -ча морфемаси билан бирикиши, аникроги, *келгун* типидаги феъл шаклининг истеъмолдан чиқиши; 2) ҳозирда ҳам -гун билан -ча ўртасида кўплик ва эгалик шакли кўрсаткичларининг кўлланиши ва бунинг сабаби.

Тарихан феълнинг -гун¹ морфемаси билан ясалувчи сифатдош шакли истеъмолдан чиққач, ундан -ча морфемаси ёрдамида ясаладиган нокатериоал шаклнинг таркибида ва моҳиятида ўзгариш юз беради, яъни бу шаклда морфологик қайта бўлиниш юз беради – *кел-гун+ча* сўз шакли *кел+гунча* таркибига эга бўлади ва у моҳиятан категориоал шаклга, яъни феълнинг туркумлик маъноси асосида (феълнинг шаклсиз ҳолатидан) ясалувчи шаклга айланади. Шу тариқа феълнинг равишдош шаклини ясовчи -гунча морфемаси пайдо бўлади. *кел+гунча* нокатериоал шаклнинг кўлланишида муайян чекланишлар бўлганини кўрдик. У категориоал сўз шаклига (равишдош шаклига) айлангач, бундай чекланишлар ҳам бархам топади – бу ҳам қонуний хол.

Хар кандай қўшма аффикс бир бутун, ажралмас тил бирлиги бўлиши боис уни хосил қилган қисмлари ўртасида бошқа бир морфема кўлланмайди. -гунча аффиксли равишдош шаклида эса -гун билан -ча ўртасида кўплик ва эгалик кўрсаткичларининг кўлланиши кузатилади: *келгунларича* <*келгун+лар+и+ча*>. Бунинг сабаби, бизнингча, нокатериоал шаклдаги кўлланиш ҳолатининг сақланиши деб қаралиши мумкин. Қолаверса, -гунча морфемаси таркибида гун мустақил тил бирлиги, яъни морфема эмас, шунингдек, *келгунларича* шаклида унинг *келгун* қисми ҳам сўз шакли эмас, ҳозирги ўзбек тилида бундай сўз шакли йўқ. Демак, бундай кўлланиш ҳозирги ўзбек тилидаги бу сўз шаклини нокатериоал сўз шакли ҳисоблаш учун асос бўла олмайди.

¹ F. Абдурахмонов, Ш. Шукуровларнинг кўрсатишича, -гун морфемаси таркибидаги н орттирилган ундош. Ўша асар, 132-б.

Маълум бўлдики, тарихан феълнинг ҳаракат номи ва сифатдош шаклларига эга бўлган -гу(н) аффиксли сўз шаклиниг истеъмолдан чикиши натижасида унинг таркибидаги -гу(н) ҳам ўз моҳиятини – сўз шаклини ясовчи морфемалик вазифасини йўқотган ва истеъмолдан чиққан. Бу шакл -ча аффикси билан ясалувчи шаклнинг асоси (шакл ясалиш асоси) бўлгани учун мазкур шаклнинг таркибидаги гун сақланиб қолган (-ча аффиксининг феълнинг шаклсиз ҳолатига бирика олмаслиги шундай бўлишини тақозо этган). Морфологик қайта бўлинишда ҳеч қандай маъно ва вазифага эга бўлмаган гун «морфемаси» -ча аффикси “томонига ўтган”, натижада моҳиятан янги бирлик -гунча морфемаси юзага келган (Лекин у кўшма морфема эмас, чунки ҳозирги ўзбек тилида -гун морфемаси йўқ).

Нокатегориал шаклнинг категориал шаклга айланиши ходисаси феъл туркумida кўпроқ кузатилиши юқорида айтилди. Мисол сифатида яна -моқда ва -моқчи морфемалари билан ясалувчи феъл шаклларини келтириш мумкин.

-моқда аффикси билан ясалувчи ҳозирги замон феъл шакли аслида нокатегориал шакл бўлган, яъни у -моқ аффиксли ҳаракат номи шаклига ўрин-пайт келишиги шаклини ясовчи -ди аффиксининг бириқувидан ҳосил бўлган нокатегориал сўз шакли бўлган (Унинг от туркумига мансуб келишик шаклини ясовчи -да аффиксига эгалигининг ўзиёқ бу шаклнинг феъл туркумига мансуб бўлмаганлигини – нокатегориал шакл бўлганлигини кўрсатади). -моқ аффиксли ҳаракат номи шакли ва ўрин-пайт келишиги шаклига ҳос кичик бир белги улар асосида нокатегориал шакл ҳосил қилинишига имкон бўлган. Эътибор беринг: *Келмоғида мактабидан бир ўғи тўхта, дебон иккичии ту́сди йўл* (Ҳамза Ҳакимзода Ниёзий). *Келмоғида – келаётганида*. Демак, *келмоқ* феъл шаклнинг нокатегориал шакл ясалиш асоси вазифасида бўлиши ва ундан пайт маъноли -да аффикси билан нокатегориал шаклга ҳос маънони ифодалаш имконини берган. Лекин -моқ аффикси билан ясалувчи ҳаракат номи шаклнинг ясалиши ва қўлланиши, шунингдек, бу шаклнинг ўрин-пайт келишиги шаклида қўлланиши ўзбек тили учун меъёрий ҳолат бўлмагани сабабли бу нокатегориал шаклнинг қўлланиши давом этмаган. Лекин бу шакл асосида *келмоқда* типидаги категориал сўз шакли ҳамда бу шаклни

ясовчи *-моқда* морфемаси юзага келган ва у ҳозирги замон феълининг бошқа шаклларидан ўзига хос хусусиятлари билан фарқланувчи шакл сифатида истеъмолда давом этяпти. Бу морфемани қўшма морфема (қўшма аффикс) хисоблаш мумкин. Чунки унинг таркибий қисмлари истеъмолдан чиққан эмас¹.

Ҳозирги ўзбек тилида *-моқчи* аффикси билан ясаладиган *келмоқчи* типидаги сўз шакли ҳам аслида нокатегориал шакл бўлган, яъни унинг *-моқ* аффиксли ҳаракат номи шаклига *-чи* аффикси қўшилуви билан ясалганлиги сезилиб турибди. Бундай ясалиш, яъни сўз шаклидан сўз шакли ясалиши нокатегориал шаклга хос хусусиятдир. Лекин ўзбек тили тарихига оид ишларда бу ҳақда аник маълумот учрамайди. F. Абдураҳмонов ва Ш. Шукуроннинг юқорида келтирилган ишида ҳам бундай сўз шакли ҳақида ҳеч қандай гап йўқ. Фақат А.М. Щербак феълининг *-моқ* аффиксли ҳаракат номи шаклига *-чи* аффиксининг бирикувидан ҳосил бўлган “бажарувчи шахс” маъноли сўз шакли қўшимча тарздаги “мақсад” маъносига, шундай маъно оттенкасига эга бўлишини айтади ва *отланмақчи* эдук мисолини келтиради².

Ҳозирги ўзбек тили нуқтаи назаридан *-моқ* аффиксли ҳаракат номи шаклига “шахе” маъноли *-чи* аффиксининг бирикишидан нокатегориал шакл ясалишини, ясалганлигини исботлаб бўлмайди. Чунки, биринчидан, ўзбек тилида *-чи* морфемасининг *-моқ* аффиксли ҳаракат номи шаклига бирикиши қузатилмайди. Иккинчидан, *-чи* морфемаси мақсад, истак маъносига, маъно оттенкасига эга эмас. Лекин нокатегориал шакллардаги асос бирликларга (шакл ясалиш асосларига) ва унга қўшилиб нокатегориал шакл ясовчи морфемаларнинг моҳиятидан келиб чиқилса (бу белги-хусусиятларни юқорида кўрдик), *-моқчи* аффикси билан ясалувчи ҳозирги шаклнинг (категориал шаклнинг) келиб чиқишини, унинг мақсад маъносини ифодалаш сабабини асослаш мумкин.

Юқорида кўрдикки, нокатегориал шакллардаги асос шаклларнинг барчаси чекланган бир белгиси билан шу вазифада қўлланади. Ясовчи морфемаси эса унинг ана шу моҳияти асосида нокатегориал шаклни

¹ *-моқда* аффиксининг келиб чиқиши, маъноси ва ўзига хос хусусиятлари ҳакида маҳсус маколамиизда, номзодлик диссертациямизда фикр билдирилган: Ҳожиев А. Ўзбек тилида *-моқда* аффикси / Ўзбек тили ва адабиёти масалалари, 1958. 4-сон; Ҳожиев А. Ўзбек тилида ҳозирги замон феъли. Филол. фан. номз. дис.: Тошкент: 1959.

² Щербак А.М. Ўша асар, 124-б.

хосил қиласи. Бу ясалишда ясовчи морфеманинг маъноси ҳам конкретлашади. *Кел+моқ+чи* шаклининг мақсад (истак) оттенкасига эга бўлиши ҳам шу ходиса билан изоҳланади, асосланади ва бу оттенка *келмоқчи* феъл шаклининг мустақил маъносига айланади, *келмоқчи* сўз шакли *кел+моқчи* таркибига эга бўлгач, *-моқчи* мақсад маъноли феъл шаклини ясовчи морфема деб қаралади, шу тариқа янги *-моқчи* морфемаси юзага келади.

Бу қисмда баён қилинган фикрларни куйидагича умумлаштириш мумкин:

1. Морфологик сатхнинг тил бирлиги сўз шаклидир. Ҳар қандай сўз шакли эса шакл ясовчи морфема билан хосил қилинади. Демак, морфологик тил бирлиги (сўз шакли) ясалма бирлик бўлади.

2. Ясалма бирлик сифатида ҳар қандай сўз шакли таркибий қисмлардан ташкил топади. Бу таркиб шакл ясалиш асоси ва шакл ясовчидан иборат бўлади: *китоблар* (*китоб* – шакл ясалиш асоси, *-лар* – кўплик шаклини ясовчи морфема). Ана шундай таркибига эга бўлмаган тил бирлиги морфологик бирлик ҳисобланмайди – морфологик категорияга бетараф бирлик бўлади. Буларни “ноль кўрсаткичли шакл” деб ҳисоблаш ҳам мумкин эмас.

3. Сўз шакли, кўрсаткичли ёки кўрсаткичсиз бўлишидан қатъи назар, морфологик бирлик ҳисобланади, ўз маъносига эга бўлади ҳамда муайян парадигмага мансуб бўлади. Масалан, *келдим* – *келдинг* – *келди* парадигмасида учинчи шахс шахе кўрсаткичига эга эмас, лекин учинчи шахс маъноси ифодаланади. Шу боис уни парадигмага нейтрал муносабатли бирлик ҳисоблаш мумкин эмас.

4. Ҳар қандай сўз шакли ўз маъносига эга бўлади (шаклсиз маъно, маъносиз шакл бўлмайди). Шунга кўра отнинг “бош келишик”, “бирлик сон” деб қаралаётган “шакл”лари, феълнинг “бош нисбат”, “бўлишли шакл” деб қаралаётган “шакл”лари сўз шакли бўла олмайди. Улар морфологик категорияларга, парадигмаларга бетараф тил бирликлариdir. Тилда шундай тил бирликларининг бўлиши қонуний ҳол бўлиб, улар тил амалиётида ўзига хос имкониятлари билан муҳим аҳамият касб этади.

5. “Бош келишик”, “бирлик сон” деб юритилаётган тил бирликлари ‘туркумлик’ маъноси билан от туркумига, “бош нисбат”, “бўлишли шакл” деб юритилаётган тил бирликлари ‘туркумлик’ маъноси билан феъл туркумига мансуб бўлади. Ана шу хусусиятнинг ўзи (муайян

сўз туркумига мансублик) уларнинг категориаллик белгисидир. Лекин бу белги морфологик белги эмас. Шу боис уларнинг ҳар бирига хос хусусиятлар ўзлари мансуб бўлган туркум доирасида ёритилади, ўрганилади.

6. Сўз шакли ясалишида асос (сўз ясалиш асоси) вазифасида сўз (сўзнинг шаклсиз ҳолати) ёки сўз шакли кўлланиши мумкин. Шунга кўра сўз шаклининг икки тури фарқланади, яъни биринчи ҳолатда категориал шакл, иккинчисида нокатегориал шакл ҳосил бўлади: *мактабга* (*мактаб+га*) – категориал шакл; *мактабгача* (*мактабга+ча*) – нокатегориал шакл.

7. Муайян сўз туркумига мансуб сўзнинг туркумлик маъноси асосида ясалувчи шакллар, парадигма ҳосил қилиш-қилмаслигидан қатъи назар, категориал шакл ҳисобланади. Масалан, отнинг -лар аффикси билан ясалувчи кўплик шакли (*татабалар*) ва -ники аффикси билан ясаладиган қарашлилик шакли (*татабаники*), феълнинг -ма аффикси билан ясаладиган бўлишеизлик шакли (*кетма*) категориал шакллардир.

8. От туркумига мансуб категориал сўз шаклларидан -ча, -ги аффикси ёрдамида нокатегориал сўз шакли ясалади. Бу шаклларнинг асоси вазифасида -лар аффиксли кўплик шакли, эгалик шакли ҳамда жўналиш ва ўрин келишиги шакллари кўлланади: *оталарча* < *оталар+ча*, (*менинг*) *фикримча* < *фикрим+ча*, *уйгача* < *уйга+ча*, *уйдаги* < *уйда+ги*, *куздаги* < *кузда+ги*. Бу шакллардан ҳар бирининг мохияти шакл ясалиш асоси ва -ча, -ги аффиксига хос маъно асосида воқеланади.

9. Шакл ясалиш асоси вазифасидаги сўз шакли мустақил бирлик бўлмаслиги, яъни нокатегориал шаклнинг ясалиш асоси (таркибий қисми) бўлиши сабабли у категориал шаклга хос барча хусусиятларга эга бўлмайди, бундай хусусиятларни ўзида саклмайди, балки шу шаклга хос муайян мохияти, белгиси билан нокатегориал шакл ясалиш асоси вазифасида кўллана олади. Шу сабабли ҳар қандай нокатегориал шаклнинг кўлланиши унга асос бўлган категориал шаклнинг кўлланишига нисбатан у ёки бу даражада чекланган бўлади. Масалан, *оталарча*, *дўстларча*, *уйгача* типидаги нокатегориал сўз шаклларнинг кўлланиши кўплик ва жўналиш келишиги шаклларининг (категориал шаклларнинг) кўлланишига нисбатан чекланган.

10. Нокатегориал шакл ясовчи морфемаларнинг баъзилари

күмакчилар билан маънодош, вазифадош бўлади. Бу факт ҳам улар билан ясаладиган шаклларнинг категориал шакл бўла олмаслигини тасдиқлайди.

11. Категориал шаклдан нокатегориал шакл ясалиш деган гап бунда шакл ўзгариши ҳодисаси юз беради, яъни моҳияти шундан иборат, деган тасаввур беради. Бу эса мазкур ҳодисанинг “шакл ўзгариши” ҳодисаси хисоблаш мумкин, деган холосага олиб келиши мумкин. Лекин ҳодисанинг моҳияти шакл ўзгариши эмас, балки морфологик системага мансуб бўлмаган тил бирлигининг (сўз шаклининг) юзага келишидир. Нокатегориал шакл асосининг ҳам шакл ясалиш асоси ва шакл ясовчидан иборат бўлиши, яъни сўз шакли кўринишида бўлиши унга нокатегориал шакл ясовчи бирикиши билан шакл ўзгариши юз бергандек, категориал шакл нокатегориал шаклга айлангандек, яъни шакл ўзгараётгандек туюлади. Аслида эса бундай эмас. Чунки, масалан, *уйғача* шаклидаги *-ға* морфемаси шаклан жўналиш келишигига teng бўлса-да, шакл ясалиш асоси сифатида уни жўналиш келишиги шакли хисоблаш, унга *-ча* аффикси кўшилиши билан жўналиш келишиги шакли ‘чегара’ маъноли нокатегориал шаклга айланади, деб тушуниш тўгри бўлмайди. Демак, *уйғача* шаклининг *уйға* кисми моҳияттан жўналиш келишигига teng бирлик эмас ва *-ча* аффикси-нинг бирикиши билан унинг шаклида ҳам, моҳиятида ҳам ўзгариш бўлаётганий йўқ. Шу боис нокатегориал сўз ясалиш ҳодисасига нисбатан “ўзгариш” сўзини, “шакл ўзгариши” сўз бирикмасини қўллаб бўлмайди, бу сўз ва сўз бирикмаси ҳодисанинг моҳиятини қайд эта олмайди (Барча нокатегориал сўз шаклларида шундай, яъни нокатегориал шакл ясалиши билан шакл ясалиш асоси ва шакл ясовчининг моҳиятида хеч қандай ўзгариш бўлмайди, аксинча, ҳар қандай нокатегориал сўз шаклининг моҳияти шакл ясалиш асоси ва шакл ясовчининг моҳияти асосида шаклланади).

12. Маълум бир мазмунли синтактик муносабатни ифодаловчи тил бирлиги бўлиши асосида нокатегориал шаклларни “синтактик шакллар” деб юритиш, яъни ўрни билан шу сўз бирикмасини термин сифатида қўллаш мумкин.

13. Нокатегориал сўз шаклининг категориал шаклга айланиши ҳодисаси билан янги морфеманинг, асосан, қўшма морфеманинг келиб чиқиши кўрсатадики, бунда икки морфеманинг ўзаро бирикиши

эмас, балки шакл ясалиш асоси ва шакл ясовчидан таркиб топган но-категориал шаклнинг категориал шаклга айланиши натижасида шакл ясалиш асосидаги шакл кўрсаткичи билан нокатегориал шаклнинг кўрсаткичи бир морфемага айланиши ҳодисаси юз беради (Мустакил қўлланмайдиган тил бирликларининг, жумладан, морфемаларнинг ўзаро бирикиши ва шу йўл билан қўшма морфема юзага келиши хақида гап бўлиши мумкин эмас).

МУНДАРИЖА

СЎЗБОШИ	3
КИРИШ	5
Лисон ва нутқ.....	5
<i>Тил бирлиги, тил қурилиши, тил сатҳи (босқичи), тузилиши (структурда), тил системаси терминлари ҳақида.....</i>	9
Тил бирликларининг таснифи.....	17
Тилнинг системалари ҳақида умумий маълумот.....	21
БИРИНЧИ ҚИСМ	23
МОРФЕМ САТҲ. ТИЛ БИРЛИГИ – МОРФЕМА	23
Ўзбек тилшунослигига морфеманинг	
ўрганилиш тарихидан.....	23
Морфеманинг моҳияти.....	36
Морфемаларнинг ифода жиҳатига кўра турлари.....	42
Морфема қўшиладиган қисмнинг моҳияти.....	48
«Ноль морфема» масаласи.....	50
«Морфем система» масаласи.....	52
Морфемаларда полисемия, синонимия, антонимия каби ҳодисалармасаласи.....	59
Морфем сатҳнинг ривожланиши.....	67
ИККИНЧИ ҚИСМ	72
ЛЕКСИК СИСТЕМА. ТИЛ БИРЛИГИ - СЎЗ (ЛЕКСЕМА)	72
Сўз ва лексема.....	72
<i>Лексема</i> термини ҳақида.....	73
Лексик маъно ва тушунча.....	79
Лексеманинг семантик таркиби.....	80
Вазифа семаси.....	81
«Туркумлик семаси» масаласи.....	88
Лексиксистемаларнинг шаклланиши.....	100
Лексик-семантик гурух ва лексик парадигма.....	101
Лексик парадигмалар.....	103
Синоним лексемалар гурухи.....	122
Антоним лексемалар жуфтлиги (гурухи).....	131

УЧИНЧИ ҚИСМ	139
СҮЗ ЯСАЛИШИ СИСТЕМАСИ. ТИЛ	
БИРЛИГИ – ЯСАМА СҮЗ	139
Ўзбек тили сўз ясалишининг ўрганилиши.....	139
Сўз ясалиши системаси	141
Ясама сўз – лисоний бирлик.....	143
Ясама сўз – лексик системанинг тил бирлиги.....	144
Ясама сўз – сўз ясалиши системасининг тил бирлиги.....	149
<i>Сўз ясалиши маъноси термини.....</i>	150
<i>Сўз ясалиши тики термини.....</i>	154
<i>Сўз ясалиши парадигмаси (категорияси) термини.....</i>	160
<i>Маҳсулли ва маҳсулсизлик термини.....</i>	165
<i>Сўз ясалиши имконияти термини.....</i>	169
Сўз туркумларида сўз ясалиши масаласи.....	172
ТҮРТИНЧИ ҚИСМ	180
МОРФОЛОГИК СИСТЕМА. ТИЛ	
БИРЛИГИ – СҮЗ ШАКЛИ	180
Синтетик шакллар.....	180
Сўз шаклининг таркиби.....	181
Бетараф тил бирлиги ва ноль кўрсаткичли шакл.....	185
Категориал ва нокатегориал сўз шакллари.....	214
Категориал сўз шакли.....	215
Нокатегориал сўз шакли.....	218

811.512.133

81.2Ўзб

Х 59

Ҳожиев, Азим.

Ўзбек тили морфологияси, морфемикаси ва сўз ясалишининг назарий масалалари / А.Ҳожиев; масъул мухаррир Н.Махмудов. —Т.: Фан, 2010. —256 б.

УДК 811.512.133

ББК 81. 2Ўзб.

Ўзбекистон Республикаси Фанлар академияси Алишер Навоий номидаги Тил ва адабиёт институти Илмий кенгашин томонидан нашрга тавсия этилган

Мухаррир: *P.Киличев*

Тех. мухаррир: *Д.Абдуллаев*

Компьютерда саҳифаловчи: *Д.Жалилов*

Мусаххих: *Ю.Парниева*

Нашриёт лицензияси АI №138, 27.04.2009.

Нашриёт рақами: з-113 . Теришга берилди 03.09.2010.

Босишга руҳсат этилди 20.10.2010. Көғоз бичими: 60x84 $\frac{1}{16}$.

Офсет босма. Офсет көғози. Times гарнитураси.

Ҳисоб-нашриёт т. 10,92. Шартли-босма т. 14,88.

Тиражи 550 нусха. Келишилган нархда.

ЎзР ФА «Фан» нашриёти.

100170, Тошкент, И. Мўминов кўчаси, 9-уй.

ЎзР ФА “Фан” нашриёти оригинал-макети асосида “Мухаррир

нашриёти” матбаа бўлимида босилди. 136-буортма.

100060, Тошкент, Элбек кўчаси, 8-уй.